



Հայկական գիտահետազոտական հանգույց Armenian Research & Academic Repository



Սույն աշխատանքն արտոնագրված է «Ստեղծագործական համայնքներ
ոչ առևտրային իրավասություն 3.0» արտոնագրով

**This work is licensed under a Creative Commons Attribution-NonCommercial
3.0 Unported (CC BY-NC 3.0) license.**

Դու կարող ես.

պատճենել և տարածել նյութը ցանկացած ձևաչափով կամ կրիչով
ձևափոխել կամ օգտագործել առկա նյութը ստեղծելու համար նորը

You are free to:

Share — copy and redistribute the material in any medium or format

Adapt — remix, transform, and build upon the material

9(47.925)

5 - 40



~~63755~~ ահ
64104 ահ

ՀԵՏԻՐ

ՄԱՏԵՆԱԳԻՐՔ



ԵՂԻՇԷ

1000-ԱԶ

9(47.925)

Ե-40

Ե Ղ Ի Շ Ե Ի

38-

ՎԱՐԴԱՊԵՏԻ

ՎԱՍՆ


1008 / 36884

ՎԱՐԴԱՆԱՅ


ԵԻ

ՀԱՅՈՑ ՊԱՏԵՐԱԶՄԻՆ

3724



Ի ՎԵՆԵՏԻԿ



3724

ԵՂԻՇԷԻ

ՎԱՐԴԱՊԵՏԻ

ՎԱՍՆ

ՎԱՐԴԱՆԱՅ

ԵԻ

ՀԱՅՈՑ ՊԱՏԵՐԱԶՄԻՆ

ԴԱԽԹԻ ԵՐԻՑՈՒ ՄԱՄԻԿՈՆԻ

ՀԱՅՑԵԱԼ

ԲԱՆՆ Վասն սրոյ պատուիրեցեր՝
արարի, ո՛վ քաջ. վասն Հայոց պա-
տերազմին հրամայեցեր, յորում
բազումք առաքինացան քան զսա-
կաւս: Ահա նշանագրեցի յայսմ
եօթն յեղանակիս, առաջին զժա-
մանակսն, երկրորդ զերտցն պատա-
հումն յիշխանէն արեւելից, երրորդ
զմիաբանութիւն ուխտին եկեղե-

ցւոյ, չորրորդ զերկպառակուծիւն
 ոմանց բաժանելոց 'ի նմին ուխտէ,
 հինգերորդ զյարձակուումն արեւե-
 լեայց, վեցերորդ զընդդիմանալն
 Հայոց պատերազմաւ, եօթներորդ
 զյերկարուումն իրացն խռովուծեան:

Յայսմ յեօթն գլուխս կարգա-
 գրեալ և եգեալ ծայրալիր պա-
 րապմամբ զսկիզբն և զմիջոցն և
 զկատարածն. զի հանապազորդ ըն-
 թեռնուցուս, լսելով զառաքի-
 նեացն զքաջութիւն և զյետս կա-
 ցելոցն զվասթարութիւն, ոչ յան-
 ձին կարօտութիւն երկրաւոր ա-
 ռատ գիտութեան լրման, այլ այ-
 ցելութիւն երկնաւոր տնտեսու-
 թեանն՝ որ մատակարարէ յառաջ-
 գիտութեամբ զհատուցումն երկո-
 ցունց կողմանցն, որ երեւելեօքն
 զաներեւոյթն գուշակէ:

Այլ դու, ուի մեծ 'ի գիտու-
 թեանն Աստուծոյ, առ ինչ ար-
 դեօք հրամայեսցես, քան եթէ
 հրամայելիս լաւագունացն: Որպէս

երեւի ինձ և քեզ և այնոցիկ որ
 դեգերեցին յիմաստութիւն՝ երկ-
 նաւոր սիրոյ է նշանակս այս, և ոչ
 երկրաւոր փառասիրութեանն. որ
 պէս և ասացին ոմանք 'ի քաջ պատ-
 մադրացն. Զուգութիւն է մայր
 բարեաց, անզուգութիւն ծնող չա-
 րեաց: Որպէս և մեր իսկ հայեցեալ
 'ի սուրբ սէր քոյոյ հրամանիդ, ոչ
 ինչ գանդաղեալ վէհերեցաք հայե-
 ցեալ 'ի մեր ագիտութիւնս: Քան-
 զի բազում ինչ է սրբութիւն՝ սա-
 տար լինել անօրութեան, որպէս
 աղօթք՝ գիտութեան, և սէր սուրբ՝
 միաբան օգտից:

Զոր և մեր ընդ հրամանին քում
 ընկալեալ, յօժարութեամբ ձեռ-
 նարկեցաք զայս ինչ, որ է մխիթա-
 րութիւն սիրելեաց և յոյս յուսա-
 ցելոց, քաջալերութիւն քաջաց,
 կամակարութեամբ յարձակեալ 'ի
 վերայ մահուան, առաջի տեսնե-
 լով զզօրագլուխն յաղթութեան,
 որ ոչ ումք ոտնհար լինի թշնա-

մոռութեամբ, այլ անդ ուսուցանէ զիւր անսպարաւելի զօրութիւնն: Եւ ահա ո՞րք կամեսցի՛ ընդունի իբրև զնահատակ առաքինի: Եւ քանզի բազմադիմի է նահատակութեանդ անուն, և նա բազմադիմի շնորհս բաշխեաց ամենեցուն. զոր և մեծ իսկ քան զամենայն՝ սէր սուրբ յաննենգ մտաց գիտեմք:

Այս սարգուծութիւն զվերնոցն բերէ զնմանութիւն. զոր և մեր 'ի քեզ տեսեալ, մոռացաք զմեր բընութիւնս: Եւ ահա վերաբերիմք ընդ քեզ ճախրելով, և իբրև բարձրաթուիչս եղեալ՝ զամենայն փնասակար մըրկածին օգուքս անցուցանիցեմք. և փոքր 'ի շատէ ծծելով յանապահան վերին օրոցն՝ առնուցումք զգիտութիւն 'ի փրկութիւն անձանց և 'ի փառս ամենայաղթեկեղեցւոյ: Ուստի բազում սուրբ պաշտօնեայքն զուարթութեամբ կատարեսցեն զսպաս վիճակին իւրեանց 'ի փառս Հօրն բոլորեցուն.

ուր ընդ նմին սուրբ Երրորդութիւնն ցնծացեալ բերկրիցի յանտըրամական յիւրում հութեանն:

Արդ որովհետև ընկալաք զհրաման պատուիրանի յաննախանձ քոյսց բարուց բնութեանդ, սկըսցուք ուստի արժան է սկսանել. թէպէտ և ոչ յօժարիցեմք զթըշուառութիւն մերոյ ազգիս ողբալ: Ահա ոչ ըստ կամաց արտօսրալիր ողբովք ճառագրեմք զբազում հարուածս, յորում պատահեցաք և մեք իսկ ահանատեսք լինելով:

ԱՌԱՋԻՆ ՅԵՂԱՆԱԿ

ԺԱՄԱՆԱԿԻՆ

Քանզի 'ի բառնալ աղգին արշա-
կունեաց, աիրեցին աշխարհիս Հա-
յոց աղգն Սասանայ պարսկի, որ
վարէր զիւր իշխանութիւնն օրինօք
մոգաց. և բազում անգամ մարանէր
ընդ այնոսիկ, որ ոչ ընդ նովին օ-
րինօք մտանէին, սկիզբն արարեալ
յամացն Արշակայ արքայի որդւոյն
Տիրանայ, և կռուէր մինչև յամն
վեցերորդ Արտաշիսի արքայի Հա-
յոց, որդւոյն Ստահրաշապէոյ: Եւ
իբրև զնա ևս մերժեաց 'ի Թագա-
ւորութենէն, 'ի նախարարսն Հա-
յոց անկանէր Թագաւորութիւնն.
զի Թէպէտ և գանձն յարքունիս
պարսկաց երթայր, սակայն այրու-
ձին Հայոց բովանդակ 'ի ձեռն նա-
խարարացն առաջնորդէր 'ի պատե-
րազմի: Վասն որոյ և աստուած.

պաշտուածիւնն բարձրագլուխ կամակարուածեամբ երեւելի լինէր յաշխարհին Հայոց՝ ՚ի սկզբան տերուածեանն Շապուղարքայից արքայի մինչև յամս յերկրորդ Յազկերտի արքայից արքայի՝ որդւոյ Վաամայ. զոր եգիտ սատանայ իւր գործակից, և զամենայն մթերեալ թոյնան թափեաց ՚ի բաց, և ելից զնա իբրև զպատկան գարան գեղովք: Եւ սկըսաւ եղջիւր ածել անօրէնուածեամբ, և գուռալով հող հանէր ընդ չորս կողմանս երկրի, և թնամի և հակառակորդ երեւեցուցանէր իւր զհաւատացեալքս ՚ի Քրիստոս, և նեղեալ տագնապէր անխաղաղասէր կենօք:

Քանզի յոյժ սիրելի էր նմա խռովուածիւն, արիւնհեղուածիւն, վասն այնորիկ յանձն իւր տարաբերէր, եթէ յո՞ թափեցից զգառնուածիւն թիւնից, կամ ո՞ւր բացատրեցից զբազմուածիւն նետիցն: Եւ առ յոյժ յիմարուածեան իբրեւ զգաղան

մի կատաղի յարձակեցաւ ՚ի վերայ աշխարհին Յունաց, եհար մինչ ՚ի քաղաքն Մծբին, և զբազում գաւառս Հոռոմոց աւերեաց ասպատակաւ, և զամենայն եկեղեցիս հրձիգ արար. կուտեաց զաւար և զգերի, և ահաբեկ արար զամենայն զօրս աշխարհին:

Իսկ երանելին Թէոդոս կայսր, քանզի խաղաղասէր էր ՚ի Քրիստոս, ոչ կամեցաւ ելանել ընդ առաջ պատերազմաւ. այլ այր մի Անատոլ անուն, որ էր նորա սպարապետ արեւելից, առաքեաց առ նա բազում գանձիւք: Եւ արք պարսիկք, որք փախուցեալ էին վասն քրիստոնէուածեան և էին ՚ի քաղաքին կայսեր, կալաւ և ետ ՚ի ձեռս նորա: Եւ զամենայն զոր ինչ ասաց ՚ի ժամանակին՝ կատարեաց ըստ կամաց նորա, և արգել զնա ՚ի բազում բարկուածենէն. և դարձաւ անդրէն յիւր քաղաքն Տիզոն:

Եւ իբրեւ ետես անօրէն իշխանն,

եթէ յաջողեցաւ չարուծութիւնն նորա, սկսաւ այլ ևս խորհուրդ յաւելուլ, իբր ոք զի 'ի հուր բորբոքեալ յաւելլով բազում նիւթս փայտից: Քանզի ուստի սակաւ մի կասկածոան էր, անտի աներկիւղ հաստատեցաւ. վասն այնորիկ դըրգուէցսյց զբազումս 'ի սուրբ ուխտէն քրիստոնէից, էր՝ զոր բանիւք սպառնալեօք, էր՝ զոր կապանօք և տանջանօք: Էր՝ զոր չարաչար մահուամբ վախճանէր. յափշտակութիւն առնէր ընչից և արարոց, և մեծաւ անարգանօք տանջէր զամենեսեան: Եւ իբրև ետես՝ եթէ վայրատեալ ցրուեցան 'ի բազում կողմանս, 'ի խորհուրդ կոչէր զպաշտօնեայս ձախակողմանն, որք կապեալ էին 'ի կռապաշտութեանն անլուծանելի հանգուցիւք, վառեալք և ջեռեալք իբրև զհնոց առ այրել զուխտ սուրբ եկեղեցւոյ:

Քանզի էին իսկ այնպիսիքն բնակեալ 'ի կեանս իւրեանց իբրև 'ի

Թանձրամած խաւարի, և ոգիքն արգելեալք 'ի մարմնին իբրև զկենդանի 'ի գերեզմանի, յորս ամենեւին չծագէ նշոյլք սուրբ լուսոյն Քրիստոսի: Նա և արջք օրհասականք ընդ վախճանեւ շնչոյն հզօրագոյնք կռուին. յորոց և իմաստունքն տեղի տուեալ փախչին 'ի նոցանէն: Այսպիսի իմն եկեալ հասեալ է վախճան տէրութեանն. եթէ հարկանին՝ չգգան, և եթէ հարկանեն՝ չիմանան. և իբրև ոչ գտանի արտաքին թշնամի, ընդ անձինս իւրեանց մարտ եդեալ կռուին: Ի դէպ իսկ ելանէ բան մարգարէին 'ի վերայ նոցա. Այր, ասէ, առ քաղցի իւրում շրջեսցի և կերիցէ զկէս անձին իւրոյ. նման դմին և Տէրն ինքնին ասէ. Ամենայն տուն և թագաւորութիւն՝ որ յանձն իւր բաժանի, ոչ կարէ կալ հաստատուն:

Արդ զի՞ կոծիս, զի՞ մրցիս, զի՞ այրիս, զի՞ բորբոքիս, զի՞ չչիջանիս, զի՞ կոչես 'ի խորհուրդ զայնոսիկ, որոց

զողինն ձեր 'ի ձէնջ քաղեալ՝ հա-
 նեալ է զանապականդ յապակա-
 նուութիւն, և զապականելի մարմինդ
 գէշաքարչ արարեալ՝ իբրև զազիր
 մեռելոտի 'ի բաց ընկեցեալ: Ապա-
 քէն զայդ կամիս, զի ծածկեսցի
 խորհուրդ ամբարշտուութեանդ. տես-
 ջիր յորժամ յայտնեսցի, ապա գի-
 տասցես զէլս կատարածի դորա:

Ասեն մողքն. Արքայ քաջ, աս-
 տուածքն ետուն քեզ զտէրու-
 թիւնդ և զյաղթուութիւն, և ոչ ինչ
 կարօտեն նոքա մարմնաւոր մեծու-
 թեան, բայց եթէ 'ի մի օրէնս դար-
 ձուցանես զամենայն ազգս և ա-
 զինս, որ են 'ի տէրութեան քում:
 յայնժամ և աշխարհն ՚ճունաց հիս-
 զանդեալ մոցէ ընդ օրինօք քովք:
 Արդ զբանս զյայտսիկ վաղվաղակի
 կատարեա՞ դու, արքայ. զօր գու-
 մարեա և գունդ կաղմեա, խաղա՞
 գնա՞ դու յաշխարհն Քուշանաց. և
 զամենայն ազգս ժողովեա՞ և անցմ
 ըստ պահ դուռն 'ի ներքս. և դու-


անդէն արա քեզ բնակութիւն:
 Յորժամ արգելուս և փակես զա-
 մենեսեան 'ի հեռաւոր օտարու-
 թեան, կատարին խորհուրդք կա-
 մաց քոց. և որպէս երեւիս մեզ 'ի
 դենիս մերում, տիրես դու և երկ-
 րին Քուշանաց, և ՚ճոյնք խկ ոչ ե-
 լանեն ընդ քոյ իշխանութիւնդ:
 Բայց միայն զաղանդ քրիստոնէից
 բարձ 'ի միջոյ:

Հաճոյ թուեցաւ խորհուրդն
 թագաւորին և մեծամեծացն, որ
 էին 'ի նմին բանի. հրովարտակս
 գրէր, պնդարեապանս առաքէր յա-
 մենայն տեղիս տէրութեան իւրոյ:
 Եւ այս է պատճէն հրովարտակին:

Առ ամենայն ազգս տէրութեան
 իմոյ՝ Արեաց և անարեաց, բազմաւ
 ցի 'ի ձեզ ողջոյն մարդասիրութեան
 մերոյ. դուք ողջ լերուք, և մեք
 մեղէն ողջ եմք դիցն օգնականու-
 թեամք:

Առանց զձեզ ինչ աշխատանք-

4272
 373
 1008
 368



լոյ խաղացաք գնացաք յերկիրն Յունաց, և առանց գործոյ պատե-
րազմի՝ սիրով մարդասիրութեամբ նուաճեցաք զամենայն երկիրն մեզ
'ի ծառայութիւնս. դուք զբարի զմը տաւ
ածէք, և անսպառ լերուք յուրախութեանս. բայց բան զայս
կատարեցէք վաղվաղակի, զոր ա-
սեմքս: Մէք 'ի մտի եգաք անվրէպ
խորհրդովք խաղալ գնալ յաշխարհն
արեւելից, աստուածոցն օգնականութեամբ
դարձուցանել 'ի մեզ զտէրութիւնն
'Քուշանաց. դուք իբրեւ զհրովարտակս
զայս տեսանէք, անխափան վաղվաղակի
այրեւ ձի դումարեցէք առաջի քան զիս,
յանդիման լերուք ինձ յԱպար աշխարհին:

Ըստ այսմ պատճենի հրովարտակ
եհաս յաշխարհն Հայոց, 'ի Վրաց
և յԱղուանից և 'ի Լինաց, 'ի Մաւ-
դէից և 'ի Կորդուաց, յԱղձնեաց և
բազում այլ տեղեաց հեռաւորաց,

որոց ոչ էին օրէնք երթալ զայն
ճանապարհ յառաջ ժամանակաւ:
Գունդ կազմեր 'ի Հայոց մեծաց
զազատ և զազատորդի, և յարքու-
նի տանէ զոստանիկ մարդիկ. ըստ
նմին օրինակի 'ի Վրաց և յԱղուա-
նից և յաշխարհն Լինաց, և որ
այլ ևս 'ի կողմանց կողմանց հարա-
ւոյ, մերձ 'ի սահմանս տաճկաստա-
նի և 'ի Հոռոմոց աշխարհն և 'ի
Կորդուաց և 'ի Գդացն և 'ի Մաւ-
դէիցն և յԱրզնարզիւն. որք էին
ամենեքեան հաւատացեալք 'ի մի
կաթողիկէ առաքելական եկեղեցի:

Եւ անմեղութեամբ ոչ գիտա-
ցեալ զերկրիմի միտս թագաւորին,
խաղացին գնացին յիւրաքանչիւր
աշխարհաց լրջմտութեամբ և ան-
տրտում ինդութեամբ և տիրա-
սէր խորհրդովք, կատարեալք զըս-
պաս զինուորութեան աներկբայ
վաստակովք: Բարձին ևս ընդ իւ-
րեանս զաստուածային սուրբ կտա-
կարանս բազում պաշտօնէիւք և

բազմագոյն քահանայիւրք: Բայց հրաման տուեալ աշխարհի՛ ոչ իբրեւ յակնկալուածիւն կենաց, այլ իբրեւ 'ի վճարումն վախճանի. յանձն առնելով միմեանց զողիս և զմարմինս: Ձի թէպէտ և խորհուրդ թագաւորին չէր յայտնեալ նոցա, սակայն կարծիք 'ի մօտի էին ամենեցուն. մանաւանդ իբրեւ բեկեալ տեսին զզօրութիւնն Յունաց առաջի նորա, յոյժ հարեալ խոցեցան 'ի խորհուրդս իւրեանց:

Բայց քանզի պատուիրանապահ էին սուրբ կտակարանացն Աստուծոյ, հանապազ յիշէին զպատուիրեալն 'ի Պաղոսէ, եթէ ծառայք հնազանդ լերուք տերանց ձերոց մարմնաւորաց, մի սուտակասպաք և առ աչս աչառելով, այլ սրախ մըտօք ծառայել իբրեւ Աստուծոյ, և մի իբրեւ մարդկան. քանզի 'ի Տեառնէ է հատուցումն վաստակոց ձերոց: Եւ ամենայնիւ այսու բարեմտութեամբ յուզարկեալք յաշ-

խարհէ և յանձն եղեալք սուրբ Հոգւոյն, յանդիման լինէին, փուլ թով կատարեալ զհրամանն, և զամենայն արարեալ ըստ կամաց նորա: Ոյժ ուրախ լինէր թագաւորն, իբր այն եթէ կատարեցան կամք կարծեաց նորա. և ահա առնէր ընդ նոսա զայն ինչ, զոր պաշտօնեայքն ամբարշտութեան նորա խրատեցին:

Արդ իբրեւ ետես թագաւորն զամենայն կազմութիւն և զբազմութիւն գնդին բարբարոսաց, որք սրտի մտօք եկեալ էին 'ի վաստակ արքունի, առաւելապէս ուրախ եղեւ առաջի մեծամեծացն և ամենայն բազմութեան զօրաց իւրոց: Ի վերին երեսս թաքուցանէր զկամս մըտաց իւրոց, և ակամայ առատապէս պարգեւէր զնոսա: Խաղաց գընաց միանգամայն 'ի վերայ տէրութեան Հոնաց աշխարհին, զոր Քուշնս անուանեն. և զերկեամ' մի կուռեալ, ոչ ինչ կարաց ազդել

նոցա: Ապա արձակեաց զմարդիկսն յիւրաքանչիւր տեղիս, և զայլս 'ի նոցա տեղիս փոխանակ առ իւր կոչեաց նովին պատրաստութեամբ: Այսպէս ամ յամէ սովորութիւն կարգեաց, և իւր անդէն քաղաք բնակութեան շինեաց, սկսեալ 'ի չորրորդ ամէ տէրութեանն իւրոյ մինչև յամն մետասաներորդ թագաւորութեանն:

Եւ իբրեւ ետես՝ եթէ հաստատուն կացին Հոռոմք յուխաին իւրեանց՝ զոր եգին ընդ նմա, և դադարեցին Խայրնդուրք ելանել ընդ պահակն ճորայ, և յամենայն կողմանց խաղաղութեամբ բնակեաց աշխարհ նորա, և 'ի նեղ եւս էարկ զթագաւորն Հոնաց, քանզի աւերեաց զբազում գաւառս նորա, և յաջողեցաւ տէրութիւնն նորա, աւետաւորս առաքեաց ընդ ամենայն ատրուշանս աշխարհին իւրոյ. ցըլուք սախտակօք և գիսաւոր նոխազօք առատացոյց զզոհս կրակին, և

խիտ առ խիտ թանձրացոյց անդագար զպաշտօն պղծութեան իւրոյ, պսակօք և պատուովք մեծարեաց զբազումս 'ի մոգաց և զբազմագոյնս 'ի մոգպետաց: Ետ եւս հրամանս յախշտակել զբրիտանոնէից զինչս և զստացուածս, որք էին 'ի մէջ պարսկաց աշխարհին:

Եւ այսպէս հպարտացաւ բարձրացաւ 'ի միտս իւր, 'ի վեր քան զմարդկային բնութիւնս ընդվզեալ ապարթանէր, ոչ միայն յիրս մարմնական պատերազմացն, այլ մեծ ոմն զինքն կարծէր քան զբնութիւնն հայրենի կարգին. վասն այնորիկ կեղծաւորութեամբ թագուցանէր զինքն ըստ կարծեացն, և որպէս երեւէր իմաստնոցն՝ յանմահից իմն կարգի դնէր զինքն: Եւ յոյժ էր ցասուցեալ ընդ անունն Քրիստոսի, յորժամ լսէր՝ թէ տանջեցաւ, իսաչեցաւ, մեռաւ և թաղեցաւ:

Իբրև այսպէս օր ըստ օրէ 'ի սոյն միտս ցնորեալ դանդաջէր, մի ոմն

մանկագոյն 'ի նախարարացն Հայոց
ընդդէմ բանս եդ և ասէ. Արքայ
քաջ, դու ուստի՞ դիտես այդպիսի
բանս խօսել զՏեառնէ: Ետ պա-
տասխանի թագաւորն և ասէ. Իմ
խկ առաջի ընթերցան զգիրս մոլո-
րու թեանն ձերոյ: Ետ պատասխա-
նի անդրէն պատանեակն և ասէ.
Ընդէր, արքայ, ցայդ վայր միայն
ետուր ընթեռնուլ. այլ յառաջ
եւս մատն զկարգացումնն, և լես
անդ զյարու թիւնն, զյայտնու-
թիւնն առ բազումս, զվերացումն
յերկինս, զնստելն ընդ աջմէ հօր,
զխօստումն երկրորդ գալտեանն՝
զհրաշակերտ յարու թիւնն առնե-
լով բոլորեցունց, զհամառօտ հա-
տուցմուննն արդար դատաստանին:
Իբրեւ լուաւ զայս թագաւորն, 'ի
խոր խոցեալ վեր 'ի վերոյ ծիծաղե-
ցաւ, ասէ. Ամենայն այդ խաբէու-
թիւն է: Ետ պատասխանի զի-
նուորն Քրիստոսի և ասէ. Եթէ
հաւատարիմ են քեզ մարմնաւոր

չարչարանքն նորա, հաւատարմա-
գոյն ևս լիցի քեզ երկրորդ ահա-
ւոր գալուստն նորա:

Եւ զայս լսելով թագաւորին՝
բորբոքեցաւ իբրև զհուր հնոցին 'ի
Բարիլոն, մինչեւ իւրքն խկ անդէն
գեռ եւս իբրեւ զքաղզէացիան այ-
րեցեալ լինէին: Յայնժամ զբոլոր
բարկու թիւն սրամտու թեանն ե-
հեղ յայրն երանելի, որում անուն
էր Գարեգին: Ապա եալ ոտիւք և
կապեալ ձեռօք զերկեամ մի
տուաւ 'ի չարչարանս, և հանեալ 'ի
բաց զաերու թիւնն 'ի նմանէ, ըն-
կալաւ զլճիւ մահօւ:

ԵՐԿՐՈՐԻ ՅԵՂԱՆԱԿ

ԻՐԱՅՆ ՊԱՏԱՀՈՒՄՆ ՅԻՇԽԱՆԵՆ

ԱՐԵՒԵԼԻՑ

Որոց ոգիքն թուլացեալ են յերկնաւոր առաքինու թենէն, յոյժ ընդ ահիւ անկեալ է բնութիւն մարմնոյ. յամենայն հոգմոյ շարժի և յամենայն բանէ խռովի և յամենայն իրաց գողայ. երազագէտ է այնպիսին 'ի կեանս իւրում, և յանգիւտ կորուստն յուղարկի 'ի մահուան իւրում: Որպէս և ասաց ոմն 'ի հնումն. Մահ ոչ իմացեալ մահ է, մահ իմացեալ անմահութիւն է: Որ զմահ ոչ գիտէ, երկնչի 'ի մահուանէ. իսկ որ գիտէ զմահ, ոչ երկնչի 'ի նմանէ:

Եւ այս ամենայն չարիք մտանեն 'ի միտս մարդոյ յանուամնութենէ: Կայր զրկի 'ի ճառագայթից արեգական, և տգիտութիւն զրկի 'ի

կատարեալ կենաց. լաւ է կոյր աչօք քան կոյր մտօք: Որպէս մեծ է հոգի քան զմարմին, այսպէս մեծ է տեսաւորութիւն մտաց քան զմարմնոց: Եթէ կարի ոք առաւելեալ իցէ աշխարհական մեծութեամբ՝ և մտօքն աղքատագոյն, այնպիսին ուղորմելի է քան զբազումս. որպէս և տեսանեմք իսկ, ոչ միայն 'ի չափաւոր մարդիկ, այլ և որ մեծն է քան զամենայն: Թագաւոր եթէ ոչ ունի զխմաստութիւն աթոռակից իւր, ոչ կարէ 'ի վիճակին իւրում վայելուչ գոլ: Իսկ եթէ առ մարմնաւորս այսպէս, որչափ եւս առաւել առ հոգեւորն: Բոլոր մարմնոյս հոգի է կենդանութիւն, իսկ մարմնոյ և հոգեոյ միտք են կառավար. և որպէս առ մի մարդ՝ այսպէս առ բոլոր աշխարհս: Թագաւոր ոչ զիւրն միայն տացէ պարտիս, այլ և որոց եղեւ պատճառք 'ի կորուստ: Բայց մէք թէպէտ և չունիմք հրաման բամբասեւ զիշխանս, և ոչ

գովողք կարեմք լինել այնմիկ՝ որ
աստուածամարան լինին : Այլ
զանցս իրացն պատեմ, որ 'ի նմանե
ընդ սուրբ եկեղեցիան էանց, և ոչ
դանդաղիմ. ոչ բամբասանէր մտօք,
այլ ճշմարտութեամբ զէլս իրացն
ասելով ոչ լռեցից. ոչ 'ի կարծ ըն-
դաստուցեալ, և ոչ 'ի լուր զար-
թուցեալ. այլ ես ինքնին անձամբ
անդէն 'ի տեղընն պատահեցի և
տեսի, և լուսյ զձայն բարբառոյ
յանդգնաբար խօսելով. իբրև ըզ-
հողմ սաստիկ՝ զի բախիցե զծով
մեծ, այնպէս շարժէր և տատանէր
զամենայն բազմութիւն զօրաց իւ-
րոց : Եւ հանդէս առնէր ամենայն
ուսմանց, և ընդաճէր զամենայն մո-
գութիւնն և զքաւդէութիւնն և
զամենայն ուսմունս աշխարհին իւ-
րոյ : Արկանէր 'ի ներքս և զբրիս-
տոնէութիւն կեղծաւորութեամբ,
և ասէր զայրացեալ մտօք. շարցէք,
քննեցէք, տեսէք. թող որ լաւն է՝
ընարեալ կալցուք : Եւ փութայր՝

որ ինչ 'ի մտին էր՝ զի վաղվաղակի
կատարեսցէ :

Իսկ 'ի կողմանց կողմանց բրիս-
տոնեայքն որ 'ի զօրուն էին, իմա-
ցան զհուրն՝ որ 'ի ծածուկն վա-
ւեալ բորբոքէր, և կամէր հրդեհել
զլէրինս և զգաշտս առ հասարակ :
Ջեռան և նոքա անծախական հը-
րովն, և սաստկապէս պատրաստե-
ցան 'ի փորձութիւն գաղտնի մեքե-
նայիցն : Սկսան այնուհետև բարձր
բարբառով, սաղմոսիւք և երգովք
հոգեւորօք և մեծապայծաւ վարդա-
պետութեամբ յայտ յանդիման
մեծի բանակին զպաշտօնն ցուցա-
նէին, և աներկիւզ առանց զանգի-
տելոյ՝ ո՞ ոք և երթայր առ նոսա՝
ուսուցանէին կամակար : Եւ Տէր
յաջողէր նոցա նշանօք և արուես-
տիւք. քանզի բազում՝ հիւանդք
ընդունէին զբժշկութիւն 'ի հեթա-
նոսական զօրուէն :

Իսկ անօրէն իշխանն իբրեւ գի-
տաց, եթէ յայտնեցաւ խորաման-

կուժիւն խորհրդոցն, և պատրաստեալ հուրն՝ մինչչեւ ուրուք ՚ի նա փչեալ, վառումն նորա յայտնի ի մացաւ երկիւղածացն Աստուծոյ, սկսաւ ծածուկ նետուիք խոցոտել զմիտս իւրոյ չարուժեանն, և անբըժըշկական վէրս յողիս և ՚ի մարմինսն տեսանէր: Մերթ շանթէր գալարէր իբրեւ զօձ թիւնաւոր, մերթ պարզէր գոչէր իբրեւ զառիւծ զայրացեալ, գելոյր, գլորէր, տապալէր երկգլմի մտօք, զխորհուրդս կամացն կամէր կատարել: Քանզի ձեռն արկանել և ունել ոչ կարէր, վասն զի ոչ էին համագունդ ՚ի միում վայրի առ նմա, սկսաւ այնուհետեւ յառաջ կոչել զկրսերս յաւաքաց և զանարգս ՚ի պատուականաց և զտգէտս ՚ի գիտնոց և զանարիս ի քաջ արանց, և զի՛ մի մի թուիցեմ, այլ զամենայն զանարժանսն յառաջ մատուցանէր, և զամենայն զարժանաւորսն յետս տանէր, մինչև զճայր և զորդի քակէր ՚ի միմեանց:

Թէպէտ և ընդ ամենայն ազգս առնէր զանկարգութիւնս զայս, առաւել ընդ Հայոց աշխարհին մարտընչէր. քանզի տեսանէր զնոսա ջերմագոյնս յաստուածպաշտութեանն. մանաւանդ որք էին յազգէ նախարարացն Հայոց, և անմեղութեամբ ունէին զսուրբ քարոզութիւն առաքելոցն և զմարգարէից: Պատրէր զոմանս ՚ի նոցանէ ոսկւով և արծաթով, և զբազումս այլով եւս առատ պարգեւօք, իսկ զոմանս ապարսկօք և մեծամեծ գեղօք, և զոմանս պատուովք և իշխանութեամբք մեծամեծօք, և այլ եւս սնոտի յոյս ոգւոցն առաջի դնէր: Եւ այսպէս հրապուրէր և յորդորէր հանապաղ. Եթէ միայն, ասէ, զօրէնս մոգութեան յանձին կալչիք, և զձեր մոլորութիւնդ սրտի մտօք դարձուսլիք ՚ի ճմարտութիւն երեւելի մերոյ գիւցազնական օրինացս, ՚ի մեծութիւնս և յաւագութիւնս հասուցից հաւա-

սար իմոյ սիրելի նախարարացս, աւաւեւեւ եւս զանցուցից: Եւ այսպէս կեղծաւորութեամբ խոնարհեցուցանէր զինքն առ ամենեսեան, խօսելով ընդ նոսա 'ի պատճառս սիրոյ. զի խորամանկութեամբ որսալ մարթասցէ ըստ առաջին խորհրդական խրատաբանացն: Եւ զայս առնէր սկսեալ 'ի չորրորդ ամէն մինչև 'ի մետասան ամի իւրոյ տէրութեանն:

Եւ իբրեւ ետես, եթէ ոչ ինչ յարգեցաւ ծածուկ հնարագիտութիւնն, այլ ընդդէմքն յոլովագոյն գործէին, քանզի տեսանէր զբրիտոնէութիւն՝ որ օր քան զօր յորդորեալ աարածանէր ընդ ամենայն կողմանս հեռաւոր ճանապարհին ընդ որ ինքն անցանէր, սկսաւ հաշեւեւեւ մաշեւեւեւ հառաչելով յողոց հանել: Յայտնեաց ահամայ զծածուկ խորհուրդսն, ետ հրաման բարձր բարբառով և ասէ. Ամենայն ազգ և լեզուք՝ որ են ընդ իմով

իշխանութեամբ՝ դագարեսցեն յիւրաքանչիւր մոլոր օրինացն, և միայնոյ եկեսցեն յերկրպագութիւն արեգական, զոչս մատուցանելով և աստուած անուանելով, և սպասուանելով կրակի. և 'ի վերայ այսր ամենայնի և զմոգութեան եւս օրէնս կատարելով, զի մի ինչ ամենեւին պակաս առնիցեն: Չայս ասելով քարոզ կարգայր 'ի մեծի կարաւանին, և պատուէր սաստիւ 'ի վերայ դնէր ամենեցուն, և դեսպանս ստիպաւ արձակէր յամենայն ազգս հեռաւորս. զգոյն պատուէր հրամանի առ ամենեսեան արկանէր:

Արդ 'ի սկզբան երկոտասան ամի թագաւորութեանն իւրոյ դուռնի կազմէր անհամար բազմութեամբ, յարձակեալ հասանէր յերկիրն իտաղական: Չայս տեսեալ թագաւորին Քուչանաց, ոչ հանդուրժէր ելանել ընդ առաջ նորա պատերազմաւ. այլ խոյս տուեալ 'ի կողմանս ամուր անապատին, թագստեամբ

ապրէր հանդերձ ամենայն զօրօքն
իւրովք: Իսկ սա ասպատակ արձա-
կէր գաւառաց, տեղեաց, վայրաց-
առնոյր զբազում բերդս և զքա-
ղաքս, կուտէր զգերին, զառ և զա-
պուռ և զաւար, ածէր հասուցա-
նէր յերկիր իւրոյ տէրութեանն:
Եւ անդ այնուհետեւ յընդունայն
եղեալ 'ի նոյն խորհուրդս, հաստա-
տէր 'ի կարծիս մոլորութեանն, ա-
սելով ցպաշտօնեայս ամբարշտու-
թեանն. Զինչ հատուցուք մեք
աստուածոցն փոխարէնս այս մեծի
յաղթութեանս, որ ոչ որ կարաց
եղանել ընդդէմ մեր պատերազմաւ:

Յայնմ ժամանակի առ հասարակ
միաբան մոգք և քաւդեայք բարձին
զձայնս իւրեանց և ասեն. Աս-
տուածքն՝ որ ետուն քեզ զտէրու-
թիւնդ և զյաղթութիւն 'ի վերայ
թշնամեաց քոց, ոչ ինչ են կարօտ
ինդրել 'ի քէն յերեւելի պատուա-
կանացս, այլ զի բարձցես զամե-
նայն ուսմունս մոլորութեան մարդ-

կան, և 'ի մի դարձուցես օրէնս
զրադաշտական պատուիրանին: Հա-
ճոյ թուեցաւ բանն առաջի թագա-
ւորին և ամենայն մեծամեծացն, և
մանաւանդ որ էին առաջակայք օրի-
նացն: Խորհուրդ 'ի մէջ առեալ,
յաղթէր խրատն: Անդէն 'ի ներքոյ
պահ գրանն արդելոյր զբազմու-
թիւն այրուձիոյն Հայոց և Վրաց
և զԱղուանից, և զամենեցուն որ
էին հաւատացեալ 'ի սուրբ աւե-
տարանն Քրիստոսի: Եւ հրաման
սաստիւ 'ի վերայ դոնապանացն
առնէին, թէ որ յարեւելս առ մեզ
գայցէ՝ թողցեն, իսկ յարեւելից
յարեւմուտս՝ անանց լիցի ճանա-
պարհ:

Եւ իբրեւ արգել և փակեաց ըզ-
նոսս յամուր յանել գառագիղն,
որ յիրաւի ասացի ամուր և անել,
քանզի չիք անդ տեղի փախստի և
թաքստի, վասն զի շուրջանակի
թշնամիք են բնակեալ, յայնմ ժա-
մանակի ձեռն արկանէր 'ի նոսս, և

մեծաւ չարչարանօք և պէսպէս տանջանօք վատթարէր զբազումս 'ի նոցանէ, և ստիպէր ուրանալ զձրշմարիտն Աստուած և խոստովանել զերեւելի տարերսս: Իսկ զօրականքն առ հասարակ գեղեցիկ խորհրդով, քաջապէս զօրուժեամբ միաբան ազաղակէին և ասէին. Վկայ են մեզ երկինք և երկիր, ոչ երբեք հեղգացեալ եմք յարքունի վաստակս, և ոչ խառնեալ վատուծիւն ընդ արուժիւն քաջութեան. 'ի զուր անողորմ են հարուածքս 'ի վերայ մեր: Եւ բազմանայր գոչումն ազաղակի նոցա, մինչեւ ինքնին թագաւորն ականատես լինէր իրայն յանդիմանութեան, և անդէն վաղվազակի երգմամբ հասաատէր և ասէր. Ոչ թողացուցից ձեզ, մինչեւ կատարեսցիք զամենայն կամս հրամանաց իմոց:

Եւ ահա իշխանութիւն առեալ չարաչար սպասաւորացն, զի զչորս զինուորսն 'ի բուն աւագացն մա-

տուսցեն 'ի փորձութիւն տանջանայն: Եւ զառաջեաւ գատեալ բազում հարուածովք՝ նովին կապանօք անցուցին 'ի տեղիս արգելանին: Իսկ այլոցն խաբէութեամբ առ ժամանակ մի թողութիւն արարեալ, և զամենայն շնասուն պատճառս արկանէր զկապելովքն. և զայս առնէր սատանայական իրատուն:

Եւ յետ երկոտասան աւուր հրաման տայր ընթրիս գործել առատութեամբ և աւելի քան զաւուրց սովորութիւն, և կոչէր զբազումս 'ի զինուորական քրիստոնէիցն: Եւ 'ի ժամ գահուն պատրաստութեան զիւրաքանչիւր տեղիս շնորհէր նոցա զբազմականին: Եւ սիրով խոնարհութեամբ խօսէր ընդ նոսա ըստ առաջնում կարգին, զի թերեւս հաւանեսցին ուտել զմիս զոհեալ, զոր ոչ երբեք էր օրէն ուտել քրիստոնէից: Իբրեւ ոչ կալան յանձին ամենեքին, ոչ ինչ կարի

ստիպեաց. այլ հրամայեաց՝ նոցա մատուցանել զսովորական կերակուրն. այլ առեալ գինեօքն յաւելոյր 'ի տաճարին զխրախուժիւն: Եւ անտի 'ի դուրս ելեալ 'ի սրահն արքունի, արգելին զոմանս 'ի նոցանէ ձեռս յետս կապելով, և ըզխոնջանունսն կնքելով, և զգուշութեամբ պահելով, էր որ զերկուս աւուրս և էր որ զերիս: Եւ բազում այլ եւս յանարժան հարուածս չարչարէին. զոր և ոչ ընդգրով իսկ արժանի համարեցաք արկանել: Եւ զոմանս 'ի նոցանէ հեռացուցին, և քարչեցին յազնուական պատուոյն անարգեալ:

Եւ գունդս գունդս դարձեալ գումարէին 'ի նոցանէ յերկիր հեռաւոր, յամուրս անապատին 'ի մարտ պատերազմի թշնամեացն արքայի. և բազմաց իսկ և իսկ անդէն հասանէր վախճան մահու սրով: Եւ զամենեցուն զկարգեալ թռչական նուագեցուցանէին, և քաղցիւ և

ծարաւով տառապեցուցանէին ըզնոսա, և ձմերոցի տեղիս՝ զգժնեայ վայրսն հրամայէին նոցա, և անարգս և վատթարս յաչս ամենեցուն զնոսա ցուցանէին: Իսկ նոքա առ սէրն Քրիստոսի յոյժ խնդութեամբ ընդունէին զամենայն չարչարանսն վասն մեծի յուսոյն որ 'ի Քրիստոս, և որ առաջոյ պատրաստեալն կայ պատուիրանապահ համբերողացն: Արչափ չարութիւն զանարգութիւն բազմացուցանէր, նոքա եւս քան զեւս զօրանային 'ի սէրն Քրիստոսի. մանաւանդ զի բազումք 'ի նոցանէ զգիրս սուրբս ուսեալք էին 'ի մանկութենէ, զանձինս մխիթարէին, և զընկերսն քաջալերէին, և աշկարայ զպաշտօնն ունէին և բազմացուցանէին: Վասն որոյ և բազումք 'ի հեթանոսաց՝ որոց հեշտ և ցանկալի ձայնքն թուէին, քաջալերէին զնոսա, և ասէին բանս մխիթարութեան, իբրեւ թէ լաւ իցէ մարդոյ մահու

չափ ճգնել, քան յայդպիսի օրինաց
ուրանալ:

Բայց սահայն թէպէտ և նոքա
առ սէրն Քրիստոսի յոյժ զուար-
թուութեամբ խնդային ըստ ներքին
մարդոյն, արտաքին տեսիլն կարի
ողորմ էր յօտարութեանն: Այն-
պիսի պատուական զինուորութիւն
հասեալ էր 'ի չարաշուք անարգու-
թիւն, և հայրենի ազատութիւնն
չարաչար կայր 'ի ծառայութեան
մարդախոշոշ բռնաւորին, որ և
ըստ հեթանոսաց օրէնս անցանէր
արիւնահեղութեամբ. և ամենեւին
չկարծէր, թէ գուցէ այսր ամենայ-
նի վրէժխնդիր յերկինս: Նա և ոչ
զերկրաւոր վաստակս ուրուք յի-
շէր. և որ մեծն քան զամենայն է ըստ
մարմնաւոր կարգի, քանզի գոյին
ոմանք 'ի նախարարացն Հայոց, ո-
րոց զեղբարս նորա սնուցեալ էր
մայրենի կաթամբ իւրեանց, առա-
ւել եւս քան զամենեսեան զնո՞՞ա
դատէր:

Եւ յայսր ամենայնի վերայ այլ
եւս չարութիւն խորամանկեաց:
Չմի ոմն 'ի հաւատարիմ ծառայից
իւրոց 'ի գործ առաքէր յերկիրն
Հայոց, որում անուն էր Գենշա-
պուհ. որ եկեալ հասեալ հրամա-
նաւ արքունի, զողջոյն բերեալ ըզ-
մեծ թագաւորին, և խաղաղասէր
կեղծաւորութեամբ աշխարհագիր
առնել ամենայն երկրին Հայոց 'ի
թողութիւն հարկաց և 'ի թեթե-
ւութիւն ծանրութեան այրեւծիոյ:

Թէպէտ և 'ի վերին երեսս կեղ-
ծաւորէր, այլ 'ի ներքոյ խոր-
հուրդք չարագոյն ցուցանէին: Ա-
ռաջին, զազատութիւն եկեղեցւոյն
արկանէր 'ի ծառայութիւն. երկ-
րորդ, միայնակեաց քրիստոնեայք՝
որ բնակեալ էին 'ի վանորայս, ընդ
նովին աշխարհագրաւ էարկ. եր-
րորդ, զհարկ աշխարհին առաւել
ծանրացոյց. չորրորդ, բանսարկու-
թեամբ զնախարարեանն էարկ ընդ
միմեանս, և յամենայն տան արար

խուովուծիւն: Եւ զայս ամենայն
 առնէր, Թերեւս զմիաբանուծիւնն
 քակեսցէ, և զուխտն եկեղեցւոյն
 ցրուեսցէ, և զմիայնակեացան փա-
 խուսցէ, և զշինականն վատնեսցէ.
 և առ յոյժ աղքատուծեանն՝ ա-
 կամայ գիմեսցեն յօրէնս մոգուց:
 Եւ եւս չարագոյն հինգերորդն.
 քանզի որ հազարապետ աշխարհին
 էր՝ իբրեւ զհայր վերակացու հա-
 մարեալ էր աշխարհականաց քրիս-
 տոնէից, գրգռեաց յարոյց զամ-
 բաստանուծիւն 'ի վերայ նորա, և
 հանեալ զնա 'ի գործոյն՝ փոխանակ
 նորա պարսիկ ած յաշխարհն, և
 միւս եւս մոգպետ դատաւոր աշ-
 խարհին, զի զեկեղեցւոյն փառսն
 աղաւաղեսցեն:

Իայց սակայն Թէպէտ և ամենայն
 գործքս այս դժնեայ էին, չեւ էր
 ուրուք ձեռնարկեալ յայտնի յե-
 կեղեցին. վասն այնորիկ և ոչ ոք
 ընդգիմացաւ նմա, Թէպէտ և էր
 ծանրուծիւն հարկացն: Քանզի

ուստի արժանն էր առնուլ հարիւր
 դահեկանաւ չափ, կրկին առնուին.
 սոյնպէս և եպիսկոպոսաց և երի-
 ցանց զնէին, ոչ միայն շինաց, այլ
 և աւերակաց: Նա բնաւ ո՛վ իսկ
 կարէ պատմել վասն ծանրուծեան
 մտից և սակից, բաժից և հասից և
 հարկաց լերանց և դաշտաց և մայ-
 րեաց: Ոչ ըստ արքունի արժանա-
 ւորուծեանն առնուին, այլ հինա-
 բար յափշտակելով. մինչեւ ին-
 քեանք իսկ մեծապէս զարմանային,
 Թէ ուստի այս ամենայն գանձ ելա-
 նէ, զիմորդ շէն կայցէ աշխարհն:

Եւ իբրեւ տեսին, Թէ այսու և
 մենայնիւ չկարացաք ձանձրացու-
 ցանել, յայնժամ յայտնապէս հրա-
 ման ետուն մոգաց և մոգպետաց
 նամակ մի գրել ըստ ձախողակի
 դէնին իւրեանց: Եւ է պատճէն նա-
 մակին այս:

Միհրնբուհ վզրուկ հրամատար
 Երան և տաներան, Հայոց մեծաց
 ողջոյն շատ:

Դուք գիտաաշխարհ, ամենայն մարդ որ բնակեալ է 'ի ներքոյ երկնի, և ոչ ունի զօրէնս գեներմազգէզն, նա խուլ է և կոյր, և գիււաց չարամանոյ խաբեալ: Քանզի մինչ չեւ էին երկինք և երկիր, Զրուան մեծն աստուած յաշտ առնէր զհազար ամ, և ասէր. Թերեւս լիցի իմ որդի մի Որմիզդ անուն, որ արասցէ զերկին և զերկիր: Եւ յղացաւ երկուս յորովայնի, մի վասն յաշտ առնելոյ, և զմիւսն եւս 'ի Թերեւսն ասելոյ: Իբրեւ գիտաց, եթէ երկու են յորովայնիս, Որ վաղ եկեսցէ, ասէ, նմա տաց զԹագաւորութիւնս: Իսկ որ էր 'ի Թերահաւատութենէն յղացեալ, պատառեաց զորովայնն և ել 'ի դուրս: Ասէ ցնա Զրուանն. Ո՞վ էս դու: Ասէ. Որդին քո Որմիզդ: Ասէ ցնա Զրուանն. Իմ որդին լուսաւոր է և անուշահոտ, դու խաւարային ես և չարասէր: Եւ իբրեւ կարի դառնապէս ելաց, ետ ցնա զԹագաւորութիւնն զհազար ամ:

Իբրեւ ծնաւ զմիւս եւս որդին, անուանեաց զնա Որմիզդ. եհան զԹագաւորութիւնն յԱրհմնէ, և ետ ց Որմիզդն. և ասէ ցնա. Յայժմ ես քեզ յաշտ արարի, արդ դու ինձ արա: Եւ Որմիզդ արար զերկին և զերկիր. իսկ Արհմն ընդդէմ չար գործեաց: Եւ այսպէս բարժանին արարածքս. հրեշտակք Որմիզդի են, իսկ գեւքն Արհմնոյն. և ամենայն բարիք որ յերկնից և այսր լինին՝ Որմիզդի են, և ամենայն վնասք որ անտի և այսր գործին՝ զայն Արհմն արար: Սոյնպէս և յերկրիս որ ինչ բարի է՝ զայն Որմիզդն արար, և որ ոչն է բարի՝ զայն Արհմն արար. որ պէս զմարդ Որմիզդ արար, և զախտս և զհիւանդութիւնս և ըզմահ Արհմն արար: Եւ ամենայն Թշուառութիւնք և պատահարք որ լինին, և պատերազմունք դառնութեան՝ չարին մասին արարածք են: Իսկ յաշտութիւնք և տէրութիւնք և փառք և պատիւք և առողջու-

Թիւնք մարմնոց, գեղեցկութիւնք
դիմաց և ճարտարութիւնք բանից
և երկայնակեցութիւնք ամաց, այդք
'ի բարւոյն առնուն զգոյացութիւն.
և ամենայն որ ոչ այդպէս է, 'ի նա
չարին արարած խառնեալ է:

Եւ ամենայն մարդիկ մոլորեալ
են, որ ասեն եթէ զմահ Աստուած
արար, և չար և բարի 'ի նմանէ լի-
նի. մանաւանդ որպէս քրիստո-
նեայքդ ասեն՝ Թէ Աստուած նա
խանձոտ է, վասն թզի միոյ ուտելոյ
'ի ծառոյն Աստուած զմահ արար,
և զմարդն էարկ ընդ այնու պատու
հասիւ: Զայդպիսի նախանձ և ոչ
մարդ առ մարդ ունի, թող թէ Աս-
տուած առ մարդիկ. զի որ զայս ա-
սէ՝ նա խուլ է և կոյր և 'ի դիւաց
չարամանոյ խաբեալ:

Իարձեալ միւս եւս այլ մոլոր-
ութիւն ասեն. Աստուած, ասեն,
որ զերկինս և զերկիր արար, եկն և
'ի կնոջ ումեմնէ ծնաւ, որում ա-
նուն էր Մարիամ, և առն նորա

Յովսէփ: Եւ զհետ այսպիսի մար-
դոյ մոլորեալ են բազումք: Եթէ
աշխարհն Հոռոմոց առ յոյժ յիմա-
րութեան տգիտաբար մոլորեալ են,
և զրկեալ են 'ի կատարեալ դէնէս
մերմէ, յանձանց պարմայեն զվը-
նասն իւրեանց. դուք եւս ընդէր
զհետ նոցա մոլորութեանն ցնորիք:
Այլ զոր օրէնս տէրս ձեր ունի, ըզ-
նոյն և դուք կալարուք. մանաւանդ
զի և առաջի Աստուծոյ վասն ձեր
համարս ունիմք տալ:

Մի հաւատայք առաջնորդացն
ձերոց, զոր նածրացիսդ անուանէք,
քանզի յոյժ են խաբեբայք. զոր
բանիւքն ուսուցանեն, գործովք ոչ
կարեն յանձն առնուլ: Միս ուտել,
ասեն, ոչ են մեղք, և ինքեանք ու-
տել ոչ կամին. կին առնել արժան
է, բայց ինքեանք և հայել 'ի նա ոչ
կամին. կարասի որ ժողովէ, ասեն,
յոյժ մեղք են, բայց զաղքատու-
թիւն առաւել քան զյոյժ գովեն.
յարգեն զԹշուառութիւն, և պար

սաւեն զյաջողուածս. ծաղր առնեն զանուն բախտի, և զփառաւորան յոյժ այպանեն. սիրեն զանշքութիւն հանգերձից, և յարգեն զանարգս քան զպատուականս. գովեն զմահ, և պարսաւեն զկեանս. անարգեն զծնունդս մարդոյ, և գովեն զանորդութիւն: Եւ եթէ լսէ ոք դոցա և 'ի կանայս ոչ մերձենան, աշխարհի վախճան վաղվաղակի հասանէ:

Այլ էս ոչ կամեցայ զամենայն ըստ մասանց ընդ գրով արկանել առ ձեզ. զի բազում այն ինչ է, զոր խօսին դոքա: Որ չարագոյն եւս է քան զոր գրեցաքդ, զԱստուած 'ի խաչ ելեալ 'ի մարդկանէ քարողեն, և զնոյն մեռեալ և թաղեալ, և ապա յարուցեալ և վերացեալ յերկինս: Ո՞չ ահա ձեզէն իսկ արժան էր անդրէն դատաստան առնել վասն այդպիսի անարժան ուսմանց: Դեւք որ չարք են, ոչ ըմբռնին և տանջին 'ի մարդկանէ, թող թէ

Աստուած արարիչ ամենայն արարածոց. զոր ձեզ ամօթ է ասել, և մեզ կարի անհաւատոյի բանք:

Արդ երկու իրք կան առաջի ձեր. կամ արարէք բան առ բան նամակիդ պատասխանի, և կամ արիք 'ի դունն եկայք, յանդիման շերտք մեծի հրապարակին:

ԱՆՈՒԱՆՔ ԵՊԻՍԿՈՊՈՍՍՅՆ, ՈՐՔ ՊԱՏԱՍԽԱՆԵՏԻՆ ՆԱՄԱԿԻՆ

Յովսէփ եպիսկոպոս Այրարատոյ, Սահակ եպիսկոպոս Տարօնոյ, Մելեօ եպիսկոպոս Մանազկերտոյ, Եզնիկ եպիսկոպոս Բագրեւանդայ, Սուրմակ եպիսկոպոս Բզնունեաց, Տաճատ եպիսկոպոս Տայոց, Թաթիկ եպիսկոպոս Բասենոյ, Քասու եպիսկոպոս Տարուբերանոյ, Երեմիա եպիսկոպոս Մարդաստանի, Եւղաղ եպիսկոպոս Մարդաղոյ, Անանիա եպիսկոպոս Սիւնեաց, Մուշէ եպիսկոպոս Արժրունեաց,

Սահակ եպիսկոպոս Ռըշտունեաց,
Բասիլ եպիսկոպոս Մոկաց, Գադ-
եպիսկոպոս Վանանդայ, Եղիշայ
եպիսկոպոս Ամատունեաց, Եղբայր
եպիսկոպոս Անձեւացւոց, Երե-
միաս եպիսկոպոս Ապահոնեաց:

Այս ամենայն եպիսկոպոսք և
բազում քորեպիսկոպոսք և պա-
տուական երիցունք 'ի տեղեաց տե-
ղեաց հանդերձ սուրբ ուխտիւ ե-
կեղեցւոյ միաբանք և միահաւանք,
միահամուռ ժողովեալք 'ի Թագա-
ւորանիստ տեղին յԱրտաշատ, հա-
ւանուածեամբ մեծամեծ նախարա-
րացն և ամենայն բազմութեամբ
աշխարհին արարին նամակին պա-
տասխանի:

Յովսէփ եպիսկոպոս հանդերձ
ամենայն միաբանելովքս 'ի մեծամե-
ծաց մինչեւ ցփոքունս՝ Միհրներսե-
հի մեծի հազարապետիդ Արեաց և
անարեաց՝ բազում խաղաղասէր մը-
տօք բազմասցի ողջոյն առ քեզ և ա-
մենայն մեծի սպահնիդ Արեաց:

Ի նախնեաց ունիմք սովորու-
ածին աստուածատուր պատուիրա-
նաւ՝ աղօթս առնել 'ի վերայ կե-
նաց Թագաւորի, և անձանձրոյթ
խնդրել յԱստուծոյ վասն Երկայն
ժամանակաց դորա, զի խաղաղու-
ածեամբ վարեսցէ զտիեզերական իշ-
խանութիւնդ, զոր աւանդեալ է
դմա յԱստուծոյ. զի 'ի դորա յեր-
կար խաղաղութեանն և մէք առող-
ջութեամբ և աստուածպաշտու-
ածեամբ կատարեսցուք զկեանս մեր:

Վասն նամակին, որ քո 'ի մեր
աշխարհս տուեալ էր, յառաջ ժա-
մանակաւ մի ոմն 'ի մոգպետաց, որ
կատարելագոյն էր 'ի գենիդ ձե-
րում, և դուք առաւել քան զքնու-
ածին մարդկան 'ի վեր համարէիք
զնա, հաւատաց նա յԱստուած
կենդանի յարարիչն երկնի և եր-
կրի, և բան առ բան ելոյծ և իմա-
ցոյց ձեզ զօրէնս ձեր: Եւ իբրև ոչ
կարացին բանիւ զգէմ ունել նորա,
քարկոծեալ մեռաւ յՈրմզէտ ար-

քայէ: Եւ եթէ հաւատարիմ համարիցիս զմեր բանս լսել, 'ի բազում տեղիս այդրէն յաշխարհիդ ձերում գտանին գիրք նորա, ընթերցիր, և անտի տեղեկանաս:

Այլ վասն օրինացս մերոց, ոչ ինչ աներեւոյթ են, և ոչ յանկեան ուրեք աշխարհիս քարոզին. այլ համատարած ընդ ամենայն երկիր, ընդ ծով և ընդ ցամաք և ընդ կղզիս. ոչ միայն ընդ արեւմուտս, այլ և ընդ արեւելս, այլ և ընդ հիւսիս և ընդ հարաւ և 'ի միջոցս լի է հոծութեամբ: Աչ 'ի մարդ ապաստան, եթէ վերակացուաւ տարածեսցի ընդ աշխարհս, այլ ինքն յինքեանէ ունի զհաստատութիւն: Աչ առ այլովք վատթարօքն վեհ երեւի, այլ 'ի վերուստ յերկնուստ ունի զանսուտ օրէնսդրութիւնն. ոչ միջնորդաւ, զի մի է Աստուած, և չիք այլ որք բայց 'ի նմանէ, ոչ երիցագոյն և ոչ կրասերագոյն: Աչ սկիզբն առեալ յումեքէ լինել Աս-

տուած, այլ ինքն ինքեամբ մշտնջենաւոր. ոչ 'ի տեղւոյ ուրեք, այլ ինքն ինքեան տեղի. և ոչ 'ի ժամանակի իմիք, այլ ժամանակք 'ի նմանէ գոյացան. ոչ միայն քան զերկինս երիցագոյն, այլ և քան զկարծիս մտաց մարդկան և հրեշտակաց: Աչ ձեւանայ 'ի տեսիլ տարրեղէն, և ոչ անկանի ընդ տեսլեամբ ական. և ոչ միայն ձեւին չզննի, այլ և ոչ ընդ միտս ուրուք հարկանի, ոչ միայն ընդ մարմնականացս, այլ և ոչ ընդ անմարմին հրեշտակացն. բայց եթէ ինքն կամի՝ իւրոց արժանաւորացն մտաց իմանի, այլ ոչ աչաց տեսանի. և մտաց՝ ոչ երկրաւորացս, այլ որ Աստուածն են հաւատացեալ ճշմարտիւ:

Եւ անուն է նորա արարիչ երկնի և երկրի. իսկ յառաջ քան զերկին և զերկիր, որպէս ինքնագոյ՝ ինքնաւուն է: Ինքն անժամանակ է, իսկ արարածոցս յորժամ կամեցաւ ըսկիզբն արար լինելոյ, ոչ յընչէ, այլ

յողննչէ. զի ինչ՝ նա միայն է, և այլս ամենայն 'ի նմանէ ընչացաւ: Ոչ եթէ իբրև յետոյ իմացաւ և աւրար, այլ մինչ չեւ արարեալ էր նորա՝ 'ի կանուխ գիտութեանն իւրում տեսանէր զարարածս. որպէս և այժմ մինչ չեւ է գործեալ մարդոյ բարի ինչ կամ չար, Աստուծոյ յայտնի են անգործք մարդոյն: Սոյնպէս և յայնժամ, մինչ չեւ էր արարեալ, ոչ խառն 'ի խուռն ինչ ճանաչէր զանեղսն, այլ կարգեալ և յարմարեալ կային առաջի նորա իւրաքանչիւրն մասանցն տեսակքն. իսկ մարդկան և հրեշտակաց՝ և տեսակքն և որ 'ի տեսակին լինելոց էին:

Եւ քանզի արարող զօրութիւն է, ոչ կարէր խափանել զնորա բարերարութիւնն մեր չարութիւնս. որպէս և եղեւ իսկ. և ունիմք դատաւոր զաջն արարչին: Չեւք, որ զերկինս և զերկիր հաստատեցին, նոյնք և տախտակս քարեղէնս փո-

րագրեցին և հտուեն մեզ դարուութիւն՝ որ ունի զօրէնս խաղաղականս և փրկականս. զի գիտասցուք զմի Աստուած արարիչ երեւելեաց և աներեւուութից. ոչ այլ և այլ, իբրեւ թէ ոմն բարի և ոմն չար, այլ մի և նոյն և համակ բարի:

Բայց եթէ թուիցի քեզ չար ինչ գող յարարածս Աստուծոյ, աստ՝ համարձակ, զի թերեւս ուսցիս ըզճմարիտն բարի: Զդեւս չար ասացեր. գոն և դեւք բարի, զոր և դուք և մեք հրեշտակս անուանեմք. եթէ կամին՝ և դեւք բարի լինին, և եթէ կամին՝ և հրեշտակք չար լինին: Այդ և 'ի մարդիկ երեւին, և առաւել 'ի միոյ հօր որդիս. է որ հնազանդ և հպատակ է հօրն, և է որ չարագոյն քան զսատանայ: Նա և ինքն իսկ մարդն առանձինն յերկուս բաժանեալ տեսանի, երբեմն չար և երբեմն բարի. և որ բարին էր՝ նոյն և չարացաւ, դէպ եղեւ՝ զի դարձեալ անդրէն 'ի բարի շրջեցաւ, և բնութիւնն մի է:

Բայց այն որ ասեան, եթէ վասն
Թղոյ միոյ մահ արար Աստուած,
վատթարագոյն է պատառ մի մա-
գաղաթ քան զԹուզ. ապա եթէ
բան թագաւորին նկարի 'ի նմա, ո
պատառէ զնա՝ մահու ընդունի ըզ-
պատուհաս. իսկ արդ չար արժան
է ասել թագաւորին. քաւ, ես ոչ
ասեմ. այլ խրատ 'ի դործ արկեալ
զայլս ուսուցանեմ: Յայնժամ էր
Աստուած նախանձոտ, թէ չէր պա-
տուիրեալ չուտել 'ի ծառոյ անտի.
ապա եթէ յառաջագոյն զգուշա-
ցաւ, զգուծ բնական սիրոյն իւրոյ
յայտնեաց նմա: Իսկ արհամարհե-
լով մարդն՝ ընկալաւ զպատիժս մա-
հուն:

Բայց այն զոր ասացեր, եթէ Աս-
տուած 'ի կնոջէ ծնաւ, յայդմ չէր
արժան քեզ խորշել և փախչել. զի
ահաւաստիկ Արհմն և Որմիզդ 'ի հո-
րէ ծնան և ոչ 'ի մորէ. որում եթէ
քաջ միտ գնես, և ոչ դու յանձն
առնուս: Եւ միւս եւս այլ ծաղրա-

դոյն քան զայդ. Միհր աստուած 'ի
կնոջէ ծնաւ, եթէ ոք ընդ իւրում
ծնողին անկցի:

Այլ սակաւիկ մի եթէ 'ի բաց
Թողացուցանէիր զիջումն տէրու-
թեանդ, և ընկերաբար գայիր 'ի
պայքար, գիտեմ՝ զի իբրեւ այլովդ
ամենայնիւ յոյժ իմաստուն ես, և
վասն ծննդեան Տեառն մերոյ 'ի
սուրբ կուսէն՝ ոչ աւելաբանու-
թիւն համարէիր, այլ առաւել
քան զարարչութիւնն յոչնչէ զաչ-
խարհս՝ մեծագոյն զլերջին փրկու-
թիւնան իմանայիր, ազատութեան
մարդոյն զյանցաւորութիւնն դը-
նէիր, և բարերարութեանն Աս-
տուծոյ՝ զազատութիւնն 'ի ծառա-
յութենէ:

Քանզի յորժամ ըսես եթէ յո-
չընչէ արար Աստուած զամենայն
աշխարհս, բանիւ ծնունդ իմաստիւր
զարարածս: Իսկ քանզի Աստուած
որ զայս մեծ մարմին առանյ չար-
չարանաց ծնաւ, ապաքէն իբրեւ

զհայր գուԹ ունի ընդ սմա: Չի որ
ինքն անապական է, և զարարածս
առանց ապականութեան ծնաւ .
իսկ սա կամօք գլորեալ ապականե-
ցաւ, և անձամբ եւս ոչ կարէր
կանգնել կալ 'ի վերայ օտից: Վասն
զի էր 'ի հողոյ, անձամբ անձին ա-
րարեալ՝ անդրէն 'ի նոյն բնութիւն
դարձաւ. իբրեւ ոչ եԹէ յօտար
դօրութենէ չարի ինչ ընկալաւ ու-
րուք զպատիժս պատուհասին, այլ
'ի յիւրմէ հեղգութենէն չլսել բա-
րերար պատուիրանին, խրատեցաւ
ծառայական մասնն մահուամբն,
զոր կրեաց յանձն իւր:

Արդ եԹէ զմահ չար աստուածն
արար, զինչ փոյացութիւն երեւի
մահու 'ի միջի. և ոչ ինչ: Բայց ըզ-
բարի Աստուծոյ զարարածսն խան-
գարեաց: ԵԹէ այդ այդպէս է,
նմա և բարի իսկ ասել ոչ մարԹի,
այլ կիսագործ ապականացու: Եւ
որոյ Աստուծոյ արարածքն ապա-
կանելիք են և եղծանելիք, նմա

անեղծ Աստուած չմարԹի ասել: Տի
օն անդր Թողէք զյիմարութեան
զբարբանջմունսդ: Միոյ աշխարհի
երկու դեհապետք ոչ լինին, և ոչ
միոյ արարածոց երկու աստուածք:
ԵԹէ Ժպրհեսցին և լինիցին երկու
Թագաւորք միոյ աշխարհի, աշ-
խարհն եղծանի և Թագաւորու-
Թիւնքն խանգարին:

Աշխարհս նիւթեղէն է, և նիւթքս
որիչ որիչ են և ընդ միմեանց հա-
կառակ. մի է արարիչ հակառակոր-
դացս. որ ածէ զսոսա 'ի սիրելու-
Թիւն հաւանութեամբ. որպէս մա-
լեալ կակղէ զՎերմութիւն հրոյն՝ օ-
դոյս հաւանութեամբ, և զապա-
ռուսն բրտութեան օդոյն՝ հրոյն ե-
ռանդմամբ, սոյնպէս և մանրամաղ
փոշիացեալ հողս՝ ջրոյն խոնաւու-
Թեամբ զանգանի, իսկ զ'ի վայր ծո-
րելի բնութիւն ջրոյն սալայատակ
տրամացեալ հողոյն կափմամբ:

Չի եԹէ միաբանէին տարերքս,
Գուցէ որ 'ի կարճամտաց և Աս-

տուած անապական զոտսս կարծէր. և թողեալ զարարիչն՝ արարածոյս զերկրպագութիւն մատուցանէր. վասն այնորիկ որ արար զսա, զգուշացաւ յառաջագոյն. զի հայեցեալ մարդիկ 'ի յանգիմանութիւն ապականացու տարերացս, անապական միայն զկառավար սորա իմասցին, զմի և ոչ զերկուս. զնոյն արարիչ չորեքկին նիւթոյս, յորմէ ամենայնքս ծննդագործին հրամանաւ արարողին իւրեանց: Եւ շրջագայութեամբք չորեք յեղանակք կատարեալք՝ գործէն զտարեւոր սպասաւորութիւնն, և չորեքեան հային կամայ ակնարկելոյ արարչին իւրեանց. և անդգայութեամբ լծեալ են 'ի գործ հարկաւորութեանն՝ չյափշտակելով զկարգ սլասուռոյն 'ի միմեանց:

Եւ ահա պարզաբար ասացեալ գիւրատար լուսաւորութիւն յականջս ամենեցուն: Զի այն որ հուրն է, գոյացութեամբ և զօրու-

թեամբ խառնեալ է յերիսն եւ մասունս. իբրեւ գտանի ջերմութիւնն յուրագոյն 'ի քարինս և յերկաթս, և սակաւագոյն յօդ և 'ի ջուր, և ինքն առանձին ուրեք ոչ երեւի: Իսկ ջրոյն բնութիւն գոյ առանձինն, գոյ և 'ի խառնուածան երիցն եւս մասանցն. յուրագոյն 'ի հողաբոյսս և սակաւագոյն յօդ և 'ի հուր: Իսկ օդն թափանցանց է ընդ հուրն և ընդ ջուրն, և 'ի ձեռն ջրոյն ընդ կերակուրս աճեցականս:

Եւ այսպէս խառնեալ են տարերքս այս, և գոյացեալ իբրեւ զմի մարմին, և ոչ կորուսեալ զիւրաքանչիւր բնութիւնս, և ոչ երբեք զկայան առեալ հակառակութեամբ, հայեւով 'ի մի իշխանն միխառնն, որ զխառնուածան յարմորեալ կառմէ առ 'ի բնակութիւն կենդանեաց ամենեցուն, և տեւողութիւն յարակայութեան բոլոր աշխարհիս:

Իսկ եթէ տուանք անբան աշխարհս այսպէս հոգ տանի Աստուած, որ-

չափ եւս առաւել առ բանաւոր աշխարհս՝ մարդս: Չոր և ձեր ոմն քաջ յիմաստնոցն ասաց, եթէ Սիհրն աստուած մայրածին է 'ի մարդկանէ, և թագաւոր աստուածազաւակ է և համհարդ քաջ եօթներորդաց աստուածոց: Եթէ հաւատալ արժան է առասպելաբանութեանդ, զոր դուք և գործովք իսկ կատարեալ ցուցանէք 'ի դէնիգձերում, մէք ոչ եւս առասպելացն հաւատամք. այլ աշակերտք եմք մեծին Մովսիսի մարգարէին, ընդ որում Աստուած խօսեցաւ 'ի մորենւոյն 'ի Սինէ, և դէմ՝ յանգիման օրէնս գրեաց և ետ ցնս. և ծանոյց զնիւթեղէն աշխարհն իբրեւ զարարածս, և զիւր աննիւթ էութիւնն՝ արարիչ նիւթոցս յոչընչէ. և զերկիրս երկրաւորօքս և զերկինս երկնաւորօք ծանոյց նմա, զի գործք ձեռաց նորա են: Բնակիչք երկնի՝ հրեշտակք, և բնակիչք երկրի՝ մարդիկ. բանաւոր՝ մարդ և հրեշտակ

միայն, և Աստուած 'ի վեր քան զերկինս և զերկիր:

Եւ ամենայն արարածք անբանութեամբ կատարեն զհրամանս պատուիրանի նորա, ոչ երբեք անցանեն ըստ եղեալ սահմանն իւրեանց. բայց մարդ և հրեշտակ ազատ թողեալ 'ի կամս անձին իւրոյ, քանզի մտաւորք են, եթէ կայցեն 'ի հրամանի նորա՝ անմահք են և որդիք Աստուծոյ: Չբոլոր արարածս տուեալ է 'ի ծառայութիւն, զերկիրս մարդկան և զերկինս հրեշտակաց. ապա եթէ ստուենդանիցեն և անցանիցեն ըստ հրամանաւ, զընդդէմն գործեսցեն Աստուծոյ, յիւրաքանչիւր պատուոցն զանարգանս ընկալցին. զի երեւեսցի տէրութիւնն անբամբաս, և յանցաւորքն ամօթալից յանցանացն:

Իսկ եթէ դու 'ի տգիտութեան վրիպեալ ես, ես որ հաստատուես դիտեմ՝ ոչ կարեմ գալ զկնի քո մոլորութեանդ: Եթէ աշակերտիմ

անուսուսուսութեանդ, երկոքինս
յանգիւտ կորուստն մատնիմք, թե-
րեւս ես չարագոյն քան զքեզ.
քանզի վկայ ունիմ ինձ զինքնա-
սաց ձայնն Աստուծոյ. Մառայ, ա-
սէ, որ ոչ գիտէ զկամս տեառն իւ-
րոյ, և արժանի գանի ինչ գործ
գործէ, ըմպել ըմպէ քան, այլ սա-
կաւագոյն. իսկ որ տեղեկագոյն է
կամաց թագաւորին, և յանցանէ
ինչ առաջի նորա, առանց բարեխօ-
սի բազմապատիկ տանջի:

Արդ ազաչեմ զքեզ և զամենե-
սեան՝ որ ընդ քոյով իշխանու-
թեամբ են, մի դու ընդ իս բազմա-
պատիկ տանջիր, և ոչ ես ընդ քեզ
սակաւագոյն. այլ ես և դու և ա-
մենայն բազմութիւնդ հանգերձ ա-
րի թագաւորաւդ այնպէս աշակեր-
տեսցուք աստուածային դրոց, զի
'ի տանջանացն ապրեսցուք, և
զդժոխս արհամարհեսցուք, և յան-
չէջ հրոյն զերծանիցիմք, և զտրբա-
յութիւնն ժառանգիցիմք, և ան-

ցաւոր կենօք զանանց մեծութիւնն
անվախճան ունիցիմք: Բայց յորմէ
դուդ զարհուրեալ ես՝ դիւրահա-
ւան լեր, և վաղվաղակի աշակերտիս
Ճմարտութեանն:

Ոմն 'ի հրեշտակաց յանմահիցն
գնդէն ստամբակեալ և 'ի բաց գնաց
յերկնից. 'ի մեր աշխարհս եկեալ՝
պատիր բանիւք և սուտ խոստամբ
զանլինելի յոյսն առաջի գնէր, իբ-
րեւ տղայ մանկան, անփորձ և ան-
կիրթ նորաթէք մարդոյն, 'ի վեր
հայեցուցանելով զմիտս նորա ու-
տելով 'ի պտղոյ ծառոյն, յոր
հուպն չհրամայեաց երթալ, զի լի-
ցի աստուած: Իսկ նորա մոռացեալ
զպատուիրանն Աստուծոյ, խաբե-
ցաւ զինի մոլար խաբէութեանն.
կորոյս զոր ունէր զփառս անմահու-
թեանն, և չեհաս երազալոյս կար-
ծեացն: Վասն որոյ և մերժեալ 'ի
կենաց տեղոյն, ընկեցաւ յապա-
կանելի աշխարհս՝ յորում և դուքս
էք բնակեալ այժմ, և ցնորեալ մո-

լորիք զինի նորին խրատտուի. ոչ եւս ուտելով 'ի պատուիրեալ ծառոյն, այլ զարարածս աստուած աւետիկ, և անխօս տարերցս երկիր պագանելով, և անորովայն գիւաց կերակուր մատուցանելով, և յարարէն բողբոցուց 'ի բաց լինելով:

Ոչ յագի չար խրատտուն, այլ կամի՝ զի քան զինքն չարագոյնս արացէ: Քանզի գեւքն ոչ եթէ բռնաբար զոք վարեն 'ի կորուստ, այլ զմեղսն քաղցրացուցանեն 'ի կամս մարդոյն, և ողբանօք որսան զանուամոնես 'ի խաբէութիւն, որպէս բազում մարդիկ զընկերս իւրեանց 'ի գողութիւն և յաւազակութիւն. իբր ոչ եթէ բռնի ինչ վարելով, այլ պատիր խաբէութեամբ տան գործել բազում չարիս, զոմանս 'ի կասարգութիւն և զոմանս 'ի պոռնրկութիւն և զոմանս յանթիւ 'ի բազում յայլ իրս աղտեղութեան: Եւ արդար գատաւորօք վրէժ առ

նուն մահու չափ. իբր ոչ եթէ բարի աստուծոյ դատաւորք իցեն բարեգործ, և չարին՝ չարագործ. զի բազում անգամ է՝ զի 'ի բարի մարդկանէ չարք լինին, և յետոյ 'ի չարագունից անտի կատարելագոյն բարիք:

Եւ գատաւորք ստոյգ, որք դատին զչարագործս, ոչ եթէ չարք անուանին և չարչարիչք, այլ յոյժ բարիք և բարեգործք. և բնութիւն մի է, և ոչ երկու. իսկ 'ի միոջն անտի գործք երկուութեան երեւելին. ոմանց սատակիչք, և ոմանց պարգեւատուք: Եւ եթէ առ մարդիկ այս պաշտի 'ի ձեռն թագաւորական վիճակին խրատու ինամ տանել իւրում իշխանութեանն, որչափ եւս առաւել Աստուծոյ բողբոց աշխարհս, որ ընդ ամենեցուն կեանս կամի, և ոչ ընդ մահ: Իսկ ուր բազմացաւ յանցաւորութիւն, տանջեաց զամենեսեան մահուամբ. իսկ ուր եղեւ ունկնդրութիւն

հնազանդութեան, շնորհեաց պարգեւս անմահութեան:

Այն է Ճշմարիտ Աստուած՝ բոլորեցունց մեր արարիչ, զոր գու աներեսանակ արձակ բերանով՝ անասն աներկիւղ համարձակ հայհոյես. թողեալ զՅիսուս Քրիստոս զփրկական անուէն, Փանդուրակայ որդի անուանես, և մարդ մոլորեցուցիչ կարծես. և զերկնաւոր փրկութիւնն աղաւաղես և անարգես՝ ի կորուստ անձին և բոլոր աշխարհիս: Զոր տալոց և հատուցանելոց էս զանանցական վրէժ տանջանացն յանչել հուրն սպառնացեալ գեհենին, հանդերձ ամենայն գործակցօք քոյովք, առաջնովք, միջնովք և վերջնովք: Այլ մեք այսպէս գիտեմք զԱստուած, և ՚ի սոյն հաւատամք յաներկբայս:

Եւ որ արար զաշխարհս, նոյն եկն և ծնաւ ՚ի սուրբ կուսէն Մարիամայ, յառաջագոյն նկատելով մարգարէիցն, առանց իրիք պատճառաւ

նաց մարմնաւոր կարգի: Որպէս յոչնչէ արար զայս մեծամարմին աշխարհս, սոյնպէս առանց իրիք մարմնական միջնորդի ան զմարմինն յանփորձ կուսէն Ճշմարտիւ, և ոչ առստուերագիր երեւմամբ: Էր Աստուած Ճշմարտիւ, և եղեւ մարդ Ճշմարտիւ. ոչ ՚ի լինելն մարդ՝ կորոյս զաստուածութիւնն, և ոչ ՚ի կալ մնալ Աստուած՝ անաղաղեաց զմարդկութիւնն, այլ նոյն և մի: Այլ քանզի ոչ կարեաք տեսանել զանտեսանելին և մերձենալ յանմերձենալին, եկն եմուտ ընդ մերով մարդկութեամբս, զի և մեք մտոցուք ընդ նորա աստուածութեամբն: Ոչ անարգանս ինչ համարեցաւ զգեւնուլ զիւր ստեղծուած մարմինս, այլ մեծարեաց իբրեւ աստուածաստեղծ զիւր գործ: Ոչ առ սակաւ սակաւ շնորհեաց ինչ սմա զանմահութեան պատիւն, իբրեւ զանմարմին հրեշտակաց, այլ միանգամայն զբոլոր բնութիւնն մարմնով՝

չնչով և հոգևով զգեցաւ, և միաբանեաց ընդ աստուածուծեանն. միուծիւն, և ոչ երկուուծիւն. և այսուհետեւ մի գիտեմք զաստուածուծիւնն, որ յառաջ էր քան զաշխարհս, նոյն և այսօր:

Այս Յիսուս Քրիստոս՝ որ յիւր մարմինն փրկեաց զբոլոր աշխարհս, սա եկն կամաւ 'ի մահ. և որպէս ինքն աստուածուծիւնն գիտէ, թանձրացաւ յանարատ կուսէն, և ծնաւ և պատեցաւ 'ի խանձարուրս և եղաւ 'ի մսուր, և շարժեաց ամ զմոգսն յարեւելից յերկրպագուծիւն. սնաւ իբրեւ զտղայ կաթամբ, աճեաց և մեծացաւ ամս երեսուն, մկրտեցաւ 'ի Յովհաննէ 'ի յամլորդւոյն 'ի Յորդանան գետ: Արար նըշանս մեծամեծս և արուեստս 'ի մէջ շրէիցն, մատնեցաւ 'ի քահանայից, դատաւարտեցաւ 'ի Պիլատոսէ պոնդացւոյ: Խաչեցաւ, մեռաւ, թաղեցաւ, յարեաւ յաւուր երրորդի, երեւեցաւ երկոտասան ա-

շակերտացն և այլոց բազմաց աւելի քան զՀինգ հարիւրոցն: Եւ շրջելով ընդ նոսա զաւուրս քառասուն՝ վերացաւ յերկինս 'ի լեռնէն ձիթեանեաց յանդիման իւրոց աշակերտացն, ել և նստաւ 'ի հայրենի աթոռն: Խոստացաւ երկրորդ անգամ գալ ահաւոր զօրուծեամբ յարուցանել զմեռեալս, նորոգել զբոլոր աշխարհս, առնել դատաստան արդար 'ի մէջ արդարոց և մեղաւորաց, տալ պարգեւս արժանաւորաց, և հատուցանել պատիժս չարագործաց՝ որ այսմ ամենայնի բարերարուծեանց ոչ հաւատան:

Յայսմ հաւատոց զմեզ ոչ ոք կարէ խախտել, ոչ հրեշտակք և ոչ մարդիկ, ոչ սուր, ոչ հուր, ոչ ջուր, ոչ ամենայն զինչ և են դառն հարուածք: Ամենայն ինչք և ստացուածք մեր 'ի ձեռս քո, և մարմինք մեր առաջի քո կան, ըստ կամաց քոց արա զինչ և կամիս: Եթէ սովին հաւատովք թողուս, ոչ

յերկրի այլ աէր փոխանակեմք ընդ քեզ, և ոչ յերկինս այլ Աստուած փոխանակեմք ընդ Յիսուսի Քրիստոսի, որ չիք այլ Աստուած բայց 'ի նմանէ: Ապա եթէ յետ այսր մեծի վկայութեան այլ ինչ հարցանես, աւասիկ կամք, զբոլոր մարմին տուեալ 'ի ձեռս քո. վազվազակի աւրա զինչ և կամիս: Ի քէն տանջանք, և 'ի մէնջ յանձնառութիւնք. ռուք քո, և պարանոցք մեր: Չեմք ինչ լաւ մեք քան զառաջինսն, որ յայսր վկայութեան վերայ եդին զինչս և զստացուածս և զմարմինս իւրեանց:

Զի եթէ անմահք իսկ էաք, և մարթ էր մեզ մեռաննել վասն սիրոյն Քրիստոսի, արժան էր. քանզի և նա անմահ էր, և այնչափ սիրեաց զմեզ, մինչեւ մահ 'ի յանձն էառ, զի և մեք նորա մահուամբն յաւիտենական մահուանէն ապրեսցուք: Եւ եթէ նա յիւր յանմահութիւնն ոչ ինայեաց, մեք զի կամօք եղաք մահկանացուք, կամօք մեռցուք

վասն սիրոյ նորա, զի կամօք յանձն առցէ զմեզ յիւր յանմահութիւնն. մեռցուք իբրեւ զմահկանացուս, զի ընկալցի զմեր մահն իբրեւ զանմահից:

Այլ դու յայսր ամենայնի այլ զմեզ մի հարցաներ. զի ոչ եթէ ընդ մարդոյ է ուխտ հաւատոց մերոց, եթէ պատրիցիմք իբրեւ զտղայս. այլ անլուծութեամբ ընդ Աստուծոյ, որում չիք հնար քակտել և 'ի բաց ելաննել, ոչ այժմ և ոչ յապա և ոչ յաւիտեանս և ոչ յաւիտենից յաւիտեանս:

Ի սմին մեծի հաւանութեան ամենայն բազմութիւնն միաբանեաց 'ի մեծամեծաց մինչ ցփոքունս. անսուտ երգմամբ եդին վկայութիւն կենօք և մահու 'ի նմին կալ հաստատուն:

Եւ իբրեւ եհաս նամակն յարքունիս, և ընթերցան 'ի մեծի խոնաստանի յանդիման ամենայն բազ

մոլթեան կարաւանին, բազումք
այնոքելի էին՝ որ իբրեւ լսէին՝ գո-
վէին զպատասխանին: Թէպէտ և
երկնչէին յահէ տերուութեանն, սա-
կայն՝ ի ծածուկ առ միմեանս զնոյն
վկայութիւնս գովուցութեանց տային.
առաւել քան ընդ ճարտարաբա-
նութիւնն, ընդ համարձակութիւն
աներկիւղութեանն զարմանային:
Եւ բազումք ահաբեկեալք սկսան
զրահել պնդապէս. և զնոյն շնչիւն
լսէին յամենայն շրթանց:

Իսկ չարասէր մոգպետն հանդերձ
մեծ հազարապետան շնչեաց չա-
րախօսութիւն, և բորբոքեաց ըզ-
թագաւորն իբրեւ զհօւր անշիջա-
նելի: Եւ սկսաւ կրճուել զատա-
մունան իբրեւ զօրհասական վիրա-
ւոր. և յայտ յանդիման ձայնար-
կեաց առ մեծ հրապարակին և ա-
սէ. Քիտեմ՝ ես զչարութիւն բազ-
մութեան մարդկանս, որ թերահա-
ւատեն ՚ի մերոց օրինացս, և զկնի
կախարդութեան մոլորեալ են ան-

դարձութեամբ: Եւ իմ եղեալ է ՚ի
մտի, թէ ոչ ումեք թողացուցից ՚ի
մեծամեծ հարուածոցն, մինչեւ ա-
կամայ ՚ի բաց կայցեն յայնպիսի
վրիպական օրինաց. եթէ ոք կարի
՚ի մերձաւորաց իցէ, զնոյն անցս և
ընդ նոսա անցուցից:

Յայնժամ ծերն դառնացեալ
բանս ՚ի ներքս ընկէց, և ասէ ցթա-
գաւորն. Առ ի՞նչ է քոյ այդ մեծ
տրամոլութիւնդ. զի եթէ կայսր չե-
լանէ ըստ քո հրաման, և Հոնք կան
քեզ ՚ի ծառայութեան, ո՞ր մարդ է
յերկրի՝ եթէ կարող է ընդդէմ
դառնալ քում հրամանիդ: Տիրա-
բար հրաման տուր ՚ի ներքս, և ա-
մենայն որ զինչ և ասես՝ վաղվաղա-
կի կատարի:

Եւ անդէն թագաւորն ՚ի ներքս
կոչեալ զգալրապետն, հրամայէր
գրել հրովարտակ. և ոչ եւս ըստ
սովորութեանն, այլ բանս զայրա-
գինս իբր առ ատելիս և անպիտանս,
չյլ շէլով ամենեւին զմեծամեծ վաս-

տակա տիրասէր մարդկանն . այլ միայն կոչոյ չրաման տուեալ յա-
կանէ յանուանէ զարս՝ զոր ինքն
ճանաչէր, որոյ անուանքն են այս .
'ի տոհմէն Սիւնեաց Վասակ անուն,
'ի տոհմէն Արծրունեաց Ներշա-
պուհ անուն, 'ի տոհմէն Ռըշտու-
նեաց Արտակ անուն, 'ի տոհմէն
Խորխոռունեաց Գաղէշոյ անուն,
'ի տոհմէն Մամիկոնենից Վարդան
անուն, 'ի տոհմէն Մոկաց Արտակ
անուն, 'ի տոհմէն Ապահունեաց
Մանէճ՝ անուն, 'ի տոհմէն Ամա-
տունեաց Վահան անուն, 'ի տոհ-
մէն Վահեւունեաց Գիււտ անուն, 'ի
տոհմէն Անձեւացոց Շմաւոն ա-
նուն: Չայս նախարարքս յականէ
յանուանէ կոչեցին 'ի դուռն ար-
քունի . և կէսքն առ նմա իսկ էին 'ի
կարաւանին, և այլք 'ի կողմանց
հիւսիսոյ 'ի Հոնաց պահակին . թո-
ղեալ էր զմանս 'ի նախարարացն
անդէն յաշխարհին Հայոց:

Արդ թէպէտ և ոչ համագունդ

'ի միոջ վայրի գիպեցան ամենե-
քեան, սակայն յառաջագոյն գի-
տացեալ զխորհուրդսն չարաբարոյ
բռնաւորին, և զհեռաւորան եւս
իբրեւ զմերձաւորան 'ի միոջ վայրի
առ միմեանս համարէին: Եւ 'ի
ձեռն Յովսեփու եպիսկոպոսի նո-
վին ուխտիւ հաստատեալ խաղա-
ցին գնացին յիւրաքանչիւր տե-
ղեաց 'ի դուռն արքունի: Եւ յոյժ
փուլթային վասն էղբարց և որդեաց
և սիրելի զայեկասնունդ բնակացն,
որ չարաչար կային 'ի մեծի նեղու-
թեանն: Վասն որոյ և նոքա զան-
ձինս 'ի մահ մատնեցին, ոչ ինչ զան-
գիտելով իբրեւ զանարի վատա-
սիրտս, այլ յոյժ քաջութեամբ
պնդէին զանձինս, զի թերեւս կա-
րացեն փրկել զնոսա 'ի մեծամեծ
հարուածոցն:

Եւ իբրեւ հասին 'ի դուռն ար-
քունի, և 'ի մեծի շաբաթու զատ-
կին յանդիման լինէին մեծի թա-
գաւորին: Բայց թէպէտ և տեսա-

նէին զեղբարս իւրեանց 'ի մեծամեծ վիշտս տառապանաց, որ վասն աւուրանն Քրիստոսի ճգնեալք էին պնդապէս, ոչ ինչ տրտում և տըխուր զերեսս ցուցանէին հրապարակին: Եւ որչափ նոքա զուարթագին երեւէին ամենեցուն, առաւել զարմանային չարասէրքն:

Եւ զի օրէնք էին յառաջ ժամանակաւ, յորժամ 'ի Հայոց այրուձի 'ի դուռն երթայր 'ի ձեռն պատուաւորի զօրագլխի ուրուք, այր ընդ յառաջ յղէր, և հարցանէր զողջոյն և զխաղաղութիւն Հայոց աշխարհին. և երկիցս անգամ զնոյն առնէր, և զհանգէս գնդին ինքնին տեսանէր: Եւ յառաջ քան 'ի գործ պատերազմին հասանել, զգալն իսկ առ նա՝ մեծ շնորհակալութիւն համարէր, և առաջի աթոռակցացն իւրոց և ամենայն մեծամեծացն՝ ամենեցուն գովութիւն մատուցանէր. և յիշէր զնախնեացն զվաստակս, և զառն առն քաջութիւն պատմէր նոցա:

Իսկ այն օր և ոչ մի ինչ յայցանէ ամենեւին ինչ ոչ յիշեաց. այլ իբրեւ զչարագեւ մի՝ ոչ եւս դագարէր յուղել և շարժել զբուք ձմերայնեոյ. որպէս և նմանեալ իսկ էր ծովածուփ այլէկոծ խռովութեան. և ոչ գուզնաքեայ վեր 'ի վերոյ, այլ անդստին յանդնոց բարձրանալ փրփրել կուտակել՝ վիշապաձայն որոտալով, գազանաբար գոչելով առ հասարակ դողացուցանէր զտիեզերական իշխանութիւնն, որպէս փլեալ տարածանիցի համատարած ամենայն 'ի վերայ լերանց, խորոց, ձորոց, ապականեալ միանգամայն զլայնութիւն դաշտացն վայելչութեան:

Մոնչելով բարբառ արձակեալ և ասէ. Երգուեալ իցէ իմ յարեգակն 'ի մեծ աստուածն, որ ճառագայթիւքն իւրովք լուսաւորէ զամենայն տիեզերս, և ջերմութեամբն կենդանածնէ զամենայն գոյացեալն. եթէ վաղիւ ընդ առա-

ւօտն, ընդ երեւումն սքանչելւոյն,
 ընդ իս զիւրաքանչիւր ծոռնր նմա
 ոչ կրկնեսջիք՝ խոստովանելով զնա
 աստուած, ոչ ինչ թողացուցից
 ձեզ՝ զամենայն նեղութիւնս չարա-
 րանաց ՚ի վերայ ածելով, մինչև ա-
 կամայ կատարեսջիք զկամս հրամա-
 նաց իմոց:

Իսկ հաւատացեալքն հաստա-
 տեալք ՚ի Քրիստոս, ոչ ՚ի սառնա-
 մանեաց ձմերանւոյն հովանային, և
 ոչ ՚ի անապոյ խորշակին ջեռնուին,
 և ոչ յահագին ձայնէն սարսէին, և
 ոչ ՚ի սպառնալեաց տանջանացն
 զանգիւսէին. այլ ՚ի վեր հայեցեալք՝
 զզօրութիւնն Քրիստոսի յօգնակա-
 նութիւն եկեալ տեսանէին. և
 զուարթագին դիմօք և համեստ բա-
 նիւք յառաջ մատուցեալ՝ տային
 պատասխանի թագաւորին.

Խնդրեմք ՚ի քէն, արքայ քաջ,
 ունին գիր սակաւ բանից մերոց, և
 քաղցրութեամբ լուր զոր ասելոցս
 եմք: Քանզի յիշեցուցանեմք քեզ

զժամանակն Նապօյ արքայից ար-
 քայի, որ էր հայր հաւուն քո Յազ-
 կերտի. և ետ նմա Աստուած զեր-
 կիրն Հայոց ՚ի ժառանգութիւն սո-
 վին օրինօք, որով և մեք իսկ վա-
 րիմք այժմ, և հարքն մեր և հաւքն
 հարցն մերոց կացին նմա ՚ի ծառա-
 յութեան վաստակս. և սիրով կա-
 տարէին զամենայն հրաման բանի
 նորա, և բազում անգամ ՚ի նմանէ
 մեծապարգեւք լինէին: Եւ յայնց
 ժամանակաց մինչեւ ՚ի քո հայրենի
 աթոռգ՝ և մեք զնոյն ծառայու-
 թիւն ծառայեցաք, բայց թերեւս
 քեզ լաւագոյն քան զառաջնոցն:

Ձայս ասելով ցուցանէին զքա-
 ջութիւն արութեանցն լաւագոյն
 քան զառաջնոցն ըստ զինուորու-
 թեան կարգի: Իսկ զմտից և զսա-
 կից, և որ այլ եւս էին հարկք աշ-
 խարհին, բաղմագոյն քան առ հարքն
 նորա երթայր յարքունիս, նա և ՚ի
 սուրբ եկեղեցւոյն, որ էր ազատ ՚ի
 Քրիստոս ըստ կարգի նախնեացն

մերոց 'ի սկզբանէ, և դու ընդ հարկաւ եդիր. և մէք առ սէր քոյոյ տէրու թեանդ ոչ ինչ ընդդիմացաք քեզ: Արդ վասն էր յուզեալ իցէ ցասումնս այս 'ի վերայ մեր. ասա դու մեզ զպատճառս վնասուն. եթէ օրէնքն մեր պատճառք իցեն անվաստակ լինելոյ առաջի քոյ:

Իսկ չարագեւն լի ամենայն նենգու թեամբ՝ զերեսս 'ի մի կոյս դարձուցեալ, և ասէ. Վնաս համարիմ ընդունել 'ի գանձ արքունի զհարկս աշխարհին ձերոյ, և անօգուտ զբաշու թիւն արու թեան ձերոյ. քանզի տգիտաբար մոլորեալ էք 'ի ճրջմարիտ օրինացս մերոց, և զաստուածս անարգէք և զկրակ սպանանէք և զըուրս պղծէք և զմեռեալս 'ի հող թաղելով զերկիր ապականէք, և քրտիկար չառնելով ոյժ տայք Հարամանոյ. և որ մեծ քան զամենայն, զի հանապաղ 'ի կանայս ոչ մերձենայք. և մեծապէս լինի դիւաց խնդու թիւն, չխրատելով

ձեր և չպահելով զամենայն կարգս մոգաց: Տեսանեմ զձեզ իբրեւ ըզխաշինս ցրուեալս և զվայրատեալս յանապատի. և յոյժ զեղջ է մտաց իմոց, թէ դուցէ աստուածքն բարկացեալ վասն ձեր՝ 'ի մէնջ վրէժ առնուցուն: Այլ դուք եթէ կամիք կեալ և կեցուցանել զանձինս ձեր և մեծարանօք անդրէն յուզարկիլ, զոր ասացի՝ վաղիւ վաղվաղակի կատարեցէք:

Յայնժամ՝ երանելի նախարարքն առ հասարակ զձայնս իւրեանց բարձին և ասեն յանդիման ամենեցուն. Մի դու, արքայ, և մի զայդ այլ առ մեզ ասեր. քանզի ոչ է եկեղեցի շինուած մարդոյ, և ոչ տուրք արեգական, որպէս դուդ այլ ընդ այլոյ կարծես՝ թէ աստուած իցէ. ոչ միայն զի աստուած չէ, այլ և կենդանի չէ:

Այլ եկեղեցիք ոչ են պարգեւք թագաւորաց, և ոչ արուեստ ճարտարութեանց, և ոչ գիւտք իմաստ

նոց, և ոչ աւար քաջութեան զինուորաց, և ոչ պատիր խաբէութիւնք դիւաց. նա և բնաւ իսկ աւմենեւին զինչ և ասացես յերկրաւորացն, կամ 'ի վէհից կամ 'ի վատ թարաց, բնաւ ուրեք եկեղեցի 'ի նոցանէ ոչ գտցի: Այլ շնորհք են մեծին Աստուծոյ, ոչ միում ումեք 'ի մարդկանէ տուեալ, այլ ամենայն բանաւոր ազգաց, որք վիճակեալք են 'ի բնակութիւն 'ի ներքոյ արեգականս: Հիմունք նորա եգեալ են 'ի վերայ հաստատուն վիմի. ոչ ներքինք շարժեւ կարեն, և ոչ վերինք դրդուեցուցանել: Եւ զոր երկինք և երկիր ոչ դողացուցանէ, մի ոք 'ի մարդկանէ խրոխտասցի յաղթել նմա: Հասպա, որով օրինակաւ զինչ կամիս առնել՝ կատարեա՛: պատրաստ եմք ամենեքեան առ ամենայն մեքենայս հարուածոցն տանջանաց՝ զոր սպառնացար, ոչ միայն 'ի չար չարել, այլ և 'ի մեռանել: Եւ եթէ դարձեալ եւս զնոյն բանս հարցա-

նես, 'ի միտքէ միտքէ լուիցես առաւել քան զգոյն պատասխանի:

Յայնժամ գառնացեալ քան զլէզլի թագաւորն, փլուզանէր անդէն 'ի փորին զծով կամաւոր մաղձոյն իւրոյ. և ընդ քիթան և ընդ բերանն առ հասարակ գոլոշի ջերմախառն ելանէր, իբրեւ 'ի սաստիկ հնոցէ ծուխ թանձրացեալ: Եւ առ չհանդարտել սրտին իւրոյ՝ կոտորէր ըզզօրութիւն մարմնոյն, և ծակոտէր զբազմամթեր աման խորհրդոցն. ցրուէր և վասնէր զամենայն խորհումն նենգութեան: Եւ զոր ոչ երբեք կամէր իւրոց սիրելեացն յայտնել, ահամայ առաջի ծառայիցն Քրիստոսի մերկանայր և դնէր զամենայն կարգաւ:

Երեքինէր և չորեքինէր զանսուտ երդումն յարեգակն, և ասէր այսպէս. Ոչ կարէք աւերել զանխաբամուրս իմ. և ոչ որում ցանկացեալք էք՝ վազվազակի տամ գտանել ձեզ. այլ զամենեսեան զձեզ և

որ 'ի գնդիս են՝ չարաչար կապանօք 'ի Սակաստան տամ՝ անցուցանել ընդ անձանապարհ տեղիս, որ և բազումք 'ի ձէնջ 'ի խորշակէ յերթածալն սատակիցին, և մնացեալքն անկցին 'ի բերդս ամուրս և 'ի բանդս անելս: Եւ 'ի ձեր աշխարհն առաքեցից զօրս անթիւս հանդերձ փղօք, և զկին և զորդիս 'ի Խուժաստան տամ խաղացուցանել. և զեկեղեցիս՝ և զոր անուանեքն վկայարանս՝ քակեցից, քանդեցից և յապահանուծիւն դարձուցից. և եթէ ոք ընդդէմ՝ դարձեալ գտցի, կոխան եղեալ գազանաց՝ անողորմ մեռանիցի: Եւ զամենայն ասացեալս արարից և կատարեցից առ մնացորդս աշխարհին:

Եւ վաղվաղակի հրամայէր զպատուական նախարարսն հանել մեծաւ անարգանօք յերեսաց իւրոց. և զգուշուծեամբ հրաման տուեալ դահճապետին՝ առանց կապանաց յիւրաքանչիւր վանս պահել, և ինքն

զառածեալ անդրէն դառնայր անմխիթար տրտմուծեամբ զօթեաւ. նրս ագանէր: Իսկ հաւատացեալքն ճշմարտուծեամբ 'ի Քրիստոս ոչ ինչ երկմտուծեամբ թերահաւատէին յառաջին խրատուէն 'ի սուրբ վարդապետացն իւրեանց. այլ տակաւին խնդրէին հնարս իրացն, թէ որպէս զանձինս և զսիրելիս հանցեն 'ի նեղուծեանէն: Եւ բազում անգամ ջանալով, և մեծամեծացն՝ որ օգնականք էին նոցա 'ի դրանն արքունի՝ խոստմունս մեծամեծս առաջի գնէին նոցա առ 'ի յոյս կարասոյ, և ոչ սակաւ գանձս առ ժամայն ծախէին նոցա:

Եւ իբրեւ յամենայն կողմանց եկն փակեցաւ անել արգելան նոցա, յայնժամ զխորհուրդն Աբրահամոն 'ի մէջ առեալ՝ աղաղակէին և ասէին 'ի սիրտս իւրեանց. Ամենցուն մեր նուիրեալ և եղեալ զեղբարս և զորդիս և զամենայն սիրելիս ընդ կապանօք իբրեւ զՍահակ

՚ի վերայ սուրբ սեղանոյն, ընկալ Տէր զկամաւոր պատարագս մեր, և մի տար զեկեղեցի քո յայսն կատականաց անօրէն իշխանիս այսօրիկ:

Մի ոմն ՚ի ներքին խորհրդակցացն արքայի ՚ի ծածուկ ունէր զանքակ սէրն ՚ի Քրիստոս, քանզի մկրտեալ իսկ էր յաւազանն կենդանի, և մեծապէս հոգ տանէր հնարից կենաց վշտացելոցն: Եւ իբրեւ ստուգեաց Ճգրտիւ, եթէ զոր բազում սպառնացաւ թագաւորն՝ զամենայն չարիան կամի անցողցանել ընդ աշխարհն Հայոց, թէպէտ և ոչ ամենեցուն՝ այլ սակաւուց ՚ի նոցանէ ուսոյց զխրատ հնարից. զի առ անգամ մի ՚ի նեղութենէ անտի զանձինս ապրեցուցեն:

Եւ մինչ դեռ գունդ կազմէին, որ զնոսա չլօթակ արացցեն յանդարձ օտարութիւն, որպէս զբազում նախարարոն ՚ի Վրաց աշխարհէն արարին, ՚ի նմին ժամանակի

գուժկան հասանէր ՚ի կողմանցն Քուշանաց, եթէ գունդ հատաւ ՚ի թշնամեացն, որ ելին աւերեցին ըզգաւառս բազումս արքունի: Եւ այս լինէր մեծ օգնականութիւն նոցա յերկնից: Եւ անօրէնն ճեպեալ տագնապէր զայրուձին յառաջ արձակել, և ինքն փութով ստէպ ըզհետ երթայր. և ՚ի խոր խոցեալ զխորհուրդսն՝ ցրուէր զառաջին հաստատուն երգումն:

Իսկ երկիւղածացն Տեանն զայս տեսեալ, մեծաւ յուսով աղօթելով ասէին միաբան. Դու Տէր ամենայնի, որ գիտես զծածկեալս սրտից մարդկան, և յայտնի են առաջի քո ամենայն աներեւոյթք խորհրդոց, և ոչ ինչ խնդրես վկայութիւն յերեւելեաց, որպէս զի և զանգործս մեր տեսին աչք քո. արդ առաջի քո հեղումք խնդրուածս մեր: Ընկալ, Տէր, զծածկութիւն աղօթից մերոց, և կատարեա զմեզ ՚ի հաճոյս պատուիրանաց քոյ. զի ամա-

չեսցէ չարն, որ խրոխտացեալ մարտընչի ընդ մեզ իշխանութեամբ անորինին: Մարտեա, Տէր, զկամակոր խորհուրդսն նենգաւորին, և խափանեցն զկամս ամբարշտութեան նորա, և դարձն զմեզ խաղաղութեամբ խորհրդոցն անդրէն 'ի սուրբ եկեղեցին. զի մի յանկարծակի յափշտակեալ աւերեսցի չարաչար 'ի թշնամեաց:

Եւ անձամբք իւրեանց զայս ուխտ եղեալ անբակուլութեամբ ընդ Աստուծոյ, զի հաստատուն կայցեն ըստ առաջին խորհրդոցն, պատգամ 'իներբս յղէին զնոյն խրատուուն իւրեանց, իբր թէ կատարեսցին կամք անորէնութեան նորա:

Զայն իբրեւ լուաւ թագաւորն, յոյժ ցնծացեալ բերկրեցաւ, կարծեցեալ զգիսն հասանել նմա յօգնականութիւն, շրջեալ և աւերեալ զհաստատուն խորհուրդս ծառայիցն Աստուծոյ, և ահա մատուցանեն երկրպագութիւն արեգական,

պատուեալ զնա զոհիւք և ամենայն օրինօք մոգութեանն: Եւ զայն ոչ կարաց իմանալ ցնորեալն, եթէ անստուեր լոյսն արեգականն արդարութեան, սպառէր և մաշէր զխաւարային խորհուրդս նորա, և եղծեալ ապականէին զամենայն խեղաթիւր կամս նորա: Եւ կուրացեալ 'ի ճշմարիտ յայանութենէն՝ ոչ ինչ իմացաւ զպատրանս խաբէութեանն, որով վրիպեացն: Հեղոյր արկանէր առաջի նոցա զպարգեւս երկրաւորս, և վերստին ամենեցուն զպատիւս և զգահս նորոգէր, յառաջ մատուցանելով և երեւելի առնելով ընդ ամենայն տիեզերական իշխանութիւնն: Եւ անբաւաւատութեամբ ագարակս և աւանս միում միում նոցա յարքունուս շնորհէր, սիրելիս և բարեկամս կարգայր զնոսա. և առ հսարտ յանդրգնութեան մտացն կամակորութեան՝ կարծէր եթէ փոխանակիցի ճշմարտութիւնն ընդ ստուութեանն:

Եւ զայս արարեալ, բազում այրուճի գումարէր ընդ նոսա, և 'ի մոգացն ոչ սահաւս, աւելի քան զեօթն հարիւր վարդապետս յղէր ընդ նոսա, և զմեծ ոմն իշխան մոգպետ կացուցանէր 'ի վերայ նոցա: Խոնարհէր և աղաչէր պատուիրելով, թէ մինչ ես 'ի պատերազմէս դարձեալ գայցեմ՝ խաղաղութեամբ, ձեր արարեալ և կատարեալ իցէք զամենայն ըստ կամաց իմոյ: Լիւայսպէս շքով և պատուով առաջ նորդէր նոցա զերկարութիւն ճանապարհին անդրէն յերկիրն Հայոց:

Եւ ինքն աւետիս ինդալիս առաքէր յասրուշանս բազումս, գրէր և ցուցանէր մոգաց և մոգպետաց և ամենայն մեծամեծաց կողմանց կողմանց աշխարհաց, որպէս դիցն օգնականութեամբ զգործ քաջութեան իմոյ յառաջ մատուցեալ:

Իսկ խոհերականքն այնուհետեւ յարուցեալ յիւրաքանչիւր խաւարային դարանաց՝ իղձք լինէին վաղ

վաղակի զհրամանն կատարել. ձայն արարեալ յաշխարհս հեռաւորս՝ միանգամայն խաղաղ գնալ յերկիրն արեւմտից: Եւ մինչ չեւ հասեալ էին յերկիրն Հայոց, փայտ ընկենուն և վիճակս արկանէին, թէ որ լեզու որովմ՝ դասու հասցէ յաշակերտութիւն: Զի առ հասարակ հրաման առեալ էր յարքունուստ, որպէս աշխարհին Հայոց՝ նոյնպէս և Վրաց և Աղուանից և Լփնաց, Աղձնեաց և Կորդուաց և Ծաւղէից և Դասան, և որ այլ եւս ուրեք ուրեք 'ի ծածուկ յիշխանութեանն՝ Վարսից ունէին զբրիտոնէութիւն: Եւ յանզգայ յարձակմամբ յաւարի աւնուլ փութթային զգանձս սուրբ եկեղեցեացն. և իբրեւ զդեւս այնուհետեւ միմեանց պատահէին: Եւ լինէր գունդ զօրաց բազմաց, և չարասէրն սատանայ իբրեւ զօրավար 'ի մէջ նոցա երեւէր, և անդադար յորդորելով զամենեսեան ճեպեալ փութացուցանէր: Կէտ է

դեալ զժամանակն՝ զամիսն վեցե-
րորդ, տադնապէին և ստիպէին ար-
քունի հրամանաւ:

Մինչեւ 'ի նաւասարդէ՝ նաւա-
սարդ, ասէ, յամենայն տեղիս՝ ուր
լիցեն ընդ իշխանութեամբ թագա-
ւորին մեծի, բարձցին կարգ եկեղե-
ցոյ, փակեսցին և կնքեսցին դրունք
սուրբ տաճարացն, դրով համարով
առցին նուիրեալ սպասքն յարքու-
նիս, լռեսցեն ձայնք սաղմոսացն և
դադարեսցեն ընթերցուածք ան-
սուտ մարգարէիցն: Քահանայք մի
իշխեսցեն 'ի տունս իւրեանց ու-
սուցանել զժողովուրդս, և հաւա-
տացեալքն 'ի Քրիստոս արք և կա-
նայք՝ որ բնակեալ են յիւրաքան-
չիւր մենանոցս, փոխեսցեն զհան-
դերձս իւրեանց ըստ աշխարհական
կարգաց:

Իարձեալ և կանայք նախարա-
րացն կալցին զուսումն վարդապե-
տութեան մոգացն: Ուստերք և
դասերք աղատաց և շինականաց

կրթեսցին 'ի հրապարակս նոցուն
մոգաց: Կարձեսցին և արգելցին օ-
րէնք սուրբ ամուսնութեան, զոր
ունէին 'ի նախնեաց ըստ կարգի
քրիստոնէութեանն. այլ փոխա-
նակ ընդ կնոջ միոյ՝ բազում կանայս
արասցեն, զի աճեցեալ բազմացին
ազգդ Հայոց: Դստերք հարանց լի-
նիցին, և քորք՝ եղբարց. մարք մի
ելցեն յորդուոց, այլ և թուունք
ելցեն յանկողինս հաւուց:

Պատրուածակք մի մեռցին անյազ,
եթէ յօդեաց իցէ և եթէ յայծեաց
և եթէ յարջառոց և եթէ 'ի հա-
ւուց և եթէ 'ի խողաց: Հայսք ա-
ռանց փանդամի մի զանդցին, ծիւղք
և քակորք 'ի կրակ մ' եկեսցեն,
ձեռք առանց գոմիլոյ մի լուսացին.
Ննջրիք և աղուեսք և նապաստակք
մի մեռցին: Սձք և մողէզք, գորտք
և մրջմունք, և որ այլ եւս խառնա-
փրնդոր բազմաճճիք են, մի կայ-
ցեն. այլ վաղ թուով համարով 'ի
մէջ բերցեն ըստ արքունի չափոյն:

Եւ որ այլ եւս ինչ սպասք իցեն, կամ զոհից կամ սպանդից, ըստ տօնական կարգին՝ տարեւոր թուականին, և ըստ կապճաթիւ մոխրաչափ կարգին:

Չայս ամենայն որ ասացաք, առ ժամանակ մի մինչեւ 'ի գլուխ տարւոյ կատարեսցեն ամենեքեան. և զայլն ամենայն առ յապա պատրաստեսցեն:

Իսկ զայս ամենայն հրամանս պատուիրանաց առեալ մոգաց և մոգպետաց, զտիւ և զգիշեր փութային հասանեւ յաշխարհն Հայոց. և առ յոյժ խնդութեանն ոչ երբէք յագէին երկայնութեամբ ճանապարհին:

ԵՐՐՈՐԴ ՅԵՂԱՆԱԿ

ՎԱՍՆ ՄԻԱԲԱՆՈՒԹԵԱՆ ՍՈՒՐԲ

ՈՒԽՏԻՆ ԵԿԵՂԵՑԻՈՅ

Թեպէտ և ոչ իցեմք բաւականս սակ զամենայն չարիան, որ անցք անցին անդէն 'ի կարաւանին ընդ գունդն Հայոց, սակայն և ոչ լուել կամիմք ծածկելով զվիտս նեղութեանն. այլ ասասցուք փոքր 'ի շատէ, զի ձայնակիցք լիցուք այնուցիկ, որք դառնապէս զմեզ ողբալին. զի և գու իբրեւ լուիցես, ոչ սակաւ արտասուս հեղուցուս 'ի վերայ ազգին թշուառութեան:

Չի ահա անդէն 'ի մեծ բանակին Պարսից՝ յազգաց ազգաց, որք են հաւատացեալ 'ի սուրբ աւետարանն Քրիստոսի, իբրեւ տեսին ըզչար յանձնառութիւնն Հայոց, յոյժ հարան 'ի միտս իւրեանց, և

կործանեցան անկան 'ի վերայ գիմաց իւրեանց: Բազումք 'ի նոցանէ թաղծեալք 'ի սուգ ծանրութեան, հարեալ յոգիս և դառնացեալ յարտասուս, եկին և յանգիմանեցին զնախարարեանն, և յոյժ դարովեցին զուխա քահանայութեանն: Զզուէին զամենեսեան և ասէին. Զի՞ առնիցէք զսուրբ կտակարանագ, և կամ յո՞ տանիցէք զսպաս տերունեան սեղանոյն. մոռանայցէք արդեօք զհոգեւոր օրհնութիւնսդ, և կամ լռեալ դադարիցէք 'ի մարգարեական ձայնիցդ: Ապիուցէք զաչս յընթերցուածոց, և խցէք զականջս 'ի լսելոյ. միթէ զմտացդ անմոռացութիւն ո՞չ յիշիցէք. զի՞նչ առնիցէք զսպասութեանս 'ի Տեառնէ. Որ ուրասցի զիս առաջի մարդկան, յուրաստ եղէց և ես առաջի հօր իմոյ, որ յերկինս է, և հրեշտակաց սրբոց:

Վարդապետք էլք առաքելական քարոզութեանցն, արդ աշակերտք

լինիցիք մոլոր խաբէութեանն: Ուսուցիչք էլք ճշմարտութեանն, արդ ուսուցանէք զսպասիւր խաբէութիւն մոգաց: Քարոզք էլք արարչական զօրութեանցն, արդ զտարերս աստուածս խոստովանիք: Յանգիմանիչք էլք ստութեան, արդ և քան զսուան ստագոյնք լինիցիք: Ի հուր և 'ի հոգի էլք մկրտեալք, արդ 'ի մոխիր և յաճիւն թաթաւիցիք. կենդանի մարմնով և անմահ արեսմք էլք սնեալ, արդ 'ի ճենճեր զոհից և 'ի շարաւս աղտեղիս մրձոսիցիք: Տաճար էլք Հոգւոյն սրբոյ, արդ զոհարան գիւաց լինիցիք. քրիստոսագգեացք էլք 'ի մանկութենէ, արդ մերկացեալք 'ի փառացն գիւաբար արեգական կաբաւիցէք. ժառանգ էլք արքայութեանն, արդ անձամբ զանձինս արկէք 'ի ժառանգ գեհէնին: Նոցա է սպառնացեալ հուրն անշէջ, ընդէր դուք ընդ նոսա այրեցեալ տոչորեցայք. նոցա պարարի որդն անմահ, իսկ

արդ դուք պարարիցէք զմարմինս
 ձեր նմա 'ի կերակուր. խաւարն
 արտաքին նոցա թանձրացեալ պա-
 ճի, դուք լուսազգեստք ընդէր յու-
 ղարկեցալք ընդ նոսա 'ի նոյն խա-
 ւար: Նոքա 'ի վաղնջուց չետէ էին
 իսկ կուրացեալք, դուք զինի կու-
 րացն կուրացարուք. նոցա էր փո-
 րեալ զխորխորանն, դուք ընդէր
 լցէք յառաջագոյն: Ն՞րք ուսանիցիք
 զբազմաթիւ անուանս աստուածոցն
 նոցա, այն՝ որ չիք ուրեք 'ի միջի և
 ոչ մի: Թեթեւացեալք 'ի ծանր բե-
 ռանց՝ անձին անձամբ առէք զբեռն
 ծանրութեան. ազատեալք 'ի ման-
 կութենէ՝ չարաչար մտէք յանազա-
 տելի ծառայութիւնն:

Եթէ գիտէիք և երեւէր ձեզ
 յայտնի, սուգ առին երկիրք 'ի վե-
 րայ ձեր, և թաղծեցաւ երկիրս 'ի
 ներքոյ ոտից ձերոց: Հրեշտակք 'ի
 վերուստ են ձեզ բարկացեալք, և
 'ի յերկրէս մարտիրոսքն են ձեզ ցա-
 սուցեալք: Ողորմիմ՝ ողորմիմ սիրե-

լեաց ձերոց, և բազում անգամ ո-
 ղորմիմ անձանց ձերոց: Այլ թէ
 մարդոյ փրկեալ էր զձեզ 'ի ծառա-
 յութենէ, և դուք անձամբ զան-
 ձինս այլում 'ի ծառայութիւն ար-
 կանէիք, 'ի մեծ բարկութիւն բըր-
 դէիք զառաջին տէրն ձեր: Իսկ արդ
 զի՞նչ առնիցէք զաստուածասաստ
 հրամանն. Ես եմ Աստուած, և չիք
 այլ ոք բայց յինէն, և ոչ զինի իմ
 այլ ոք լիցի Աստուած. Աստուած
 նախանձոտ եմ ես, հատուցանեմ
 զմեղս հարց յորդիս, մինչեւ յետին
 դար: Իսկ եթէ որդիքն արդարք
 վասն հարցն մեղաց ընդունին զա-
 տակումս, յորժամ ինքեանք որ-
 դիքն իսկ մեղիցեն, ո՞չ ահա միան-
 գամայն զանձանց և զհարցն տայցեն
 'ի միասին:

Դուք էիք մեր ամուր պարիսպ ա-
 պաստանի. յորժամ աստի վտանդ
 հասանէր, առ ձեզ յանդորր ելա-
 նէաք. արդ մեծ ամուրդ այդ հիմն
 'ի վեր տապալեցաւ: Դուք էիք մեր

պարծանս առ թշնամիսն ճշմարտու-
թեան, արգ դուք էք մեր նախա-
տինք առ նոյն թշնամիս: Յայժմ՝
վասն ձերոյ ճշմարիտ հաւատոցն և
'ի մեզ փոքր 'ի շատէ խնայէին. և
արգ 'ի պատճառս ձեր և զմեզ անո-
ղորմ դատին: Ոչ միայն զանձանց
դատաստան տալոց էք առաջի ա-
հեղ ատենին Աստուծոյ, այլ և
բազմաց ամենեցուն՝ որ 'ի ձեր
պատճառս և զնոսս եւս չարչարե-
ցեն:

Զայս և առաւել քան զսոյն խո-
սեցան ընդ մեծամեծս աւագան-
ւոյն, և յաւելին ցաւս 'ի վերայ
ցաւոց: Յայտնել և ցուցանել նոցա
զխորհուրդն ոչ կամէին, լռել և
չառնել պատասխանի անհնար էր.
Հեղձամղձուկ եղեալ մեծապէս
յարտասուս հարկանէին: Ընդ նո-
սին դառնացեալ լսողք և տեսողք
յանմխիթար սուգ լինէին ամենե-
քեան:

Յայնմ ժամանակի քահանայքն՝

որ էին անդէն 'ի զօրուն, առ չժու-
ժալ սրտիցն բարկուծեան քա-
կեալ որոշեցան 'ի նախարարացն և
յամենայն բազմութենէն. և զմի
ոմն դեսպան ձիով առաքեցին փու-
թապէս յաշխարհն Հայոց: Քոյժ
'ի բերան առեալ և զօձիս պատա-
ռեալ, հասեալ 'ի ժողովս եպիսկո-
պոսացն, մեծապէս յարտասուս
հարեալ, կայր և պատմէր զամենայն
անցս չարչարանայն. այլ ոչ յայտ-
նէր նոցա զձածկութիւն խորհր-
դոցն:

Յայնմ ժամանակի սփռեցան ե-
պիսկոպոսքն յիւրաքանչիւր իշխա-
նութիւնս, և առաքեցին զքորե-
պիսկոպոսս 'ի Կեօղս և յագարակս և
'ի բազում ամուրս լեռնային դաւա-
ռացն: Արդեցին ժողովեցին զբազ-
մութիւն արանց և կանանց, շինա-
կանաց և ազատաց, զքահանայից և
զմենակեցաց. խրատ եղին, պնդե-
ցին և արարին զամենեսեան զի-
նուորս Քրիստոսի:

Եւ յառաջին բան խորհրդին այս
հաստատեցաւ. Ձեռն եղբօր հարա-
զատի 'ի մերձաւոր իւր լիցի՝ որ ան-
ցեալ իցէ ըստ ուխտ պատուիրա-
նին Աստուծոյ. և մի խնայեսցէ
հայր յորդի, և մի ակն առնուցու
որդի հօր պատուոյն: Աին կռուես-
ցի ընդ առն ամուսնոյ, և ծառայ
դարձցի ընդդէմ տեառն իւրոյ: Ս-
րէնք աստուածային կացցեն թա-
գաւոր 'ի վերայ ամենայնի, և 'ի
նմին օրինաց ընկալցին յանցաւորք
զպատիժս դատապարտութեան:

Եւ իբրեւ այս այսպէս հաստա-
տեցաւ կազմեցաւ, երեւեցան ամե-
նեքեան զինեալք և սաղաւար-
տեալք, սուր ընդ մէջ և վահան 'ի
ձեռին՝ ոչ միայն արանց քաջաց,
այլ և կանանց առնականանց:

Իսկ գունդն Հայոց ամենայն օգ-
նականօքն հանդերձ և մոգացն բազ-
մութեամբ յամսեանն չորրորդի ե-
կին հասին յաշխարհն Հայոց, 'ի
գիւղաքաղաք մի մեծ՝ որում անուն

էր Անդղ: Բանակեցան, բոլորեցան,
զետեղեցան, և յամենայն կողմանց
անդր ժողովեցան, և էին անթիւ
բազմութիւն:

Եւ եղև յետ աւուրց քսան և
հնգից, մոգպետն ինքնին մոգօքն
հանդերձ հասանէր մեծաւ զօրու-
թեամբ՝ քակել զգրունս եկեղե-
ցւոյն յաւուր միաշաբաթուն. ըզ-
փորձ առնուլ կամէր զառաջարկու-
թեան գործոյն: Իսկ սուրբն Ղե-
ւոնդ երէց միաբանութեամբ առա-
ջին խորհրդակցօքն և բազում ուխ-
տիւ 'ի տեղուջ անդ պատրաստա-
կան դիպեցաւ, ոչ ետ թոյլ: Թէ-
պէտ և ոչ էր տեղեկագոյն մտացն
ամենեցուն նախարարացն, և ոչ զօ-
րութեան ուժոյ մոգպետին, ոչ ինչ
եկաց մնաց ամենայն եպիսկոպո-
սացն, և ոչ առ սակաւ մի համբեր
անօրէն իշխանին թողացուցանել.
այլ բազում ամբօխ ազաղակի զօ-
րացն և մոգացն հասուցանէր: Քան-
զի վիրդս 'ի ձեռն առեալ՝ զկառա-

փոռնս մոգացն և մոգպետին ջարդեցին. փախտտական յիւրաքանչիւր վանս արկանէին, և ինքեանք զպաշտօնն բարձրացուցեալ յեկեղեցւոյն՝ զտերունական կանոնն կատարէին, մինչեւ 'ի նոյն միաշաբաթին անգագար լինելով:

Եւ յետ այս տագնապի խռովութեանն՝ յամենայն կողմանց յաշխարհէն Հայոց բազմութիւն աւանց և կանանց 'ի տեղին հասանէին: Եւ անգ էր տեսանել զմեծ աղէտ տարակուսին. ոմանք զգերարտօսըն իբր յաղբերականց հոսէին յաչաց իւրեանց. այլքն բարձրաճիչ աղաղակաւ՝ իբր այն թէ զերկինս դողացուցանէին. իսկ կէսքն խիզախելով և 'ի զէնս ընթանալով՝ զմահ քան զկեանս ընտրէին: Իսկ ոմանք 'ի սուրբ ուխտէ եկեղեցւոյն՝ զուետարանն 'ի ձեռն առեալ, աղօթիւք առ Աստուած կարգային, և այլք ըղձանային զպատառումն երկրին, զի անձանց լիցի դե-

րեզման: Եւ այսպէս շտապ տագնապի 'ի վերայ մոգպետին հասուցանէին: Բազում անգամ աղաչէր զօրնականսն իւր, զի 'ի մահուանէ կարասցեն զնս ապրեցուցանել, և ողջանգամ անդէն յարքունիս հասուցանել:

Այլ վասն գործոյն յոր եկեալն էր՝ ստիպէր զնոսա և ասէր. Թող գրեմ և ցուցանեմ մեծ թագաւորին, զի 'ի բաց թողացուցանէ զայսպիսի իրաց առաջարկութիւն. զի եթէ ինքեանք աստուածքն եկեսցեն յօգնութիւն, չէ հնար օրինացս մոգութեան 'ի Հայս առնուլ զհաստատութիւն, որպէս զփորձ առ ի միաբանութեան ուխտին եկեղեցւոյ: Զի թէ էին զօրք աշխարհիս մոգք, ոչ ինչ խնայէին սօքա 'ի նոսա սատակմամբ՝ ոչ միայն զարտաքինսն, այլ և յեղբարս և յորդիս և յամենայն մերձաւորս իւրեանց, նա և ոչ յանձինս իւրեանց: Մարգք, որ ոչ 'ի կապանաց զանգի-

տեն, և ոչ 'ի տանջանաց երկնչին, և ոչ 'ի ստացուածոց պատկառին, և որ յետին չարն է քան զամենայն չարիս. մահ քան զկեանս ընտրեն, մի է որ կարէ նոցա գիմակայ լինել:

Լուեալ իսկ իմ' էր 'ի նախնեաց մերոց, եթէ յաւուրս Շապչոյ արքայից արքայի, իբրեւ սկսաւ ուսումնոց այդ աճել և բազմանալ և ընուլ զամենայն երկիրն Պարսից, և եւս անդր յարեւելս հասանել, իսկ որ վարդապետքն էին օրինացն մերոց՝ յորդորեցին զթագաւորն, զի մի բնաւ ամենեկին բարձցին օրէնք մոգութեան յաշխարհէն, ետ հրաման սաստիկ, զի լուեալ գադարեսցէ քրիստոնէութիւնն: Եւ որչափ նա կամեցաւ արգելուլ, եւս քան զեւս աճեցին և բազմացան, և հասին մինչեւ յաշխարհն Քուշանաց, և անտի 'ի հարաւակողմն՝ մինչեւ ի հնդիկս տարածեցաւ:

Եւ այնպէս աներկիւղ և համարձակք էին յաշխարհին Պարսից,

մինչեւ յամենայն քաղաքս աշխարհին եկեղեցի շինեցին, որ զանցուցանէր պայծառութեամբ զթագաւորաբնակ արքունեօքն: Շինէին և վկայարանս իմն անուանեալ, և ըլնոյն զարդ եկեղեցեաց զարդարէին, և յամենայն տեղիս՝ յապատս և յանապատս միայնանոցս շինէին: Եւ իբրեւ ոչ ինչ երեւէր յայտնի օգնութիւն ուստեք, աճելով աճէին և բազմանալով բազմանային, և մարմնաւոր մեծութեամբ մեծանային: Չպատճառս հարստութեան մեք ինչ ոչ գիտեաք. բայց այսչափ ինչ ճշմարտիւ խմանայաք, զի տիւզերք ամենայն զկնի ուսմանց նոցա գնային:

Թէպէտ էարկ 'ի նոսա թագաւորն զձեռն իւր խստութեամբ, և զբազումս կալաւ և չարչարեաց 'ի նոցանէ, և զեւս բազումս մահուամբ սատակեաց, դառնացաւ և ձանձրացաւ յանձն իւր, և զնոսա ոչ կարաց նուազեցուցանել 'ի բազ-

մոռութենէն: Պարձեալ թէպէտ փակեաց և կնքեաց զգրուես եկեղեցեացն ընդ ամենայն աշխարհն Պարսից, նոքա զամենայն տուն եկեղեցի արարին. և յամենայն տեղոյ զիւրեանց օրէնսն կատարէին: Եւ զանձինս իւրաքանչիւր վկայարանս համարէին, և լաւագոյն զինուածս մարդկեղէնս քան զհողեղէնս հաշուէին: Սուրբ սպանողացն բթեցան, և նոցա պարանոցքն ոչ ձանձրացան. աւարառութս ստացուածոց նոցա աշխատեցան, և աւարն օրքան զօր աճեցեալ բաղմացաւ: Սրտմտեալ էր թագաւորն, և յոյժ դառնացեալ դահիճք բարկու թեանն. իսկ նոքա արթունք և զուարթունք, և խնդալից ընդունէին զամենայն հարուածս տանջանացն, և սիրով տանէին զամենայն յափշտակութիւն ընչից իւրեանց: Իբրեւ ետես թագաւորն եթէ դուռն տուեալ դիմեցին 'ի մահ իբրեւ խաշնք սուրբք յազն երկնաւ

ւոր, արգել և կարճեաց 'ի նոցանէ զհարուածս տանջանացն. և հրաման ետ մոգաց և մոգպետացն, զի մի ամենեւին ոք խուեսցէ զնոսա, այլ հաստատեալ կայցեն աներկիւղութեամբ յիւրաքանչիւր ուսմունս, մոգն և զանդիկն և հրեայն և քրիստոնեայն, և որ այլ բազում կեչտք են 'ի կողմանս կողմանս աշխարհին Պարսից: Եւ ապա սճ երկիրն զխաղաղութիւն հաստատութեամբ, և լուեալ դադարեցին ամենայն խռովութիւնք յուզմանց: Քանզի ընդ մերոյ աշխարհին շարժմանն՝ և արեւմուտք եւս մեծապէս շարժեցան, և ամենայն տաճկաստան ընդ նոսին խռովեցան:

Զայն ահա 'ի լեւոյ դիտեմք. բայց այս որ ես ինձէն աջօք տեսի, թուի ինձ՝ թէ մեծագոյն եւս լինի քան զառաջինն: Արդ դու որ մարդպանդ ես աշխարհիս, պարտ է քեզ հոգ յանձին ունել, գրել և ցուցանել յարքունիս զմիաբանութիւն

բունութեանս, որպէս աներկիւղութեամբ առ ոչինչ համարեցան ըզհրամանս արքունի: Եթէ չէր մեր աճապարեալ և 'ի փախուստ գարձեալ, միում 'ի մէնջ ոչ տային ապրել: Եւ եթէ անդէն մարդիկ այգպէս բռնացան, եթէ յանկարծ զինուորս եւս ընդ ինքեանս միաբանեցուցանեն, ո՞ կարիցէ կալ առաջի գոցա յանգուգն յարձակմանդ:

Ես ահա անտեղեակ էի անքակուխտի եկեղեցւոյդ 'ի միմեանց. զի այլ է՝ զոր լսէ մարդ, և այլ է՝ զոր տեսանէ հաստատուն իւրովք աջօք: Դու որ 'ի մանկութենէ յայդմ օրէնս սնեալ էիր, և ճմարտեալ գիտէիր զպնդութիւնդ մարդկանդ, եթէ առանց բաղում արիւն հեղլոյ դոքա մեզ ոչ տան ձեռն արկանել յեկեղեցիսդ, ընդէր ոչ զայդ ամենայն հաւաստեալ յանդիման չասացեր ցթագաւորն: Քանզի ամենայն նախարարացն աւագ դու էիր, և զբոլոր աշխարհս քեզ յանձն ա-

րարեալ էր մարդպանութեամբ. ընդէր ոչ մեծապէս հոգ տարար յանձն քո: Զի յայլ ժամս իմաստուն էիր, և ես գիտէի. զայս՝ գործ իմաստութեան ոչ գործեցեր: Ապա թէ ոչ, յայտ է եթէ դու 'ի նոցա բանի ես, և քոյով խորհրդով անցուցին զայս անցս ընդ իս և ընդ զօրս:

Արդ եթէ այդ այգպէս է, և քեզ կամք չէ ունել զմոգութիւն, մի ինչ պատկառեր դու երկիւղիւ յարքայէ. ես գրեմ և ցուցանեմ 'ի դուռն մովպեաան մովպեաի և դերանդարձապետի և մեծ հազարապետին, զի ածցեն զարքայ 'ի հաւանութիւն, որպէս զի 'ի բաց թողացուցէ ըստ առաջին հրամանին. և 'ի կամս մարդկանս ապաստան արացեն, զի առ սակաւ սակաւ ընդեւցին ընդ օրէնս մոգութեանս. զի որք կալցին՝ սիրով երեւեսցին կատարեալ զհրամանս արքունի: Քանզի մարդ է աշխարհս, գուցէ յոր-

ժամ մնաս ինչ առնիցեն, և ինքեանք ցրուեալ վատնեսցին յօտարուեթիւն. իսկ յորժամ աշխարհս թափուր լինիցի 'ի մարդկանէս, յայնժամ և քեզ գլխովին մեծապէս մնաս հասանէ յարքունուստ:

Ետ պատասխանի մարդպանն մոգպետին, և սսէ. Սմենայն բանք խրատուդ՝ զոր ասացեր, ճմարիա են. բայց զառաջինն զոր չիմացաք՝ տեսեր, և մեծապէս զղջացաք այժմ: Բայց դու արդ զոր ասեմս արա, և բարիոք թուեսցի քեզ. սակաւիկ մի երկայնամիտ լեր և զխորհուրդս քո արդէլ 'ի բազմաց, բայց արանց՝ որոց էս ասեմ, նոցա յայտնեա. մինչեւ էս ինձ ոյժ ժողովեցից զոր 'ի թիկունս ածեղոյ, և զուխտ եկեղեցւոյդ թերեւս կարացից երկփեղկել: Եւ եթէ զայդ այդպէս արարից, գիտեմ ապա թէ և զհրամանն արքունի կարող եմ կատարել:

Եւ անդէն հրոս հանեալ 'ի Սիւնեաց աշխարհէն, զիւր գունդն ըս-

տուարացոյց 'ի թիկունս օգնականուեթեան մոգաց և մոգպետին: Եւ ապա սկսաւ ասել. Սղէ դու անգամ մի հրովարտակ 'ի դուռն ասուր վասն այրուծիոյն՝ որ յԱղուանսն է տասն հազար, զի 'ի ձմերոց 'ի Հայաս եկեսցեն. և յորժամ զնոսա 'ի ձեռին ունիցիմք, չիք ոք որ եղծանել կարէ զհրամանն արքունի:

Պատասխանի ետ մոգպետն և ասէ ցմարդպանն. Սյդ խորհուրդդ արձեալ իմոյ բանիցս ընդդէմ է. քանզի մեք յորժամ բռնուեթեամբ կուուեսցուք ընդ աշխարհիս, աշխարհս 'ի բաց քանդի, և մեք 'ի սատուհասէ չապրիմք. անձանց մնաս, և արքունի մեծապէս զեան:

Եւ ոչ ինչ կամեցաւ ամենեւին ունկն գնել նմա մարդպանն, զի սքրտի մտօք կալեալ էր զսպարսկական օրէնսն: Սկսաւ այնուհետեւ պատրել զոմանս կարասուով և զոմանս ողջական բանիւք. զաամիկն ամենայն՝ ահեղ բանիւք սպառնացեալ

սրտաթափ առնէր: Հանապազորդ առատացոյց զուռճիկսն տաճարին, և յերկարէր զնուագան ուրախութեան, մաշելով զերկայնութիւն գիշերացն յերգս արբեցութեան և 'ի կաքաւս լիտութեան. քաղցրացուցանէր ոմանց զկարգս երաժշտական և զերգս հեթանոսականս. մեծապէս գոհութիւն մատուցանէր օրինաց թաքաւորին: Իերեալ էր և յարքունուստ բազմութիւն կարասւոյ, և միում միում կաշառ գաղտ խթէր 'ի պատճառս պարգելի և պատուոյ. և բազում նենգութեամբ զանմեղ մարդիկ հրասլուրէր և յինքն արկանէր:

Իսկ զայս ամենայն իբրեւ տեսին սուրբ եպիսկոպոսունքն, եւս քաջ գրգեալ յորդորեցան 'ի նոյն միաբանութիւն, և հնարագէտ իմաստութեամբ ընդ երկուս բաժանեցին զբանակն: Մանաւանդ իբրեւ հաստատեալ գիտացին 'ի միտս իւրեանց, եթէ անօրէն իշխանն Սիւ-

նեաց զօրհասական վերսն 'ի յոգիսն ընկալեալ էր, խորշեցան մերժեցան և 'ի բաց փախեան 'ի նմանէ:

Խորհուրդ արարեալ 'ի գիշերի միում ամենայն ուխտին բազմութեամբ, կոչեցին և զսպարապետն ջորաց 'ի խորհուրդն. հարցին և քննեցին և 'ի վերայ հասին մտացն անշարժութեան, որոյ ոչ սակաւ մի թերացեալ էր 'ի սիրոյն Քրիստոսի: Եւ միաբան աղօթս արարեալ 'ի վերայ նորա, վերստին ընկալան զնա յառաքինութիւն: Եւ նովաւ որսացեալ զբազումս 'ի նոյն միաբանութիւն, որք ոչ էին քակեալ յառաջին միաբանութեանէն, եկին և ժողովեցան գունդ ջորաց բազմաց: Եւ եւս առաւել հեռագոյն զատան 'ի մոգացն և 'ի մոգպետէն և յանօրինէն վասակայ:

Իսկ նա այնչափ յիմարեցոյց և ափշեցոյց զմիտս մոգպետին, մինչեւ չետ նմա իմանալ զելս իրացն: Սկսաւ բաշխել մոգս 'ի տունս նա-

խարարացն և մեծամեծ ռոճիկս կարգել, զոհել պատրուճակս, և բռնաբար կնքաւոր մարդկանն տալ ուտել միս յաղածոյ, և երկիր պագանել արեգական: Իբրեւ սկսաւ բազմանալ ընդ ամենայն աշխարհն այնպիսի պղծագործ խառնակութիւն, յանդգնեցան և եւս կանայք փշտիպանացն յաւուր կիրակէի անցուցանել զճրագունս եկեղեցւոյն և պատառել զհանդերձս հաւատաւոր կանանցն:

Չայս գուժկան աղմկի իբրեւ տեսին միաբան սուրբ եպիսկոպոսունքն, զաւետարանն ՚ի ձեռն առեալ հասին և անկան առանց հարցանելոյ ՚ի վնս սպարապետին, ուր ժողովեալ էին զօրքն Հայոց: Համբարձին զձայնս իւրեանց և ասեն. Աղաչեմք զձեզ զամենեսեան սուրբ աւետարանաւս, եթէ ձերով խորհրդիւ գործէ զայն անօրէնութեան չարիս մարդպանն և մոգպետն, նախ զմեր պարանոցս հա-

տէք, և ապա յեկեղեցին ձեռնարկեցէք. ապա թէ առանց ձեր կամաց նոքա զայն չարն գործեն, այսօր խնդրեսցի վրէժդ այդ ՚ի նոցանէ:

Իսկ որք էին ՚ի ներքս ՚ի վնս սպարապետին՝ յոտն կացին, միաբան համբարձին զձայնս իւրեանց առ Աստուած և ասեն. Դու, Տէր, սրտագէտ ամենեցուն, ոչ ինչ պիտի քեզ վկայութիւն ՚ի մարդկանէ. եթէ խոտորեալ իցեմք ՚ի քէն սըրտի մտօք, զայն դու ինքնին քաջ գիտես, այսօր իսկ գատեա զմեզ ըստ մեզաց մերոց: Ապա եթէ հաստատուն կամք յուխտի սուրբ աւետարանիս, դու, Տէր, լեր մեր օգնական այսօր, և տուր զթշնամիսն ճշմարտութեան ՚ի ձեռս մեր, զի արասցուք ընդ նոսա ըստ կամաց մերոց:

Չայս իբրեւ ասացին, ամենեքեան զգլուխ զգետնի հարկանէին. և ողջունեցան յաւետարանէն և

յեպիսկոպոսացն: Իսկ մի ոմն 'ի նախարարացն որ անդր գիպեցաւ, էր 'ի նոցա խորհրդի, և ոչ միաբանեաց ընդ նոսա 'ի մեծ վկայութիւնն. և անդէն առ ժամայն 'ի նոցունց 'ի տեղւոջն քարկոծեցաւ, և ահ մեծ անկաւ 'ի վերայ ամենեցունց:

Յայնժամ ամենեքեան 'ի նախանձ բարկութեան բրդեցան, մինչեւ ամենայն տեսողացն երիկամունքն դուլային, որք առ ոչինչ համարեցան զպարգեւս արքունի, և առ ոսն հարին զհրամանս ահագինս: Ընթացան վաղվաղակի 'ի զէնս իւրեանց, վառեցան կազմեցան զգիշերն ամենայն, և ընդ ծագել արեգական ըզգունդն յերիս մասունս բաժանեալ 'ի բանակն արկանէին: Գունդն առաջին յարեւելից կուսէ, և գունդն երկրորդ յարեւմտից կողմանէ, և գունդն երրորդ 'ի հիւսիսոյ կողմանէ, շուրջանակի 'ի մէջ առեալ փակեցին զբազմութիւն բանակին. և

զբազումն կոտորեցին, և զեւս բազմագոյնս կապեցին զերեւելի մարդիկ, և արկին 'ի բերդս ամուրս ընդ իւրեանց իշխանութեամբ: Յւղաւ և զապուռ զաւար բանակին 'ի մի վայր ժողովեալ պահէին իբր հրամանաւ արքունի:

Իսկ զմարդսն ձերբակալ արարեալ, և միաբանէր ընդ նոսա երգմամբ՝ հաստատուն կալ յուխտին, զղջանայր զառաջին քակումն 'ի նոցանէ: Անկանէր սպաշխարութեամբ յոտս սուրբ եպիսկոպոսացն, և աղաչէր խաղապատելով՝ զի մի մերժեալ ընկեսցի առ 'ի նոցանէ: Կրկնէր և երեքկնէր զանսուտ երգումն առաջի բազմութեանն 'ի սուրբ աւետարանն, զըրէր և կնքէր զերգումն և կապէր զաւետարանէն. և աղաչէր՝ զի յԱստուծոյ յայտնեսցի վրէժինդրութիւնն, և մի նոքա մարդկաբար սատակեսցեն զնա: Իսկ նոքա թէպէտ և հաստատեալ գիտէին զնենգաւոր

կեղծաւորութիւնն նորա, և թէ խաբէութեամբ դառնայ անդրէն 'ի չին մոլորութիւնն, ոչ ինչ փոյթ առնէին ձեռն արկանել 'ի նա վասն առաջին յանցանացն, այլ սուրբ աւետարանին թողին 'ի դատապարտութիւն:

Իսկ որք եկեալ էին յաւարի առնուլ զսուրբ գանձս եկեղեցւոյն, ահամայ եզին զանձինս և զաւարիւրեանց առաջի սուրբ եպիսկոպոսացն և ամենայն զօրացն. և եղծեալ ապահանեցաւ հրաման թագաւորին: Եւ յաջողեալք զօրութեամբն Աստուծոյ՝ աղաղակէին և ասէին գոհանալով արք և կանայք և ամենայն ռամիկ բազմութիւնն. Պատրաստ եմք 'ի հալածել և 'ի մեռանել և յամենայն նեղութիւնս և 'ի չարչարանս վասն սուրբ եկեղեցեաց, զոր աւանդեցին հարքն մեր առաջինք՝ զօրութեամբ գալստեան Տեառն մերոյ Յիսուսի Քրիստոսի, որով վերստին ծնաք 'ի մի յոյս հա

ւատոցն մկրտութեամբ 'ի Քրիստոս Յիսուս. ըստ նմին նմանութեան կամիմք չարչարանօք և արեամբ նորոգել զանձինս: Քանզի հայր մեր՝ զսուրբ աւետարանն գիտեմք, և մայր՝ զառաքելական եկեղեցի կաթողիկէ. մի ոք չար անջրպետ 'ի մէջ անկեալ՝ զմեզ քակեսցէ 'ի սմանէ:

Ոչ երեւէր այնուհետեւ առաւել տէր քան զծառայ, և ոչ ազատ փափկացեալ քան զգեղջուկ վշտացեալ. և ոչ ոք քան զոք նուազեալ 'ի յարութեանէ: Մի սիրա յօժարութեան ամենեցուն արանց և կանանց, ծերոց և տղայոց և ամենայն միաբանելոց 'ի Քրիստոս: Քանզի առ հասարակ զմի զինուորութիւն զինուորեցան, և զմի ագան զրահս հաւատոց պատուիրանին Քրիստոսի, և միով գօտեաւ ճմարտութեան պնդեցին զմէջս արք և կանայք:

Ընկեցեալ կայր այնուհետեւ ու

կի, և ոչ ոք առնոյր իւր առանձինն արծաթ. և արհամարհեալ առանց ագահութեան, անարգեալ պատուական հանդերձք առ 'ի զարգս մեծարանաց: Նա՛ իւրաքանչիւր ստացուածք ոչ ինչ համարէին յաստ իւրեանց ստացողին. տեսանէին զանձինս իւրեանց իբրեւ զմեռեալ դիակունս, և զիւրաքանչիւր դերեւմանս ինքեանք փորէին. և կեանք իւրեանց 'ի մահ համարեալ էին և մահք իւրեանց անշուշտ կեանք:

Իայց այս բարբառ ստեպ ստեպ ընթանայր. Քաջութեամբ միայն մեռցուք, զանուն և զողբիս եւեթ ժառանգեսցուք. զի կենդանի իցէ 'ի մեզ Քրիստոս, որում գիւրին է միւսանգամ նորոգել զմեզ 'ի հողոյ զամենայն զյառաջագոյն զինջեցեալն, և հատուցանել իւրաքանչիւր ըստ գործս իւրեանց:

Չայս և առաւել քան զսոյնս խօսելով, և մխիթարելով զանձինս և զմիմեանս, դարձեալ միւսանգամ

զինուորքն պատրաստեցին զզէնս իւրեանց, և աղօթականքն անդադար լինէին յաղօթսն իւրեանց. և պահողքն ճգնէին 'ի պահս իւրեանց: Չայնք պաշտօնէիցն 'ի տուէ և 'ի գիշերի անհատ էին 'ի սուրբ սաղմոսն. ընթերցուածք աստուածային կտակարանացն ոչ երբեք առնուին դադարումն յամենայն ժամ, սոյնպէս և մեկնիչքն 'ի մխիթարութիւն երկնաւոր վարդապետութեանն:

Յայնմ ժամանակի դարձեալ յարձակեցան 'ի վերայ բերդիցն և աւանաց, զոր ունէին պարսիկքն 'ի տեղիս տեղիս, յամրոցս աշխարհին. տապալէին քանդէին զբնակուածիւնս նոցա: Առաջին զմեծն Արտաշատ հանդերձ աւանօք իւրովք. և առնուին զանմատոյց ամուրսն՝ զԳառնի քաղաքն, զԱնին, զԱրտագերս, և զաւանս իւրեանց. զԵրկայնորդսն և զԱրհնին, և զաւանս իւրեանց. զԻարձրաբուղն, զԽորա-

նրստն, զԾախանիստն, զանկասկա-
ծելի Ողականն, և ընդ նոսա և զա-
ւանս իւրեանց. զԱրբանեալն, ըզ-
վանն աւան, ընդ նմին և զաւանսն
իւր. զԳրեալն և զԱսպոյտն, զՈ-
րոտն և զՎասակաշատն:

Չամենեւին զայս իւրաքանչիւր
գեղիւք և ագարակօք, զօրօք և զօ-
րագլխօք 'ի նմին ամի առեալ տա-
պալէցին, և 'ի գերուծիւն վարեցին
զարս և զկանայս ընչիւք և ստա-
ցուածովք, հանգերձ պատուական
գանձիւք և նոցին սպասուք: Տա-
պալէին քանդէին զշինուածս նոցա,
և այրէին կիզուին զտունս պաշտօ-
նարկի և պաշտաման կրակի: Սըր-
բէին զպղծութիւն կռապաշտու-
թեանցն, և առնուին զկահ և զկազ-
մածս ատրուշանացն, բերէին և դը-
նէին 'ի սուրբ եկեղեցւոյն. և 'ի
ձեռն սուրբ քահանայիցն նուիրէին
'ի սպաս տերունական սեղանոյն:
Եւ փոխանակ սնտոի պաշտամանցն՝
զօր տապալէցին յամենայն տեղիս

հեթանոսացն, զփրկական խաչն
Քրիստոսի կանգնէին. զամենա-
սուրբ սեղանն ուղղէին, և զկենդա-
նարար խորհուրդն կատարէին սըր-
բուծեամբ. պաշտօնեայս և քահա-
նայս 'ի տեղւոյն կացուցանէին:
Յուսով հաստատեալ խնդայր ամե-
նայն երկիրն առ հասարակ:

Եւ մինչ դեռ յայսմ մեծի առա-
քինութեան կատարեալ գործէին
զգործ նահատակութեանն, երեւեր
իմն 'ի վերայ ամենեցուն աստուա-
ծային շնորհք. քանզի առանց հրա-
մանի 'ի զօրացն շայոց, յարեւելից
կողմանէ աշխարհին, յարձակեցան
ոմանք յԱտրպատական աշխարհն,
և 'ի տեղիս տեղիս բազում վնաս ա-
րարին՝ առնլով և աւերելով և քան-
դելով զբազում ատրուշանս:

Իսկ որ 'ի մեծ ամուրսն անկա-
նէին, իաչանչան արարեալ 'ի վե-
րայ զօրուն յարձակէին. որ և եր-
կու մեծամեծ բերդացն պարիսպքն
առանց ուրուք մերձեալոյ անկեալ

կործանեցան. մինչեւ ամենայն բընակչաց երկրին զահի հարեալ 'ի մեծ նշանէն, ինքեանք ինքեանց ձեռօք զկրակատունսն այրէին. ուրանալով զօրէնս մոգութեանն՝ խոստովանէին 'ի սուրբ աւետարանն:

Եւ այլ մեծամեծ աջողութիւնք կատարէին 'ի ձեռն զօրականին. քանզի ուր ոչ էր ակնկալութիւն, եթէ զանուն Աստուծոյ որ յիշեացէ, արհաւիրք մեծ անկանէին 'ի վերայ նոցա. և ամենայն մարդ պատմէր ընկերի իւրում՝ ատիւր նորս և զարմանալիս: Սոյնպէս և աստեղք 'ի յերկինս երեւէին յոյժ լուսալիր պայծառացեալ, զոր ոչ ունէին յառաջին բնութեանն: Եւ ամենայն տղայք աշխարհին իբրեւ զարս պատերազմողս խիզախէին:

Եւ ահա յետ աւուրց բազմաց եկն եհաս հազարապետն Աղուանից սուրբ Եպիսկոպոսաւ աշխարհին, մեծաւ տագնապաւ փութապոցացանէր զզօրսն ասելով. Գունդ Պար-

սից, որ էր 'ի կողմանս աշխարհին Հոնաց, դարձաւ այսրէն, եկն եւ մոռտ յաշխարհս մեր. և բազում եւս և այլ այրուծի՝ որ 'ի դրանէ եկն: Եւ թող զայս ամենայն, այլ երեք հարիւր մոգ վարդապետ ածեալ ընդ իւրեանս, պառակտեցին զաշխարհն, և զոմանս ոմանս յինքեանս արկին, և կամէին յեկեղեցին ձեռն արկանել. և հրամանաւ Թագաւորին ստիպէին զամենեսեան և ասէին. Եթէ կամօք յանձն առնուք զօրէնսն, պարգեւս և պատիւս գտանէք 'ի նմանէ, և թողութիւն հարկացն յարքունուստ լիցի ձեզ. ապա թէ կամօք չառնէք, հրաման ունիմք 'ի գեօղս և 'ի քաղաքս շինել ատրուշանս, և զվաւանկան կրակն 'ի ներքս դնել, և կայոցացանել մոգս և մոգպետս օրէնսդիր ամենայն աշխարհիդ: Եւ եթէ ստամբալեալ որ ընդդէմ դարձցի, ինքն մահու պատուհաս ընդունի, և կին և որդիք այնպիսւոյն անաշխարհիկ եղեալ յարքունիս երթիցեն:

Իսկ գունդն Հայոց իբրեւ լուաւ զայս գոյժ դառնութեան, ոչ ինչ թուլացեալ Լքան 'ի քաջութենէն. այլ դարձեալ համագունդ ժողով լինէր ամենայն աշխարհին վասն գուժաբեր հրեշտակացն, որ հասին առ նոսա: Եւ միաբան քաջալերս տուեալ՝ արձակեցին զնոսա, զի առ ժամանակ մի զնոսա պատիր խաբէութեամբ կալցեն, զի խափանեսցին 'ի չար կամացն, չձեռնարկել 'ի սուրբ ուխտ եկեղեցւոյն իւրեանց. և զօրութեամբն Աստուծոյ խորհուրդ 'ի մէջ առեալ՝ իրացն հնարիւք ելա խնդրէին:

Յայնմ ժամանակի զմի ոմն 'ի մեծ նախարարացն, 'ի տոհմէն գնունեաց Ատոմ, ճեպով առաքեցին յերկիրն արեւմտից ցուցանել զայս ամենայն խորհուրդ զչարխմաց թագաւորին արեւելից. միանգամայն և պատմել զիւրեանց քաջութիւն աւրութեանցն, զոր գործովք կատարեցին՝ առ ոտն հարկանելով զհրա.

մանն ահեղ, և մեծապէս սատակումն 'ի վերայ մոգացն հասուցանել. ինդրել 'ի նմանէ օգնականութիւն սատարութեան, և եթէ նա կամեսցի՝ նմա իսկ մտանել 'ի ծառայութիւն: Եւ այս է պատճէն հրովարտակին զոր գրեցին առ Թէոդոս կայսր.

Յովսէփ եպիսկոպոս բազում եպիսկոպոսակցօք իմովք և ամենայն զօրք Հայոց, Ասասկ մարզպան և Ներշապուհ ռմբոսեան հանդերձ սպարապետաւս և ամենայն մեծամեծ նախարարօք՝ առ մեծանունդ Թէոդոս կայսր, բազմացի ողջոյն մեր առ քեզ և ամենայն զօրաց քոց, որ խաղաղասէր մարդասիրութեամբ ձերով տիրէք ծովու և ցամաքի, և չիք ոք յերկրաւորացս՝ որ ձերում անարգել տէրութեանդ ընդդէմ դառնայցէ: Որպէս մեք իսկ ունիմք զանսուտ յիշատակարանն զառաքինի նախնեացն ձե.

րոց. ունեւոյլ զՅւրոպէ՝ անցին և տիրեցին և ասիացւոց կողմանցն՝ ի սահմանացն Սերաց մինչեւ ՚ի կողմանս Քաղերովնի, և ոչ ոք գտաւ ստամբակեալ և ելանել ըստ ձեռննոցա:

Եւ յայնչափ մեծ իշխանութեան՝ դաստակերտ մեծ և սիրելի զՀայոց աշխարհս անուանէին: Վասն որոյ և նախնին մեր Տրդատիոս յիշելով զառաջին սէրն ձեր, որ ՚ի աղայութեան փախուցեալ ՚ի հայրասպան մարդախողխող հօրեղբարցն իւրոց՝ ապրեալ սնաւ յերկրիդ Յունաց, և ՚ի ձէն՝ թագաւորեալ տիրէր հայրենի աշխարհիս, սոյնպէս և ըզհաւատան որ ՚ի Քրիստոս՝ ընկալեալ ՚ի սուրբ եպիսկոպոսապետէն Հռովմայ, լուսաւորեաց զխաւարային կողմանս Հիւսիսոյ. զոր և այժմ կամին ՚ի մէջ կորզել հանել խաւարասէր որդիքն արեւելից:

Եւ մեք ՚ի ձեր քաջութիւն արուութեանդ խիղատեալ, էր ինչ՝ որ ընդ-

դէմ դարձաք նոցա հրամանացն, և բազում այն է՝ որ արդ առաջի պատրաստեալ եմք: Ընտրեցաք ըզմահ աստուածպաշտութեամբ քան զկեանս ուրացութեամբ. եթէ դուք եւս ՚ի ձեռն առջիք զմեզ, ահա կրկին կենաց դիպեցաք և ոչ մի անգամ մահու: Եւ եթէ սակաւիկ մի հեղգայք, դուցէ բազում և այլ աշխարհաց հասանիցէ տապ բոցոյ սորա:

Եւ իբրեւ յանդիման եղեն մեծի թագաւորին, և ընթերցան զգիր պաղատանաց Հայոց աշխարհին և զյիշատակարանն նախնեացն, բազում մատենք ՚ի մէջ եկեալ ընթերցան, որ զնոյն ուխտ հաստատութեան ՚ի ներքս գտանէին: Եւ մինչ դեռ երանելին թէոգոս հարցանէր զամենայն սինկղիստոսն, և հնարս իրացն կամէր գտանել խաղաղութեամբ, և հոգ տանէր մեծաւ յօժարութեամբ, զի մի եկե-

ղեցիքն արեւելից յափշտակեսցին յանօրէն հեթանոսացն, 'ի նմին ժամանակի հա՛ անդէն վաղվաղակի հասանէր վախճան կատարածի կէնաց նորա, և կարի չար խափան լինէր գործոյն օգնականութեան:

Եւ թագաւորէ փոխանակ նորա Մարկիանոս կայսր, և 'ի ձեռն վատ թար արանց խրատողացն իւրոյ ծառայիցն, Անատոլեայ՝ որ սպարապետն էր, և Եփլալիոս ասորի, երկոքեան անարգք և վատթար արանց, միանգամայն և անստուգածք. 'ի նոցա բանս ելեալ թագաւորն, ոչ կամէր անսալ միաբան ուխտին հաւատոց, որ ամենայն ուժովն իւրեանց ընդդէմ՝ կացեալ էին չարութեանն հեթանոսաց: Իսկ անարիս այս լաւ համարէր պահել զուխտն հեթանոսաց վասն մարմնական խաղաղութեան, քան պատերազմակից լինել ուխտին քրիստոնէութեան: Վասն այսորիկ փութացաւ արձակեաց դեսպանս առ

Թագաւորն Պարսից զնոյն Եփլալիոսն, և եմուտ ընդ նմա յուխտ հաստատութեան՝ ձեռնթափ լինել 'ի զօրացն Հայոց զօրու և զինու և ամենայն օգնականութեամբ:

Եւ իբրեւ այսպէս հաստատեցաւ, և հասաւ օգնականութիւն յուսոյ նոցա 'ի մարդկանէ, գարձեալ սուրբ եպիսկոպոսքն քաջալերել սկսան զանձինս և զօրսն Հայոց: Թէպէտ և հայէին յիւրեանց սակաւութիւնն և յերկոցունց թագաւորացն միաբանութիւն, ոչ ինչ վատասրտեալ զողային, այլ ըստ առաջին ուխտին խիզախէին և աւելին. Պատրաստ եմք 'ի սպանանել և 'ի մեռանել. գիւրիս է Աստուծոյ սակաւութեամբ զբազմաց գործ գործել, և անարգօք զմեծամեծ իրս կատարել:

Թէպէտ և ոչ ունէին թագաւոր առաջնորդ, և ոչ յարտաքուստ օգնական զոք յօտարաց, սակայն անձանց առաքելութեամբ և սուրբ

վարդապետաց մխիթարութեամբ
համագունդ ամենայն զօրօք նախա-
րարացն յիւրաքանչիւր տանէ 'ի
մի վայր գային հասանէին վաղվա-
ղակի. բազում և այլ այրուծի, որ
յարքունի տանէ անտի էր: Եւ զա-
մենայն զօրսն յերիս գունդս բաժա-
նէին: Զգունդն առաջին տային ցը-
Ներշապուհս ռըմբոսեան, և գումա-
րէին զնա պահապան աշխարհին,
մերձ 'ի սահմանս Ատրպատական
աշխարհին: Եւ զգունդն երկրորդ
տային 'ի ձեռն Վարդանայ զօրա-
վարին Հայոց՝ անցանել ընդ սահ-
մանս Վրաց 'ի վերայ մարզպանին
Ճորայ, որ եկեալ էր աւերել զե-
կեղեցիան Աղուանից: Իսկ զգունդն
երրորդ տային 'ի ձեռն Վասակայ
իշխանին Սիւնեաց, որ ոչ 'ի բաց
կացեալ էր յուխտէն հեթանոսաց
ըստ ներքին խորհրդոցն իւրոց:

Ընտրեաց և առ ընդ իւր զորոց
գիտէր զթուրութիւն հաւատոցն ու-
ցա. զիշխանն Բագրատունեաց զօ-

րօք իւրովք, զիշխանն Խորխոռու-
նեաց զօրօք իւրովք, զիշխանն Ա-
պահունեաց զօրօք իւրովք, զիշ-
խանն Վահեունեաց զօրօքն իւ-
րովք, զիշխանն Պալունեաց զօրօքն
իւրովք, զիշխանն Քաբեղենից զօ-
րօք իւրովք, զիշխանն Ուրծայ զօ-
րօքն իւրովք: Եւ զայլս բազում
զօրս յարքունի տանէն էարկ յինքն,
և զսեպուհս ոմանս յայլմէ տոհմէ:
Եւ խորամանկ խաբէութեամբ գա-
րանամուտ լինէր յամուրս իւրոյ
աշխարհին, 'ի պատճառս կեղծա-
ւորութեամ՝ եթէ ընդ ճապուկ
անդր անցանէ 'ի վերայ դնդին
Պարսից՝ հալածականս առնել յաշ-
խարհէն Աղուանից:

Իսկ նա յամրածածուկ հաւալու-
ցէն ճեպով գեսպանս արձակէր առ
գունդն Պարսից. Ահա՛ աւաղիկ
քակեցի զմխաբանութիւն ուխտիս
Հայոց, և ընդ երիս կողմանս ըզ-
գունդն քայքայեալ բաժանեցի:
Զգունդն առաջին հեռացուցի 'ի

կողմանս Հերայ և Զարաւանդայ. և գունդս երկրորդ ընդ իմով ձեռամբ է, որոց ոչ ինչ տամ ՚նաս առնել զորաց արքունի: Եւ զայլ ամենայն, որ այր կուուոյ յաշխարհի սաս գըտանէր, ցանեցի ցրուեցի ընդ ամենայն միջոցս աշխարհիս: Բայց ըզգունդն երրորդ արարի ընդ Վարդանայ յԱղուանս՝ սակաւաձեռն և ոչ բազմաթիւ: Ե՛լ համարձակ ընդ առաջ նորա, և մի զանգիտեր ամենեւին տալ պատերազմ. գիտեմ՝ զի ՚ի պարտութիւն մատնին առաջի քոյոյ մեծի զօրութեանդ:

Չայս գրեայ և եցոյց մարդպանին, որում անունն էր Սեբուխտ: Իսկ նա իբրեւ լուաւ զայս ամենայն զքաջաւերս ՚ի Վասակայ, և ստուգեալ հաստատեաց ՚ի միտս իւր, եթէ սակաւաձեռն գնդաւ գայ ըսպարապետն Հայոց ՚ի վերայ նորա, ոչ եկաց մնաց ՚ի կողմանս Ճորայ. այլ կուտեաց զամենայն բազմութիւն զօրու իւրոյ, և փութանակի

անցանէր ընդ մեծ գետն կուր աւուն, և պատահէր նմա մերձ ՚ի սահմանս Վրաց հանդէպ Խաղխաղ քաղաքի, որ ձմերոց էր թագաւորաց Աղուանից: Անցանէր բաւանգակէր ամենայն զօրօք իւրովք, ռազմ արարեալ զբոլոր մեծութիւն դաշտին ՚ի ներքս փակէր, զինեալք և վառեալք ամենայն պատրաստութեամբ ՚ի մարտ պատերազմի ընդգէմ գնդին Հայոց:

Իսկ քաջն Վարդան և ամենայն զօրքն, որ ընդ նմա էին, իբրեւ տեսին զբազմութիւն պատրաստութեան գնդին հեթանոսաց, հայեցան և յիւրեանց սակաւութիւնն, թէպէտ և կարի յոյժ նուազունք էին քան զնոսա, ոչ ինչ զանգիտեցին առ յոյժ բազմութենէն, այլ հասարակ միաբանեցին և համբարձին յերկինս զձեռս իւրեանց, ազաղակէին և ասէին. Իստեա, Տէր, զայնոսիկ՝ ոչք դատին զմեզ. մարտիւր ընդ այնոսիկ, որ մարանչինս

ընդ մեզ, զինու և ասպարաւ քով
օգնեա մեզ: Շարժեա և դողացո
զգունդագունդ բազմութիւն անօ-
րինացս. ցրուեա և վառնեա զչար
միաբանութիւն թշնամեաց քոց ա-
ռաջի քոյոյ փրկական մեծի նշանիս,
և առւր 'ի ձեռն սակաւուցս զբա-
ջութիւն յաղթութեան 'ի վերայ
անհնարին բազմութեանս: Ոչ 'ի
պարծանս անոտի փառաւորու-
թեան անօգուտ վաստակոց ինչ ա-
ղաչեմք՝ յաբահուութիւն ընչասիրու-
թեան զանցաւոր մեծութիւն կապ-
տեւոյ, այլ զի ծանկցեն և գիտաս-
ցեն ամենեքեան այնօքիկ՝ որ հնա-
զանդին սուրբ աւետարանին քա-
րողութեան, եթէ դու ես Տէր կե-
նաց և մահու, և 'ի ձեռս քո է
յաղթութիւն և պարտութիւն:
Եւ մեք պատրաստ եմք 'ի մեռանել
վասն քո սիրոյդ. և եթէ սպանա-
նել եւս հասանէ զնոսա, եղիցուք
վրէժինդ իրք ճշմարտութեանն:

Եւ զայս ասելով՝ խուժք արա-

րեալ յարձակէին, և զաջ թեւն
բեկեալ՝ զձախոյ կողմամբն արկեալ,
և սրոյ ճարակ զամենեսեան տային
ընդ երեսոս դաշտին, և փախտա-
կան առնէին մինչեւ յամուր տեղիս
մայրեացն առ խորագոյն գարիւքն
Լոփնաս գետոյ: Ուր ընդդէմ դար-
ձեալ թագաւորազանց ոմանց բա-
ղասական արքայի, ընկեցին զոմն 'ի
ձիոյ 'ի նախարարաց Հայոց, 'ի գըն-
դէն Գիմաքսենից զՄուշ սպանին,
և զՔազրիկ վիրաւորեցին:

Յայնմ տեղու զէտ ակն 'ի վեր
ամբառնայր Արշաւիր Արշարունի,
գոչէր առիւծաբար և յարձակէր
վարազաբար, հարկանէր և սատա-
կէր զՎուրկն քաջ զեղբայր թա-
գաւորին Լփնաց, և զբազում համ-
հարզս նորին ընդ նմին ստտակէր:
Եւ այնպէս ամենեքեան առ հասա-
րակ սյր զախոյեան իւր յերկիր
կործանէր: Եւ առ յոյժ յանգուգն
յարձակմանն՝ յուրվագոյն այն էր
զոր գետամոյնս առնէին քան զան-

կեալսն սրոյ 'ի ցամաքի: Ի բազմո՞ւ
թենէ դիականցն անկեւոյ՝ յստակ
ջուրք գետոյն յարիւն դառնային,
և ոչ գտանէր ոք ամենեւին 'ի նո-
ցանէ ապրեալ և թաքուցեալ յան-
տառախիտ մայրիս դաշտացն: Իայց
մի ոմն 'ի զօրականէ թշնամեացն՝
զինու հանդերձ ելեալ 'ի նիւս երի-
վարին անցանէր ընդ մեծ գետն,
մազապուր պրծեալ 'ի պատերազ-
մէն՝ գոյժ տանէր 'ի մնացեալ բուն
բանակն, որք փախստական անկա-
նէին 'ի մեծ շահաստանն:

Յայնմ ժամանակի զօրքն Հայոց
կատարելով զմեծ դործ պատերազ-
մին, դիակապուտ դառնային, ժո-
ղովէին զբազում աւար բանակին,
և կողոպտէին զանկեալ դիակունսն,
և կուտէին բազում արծաթ և ոս-
կի, զզէնս և զզարդս զարի արանց
և զքաջ երիվարաց:

Իարձեալ յարձակէին ոչ սակաւ
քաջութեամբ 'ի վերայ բերդիցն և
բաղաքացն, զոր ունէին Պարսիկքն

յաշխարհին Աղուանից. հօրապէս
մարտնչելով և այրելով զամուրս
արգելանաց նոցա, և զերամս ե-
րամս մոգացն՝ զոր պատրաստական
ածեալ աշխարհին գայթակղու-
թիւն, սւր և գտանէին յամուրս
ամուրս վայրացն, սրոյ ճարակ
տուեալ՝ դնէին գէշ թուչնոց երկ-
նից և գազանաց երկրի: Սրբէին ըզ-
տեղիսն յամենայն պղծագործ զո-
հիցն, և փրկեալ ազատէին զեկեղե-
ցիսն յանհնարին նեղութենէն:

Եւ բազումք 'ի նախարարացն Ա-
ղուանից և յամենայն շինականացն,
որք վասն անուանն Աստուծոյ ցը-
րուեալ և վասնեալ էին յամուրս
լերանց Կապկոհի, իբրեւ տեսին
զաջողութիւն գործոյն՝ զոր կատա-
րէր Աստուած 'ի ձեռն գնդին Հա-
յոց, գային ժողովէին և նոքա, և
խառնէին 'ի զօրս նոցա, և միաբանք
և հաւասարք կցորդք լինէին գոր-
ծոյն նահատակութեան: Խաղային
գնային այնուհետեւ 'ի վերայ պա-

հակին Հոնաց, զոր ունէին բանու-
թեամբ պարսիկքն. առնուին քան-
դէին զպահակն, և կոտորէին ըզ-
զօրսն՝ որ 'ի ներքս բնակեալ էին. և
զգուռնն տային 'ի ձեռն Վահանայ,
որ էր յազգէ Թագաւորայն Ա-
ղուանից: Եւ յայտ ամենայն քա-
լութեան վերայ ոչ ոք անկեալ վի-
րաւորեցաւ ամենեւին 'ի նոցանէ,
բայց 'ի միոյ երանելոյ որ կատարե-
ցաւ նահատակութեամբ 'ի մեծ
պատերազմին:

Եւ անդէն 'ի նմին տեղուջ զայրն՝
որում զգուռնն յանձն արարին,
լինոյն դեսպանս արձակեցին յաշ-
խարհն Հոնաց, և 'ի բազում յայլ
ազգս բարբարոսայ, որ համագործք
էին Հոնաց աշխարհին, բանս դնել
ընդ նոսա և ուխտ հաստատել՝ ան-
քակութեամբ ունել զմիաբանու-
թիւնն: Իսկ նոքա իբրեւ զայն ամե-
նայն լուան, փութապէս վաղվաղա-
կի հասանէին 'ի տեղին, և ականա-
տեսք լինէին գործոյն յաղթու-

թեան: Եւ ոչ ինչ յապաղեցին երգ-
մամբ յուխտ մտանել ըստ կարգի
իւրեանց օրինաց. յանձն առին և
զերդումն քրիստոնէից, պահել
ընդ նոսա հաստատութեամբ զմիա-
բանութիւն:

Իսկ իբրեւ զայս կատարեցին և
արարին իւրեանց մեծապէս հաս-
տատութիւն, և դեռ անդէն 'ի
տեղուջն զետեղեալ էին խաղաղու-
թեամբ, գուժկան հասանէր յաշ-
խարհէն Հայոց, զճակատ հարեալ
և զօձիս պատառեալ վասն ապրս-
տամբին Վասակայ, յետս կացեալ
յուխտէն քրիստոնէութեան և ա-
ւերեալ զբազում տեղիս Հայոց աշ-
խարհին, մանաւանդ զձմերոցս ար-
քունի, որ կայեանք զօրայն էին, ըզ-
Գառնին և զԵրամաւանս և զԻրսհա-
նակերան՝ զմեծ դաստակերտն, ըզ-
Վարդանաշատն և զամուրն Օշա-
կան, զՓառախոսն, զԱրդեանսն,
զՉողկերտն աւան և զբերդն Ար-
մաւրի, զԿուռչն աւան, զԱրուճն,

զԱշնակն և զամենայն ոսն Արա-
գածու, և զնահանգն Արտաշատու
և զԼիրտաշատն ինքնին գլխովին, և
զամենայն գեօղս և զաւանս՝ որ
չուրջ զնովաւ էին, առեալ աւե-
րեալ և հրձիգ արարեալ, և զամե-
նեցուն ձեր զընտանիս փախու-
ցեալ մերժեալ յիւրաքանչիւր բը-
նակուածենէ:

Չեռն արկեալ և ՚ի սուրբ եկե-
ղեցիան, տարեալ և զսուրբ սպաս
եկեղեցւոյն սեղանոյ. գերի վարեալ
զընտանիս քահանայից, և զնոսին
կապեալ և եգեալ ՚ի բանգի. և
ինքն սփռեալ տարածեալ ասպատա-
կաւ աւերէր զերկիրն ամենայն: Եւ
գունդն՝ որ էր ՚ի կողմանս Աարը-
պատականի, ոչ ժամանեաց ձեռն
տալ ՚ի միջոց աշխարհին: Եւ զօրքն՝
որ անդ մնացեալ էին, խոյս
տուեալ յանօրինէն մերժեցան
յեզր աշխարհին, և դեռ պահեն
ընդ ձեզ զուխտ միաբանութեան
սիրոյն Քրիստոսի: Բայց այն որ ընդ

նմայն էին, են ոմանք՝ որ փախեան
յիւրաքանչիւր տեղիս, և բազումք
այն են՝ որ զհեա մուրեցան նորա
ամբարշտութեանն:

Չու արարեալ ՚ի տեղուղէ անտի՝
գառնալ անդրէն յաշխարհն Հայոց
մեծաւ ստիպով և բազում աւա-
րաւ և անչափ մեծութեամբ: Եւ
անարտում ուրախութեամբ երգս
՚ի բերան առեալ և ասէին ձայնիւ.
Խոստովան եղերուք Տեառն, զի բա-
րի է զի յաւիտեան է ողորմութիւն
նորա. ո եհար զազգս մեծամեծս և
սպան զիշխանս հզօրս, զի բարի է,
զի յաւիտեան է ողորմութիւն նո-
րա: Եւ զայս սաղմոսս երգելով մին-
չեւ ՚ի վախճան կատարեալ աղօ-
թիւք փառատրութիւն սուրբ Եր-
րորդութեանն մատուցանէին: Անդ
յանձանձէր ածէր զօրավարն զկաց
և զմնաց զօրականին, առաջապա-
հօք, վերջապահօք, կողմապահօք
ողջ և առողջ հասուցեալ յաւուրս
երեսուն մերձ ՚ի սահմանս հայրենի
աշխարհին:

Այդ եղեւ ուրացեալն Վասակայ
և իշխանացն որ ընդ նմա էին քա-
ջուծիւն նահատակուծեան գնդին
Վարդանայ յաշխարհին Աղուանից,
և միաբանուծիւնն եւս շոնաց:
Մինչ չեւ յանդիման եղեալ էին
միմեանց, զգիշեր մի օգնական գը-
տեալ նորա՝ փախտական անկանէր
յամուրս իւրոյ աշխարհին. և այն-
պէս տագնապու մերժեցաւ, զգե-
րի և զաւարն զոր առեալ էր յԱյ-
րարատ գաւառէ, ահամայ զիւրն
եւս եթող և փախեաւ:

Եւ քանզի ժամանակ ձմերայնույ
հասեալ էր, և զուռճիկս՝ թշնա-
մեաց գնդին հարեալ էր, ոչ կարէր
զմիով տեղեաւ համագունդ զզօրսն
դարմանել. այլ սփռէր տարածա-
նէր ընդ գաւառս գաւառս աշխար-
հին առ ՚ի հանգիստ ձմերոցին: Պա-
տուէր հրամանի տայր պատրաս-
տական լինել կազմուծեամբ առ
ժամանակ դարնայնոյն: Եւ զսա-
կաւս ՚ի գնդէն յաւագ նախարա-

րացն գործակից իւր թողեալ, բըռ-
նանայր ՚ի վերայ՝ ունելով զթագա-
ւորանիստ տեղիսն:

Եւ գունդս գունդս արձակէր
յաշխարհն Սիւնեաց, աւնոյր և ա-
ւերէր զբազում գաւառս, և այն-
պէս ՚ի նեղ արկանէր զնա և զամե-
նայն զօրսն որ ընդ նմա էր, զի զչս
և զձիս մեռելոտիս առ սովոյն վը-
տանգի անխտիր ուտէին: Եւ բա-
զում հարուածս հասուցանէին ՚ի
վերայ ուրացելոյն, մինչեւ ժողով
սուրբ եպիսկոպոսացն և ամենայն
ուխտ քահանայուծեանն դառնա-
պէս արտասուս իջուցանէին ՚ի վե-
րայ չարաչար վշտացելոյն՝ որ բոկ
և հեաի վարէին զարս և զկանայս
փափկասունս, և բազում տղայք
զքարի հարեալ ընկեցան յանցս
ճանապարհաց:

Իբրեւ այս ամենայն աշողուծիւն
լինէր երկիւղածացն Աստուծոյ, ա-
մենայն եպիսկոպոսունք և երի-
ցունք պատուէր հրամանի տուեալ

աշխարհին, զողջոյն ամիսն քաղոց պահօք և աղօթիւք առնել խընդըրուածս առ Աստուած, և զտօն պատերազմացն յաղթուածեան խառնել 'ի սուրբ տօն յայտնութեանն Քրիստոսի, զի անխափան կացցէ մեծ յիշատակարանս այս ընդ աստուածային անանց տօնին: Եւ զսոյն զայս ամենայն այցելութիւնս Աստուծոյ, որ 'ի վերայ աշխարհին Հայոց մեծապէս երեւեցաւ, գրեցին սուրբ եպիսկոպոսուհքն և ետուն տանել յաշխարհն Յունաց 'ի մեծ քաղաքն առ սուրբ ուխտ եկեղեցոյն, զի և նոքա աղօթս առնելով խնդրեսցեն յԱստուծոյ, որպէս սկսաքս 'ի նմին և կատարեսցուք:

Եւ զոմն յառաջին կապելոցն Պարսկաց լուծեալ և ածեալ զառաջեալ նախարարացն, խօսէին ընդ նմա և ցուցանէին զամենայն փնասն որ եղեւ, կամ աշխարհացն աւերելն, կամ զօրացն արքունի

հարկանելն, և կամ որ այլ իրք առաջոյ լինելոց էին: Եւ իբրեւ զայս ամենայն բովանդակ ցուցին նմա, միաբան լինէր ամբաստանութիւն երկոցունց կողմանցն, զառաքիւնեացն և զյեսու կացելոց, որպէս զուր և տարապարտուց նեղեաց ըզնոսս՝ 'ի հայրենի օրինացն յեսու կալ. և զխաբէութիւնն ապստամբին Վասակայ, որպէս Հայոց բանիւխաբեաց զթագաւորն, յանձն առնուլ զմոգութիւն. իբրեւ չէր ուրուք ընդ նմա բանս եզեալ, նա յանձնէ սուտակասպաս լինէր:

Իբրեւ լիով զայս ամենայն իմացուցին, արձակեցին զնա հրեշտակութեամբ յաղերսաբանութեան 'ի հնարս հայթայթանաց, թերեւս կարացցեն զեղբարս իւրեանց 'ի նեղութենէն գողանալ: Այլ առ նա՝ անօրէնն Վասակայ գուժկանքն յառաջագոյն հասեալ էին, պատմել զաղէտս տարակուսանացն, զոր անցուցեալ էր ընդ զօրան արքունի. և

ամենայն ամբաստանութիւնն 'ի սօւրբ ուխտ եկեղեցւոյն կրթեալ էր: Քանզի այն խկ կամք էին անօրինին, եթէ զմիաբանութիւն եւ պիսկոպոսացն քակեցէ 'ի նախարարացն. և զայս ոչ էր տեղեկացեալ տակաւին, եթէ հոգի և մարմին բաժանելցին առ ժամանակ մի՛ դոյ տեսանել 'ի բնութեանս, այլ որ սիրովն Աստուծոյ յուխտ մը տեալ է՝ այսմ անհնար է լինել:

Արդ երթեալ այրն 'ի տեղի ձմերոցին, պատմեաց զայս ամենայն յանկանջս թագաւորին. շարժեալ դողացոյց, որ և յամենայն զօրութենէն պակասեալ գտաւ. մանաւանդ զի յարեւելից պատերազմէն կորակոր՝ և ոչ բարձրագլուսն էր դարձեալ: Իբրեւ ստուգեալ հաստատեաց 'ի վերջին հրեշտակէն որ եհաս առ նա, զամենայն մնասս զիւր գործոցն զխորհրդակցօք արկանէր: Եւ անդէն շիջանէր 'ի բազմաբոց բորբոքմանէն. քանզի խյաւ բերան

չար խրատողացն, որ անդադար յորդորէին զնա 'ի գործ դառնութեան: Խօնարհեցաւ 'ի բարձր հպարտութենէն, և զվայրենացեալ սիրտն դարձոյց 'ի մարդկային բընութիւն. հայեցաւ և ետես զինքն լի տկարութեամբ. գիտաց եթէ զամենայն զոր կամի աւնել՝ ոչ կարէ կատարել: Վասն այնորիկ և դադարեաց յանդուգն յարձակմանէն, և լուեցոյց զմոլեգնոտաբար գոչումն:

Եւ որ մեծաձայն բարբառով ռրոտայր, և եւս ահագին հրամանօքն զհեռաւորս և զմերձաւորս դողացուցանէր, սկսաւ քաղցր և աղերս բանիւք խօսել ընդ ամենեսեան և ասել. Ձի՛նչ ինչ մնաս գործեալ է իմ, և կամ զ՞՞ր յանցս յանցուցեալ կամ առ ազգս կամ առ լեզուս կամ առ անձն իւրաքանչիւր: Ո՛չ ահա բազում ուսմունք են յաշխարհիս Արեաց, և իւրաքանչիւր պաշտամունք յայտնի են. ո՞

երբէք նեղեաց պնդեաց դարձուցալ նեւ ՚ի մի օրէնս մոգութեանս. մանաւանդ վասն օրինաց քրիստոնէութեանն, որպէս հաստատուն և ճշմարիտ կացեալ են յիւրեանց դէնին, նոյնպէս և առ մեզ լաւագոյն քան զամենայն կեշտան նոքա երեւեալ են: Եւ բիժ իսկ ոչ կարէ ոք դնել ընարեալ օրինաց նոցա. այլ զոյգ և հաւասար համարիմ գենիս մազգեզանց, որպէս և յարգեալ իսկ էին նոքա առ նախնեօքն մերովք, զոր ես ինձէն իսկ յիշեմ առ հարբն իմօ՛վ՝ որ նստէր ՚ի մեծ գահոյս յայսմ:

Յորժամ սկսաւ անդաճել և քըն նեւ զամենայն ուսմունս և հաստատութեամբ ՚ի վերայ եհաս, առաւել վեհ գտանէր զօրէնս քրիստոնէից քան զամենեցունս. վասն այսորիկ մեծարեալք և պատուեալք շրջէին ՚ի դրան արքունի, և առատաձեռն պարգեօք երահիկք լինէին ՚ի նմանէ, և համարձակու-

թեամբ շրջէին ընդ ամենայն երկիր: Նա և որ գլխաւորքն էին քրիստոնէիցն, զոր և եպիսկոպոս անուանեն, ընծայից և պատարագաց արժանիս առնէր զնոսա, իբր հաւատարիմ՝ ոստիկանս: Յանձն առնէր նոցա զհեռաւոր մարզսն, և ոչ երբէք սխալ լինէր ՚ի մեծամեծ իրացն արքունի:

Եւ դուք զմի զայն երբէք ոչ յիշեցէք, այլ հանապազօր ձանձրացուցէք զլսելիս իմ, խօսելով զնոցանէ զամենայն չարութիւնս: Տեսէք՝ զի ետուք գործել ինձ զոր ինչ ոչ կամէի, և եղեն փնասք մեծամեծք ՚ի սահմանսն ՚ի մէջ երկուց անհաշա թշնամեաց: Եւ մէք դեռ ՚ի հեռաւոր ճանապարհի, և ոչ մի ինչ գործ ՚ի պատերազմիս ՚ի գլուխ երթեալ, և դուք աստէն յիմուամանս յարուցէք ՚ի վերայ պատերազմ, որոյ չարագոյն եւս լինելոց է կատարածն իւր քան զարտաքին թշնամեացն:

Չայս ամենայն և առաւել քան զսոյն խօսէր ընդ ամենայն աւագանին, և զվնասս յանցանացն արկանէր զմոգպետան և զմոգօքն: Եւ ամենայն վզրուկքն և պատուական նախարարքն, որ նստէին յատենին և ունին դնէին յեղյեղուկ լեզուի նորա, ամաչեցեալ կորանային և ընդ երկիր պշնուէին, և զգլուխ 'ի վեր ոչ կարէին համբառնալ:

Բայց սակաւք 'ի նոցանէ զմիտս հաճելով՝ ասէին զայս. Այո, արքայ քայ քայ, այդ այդպէս է որպէս ասացերդ, և արդ կարես զամենայն ուղղութեամբ նուաճել. չիք ինչ այն, որ ըստ քո կամագ արտաքս կարէ ելանել. զի տուեալ է քեզ աստուածոցն, զի զամենայն զոր և կամիս, կարես առնել: Մի նեղեալ տագնապիր յանձն քո և հարկաներ զմիտս մեր ամենեցուն. Թերեւս և դիւր իցեն հնարք իրացն կատարածի: Երկայնամիտ լեր և համբերութեամբ Թողացո մարդկանդ անդ-

րէն զքրիստոնէութիւն, և դոքօք զապստամբան սոճցես 'ի հաւանութիւն:

Հաճոյ Թուեցաւ բանքն առաջի Թագաւորին. և անդէն վաղվաղակի կոչէր զառաջեաւ յամենայն աղագացն որ ունէին զքրիստոնէութիւնն, և 'ի զօրու նորա էին, և բունաբար արգելեալ էր զնոսա, զի մի ոք իշխան լիցի յանդիման պաշտել զԱստուած. քանզի որ ընդդէմ կացին, չարչարեաց և արգել 'ի նոցանէ զյայտնի պաշտօնն, և ոմանց ոմանց ակամայ երկիր ետ պառանել արեգականն, և նստոյց 'ի սուգ տրտմութեան զամենայն զօրականն:

Իսկ այն օր հրամայէր անդրէն համարձակութեամբ ըստ առաջին կարգին հաստատուն կալ յօրէնս քրիստոնէութեամբ: Իսկ որք յանցաւորքն էին, ոչ կամէին վաղվաղակի առանց մեծի ապաշխարութեանն գալ և խառնել 'ի կարգ քրիստո-

նէութեան. հրամայէր թագաւորն՝ զի բռնի կալցին և տարցեն յեկեղէցին իւրեանց: Եւ երկցանցն համարձակէր, որպէս զիարդ և գիտիցեն՝ ըստ կարգին իւրեանց արասցեն: Եւ զհատեալ ռոճիկսն կարգէր անդրէն իւրաքանչիւր, և զարգեւեալ բազմականսն՝ ՚ի նոցանէ՝ ՚ի տեղի հրամայէր մատուցանել, և հանապազորդ յարքունիս մտանել ոչ արգելոյր զնոսա. և զամենայն որ զիարդ և կարգեալ էին յառաջագոյն՝ անդրէն յօրինէր: Խոնարհէր և խօսէր ընդ նոսա սիրով ըստ առաջին սովորութեանն:

Եւ իբրեւ զայս ամենայն արար և կարգեաց, յանդիման նոցա թողութեան հրովարտակա առաքէր ընդ ամենայն երկիր իշխանութեան տէրութեան իւրոյ վասն քրիստոնէից: Եթէ ՚ի կապանս ոք կայցէ, արքունի հրամանաւ արձակեալ լիցի. և եթէ ինչք ուրուք յափշտակեալ լիցեն, դարձցին անդրէն: Այնպէս և

երկիրք, եթէ հայրենիք, եթէ պարգեւականք և եթէ քսակազինք, և հանեալ ուրուք իցէ, հրամայեցաք զի դարձցին: Եւ իբրեւ այսմ ամենայնի զնոսա տեղեակ առնէր, խնդրէր ՚ի նոցանէ վկայութիւն հաւատարմութեան յերկիրն Հայոց, և երգամամբ յուստ մտանէր առաջի նոցա՝ հաստատութեամբ ամենայն մեծամեծաց իւրոց, եթէ ոչ ինչ յիշեցից ամենեւին զքէն վրիժուցն խնդրելոյ: Որպէս ունէիք յառաջ ճշմարտութեամբ զօրէնս ձեր, այսուհետեւ առաւել կալարուք. բայց միայն ՚ի ծառայութեանէ մերմէ մի ելանէք:

Այս ամենայն գրէր և ցուցանէր յերկրին Հայոց և ՚ի բազում յայլ աշխարհս, որ ունէին զօրէնս քրիստոնէութեանն. և ինքն գաղտ խորամանկեալ փութացեալ դեսպանս առաքէր առ Մարկիանոս կայսր: Եւ իբրեւ ստուգեալ ճշմարտեաց, եթէ Հռոմք ՚ի բայ կացին ձեռնտու

լինեւ թրխտոնէութեանն ոչ զօրու
օգնականութեան և ոչ այլ իրօք,
դարձեալ անդրէն 'ի նոյն յառաջին
կարծիս մոլորութեանն շրջեցաւ:
Չի յաշոյութեան իրացն 'ի ձեռն
իւրոյ պաշտօնէիցն հրամայէր. և
այնպէս ածէր զմտաւ, եթէ ըստ ա-
ռաջին կարծեացն կատարեսցեն զա-
մենայն:

Իսկ Հայք թեպէս և ընկալան
զգիրն խաբէբայ ողբանաց թագա-
ւորին, որ 'ի վերոյ ունէր զաւետիս
կենաց և 'ի ներքոյ զդաննութիւն
մահու, զարմացեալ ընդ թերի խոր-
հուրդս՝ ասէին ցմիմեանս. Քանի
լիրք է խորամանկ խաբէութիւն
նորա, զի երկիցս և երկցս զփորձ
աւետալ կշտամբեցաւ, և ոչ ամաչէ:
Եւ տեղեակ եղեալ մերոյ անբակ
միաբանութեանս, տակաւին լրբի
և լինի, զհետ մտեալ՝ կամի զմեզ
լքուցանել:

Իսկ հաւատասցո՞ւք անհաստատ
հրամանի նորա. զո՞ր բարեգործու-

թիւն տեսաք յառ ամենայն եկեղե-
ցիս, որ են յաշխարհին Պարսից:
Չի որ ինքն իւր չար է, այլում բա-
րի ոչ կարէ լինել. և որ ինքն ընդ
խաւար գնայ, այլում ոչ առաջ-
նորդէ ճմարտութեան լուսով: Ար-
պէս զի չիք յանիրաւութենէ ար-
դարութիւն, այսպէս 'ի ստութենէ
ճմարտութիւն, սոյնպէս և 'ի խռ-
վասէր մտաց՝ ակնկալութիւն խա-
ղաղութեան:

Այլ մէք ապրեալքս զօրու-
թեամբն Աստուծոյ, և հաստա-
տեալք հաւատովքն 'ի յոյսն Քրիս-
տոսի, որ եկն և էառ 'ի սուրբ կու-
սէն զմարմին մերոյ բնութեանս, և
միացեալ անբաժանելի աստուա-
ծութեամբն՝ ընկալաւ զջարջարանս
մերոյ մեղաց 'ի յիւր մարմինն, և
նովին խաչեցաւ և թաղեցաւ և յա-
րուցեալ երեւեցաւ բազմաց, և վե-
րացաւ յանդիման աշակերտացն
առ հայր իւր, և նստաւ ընդ ալմէ
զօրութեանն, զնոյն հաւատամք

Աստուած ճշմարիտ, և նմին ակն ունիմք, որ փառօք հօր և զօրու թեամբ գայ յարուցանել զամենայն ննջեցեալս, և նորոգել զհնու թիւն արարածոց, առնել համառօտս յաւիտենից 'ի մէջ արդարոց և մեղաւորաց:

Ոչ պատրիմք իբրեւ զտղայս, և ոչ մոլորիմք իբրեւ զանաեղեակս, և ոչ խաբիմք իբրեւ զտգէտս. այլ պատրաստ եմք ամենայն փորձութեանց: Եւ աղաչեմք զԱստուած, և անգագար խնդրեմք 'ի բազում ողորմութենէ նորա, զի յորում սկսաք, 'ի նմին և կատարեսցուք քաջութեամբ, և ոչ վատութեամբ: Ձի արդ արեւելք և արեւմուտք գիտացին զձեր աստուածամարտօղինէլ, և զմեզ 'ի զուր սպանանել 'ի վերայ ամենայն վաստակոցն մերոց: Վկայեն մեզ երկինք երկնաւորօք և երկիր երկրաւորօք, եթէ չեմք ինչ մեղուցեալ 'ի միտս մեր անգամ. և 'ի վերայ պարգեւաց և բարիս առ

նելոյ մեզ՝ զճշմարիտ կեանս կամբք հանել 'ի մէնջ, որում չիք հնար, և այլ մի լիցի:

Իսկ արդ հաւատասցօ՞ք անարժան բերանոյ նորա, որ ստիպէր չարաչար յուրացութիւն, և այսօր առանց մի ինչ բարիս գործելոյ լի նիցի՞ նա բարոզիչ աւետեաց: Եւ որ հայհոյէրն զՔրիստոս, և ուրացուցանէր 'ի նմանէ զհաւատացեալս, այսօր ահամոյ խոստովանութեանն ոչ կարեմք վաղվաղակի յանձն առնուլ: Եւ որ երդնոյրն 'ի մնտի պաշտմունս իւրոյ մոլորութեանն, անյուցանել զամենայն չարչարանս ընդ պաշտօնեայս եկեղեցւոյ, արդ եկեալ գողանալով գոհութիւն մատուցանէ. և այնու կամի զամենայն չարութիւն իւր 'ի մեզ հեղուլ: Ոչ այդմ հաւատամք, և ոչ զսուտ հրամանդ յանձն առնումք:

Իսկ նա իբրեւ գիտաց, եթէ ոչ կարեմ քակել զհաստատութիւն

միաբանեւոյն, յայնժամ քակեաց յինքենէ զծերն լի գառնութեամբ, յորում հանգուցեալ էր ստատանայ զօրութեամբ իւրով, և բազում գործեալ էր նորա նախճիրս. որոյ կերակուր կամաց իւրոց էր 'ի մանկութենէ սնարատ մարմին սրբոյ, և ըմպելի անյագութեան նորին՝ արիւն անմեղացն: Յաւելոյր եւս 'ի վերայ չարութեան նորա և զիւր մահաբեր հրամանն. գուճիս գուճիս յամենայն աշխարհացն գումարէր ընդ նմա, և բազում երամակս փրկաց յղէր ընդ նմա:

Հասեալ մերձ 'ի սահմանս Հայոց, մտանէր 'ի քաղաքն Փայտակարան, և զզօրսն ամենայն սփռէր տարածանէր շուրջ զքաղաքան առ 'ի զգուշութիւն պատրաստութեան իւրոյ չարահարխորհրդոցն: Եւ յամուր որչն մտեալ հին վիշապն չարաթոյն, և բազում կեղծաւորութեամբ զինքն թաքուցանելով յաներկեղութիւն, հեռաւո-

րացն ահագին ձայնիւ սաստէր, և 'ի մերձաւորսն իբրեւ զօձ սողալով փչէր: Սա էր իշխան և հրամանատար ամենայն տէրութեանն Պարսից, որում անուեն էր Միհրնէրսեհ. և չէր ոք ամենեւին, որ իշխէր ըստ ձեռն նորա ելանել: Եւ ոչ միայն մեծամեծք և փոքուեք, այլ և ինքն թագաւորն հրամանի նորա անսայր. որոյ և ձախող իրացն խկբուռն հարեալ էր նորա:

ՉՈՐՐՈՐԻ ՅԵՂԱՆԱԿ

ՎԱՍՆ ԵՐԿՊԱՌԱԿՈՒԹԵԱՆ ԻՇԽԱՆԻՆ

ՍԻՒՆԵԱՑ ԵՒ ԱՆՕՐԷՆ ԸՆԿԵՐԱՑ

ԻԻՐՈՑ

Մինչեւ ցայս վայր ոչ ինչ կարի շանդիտէի պատմել զհարուածս ազգիս մերոյ, որ յարտաքին թշնա մեաց ճշմարտութեանն չարաչար յարեան 'ի վերայ մեր. որք սակաւագոյնք հարին զմեզ, և յուրվագոյնք հարեալ գտան 'ի մէնջ. քան զի դեռ եւս միաբանք և հաւասարք էաք: Թէպէտ և ոմանք 'ի ծածուկ ունէին զերկմտութիւն նենգութեանն, սակայն յաչս արտաքնոցն ահաւոր երեւէր միաբանութիւնն. որպէս յերկուս և յերիս տեղիս ոչ կարացին կալ առաջի:

Արդ յայամ հետէ և անգր, ուր սպրդեալ անկանի երկպառակութիւն 'ի ներքս, ընդ քակել միաբա-

նութեանն՝ և երկնաւոր առաքի-
նութիւնն հեռանայ, և անձնըն-
տիրք լինելով՝ յոյժ բազմանայ լա-
լումն ողբոյս: Քանզի հատեալ ան-
կեալ անգամքն, որ յառաջագոյն
սորուն սուրբ մարմնոյս էին, գառ-
նայ մարդ յարտասուս առաջի մեր-
ձակայ գիականն: Եւս առաւել լը-
նու գառնութեամբ ՚ի վերայ այնո-
րիկ, որ յոգի եւ մարմին առ հա-
սարակ գիականնայ: Եւ եթէ ՚ի վե-
րայ միոյ անձին այսպէս, որչափ
եւս առաւել ՚ի վերայ ողջոյն ազգի
միոջ:

Այլ յայտմ տեղւոյ ոչ միայն ՚ի
վերայ միոյ ազգի է ողբումնս մեր,
այլ ՚ի վերայ ազգաց և աշխարհաց.
զոր և յառաջ մատուցեալ ասացից
ըստ կարգի, թէպէտ և ոչ ինդու-
թեան մտօք: Ահա ահամոյ ճառա-
գրեմ զբազումս. որպէս կորեան ո-
մանք ՚ի ճմարիտ կենացն իւրեանց,
և պատճառք եղեն բազմաց կորըս-
տեանն, ոմանց՝ երեւելեացս միայն,

և այլոց՝ երեւելեաց և աներեւու-
թից: Եւ այն՝ եւս չար է քան զա-
մենայն. դուռն՝ զոր բացին կորըս-
տեան, Աստուծոյ միայն կարողու-
թիւն է փակել զնա, այլ ըստ մարդ-
կան սահման՝ ահա անցեալ է հնար:

Այս անօրէն Միհրնէրսէհ, քան-
զի յառաջագոյն ստուգեալ գիտէր
զամբարշտութիւնն Վասակայ, և
յայնմ ժամանակի եւս յղէր և կո-
չէր զնա առ ինքն: Որպէս նորա իսկ
յառաջագոյն զատեալ և որոշեալ
էր ՚ի միաբանութենէն Հայոց, եկն
և յանգիման եղեւ. և ստուգէր
զիւր հաւատարմութիւնն և զՀա-
յոց անիրաւ ապստամբութիւնն:
Եւ եւ և պատմեաց եւս առաւել
լաբանութեամբ զոր ինչ ոչ էր գոր-
ծեալ Հայոց, և կամէր ընդանբար
ընդ միտ մտանել անօրինին:

Բայց նա թէպէտ և ՚ի ներքոյ
յոյժ դարովէր զնա, այլ արտաքին
գիմօք մեծարեաց զնա, և եդ առա-
ջի նորա զմեծամեծ պարգեւս երկ-

բաւորս: Եւ խոստացաւ նմա իշխաւ
նութիւնն աւելի քան զոր ունէրն.
և հայեցոյց զնա 'ի կարծիս սնոտիս,
որ 'ի վեր էր քան զիւր տէրու-
թիւնն. իբր թէ անկ իցէ նմա հա-
սանել մինչ 'ի թագաւորական վի-
ճակն. բայց միայն հնարս իրացն
խնդրեցէ, թէ որպէս քակտեսցի
միաբանութիւնն ուխտին Հայոց, և
թագաւորին կամքն կատարեսցին
յաշխարհին:

Եւ իբրեւ յանձն էառ զամենայն
ինչ՝ երթալ զինի կամաց նորա,
գլխաց և ծերն գառնացեալ, եթէ
թմբրեալ և ցնորեալ և քակեալ է
'ի հաստատութենէ միաբանելոցն.
յոյժ մխիթարեցաւ 'ի միտս իւր
տրտմեալս, և ած զմտաւ՝ թէ և
զամենեսեան այսպէս կարիցեմք որ-
սալ յանգիւտ կորուսան: Եւ իւրոյ
հնարապիտութեանն տայր զիմաս-
տութիւնն. և այնմ ոչ էր տեղեակ,
թէ նա իւրովի զիւր անձն զատեալ
և որոշեալ է 'ի սուրբ եկեղեցւոյն,

հեռացեալ և օտարացեալ 'ի սիրոյն
Քրիստոսի:

Քանզի մնացօնք եղէն նմա գա-
լուսա որդւոյն Աստուծոյ, և ոչ
յիշեաց զքարոզութիւն սուրբ ա-
ւետարանին, ոչ 'ի սպառնալեացն
զանգիտեաց, և ոչ յաւետիան մխի-
թարեցաւ: Ուրացաւ զաւազանն՝
որ յղացաւ զնա, և ոչ յիշեաց զըն-
կալուչ սուրբ Հոգին՝ որ ծնաւ ըզ-
նա: Անարգեաց զմարմինն պա-
տուական՝ որով սրբեցաւն, և առ-
ոտն եհար զարիւնն կենդանի՝ որով
և քաւեցաւն 'ի մեղաց: Չնչեաց ըզ-
գիր որդեգրութեանն, և իւրովք
ձեռօք խորտակեաց զհաստատուն
կնիք մատանւոյն: Եւ 'ի թուոյ ե-
րանելեացն, և ապստամբեցոյց ընդ
իւր զբազումս:

Չեոն արկ կամակորութեամբ և
եմճաւ յորդեգրութիւն զիւրապաշ-
տութեանն, և եղեւ աման չարին,
և ելից զնա սատանայ ամենայն խո-
րամանկութեամբ: Ի ձեռն էառ

իբրեւ զվահան, և ագաւ զնա իբրեւ զրահս, և եղեւ իբր զինուոր կատարեալ կամաց նորա: Մարտեաւ հնարիւք ընդ խնաստունս, և յոյժ խորագիտութեամբ ընդ գիտունս, յայննի ընդ անմեղս, և 'ի ծածուկ ընդ խորհրդականս. ձեռն էարկ և եհան զբազումս 'ի գնդէն Քրիստոսի, և խառնեաց 'ի գունդս գիււաց: Եւ 'ի բազում յայլ տեղիս գողաբար սողեցաւ և եմնւտ իբրեւ զօձ 'ի մէջ ամբացելոցն. և խրամ հատեալ յափշտակեաց և էսու և եհան յայանութեամբ զբազումս յողատաց և զբազմագոյնս 'ի շինականաց, և զայլ ոմանս յանուանեալ քահանայից:

Որոց անուանքն են այս՝ գործակցաց նորա. իշխանն Իրջտունեաց Արտակ անուն, իշխանն Խորխոռունեաց Գագիւոյ անուն, իշխանն Վահեռունեաց Գիււտ անուն, իշխանն Բագրատունեաց Տիրոց անուն, իշխանն Ապահունեաց Մանէճ ա-

նուն, իշխանն Գաբեղենից Արտէն անուն, իշխանն Ակեոյ Ընջուղ անուն, իշխանն Ուրծայ Ներսէհ անուն, իշխանն միւս եւս Պալունեաց Վարազշապուհ անուն, սեպուհ մի Ամատունեաց Մանէն անուն. բազում և այլ ազատ մարդիկ, զոր ոստանիկսն անուանեն յարքունի տանէ:

Եւ բովանդակ զիւր բոլոր աշխարհն ապստամբեցոյց յուրացութիւն, ոչ միայն ըստ աշխարհին բազմութեանն, այլ և զբազումս յուխտէ եկեղեցոյն. մանաւանդ սուտ երկցամբն, որով գործէր զչարիան. երէց մի Զանգակ անուն, երէց մի Պետրոս անուն, սարկաւագ մի Սահակ անուն, զորս յղէր առ անմեղ մարդիկ, խաբէր և պատրէր. սուրբ աւետարանաւն երդնուին և ասէին, եթէ 'ի թագաւորէն շնորհեսցի ամենեցունց քրիստոնէութիւնդ: Եւ այսպէս խորամանկ խաբէութեամբ հանէին զբա-

զուսն 'ի սուրբ միաբանութենէն, ամէկն և խառնէին 'ի գունդս ուրացողայն:

Եւ ժողովեաց զամենայն գայլթակղութիւն, և արար գունդ զօրաց բազմաց. գրեաց և եցոյց զբազուսն 'ի նոցանէ յականէ յանուանէ մեծ հազարապետին, և զիւր քաջութիւն արութեանն, մեծապէս պարծելով՝ որպէս աշակերտեաց 'ի մոլորութիւն խաբէութեան, և բաժանեալս և երկցեղս երեւեցոյց զզօրսն Հայոց:

Եւ իբրեւ այս ամենայն չարիք յաջողեցան նմա, քակեաց և զմիաբանութիւն աշխարհին Վրաց 'ի Հայոց, և Աղուանիցն ոչ ետ յառաջ խաղալ, և զաշխարհն Աղձնեաց ըստ նմին իսկ օրինակի յետս կալաւ: Գրեաց հրովարտակ և աշխարհին Յունաց, ցուցանելով նոցա այլ ընդ այլոյ ստութեամբ, առ այր մի՛ որոյ Վասակ անուանէր, յայնց Մամիկոնենից՝ որ կան 'ի ծառայու-

թեան Յունաց: Եւ 'ի թշուառութեան ժամանակին այրն այն սպարապետ էր ստորին Հայոց, և հաւատարիմ զօրայն Հռովմաց 'ի սահմանին Պարսից, և արտաքոյ էր օրինայն Աստուծոյ գործովք իւրովք: Եգիտ այս Վասակ զայն Վասակն իւր գործակից 'ի մեծամեծ չարիսն, զոր միաբանեցին երկուքեանն:

Գրէր և ցուցանէր հանապազորդնա, իբր թէ ամենայն Հայք զկնի իւր միաբանեցին. և զնոյն գիր մեծաւ զգուշութեամբ ներքին Վասակն տայր տանել 'ի Թագաւորանիսա քաղաքն կայսեր. մինչեւ ըզսուրբ եպիսկոպոսացն զմիտան եւս ուժացոյց 'ի նոցանէ, և զամենայն զօրսն Յունաց յերկբայս արար յուխտէն: Մանաւանգ զի 'ի ձեռն սուա քահանայիցն պատրէր և խաբէր իբրեւ ճմարիտ մարդովք, աւետարան հանդերձ խաջիւ տայր տանել, և զիւր զամենայն սատանա-

յական ստուգութիւնն նորօք ծածկեր: Դնէր զինքն յաստուածպաշտութեան կարգի և զամենայն կողմ՝ ուրացելոցն. առաւել զինքն հաստատէր հաստատուն քան զամենայն զօրսն Հայոց. երդնոյր և հաստատէր, էւս և զամենայն հրամանս թողութեան յարքունուսացանէր:

Այն էին և կամք Յունաց աշխարհին, լսել զայն ախորժուածեամբ. այլ 'ի ձեռն նորա առաւել եւս 'ի նոյն յեղեալ տապալեցան: Սոյն պէս առնէր և ընդ ամենայն կողմանս ամրականաց աշխարհին, 'ի Տմորիսն և 'ի Կորդիսն, յԱրցախ և յԱղուանսն, 'ի Վիրս և յաշխարհն Խաղտեաց, յղէր պնդէր, զի ասպընջականութեան ոք արժանի մի արասցէ:

Սւ ըստ մեծի չարութեան նորա առաւել եւս ժամանակն եբեր նմա զյաջողութիւն իրացն. զի ամենեւին արասքուստ օգնական ոք ոչ

գտաւ գնդին Հայոց, բայց յայնց Հոնաց, որոց բանս եղեալ էր: Սակայն և վասն նոցա կուտեաց զբաշտում այրուծին Արեաց, արգել և փակեաց զգրուես ելին նոցա. քան զի ոչ տայր դադար ամենեւին թագաւորին Վարսից, այլ յղէր և կոչէր գունդս բազումս 'ի պահակն ճորայ, և զՎրաց աշխարհին բովանդակ գումարէր, զզօրսն Կինաց և զՃղբաց, և զՎատն, զԳաւն և զԳղուարն և զԽրասնն և զՀեւմատակն, զՓասիսն և զՓոսիսն և զՓիւքուան և զամենայն զօրսն Թաւասպարանն, զԼեւնայիսն և զգաշտայինն, և զամենայն ամրակողմն լեւանցն: Էր զօր կարասեալ, մեծաւ պարգեւօք և առատաձեռն բաշխելով զգանձսն արքունի, և էր զօր հրամանաւ թագաւորին սաստիւ տագնապէր:

Չայս ամենայն իբրեւ արար և կատարեաց ըստ հրամանի թագաւորին, օր ըստ օրէ գրէր և ցուցա-

նէր մեծ հազարապետին Պարսից, որ զօղեալ և թաքուցեալ էր 'ի քաղաքն Փայտակարան: Համարձակեցաւ այնուհետեւ և նա ցուցանել զինքն բազում ազգաց. էր որոց ահ արկանէր, և էր որոց սիրով պարգեւս բաշխէր: Կոչէր առ ինքն զՎաստակ, և որք ընդ նմա իշխանքն ամենեքեան. բազում պարգեւս բաշխէր նոցա յարքունուստ, և զօրացն՝ որ 'ի նոցա բանի էին: Տանէր զառաջեալ և զուրացեալ երկցունան. ցուցանէր, հաստատէր և յայտ առնէր, եթէ սոքօք որսացայց զնոսա՝ քակտել 'ի միաբան ուխտէն: Իսկ հազարապետն իբրեւ զայն լէր, յոյժ շնորհակալ լինէր երկոցունցն, և յոյս առաջի դնէր նոցա. Եթէ լիցի մեր յաղթութիւն, զայլոց քահանայից կեանս գոցա շնորհեցից, և զմեծ վաստակ գոցա ցուցից թափաւորին:

Եւ այսպէս շարժեաց և շփոթեաց զաշխարհն Հայոց, մինչեւ

զբազում եղբարս հարազատս քակեաց 'ի միմեանց. ոչ եթող միաբան զհայր և զորդի, և 'ի մէջ խաղաղութեան արար խռովութիւն:

Եւ անդէն իսկ յերում աշխարհին եղբորորդիք երկու էին նորա 'ի սուրբ ուխտին առաքինութեան. գրեաց և եցոյց վասն նոցա յարքունիս, և հառ իշխանութիւն 'ի վերայ կենաց նոցա, մերժեաց և եհան զնոսա յաշխարհէն, զի միայլ դարձցին անդրէն: Հալածեաց և փախոյց զամենայն միայնակեացս աշխարհին, ոյք հայհոյէին զանգարձ ամբարշտութիւն նորա, որ արար և կատարեաց զամենայն չարիսն ընդդէմ ճմարտութեանն. և զոր ինչ ոչ գիտէին անօրէն հեթանոսքն՝ ի մացուցանէր նոցա, և վասն ուխտին քրիստոնէութեան, եթէ սրպէս հնարիւք կարասցէ բառնալ յաշխարհէն Հայոց:

Չայս ամենայն չարիս իբրեւ ետես 'ի նմա Միհրնէրսեհ, քան

յանձն իւր՝ առաւել 'ի նա էր յուսացեալ: Հարցանէր և ստուգէր, թէ քանի այր կայ 'ի Հայոց աշխարհին 'ի գնդին Վարդանայ ընդ ամենայն բազմութիւնն: Իբրեւ լուաւ 'ի նմանէ՝ թէ աւելի քան զվաթսուն հազար են, խնդրէր եւս տեղեկութիւն վասն իւրաքանչիւր անձին քաջութեան, և կամ քանի այն ոք իյեն՝ որ սպառազէնքն իյեն, և կամ քանի այն ոք իյեն՝ որ մերկ առանց զինու աղեղնաւորք իյեն. սոյնպէս և վասն վահանաւոր հետեւակացն:

Եւ իբրեւ լուաւ զթիւ համարոյ բազմութեանն, առաւել եւս փութացաւ ուսանել թէ քանիք իյեն պարագլուխք քաջ նահատակացն, զի երիս ընդ միոյ պատրաստեսցէ առ մի մի 'ի նոցանէ: Թող զայլ ամենայն, այլ և գրօշից անգամ իւրաքանչիւրոց տեղեկանայր 'ի նմանէ. և թէ քանի գունդ զզօրսն բաժանիցեն, և որ ոք 'ի նոցանէ սա-

լարք լինիցին, և որ զօրագլուխ յորմէ կողմանէ յուազմ՝ մասնիցէ, և զինչ անուանք՝ իւրաքանչիւր համհարզ անցանիցեն, և քանի փոզահարք 'ի մէջ գնդին ձայնիցեն: Ղահի՛ր գործիցեն արգեօք, եթէ արձակ բանակեսցեն. ճակատ առ ճակատ գործիցեն, եթէ համագունդ ընդ մի տեղի գրդիցեն: Ո՛ր ոք 'ի նոցանէ յերկբայս կայցէ, և կամ ո ոք 'ի նոցանէ զանձն 'ի մահ գնելով գունդ գործիցէ:

Եւ իբրեւ զայս ամենայն տեղեկացեալ 'ի նմանէ, կոչէր զամենայն զօրագլխեանն, պատուէր հրամանի տայր ամենեցուն յանդիման նորա, զի խրատու նորա լուիցեն ամենեքեան: Եւ զամենայն զօրսն զօրաբլիսօքն հանդերձ յանձն առնէր առն միում՝ յաւագացն, որում առնուն էր Մուշկան Նիւսալաուուրա:

Եւ ինքն խաղայր անդրէն գնայր յերկիրն արեւելից. և յանդիման եղեալ մեծի թագաւորին, պատմէր

զամենայն անցս իրացն, զիւր հնարաւոր խնաստուութիւնն և զվասակայ խաբեբայ պատրանսն հայթայթանացն, որպէս զառաջինն զիւր զամբարշտութիւնն կամեցաւ ծածկել այնու՝ զի քակեալ երկպառակեաց զգունդն Հայոց: Իբրեւ լուաւ զայս ամենայն թագաւորն՝ ՚ի բերանոյ մեծ հաղարապետին, դառնացաւ յանձն իւր, և ասէ անսուտ երդմամբ. Եթէ ապրեսցի անօրէնն այն՝ ՚ի մեծ պատերազմէն, մեծաւ անարգանօք տամ՝ ըմպել նմա զբաժակն դառնութեան մահու:

ՀԻՆԳԵՐՈՐԴ ՅԵՂԱՏԱԿ

ՅԱՐՁԱԿՈՒԾՆ ԱՐԵՒԵԼԵԱՅՑ

Մեծ է սերն Աստուծոյ քան զամենայն մեծութիւն երկրաւոր, և այնպէս աներկիւղս առնէ զմարդիկ, իբրեւ զանմարմին զօրս հրեշտակաց, որպէս անդատին՝ ՚ի սկզբանէ է տեսանել զբազումս բազում անգամ ՚ի բազում տեղիս: Մարդիկ, որ սիրովն Աստուծոյ իբրեւ զինու վառեալք էին, ոչ ինչ խնայեցին զանգիտելով, իբրեւ անարի գոլով վատասիրտք, կամ ՚ի մահ անձանց, կամ յափշտակութիւն ընչից կամ ՚ի խողխողումս սիրելեաց, կամ ՚ի գերութիւն ընտանեաց, ելանել ՚ի հայրենի երկրէն և անկանել ՚ի ստրկութիւն յօտարութեան. առ ոչինչ համարեցան զայս ամենայն անցս չարչարանացն. այլ միայն վիաբան կալ ընդ Աստուծոյ, զի ՚ի նմանէ միայն մի գերի ելցեն. և ա-

մենայն երեւելի մեծութեանս զնա բաւական համարեցան՝ ընտրեալ 'ի միտս իւրեանց: Եւ զուրաշուժիւնն մեռելլութիւն վարկանէին, և զմահ վասն Աստուծոյ՝ անանց կենդանութիւն, և ծառայել յերկրի՝ ազատութիւն կենաց իւրեանց, և ընկենուլ զանձինս յօտարութիւն՝ ընդ Աստուծոյ գիւտից: Որպէս յայսմ ժամանակի տեսաք աչօք մերովք, զի զնոյն նահատակութիւն նահատակեցաւ և աշխարհս Հայոց:

Քանզի իբրեւ ետես մեծն Վարդան զերկպառակութիւն աշխարհին իւրոյ, ոչ ինչ թերահաւատութեամբ զանգիտեաց: Թէպէտ և ստուգեալ գիտաց զբազմաց այլոց եւս զերկմտութիւն, որ դեռ եւս ընդ նմա միաբանեալք էին, քաջալերեցաւ յանձն իւր և քաջալերեաց զզորոն իւր. քանզի ինքն իսկ դեռ բռնացեալ ունէր զթագաւորանիստ տեղիսն միաբանութեամբ նախարարացն, որ ոչ քակեցան 'ի

սուրբ ուխտէն: Հրաման տուեալ ամենայն զօրացն ժողովել յԱրտաշատ քաղաք, փոխանակ յետս կացելոցն՝ որ ելին զհետ իշխանին Սիւնեաց, զէղբարս կամ՝ զորգիս կամ՝ զէղբարցն որգիս 'ի տեղի նոցա մատուցանէր, և զիւրաքանչիւր զօրս տան նոցա. զի դեռ եւս ինքն ունէր զամենայն աշխարհն:

Եւ փութով ամենեքեան 'ի տեղի պատերազմին եկեալ հասանէին իւրաքանչիւր զօրօք և ամենայն պատրաստութեամբ, նոքա և որ բունքն հաստատուն կացեալ էին 'ի տեղւոյն, Ներշապուհ Արծրունի, և Խորէն Խորխոռունի, և ինքն ըսպարապետն, և Արտակ Պալուռնի, և Վահան Ամատունի, և գունդն Վահեւունեաց, և Թաթուլ Դիմաքսեան, և Արշաւիր Արշարունի, և Շմաւոն Անձաւացի, և Տաճատ Գնթունի, և Ստոմ Գնունի, և Խոսրով Գաբեղեան, և Կարէն Սահաւունի, և Հմայեակ Դիմաքսեան,

և միւս եւս այլ Քաղրիկ Դիմաքսեան, և Ներսէ՛հ Քաջբերունի, և Փարսման Մանդակունի, և Արսէն Ընձայացի, և Այրուկ Սէկունի, և Վէրէն Տաշրացի, և Ապրսամ Արծրունեացն, և Շահ խոռապետն արքունի, և Խուրս Սրուանձտեաց և Քողեանքն և Ակէացիքն և Տրպատունիքն և զօրքն Ռըշտունեաց և ամենայն գործակալքն արքունի իւրաքանչիւր զօրօքն հանդերձ:

Սոքա ամենեքեան համագունդք հասանէին ՚ի գործ պատերազմին ՚ի գաշտն Արապու, և լինէր հանդէս համարուն վաթսուէն և վեց հազար այր՝ ընդ հեծեալ և ընդ հետեւակ: Եկին ընդ նոսա սուրբքն Յովսէփ և Ղեւոնդ երէց, բազում և այլ քահանայք, և եւս բազմագոյն պաշտօնեայք: Քանզի ոչ ինչ զանգիտեցին և նոքա գալ ընդ նոսա ՚ի գործ պատերազմին. զի ոչ եթէ մարմնական համարէին զկռիւն, այլ հոգեւոր առաքինութեան. ցանկային մահակից լինեւ. քաջ նահատակացն:

Սկսաւ սպարապետն խօսել միաբանութեամբ նախարարացն ընդ զօրսն և ասէ. Ի բազում պատերազմունես մտեալ է իմ և ձեր ընդ իս. է ուրեք՝ զի քաջապէս յալթեցաք թշնամեացն, և է ուրեք՝ զի նոքա մեզ յալթեցին. և բազում այն է՝ որ յալթող գտեալ եմք և ոչ յալթեալք: Եւ միանգամայն այն ամենայն էին մարմնոյ պարծանք. քանզի հրամանաւ անցաւոր թագաւորին մարտնչեաք: Որ փախչէր, վատանուն յաշխարհի երեւէր, և անողորմ մահ ՚ի նմանէ գլտանէր. իսկ որ քաջութեամբ յառաջ մնաչէր, քաջ անուն ազգի ժառանգէր, և պարգեւս մեծաւ մեծս յանցաւոր և ՚ի մահկանացութագաւորէն ընդունէր: Եւ մեք իսկ աւասիկ յիւրաքանչիւր մարմինս ունիմք վէրս և սպիտ բազումս. և բազում այն քաջութիւն իցէ, վասն որոյ առեալ իցէ և պարգեւս մեծաւ մեծս: Անարգ և անօգուտ զբաշու-

Թիւնսն համարիմ, և առ ոչինչ ըզպարգեւան զբազումս. վասն զի ամենեքեան խափանելոց են: Իսկ արդ եթէ վասն մահկանացու հրամանատուին զայն արուժիւնս կատարէաք, որչափ եւս առաւել վասն անմահ Թագաւորին մերոյ, որ տէրն է կենդանեաց և մեռելոց, և դատելոց է զամենայն մարդ ըստ գործոց իւրոց: Ապաքէն եթէ կարի շատ յառաջ մատուցեալ ծերայաց, սակայն ելանելոց եմք 'ի մարմնոյ աստի, զի մացուք առ Աստուած կենդանի, որ ոչ եւս ելանիցեմք 'ի նմանէ:

Արդ աղաչեմ զձեզ, ովք քաջ նիւզակակիցք իմ, մանաւանդ զի բազումք 'ի ձէնջ լաւադոյնք էք քան զիս արուժեամբ, և գահու 'ի վեր ըստ հայրենի պատուոյն. բայց յոր ժամ ձերով կամօք և յօժարութեամբ առաջնորդ և զօրագլուխ ձեզ կացուցէք, հեշտ և բաղձալի թուեսցին բանք իմ 'ի լսելիս մե-

ծամեծաց և փոքունց: Մի երկուցեալ զանդիտեսցուք 'ի բազմութենէ հեթանոսացն, և մի յահագին սրոյ առն մահկանացուի զթիկուես զարձուսցուք. զի եթէ տացէ Տէր յաղթութիւն 'ի ձեռս մեր, սատակեսցուք զջորութիւն նոցա, զի բարձրացի կողմն ճմարութեանն. և եթէ հասեալ իցէ ժամանակ կենաց մերոց սուրբ մահուամբ պատերազմիս, ընկալցուք ինդութեամբ սրտիւ. բայց միայն յարութիւնս քաջութեան՝ վատութիւն մի խառնեսցուք:

Մանաւանդ զի անմոռաց է ինձ, յիշելով զիմ և զոմանց 'ի ձէնջ, 'ի ժամանակին՝ զի զանօրէն իշխանն խաբեցաք, պատրեցաք իբրեւ զմանուկ մի աղայ անպիտան. իբր այն եթէ 'ի վերինն երեսս զկամն նորա ամբարշտութեանն կատարեցաք. բայց 'ի ծածուկ զխորհուրդս Տէր ինքնին վկայէ մեզ, որպէս անբակ կացեալ եմք 'ի նմանէ: Չոր և դուք

ինքնին խակ գիտէք, վասն սիրելեաց մերոց՝ որ 'ի մեծի նեղութեան էին, հնարս ընդդէմք վասն յանդորր հանելոյ. զի նոքօք հանդերձ մարտ եղեալ կռուեսցուք ընդ անօրէն իշխանին վասն հայրենի աստուածատուր օրինացն: Եւ իբրեւ նոցա ոչ ինչ կարացաք օգնել, անհնար լիցի այս՝ եթէ վասն մարմնաւոր սիրոյ զՍտուած ընդ մարդկան փոխանակիցեմք:

Իսկ արդ յերկուս և յերիս կըսուիս Տէր ինքնին մեծաւ զօրութեամբ օգնեաց մեզ, որպէս զի զանուն քաջութեան ժառանգեցաք, և զզօրսն արքունի չարաչար հարաք, և զմոգսն անողորմ սատակեցաք, և զպղծութիւն կռապաշտութեանն 'ի տեղեաց տեղեաց սրբեցաք, զանօրէն հրաման թագաւորին եղծաք ապականեցաք, զխռովութիւն ծովուն ցածուցաք, լեռնացեալ ալիքն գաշտացան, բարձրագէզ փրփուրն սպառեցաւ, գա-

զանացեալ սրամտութիւնն գաղաւթեաց: Որ 'ի վերայ ամպոց որուտայր, նկուն եղեալ՝ քան զսովորական բնութիւնն 'ի վայր գաւառ ընդ մեզ խօսելով: Որ բանիւ հրամանաւ կամեր կատարել զչարութիւնն իւր 'ի վերայ սուրբ եկեղեցւոյ, արդ օղեղամբ և նիղակաւ և սրով կռուի: Որ իբրեւ զհանդերձ կարծէր ունել մեզ զքրիստոնէութիւնն, արդ իբրեւ զգոյն 'ի մարմնոյ՝ չկարէ շըրջել, թերեւս և ոչ այլ կարացէ մինչեւ 'ի կատարած: Քանզի հիմունք սորա հաստատութեամբ եղեալ են 'ի վերայ վիմին անշարժութեան, ոչ 'ի վերայ երկրի, այլ 'ի վեր յերկինս, ուր ոչ անձրեւք իջանեն և ոչ հողմք շնչեն և ոչ հեղեղս յարուցանեն: Եւ մեք թէպէտ և մարմնով յերկրի եմք, այլ հաւատովք յերկինս եմք շինեալ. ուր ոչ ոք կարէ հասանել յանձեռագործ շինուածն Քրիստոսի:

Հաստատուն կացէք յանշուշտ

զօրագլուխն մեր, որ ոչ երբեք մուսայի զգործս նահատակութեան ձերոյ: Ո՛վ քաջք, մեզ այս մեծապէս է՝ զոր կատարեաց Աստուած 'ի ձեռն մերոյ բնութեանս, յորում և զօրութիւնն Աստուծոյ մեծապէս երեւի: Զի եթէ զայլս կոտորելով 'ի վերայ աստուածային օրինացն՝ պարծանս անձանց ժառանգեցաք, և զքաջ անուն ազգատոհմին մերոյ թողաք եկեղեցւոյ, և վարձուց ակնկալութիւն 'ի Տեառնէ է, որ պահի իւրաքանչիւր ումեք 'ի մէնջ ըստ սրտին յօժարութեան և ըստ գործոց առաջարկութեան, որչափ եւս առաւել եթէ մեք մեռանիցիմք 'ի վերայ մեծի վկայութեան Տեառն մերոյ Յիսուսի Քրիստոսի, որում և երկնաւորքն են ցանկայեալ, եթէ գոյր չնար: Եւ զի այս պարգեւք ոչ ամենեցուն է անկ, այլ որում պարաստի 'ի բարերար Տեառնէն, և մեզ այս ոչ եթէ յարգար գործոց

ինչ պատահեաց, այլ յաննախանձ պարգեւատուէն. որպէս և ասէ իսկ 'ի սուրբ կապարանին. Ուր առաւել եղեն մեղքն, անդէն առաւելան շնորհքն Աստուծոյ:

Եւ մեզ կարի քաջ 'ի գէպ ելանէ հրաման պատասխանելոյս այսօրիկ. որպէս և առաւելապէս երեւեցաք մարդկան ամբարշտեալք, կրկին առաւելապէս երեւեսցուք արգարացեալք մարդկան և հրեշտակաց և հօրն ամենեցուն: Զի որ օր լուան ապաքէն զմէնջ մարդիկ 'ի գործ ամբարշտութեանն, արտասուս բազում հեղան 'ի սուրբ եկեղեցւոյն, և եւս բազմագոյն 'ի մէջ սիրելեացն մերոց: Նա և ընկերք մեր սրով սրամտեալ սպառնային մեզ, և մահ դառնութեան 'ի վերայ հասուցանել կամէին, և ծառայքն մեր սարտուցեալ փախչէին 'ի մէնջ: Եւ հեռաւորաց, որոց լուեալ էր զանունքրիստոնէութեան մերոյ, քանզի ոչ էին անդեակ խորհրդոցն մերոց,

ողբ 'ի բերան առեալ անդադար աշխարէին զմեզ, և անգիտութեամբ հայհոյութիւնս բազումս խօսէին զմէնջ: Եւ որ մեծն քան զամենայն ասացից. ոչ միայն մարգիկ յերկրի, այլ և հրեշտակք յերկինս զերեսս իւրեանց դարձուցին 'ի մէնջ, զի մի տխուր դիմօք հայեսցին 'ի մեզ:

Եւ ահա եկն եհաս ժամանակ, զի զամենայն զկեղտ անուան 'ի մէնջ 'ի բաց բարձցուք: Յայնժամ իբրեւ զԹախծեալ սգաւոր՝ յոգի և մարմին էաք տրտմեալք, այսօր զուարթացեալ և զգաստացեալք յերկոսեան առ հասարակ եմք լըրջացեալք. քանզի և զՏէրն բարերար ընդ մեզ տեսանեմք յառաջնորդութիւն. չէ մեր մարդ զօրավար, այլ զօրագլուխն ամենայն մարտիրոսաց: Երկիւղ՝ թերահաւատութեան էնշանակ, զթերահաւատութիւն մեք 'ի մէնջ վաղ մերժեցաք, ընդ նմին և երկիւղն փախիցէ 'ի մըտաց և 'ի խորհրդոց մերոց:

Ձայս ամենայն առաքինի զօրավարն խօսեցաւ ընդ ամենայն բաղմոնութեանն. դարձեալ և զմի մի 'ի նոցանէ քաջալերէր 'ի ծածուկ և սրտապնդէր, և զամենայն պակասութիւն աղքատութեան ընդր: Որոյ ոչ ինչ գոյր զօրականին, յանձնէ և յընկերաց մատուցանէր. որոյ զէն չէր, զէն պատրաստէր. և որում հանդերձ պիտոյ էր, հանդերձ զգեցուցանէր, և որում երկւար՝ երկւար տայր: Եւ առատ ոռոճկօք ուրախ առնէր զամենեսեան, և զուարթագին զինքն ցուցանէր ամենեցուն: Եւ ըստ պատերազմական կարգին զքաջ արանց զյիշատակարանս հանապազ երկրորդէր առաջի նոցա. զի և ինքն իսկ տեղեակ էր 'ի մանկութենէ իւրմէ սուրբ կտակարանաց: Զոր և 'ի ձեռն առեալ զքաջ նկարագիրն մակաբայեցւոց ընթեռնոյր 'ի լսելիս ամենեցուն. և յորդառատ բունիւք զէլս իրացն իմացուցանէր նո-

ցա, որպէս մարտուցեալ կռուեցան 'ի վերայ աստուածատուր օրի նացն ընդդէմ՝ Թագաւորին անախփացւոց: Արթուրէս և 'ի նմին կատարեցան մահուամբ, սակայն անուն քաջութեան եկաց մինչեւ ցայսօր ժամանակի, ոչ միայն յերկրի, այլ և անմոռաց յերկինս: Նա և զայն յուշ առնէր զօրականին, որպէս ազգատոհմն Մատաթեայ քակտեալ բաժանեցան 'ի միութենէ նորա, դարձան 'ի հրաման Թագաւորին, շինեցին մեհեանս, մատուցին զոհս պղծութեան, խոտորեցան յԱստուծոյ, և ընկալան ըզպատիժս պատուհասի մահուան 'ի սուրբ միաբանելոցն: Իսկ Մատաթի և որք ընդ նմայն էին՝ ոչ ինչ լքեալ Թուլացան, այլ եւս առաւելապէս պնդեցան, և ձեռնամուխ եղէն 'ի գործ պատերազմին բազում ժամանակս: Չայս ասէր, և անդէն 'ի դաշտին զտեղի առեալ՝ զօրսն զետեղէր, և յամենայն կողմանց տակաւ զայրուձին կազմէր:

Իսկ յետ բազում աւուրց զօրագլուխն Պարսից խաղայր գայր ամենայն հեթանոսական բազմութեամբն, և եկեալ հասանէր յաշխարհն Հայոց 'ի Հէր և 'ի Զարաւանդ գաւառ: Եւ անդէն 'ի գաւառին զտեղի առեալ նորա, բանակ բոլորէր, փոս հատանէր, պատնէշ կանգնէր, շերտաւոր փակէր, ամրացուցանէր իբրեւ զբազաք ամենայն պատրաստութեամբ: Գունդ բազում հատանէր 'ի զօրաց նորա, ասպատակաւ արշաւէր, յաւարի առնուլ կամէր զգաւառս բազումս:

Չայն իբրեւ լուան զօրքն Հայոց, սեպուհ մի յազգէն Ամասունեաց՝ Առանձար անուն, ընտրեցին յամենայն զօրականէն լի իմաստութեամբ և քաջութեամբ: Եւ ընդ առաջ նորա հազարօք երկու, հար սատակեաց զբազմութիւն գնդին, և ըզմնացեալն 'ի նոցանէ անդրէն փախըստական 'ի բանակն արկանէր: Եւ ինքն ողջանդամ այսրէն գաւ-

նայր, և լինէր տօն ուրախուլութեան՝ մեծ յաւուրն յայնմիկ զօրացն Հա-
յոց:

Դարձեալ միւսանգամ ուրա-
ցեալն Վասակ անգրէն 'ի հնարս
հայթայթանաց մտանէր ըստ առա-
ջին կեղծաւորութեան իւրոյ. շրջե-
ցաւ 'ի ձեռն սուտ երկցանցն՝ զոր
յառաջագոյն ասացաք, նոքօք հրա-
մանաւ արքունի 'ի սլափամուռ-
րութիւն խօսէր, և երգմամբ հաս-
տատէր զքրիստոնէութիւնն անգ-
րէն ունել: Եւ զայս արարեալ զբա-
զում աւուրս՝ ոչ կարաց զմիաբանու-
թիւնն քակտել, մանաւանդ զսուրբ
ուխտ եկեղեցւոյն, որ ոչ էր հե-
ռացեալ 'ի զօրականէն: Արպէս ե-
րանելի երէցն Ղեւոնդ հրաման ա-
ռեալ 'ի սուրբ ընկերացն 'ի մեծէն
Յովսեփայ և յամենայն մեծամե-
ծացն, 'ի քահանայիցն և 'ի զօրա-
գլխացն, եբայ զբերան իւր և ասէ
բարձր բարբառով առաջի հրեշտա-
կացն.

Յիշեցէք ամենեքեան զհարսն զա-
ռաջինս, որ յառաջ քան զծագումն
որդւոյն Աստուծոյ յիւրաքանչիւր
Ժամանակս: Քանզի իբրեւ մեր-
ժեաց և ընկէց զմեզ չարն յաս-
տուածային տեղւոյն, գտաք մեք
անկեալք ընդ անողորմ գատաստա-
նօք ըստ մեղացն յանցաւորու-
թեան, որ 'ի կամս ազատութեան
մերոյ գործեցաք զանարժանս, և
զարարչական զօրութիւնն շարժե-
ցաք 'ի վերայ մեր 'ի ցասումն բար-
կութեան, և զողորմամբ գատաւորն
յուզեցաք վրէժ առնուլ անաչա-
ռութեամբ յարարածոցս. մինչեւ
հրաման տուեալ երկնային ծովուն
հեղուլ 'ի վերայ ցամաքիս, և հաս-
տատուն յատակք երկրիս ծակո-
տեալ՝ ընդդէմ զհակառակսն գոր-
ծեցին: Վերինք և ներքինք եղեն
մեզ գործիք տանջանաց՝ առանց
բարեխօսի վրէժ առնուլ յանցա-
նայ մերոց:

Ապաքէն արգարն Նոյ միայն գը-

տաւ կատարեալ յազգի մարդկու-
թեանս, որ ցածոյց զսրտամուռութիւն
բարկութեան տերունեան ցաւ-
մանն, և եղեւ սկիզբն առաջարկու-
թեան առ աճուումն բազմութեան
մարդկային ազգիս: Գարձեալ և
Սբրաձամ 'ի փորձութեանն իւ-
րում գտաւ առաքինի, և զընկա-
լեալ սարգեւան յԱստուծոյ՝ ին-
քեան ձեռօք փոխ անդրէն նմին մա-
տուցանէր, վասն այսորիկ և յա-
ռակս ընկալաւ զնա Աստուած. զի
'ի նմա սպաւորեալ տեսանէր զան-
երեւոյթ գալուստ որդւոյն Աս-
տուծոյ, և զըմբռնումն անըմբռնե-
լոյն և զզենումն անմահին, որ իւ-
րով մահուամբն խափանեաց զիշ-
խանութիւն մահու: Եւ եթէ մա-
հուամբ մահ մեռանի, մի երկիցուք
մահակից լինել Քրիստոսի. զի ընդ
որում մէք մեռանիմք, ընդ նմին և
կենդանանամք:

Յիշեցէք, առաքինիք, զմեծն Մով-
սէս, որ մինչ չեւ հասեալ էր յա-

րութեան հասակն՝ խորհուրդ
սուրբ նահատակութեանն 'ի տիս
տղայութեանն երեւէր նմա. և
տուն թագաւորին եգիպտացոց 'ի
Ժառայութիւն մտանէր նմա, և ա-
կամայ դայեկութեամբ սնուցանէր
զնա. և 'ի ժամ փրկելոյ զժողո-
վորդն 'ի նեղութենէն, միջնորդ
եղեւ երկնի և երկրի, միանգամայն
և աստուած անուանեցաւ 'ի վերայ
եգիպտացոցն: Քանզի ուր գտաւ
սուրբ խորհուրդն զօրացեալ, ան-
ձամբ իւրով վրէժ առնոյր յեգիպ-
տացոցն. իսկ ուր աստուածային
յայտնութիւնն 'ի վերայ նորա լի-
նէր՝ 'ի ձեռն գաւազանին գործէր
զմեծամեծ սքանչելիսն: Եւ վասն
սուրբ նախանձուն զօր ունէր՝ ե-
հար զեգիպտացին և ընդաւալեաց.
վասն որոյ զմեծ անուն գնէր նմա,
և առաջնորդ ժողովրդեանն զնա
կացուցանէր: Եւ բազում այն է,
որ հեղմամբ արեամբն արդարաւ-
ցաւ, և անուանեցաւ մեծ քան զա-

մենայն մարգարէս. ոչ միայն զար-
տաքին Թշնամիսն կոտորելով, այլ
զազգատոհմսն, որ փոխանակեցին
զԱստուած ընդ որթուն յանապա-
տին:

Եւ եթէ նա 'ի հեռուստ այնպիսի
վրէժ խնդրէր գալստեան որդւոյն
Աստուծոյ, մէք որ ականատեսք
եղաք, և մեծամեծ վայելեցաք
յերկնաւոր պարգեւսն շնորհաց
նորա՝ եւս առաւել պարտիմք վրէժ-
խնդիր լինել մօտակայ ճշմարտու-
թեանս: Որ եդ մահուամբ զանձն
իւր 'ի վերայ մեղաց մերոց և ար-
դարացոյց զմեզ յանհնարին դատա-
պարտութենէն, դիցուք և մէք զան-
ձինս մեր մահուամբ 'ի վերայ ան-
մահ զօրութեանն, զի մի նուազք
քան զվրէժխնդիրսն գտանիցիմք:

Յիշեցէք զմեծ քահանայն Փենե-
հէզ, որ սպանմամբ եբարձ զպղղ-
ծութիւնն 'ի ժամ պատերազմին,
և յազգէ յաղգ երգմամբ հաստա-
տեաց զքահանայութիւնն: Մի մո-

ռանայք և զսուրբ մարգարէն զԵ-
զիաս, որ ոչ կարէր հանդարտել
հայել 'ի կռապաշտութիւնն Աքա-
բու. և արգար նախանձուն իւրոյ
զուրթ հարիւրսն ինքեան ձեռօք սա-
տակեաց, և զերկուս յսուենն ան-
շէջ հրոյն մատուցանէր լուցկիս. և
զաստուածային վրէժն խնդրելով
անըմբռնելի և ահագին կառօքն
յերկրէ 'ի յերկինս վերացաւ:
Դուք՝ եւս մասին մեծի վիճակի հա-
սեալ էք. զի ոչ եւս կառք առաքին
ձեզ 'ի վերացումն, այլ ինքնին
Տէրն կառաց և երիւարաց հզօր զօ-
րութեամբ և սրբովք հրեշտակօք
ընդ առաջ եկեալ՝ ձեզ իւրաքան-
չիւր թեւս բուսուցանէ, զի նորա
ուղեկիցք լինիցիմք և նմին քաղա-
քակիցք:

Եւ այլ զԹնչ եւս երկրորդեցից
առաջի ձերոյ քաջ նահատակու-
թեանդ, զի քան զիս տեղեկագոյնք
և հմուտք էք սուրբ կտակարա-
նայն: Դաւիթ 'ի մանկութեան ժա-

մանակին քարիւ կործանեաց զմեծ բլուրն մտեղէն, և ոչ ինչ զանգիւտեաց յահագին սրոյ հսկային. ցըրուեաց զգունդս այլազգեացն, և ապրեցոյց զզօրան 'ի մահուանէ, և զժողովուրդն 'ի գերութենէ. եղեւ անդրանիկ Թագաւորացն Իսրայելի, և անուանեցաւ հայր որդւոյն Աստուծոյ: Նա անուանեցաւ առ 'ի պէտս ժամանակին, և դուք ճշմարտիւ ծնեալք 'ի սուրբ Հոգւոյն որդեք էք Աստուծոյ և ժառանգակիցք Քրիստոսի: Մի ոք զձեր բաժինն 'ի ձէնջ հատանիցէ, և զձեզ օտարախորթ արարեալ՝ տարաբաժին հանիցէ:

Յիշեցէք զամենայն զօրավարն Իսրայելի զառաջինսն, զՅեշոփ, զԳեդեոփ, զՅեփթային և զայլն ամենայն. որք ճշմարիտ հաւատովք էին, հարին կոտորեցին զզօրան հեթանոսայ, և սրբեցին զերկիրն 'ի պիղծ կռապաշտութենէն: Եւ վասն հաստատուն արդարագործու-

թեանն, որ ոչ ինչ երկմտեցին 'ի խորհուրդս իւրեանց, արեգակն և լուսին առանց ականջաց լուան և կատարեցին զբան հրամանի նոցա. ծով և գետք ճանապարհ գործեցին առաջի նոցա ըստ ոչ սովորութեան. և բարձրացեալ պարիսպք քաղաքին ձայնիւ լոկով անկեալ կործանեցան: Եւ այլքն ամենայն՝ որ ըստ հաւատոց քաջութիւնս կատարեցին 'ի դարս իւրաքանչիւր, գովեցան 'ի մարդկանէ և արդարացան յԱստուծոյ:

Ապաքէն նոյն Տէր է որ 'ի սկզբանէ մինչեւ ցայսօր և առ յապագա, և յաւիտենից յաւիտեանս, և անգրքան զամենայն յաւիտեանս: Ոչ նորոգի, զի ոչ հնանայ. ոչ մանկանայ, զի ոչ ծերանայ. ոչ փոխի անյեղյեղուկ բնութիւնն Աստուծոյ. որպէս և ինքն իսկ ասէ բերանով սուրբ մարգարէիցն. Ես եմ, ես եմ, 'ի սկզբանէ նոյն մինչեւ յաւիտեանս. ոչ ամ զփառս իմ այ-

լում, և ոչ զբաշուլթիւնս իմ գրօշեւոց:

Չայս գիտելով, եղբարք, մի թուլութեամբ լքանիցիմք, այլ պնդութեամբ սրտիւ և հաստատուն հաւատովք կամակարուութեամբ յարձակեսցուք 'ի վերայ թշնամեացն, որ յարուցեալ գան 'ի վերայ մեր: Մեր յոյսն մեզ կրկին երեւի. եթէ մեռանիմք՝ կեամք, և եթէ մեռուցանեմք՝ մեզ նոյն կեանք առաջի կան: Յիշեսցուք զբանն Առաքելոյ, որ ասէ, թէ փոխանակ ուրախութեան՝ որ նմա առաջի կայր, յանձնէառ զհամբերութիւն մահու, և մահու խաչի. վասն այսորիկ և Աստուած զնա առաւել բարձրացոյց, և ետ նմա անուն՝ որ 'ի վեր է քան զամենայն անուն. զի յանուն 'ի սուսի Քրիստոսի ամենայն ծունր կրկնեսցի երկնաւորաց և երկրաւորաց և սանդարամետականաց:

Եւ քանզի որ ճմարտութեամբ միացեալ է ընդ որդւոյն Աստու-

ծոյ, հոգւոյն աջօք տեսանէ զաներեւոյթ յստակ լոյսն ճառագայթից իմանալի արեգականն, որ յամենայն ժամ և յամենայն օր գեր 'ի վերոյ ծագեալ երեւի ամենեցուն, և սրբատեսիլ և սրբահայեացս անպղտոր յստակութեամբ ձգեսցուցանէ զհայեցուածս, և թափանցանց եղեալ ընդ երկինս՝ յանմատոյց տեսիլն մերձեցուցանէ, և կոլովութեամբ կշռէ զերկրպագութիւն զերկից հատուածոցն միաւոր զօրութեանն: Եւ արդ որ ընդ Աստուծոյ աստիճանսն ոտնփոխ եղեալ իցէն, և բարձրութեամբ յարբունիսն հասեալ, և զամենայն մեծութիւն բովանդակ տեսեալ՝ նա միայն է որ ժառանգէ զանանց ուրախութիւնն և զանտրամական մխիթարութիւնն:

Մի, տեարք իմ պատուականք, յետ այսչափ 'ի բարձունս վերանալոյ, այսրէն յերկիր անկեալ թաւալիցիմք, այլ տեղի տուեալ

անդրէն 'ի բարձրութեանն Հաստատեսցուք: Թէպէտ և Հայեսցուք 'ի ստորին կողմ՝ Երկրիս, տեսանեմք զսա լի ամենայն ապականութեամբ և անսուրբ պղծութեամբ: Քանզի զի՞նչ աղէտք տարակուսի են, որ ոչ գործին յերկրայինս ատաբերս. Թշուառութիւնք աղքատաց և անթիւ չարչարանք նոցուն, աղցաւոր ծանրութիւնք հարկահանաց, զըզուանք և կուփանք 'ի բռնաւոր ընկերակցաց, քաղց և ծարաւ ըսակարօտութեան բնութեանս: Սառնամանիք ձմերայնեոյ և խորչակք ամարայնեոյ, հիւանդութիւնք տարաժամք և ախոք մահաբերք հանապաղ տանջեն զմարդիկ. Երկիւղ արտաքնոց և արհաւիրք 'ի ներքնոց անդադար 'ի վերայ հասանեն. ցանկան մահու յառաջ քան զժամանակն, և ոչ գտանեն. և բազումք են՝ որ փորեն և խնդրեն, և խնդալից լինին յորժամ գտանեն: Իսկ որ Թուին մեզ, եթէ յաջողեալք

են 'ի մեծութեան և փափկանան ուրախութեամբք 'ի պակասելի կեանս, մեծամտեալ Հպարտանան յանցաւոր մասունս աշխարհիս, նոքա են՝ որ կուրացեալ են 'ի ճշմարիտ կենացն: Իսկ արդ զի՞նչ այն չարիք իցեն՝ որ 'ի նոսա ոչ գործիցին. ընդ մեծութիւնն խառնեալ է յափշտակութիւն ընչից աղքատաց, ընդ սուրբ ամուսնութիւնն՝ գէձ պղծութիւն: Յորս վայելեն ընտրութեամբ, նոցուն երկրպագութիւն իբրեւ Աստուծոյ մատուցանեն, մոլորեալք 'ի ճմարիտ կենացն:

Ո՞չ ահա աշխարհս ամենայն արարչին բոլորեցուն է գոյացութիւն. և զոր նոքայն պաշտեն և պատուեն՝ ապաքէն 'ի սմին նիւթոյ է մասն. իսկ արդ մասունքն մասանց կան 'ի ծառայութիւն: Զի եթէ մի մասն աշխարհիս ապականացու է, հարկ է թէ և ամենայն մասունքն ընդ նմին ապականին: Նա

և 'ի մասանց անտի՝ պարտ է թէ և ընտրութիւնք երեւեացին. իսկ արդ որ լաւ է՝ յայանի է ամենեցուն, և որ գիտէն իմանալ՝ նա է ընտիր 'ի մասանցն: Ապա թէ այդ այդպէս է, քան զամենայն պաշտամունս հեթանոսաց, որում՝ երկիր պագանեն, երկրպագութեն են առաւելեալք քան զանբան տարերսն, որոց չարաչար կան 'ի ծառայութեան. և զէն Աստուած՝ որ 'ի մարդ կերպարանեցաւ՝ չպաշտեն, այլ արարածոց տանին երկրպագութիւն. որոց մեղաց չիք քաւութիւն յարդար ատենին:

Օն անդր 'ի բաց թողցուք զխաւարային խորհուրդս մոլորելոցն. եղկելիս և ողորմելիս քան զամենայն մարդիկ զնոսա համարեացուք. մանաւանդ զի կամօք են կուրացեալք և ոչ 'ի հարկէ, և ոչ երբէք գտցեն զճանապարհն ճմարտութեան: Այլ մեր բացհայեաց աչօք տեսեալ զլոյսն երկնաւոր, մի

պատահեսցէ մեզ խաւարն արտաքին: Զի ոչք էին 'ի խաւարի, եկն առ նոսա լոյսն ճմարիտ, կուրացեալք վրիպեցան 'ի կենացն. իսկ որք ընկալայք հաւատովք՝ որդիք էք և ոչ օտարախորթք, սիրելիք և ոչ թշնամիք, բաժանորդք և ժառանգորդք վերին իմանալի քաղաքին:

Անդ է առաջնորդ փրկութեան մերոյ. աստ քաջութեամբ նահատակեցաւ, և զնոյն ուսոյց ամենայն նիզակակից գործակցաց իւրոց առաքելոց. յորմէ և դուք էք այսօր կրկին երեւեալք, օրհնեալք հաւատովք ընդդէմ աներեւոյթ թշնամւոյն, պատենազէն զրահիւք դէմ ընդդէմ ընկերակից սատանայական գործոյն: Եւ եթէ այսպէս և եթէ այնպէս, զերկոսեան կողմանսն 'ի պարտութիւն մասնէք, որպէս և Տէրն ինքնին արար. աշխարհի թուեցաւ թէ մեռաւ, այլ նա յայնժամ տարաւ զկատարեալ նա-

հատակ առաքինուԹիւնն . զախոյեանն ընկէց, զպատերազմն եհար, զԹշնամիսն ցրուեաց, զաւարն ժողովեաց, զգերին դարձոյց, զպարգեւան բաշխեաց ամենայն սիրելեաց իւրոց 'ի ձեռն իւրաքանչիւր առաքինուԹեանց :

Քիտէք դուք ամենեքեան, յառաջ ժամանակաւ հասեալ ձեր 'ի դործ պատերազմի, Թէպէտ և էր ձեր սովորուԹիւն՝ քահանայից հաւնապաղորդել 'ի մէջ բանակիս, 'ի ժամ՝ ճակատուցն յանձնեալ ձեզ 'ի նոցանէ ալօթիւք՝ յամուր տեղուջ ուրեք Թողուիք զնոսա . իսկ այսօր եպիսկոպոսք և երիցունք և սարկաւազունք, սաղմոսերգօղք և գրակարգացք իւրաքանչիւր կարգեալ կանոնաւ՝ իբր վառեալք զինու և պատրաստեալք 'ի պատերազմ, կամին ընդ ձեզ յարձակել հարկանել զԹշնամիսն ճմարտուԹեան : Եւ եթէ մեռանել եւս հասանէ 'ի նոցանէ, սակայն և յայն

մանէ ոչ են զանգիտելոց . քանզի լաւագոյն զմեռանելն կամին քան զմեռուցանելն : Որպէս զի կրկին աչս սաացեալ ունիցին . հաւատոց աջօք զքարկոծանս մարգարէիցն տեսանեն, և մարմնոյ աջօք զքաջուԹիւն ձերոյ նահատակուԹեանդ : Մանաւանդ Թէ 'ի ձեզ զերկօսեան իսկ տեսանեմք . քանզի և դուք իսկ տեսանէք զչարչարանս սուրբ առաքելոցն և զսպանմունս զամենայն սուրբ մարտիրոսացն, որոց մահուամբն հաստատեցաւ սուրբ եկեղեցի, և հեղումն արեան իւրեանց եղեւ 'ի պարծանս վերնոցն և ներքնոցն : Արդ մինչեւ 'ի գալուստն երկրորդ՝ նոյն նահատակուԹիւն կատարի չարչարանօք :

Յայս վայր խօսեցաւ 'ի գիշերին յայնմիկ սուրբ երէցն՝ Վեռնդ, և փառաբերելով կատարեաց զամենն ասելով : Եւ սեղան ուղղեալ՝ զամենասուրբ խորհուրդն կատարեցին . ուղղեցին և աւագան, և եթէ

գոյր որ երախայ 'ի բազմութեան զօրուն՝ զգիշերն ամենայն մկրտեցին. և ընդ առաւօտս սուրբ օրինացն հաղորդեցան, և այնպէս լուսազգեստ եղեն՝ որպէս 'ի տերունեան մեծի սուրբ զատկին: Եւ մեծաւ զուարճութեամբ և յոյժ իւրն դուժեամբ աղաղակեաց անենայն բազմութիւն զօրացն և ասեն. Հաւասարեացէ մահ մեր ընդ մահու արգարոցն, և հեղուին արեան մերոյ ընդ արիւն սուրբ մարտիրոսացն. և հաճեսցի Աստուած կամաւոր պատարագաւս, և մի տայէ զեկեղեցի իւր 'ի ձեռս հեթանոսաց:

ՎԵՅՅԵՐՈՐԴ ՅԵՂԱՆԱԿ

ԿՐԿԻՆ ԱՆԳԱՄ ԸՆԳԴԻՄ ԿԱԼ ՀԱՅՈՑ

ՊԱՏԵՐԱԶՄԱԻ ԹԱԳԱԻՈՐԻՆ ՊԱՐՍԻՑ

Յետ այսորիկ իբրեւ ետես զօրավար գնդին Պարսից, եթէ հատան պատգամաւորքն 'ի միջոյ՝ խաբել զնոսա, և բարձաւ յոյս ակնկալութեան իւրոյ ցրուել զնոսա յանքակ միաբանութենէն, յայնմ ժամանակի յառաջ կոչէր զանօրէնն Վասակ և զամենայն ուրացեալ իշխանսն, որ էին ընդ նմա յաշխարհէն Հայոց. հարցանէր զնոսա, և ուսանէր 'ի նոցանէ զհնարագիտութիւն յաղթութեանս: Եւ իբրեւ ուսեալ տեղեկացաւ զառն առն իւրաքանչիւր քաջութիւնս, կոչէր և զբազումս 'ի զօրագլխացն՝ որ էին ընդ իւրով ձեռամբ, և հրամայէր ամեւ զառաջեաւ զերամակս փղացն. և 'ի գունդս գունդս զգաղանսն բա-

Ժանէր, և առ մի մի փիղ երէք
հազար սպառազէնք. թող զայլ
զօրան ամենայն:

Խօսէր և ընդ մեծամեծսն արքու-
նի հրամանաւ և ասէր. Յիշեցէք
այր իւրաքանչիւր զպատուէր մեծ
թագաւորին, և գիւք սուաջի զանուն
քաջու-թեան. ընտրեցէք զմահ քան
զկեանս վատու-թեամբ: Մի մոռա-
նայք զիւզն և զպսակն և զուռն և
զառատաձեռն պարգեւն, որ շնոր-
հի ձեզ յարքունուստ: Տեարք էք
իւրաքանչիւր գաւառաց, և ունիք
իշխանութիւն բազում. դուք ինք-
նին գիտէք զքաջութիւն աշխարհին
Հայոց և զառն առն իւրաքանչիւր
նահատակութիւն արու-թեան. դու-
ցէ ձեր 'ի պարտութիւն մատնեալ,
կենդանեաւ վրիպիցէք 'ի մեծ կե-
նացն զոր ունիք: Յիշեցէք զկին և
զորդիս ձեր, յիշեցէք զսիրելի բա-
րեկամս ձեր. դուցէ ոտնահար լի-
նիցիք յարտաքին թշնամեացն և ող-
բակիցք 'ի ներքին սիրեւեացն:

Նա և յուշեւս առնէր նոցա ըզ-
բազում ընկերակիցս փախուցեալս,
որք թէպէտ և 'ի պատերազմէն
սպրեցան, սրով ընկալան զվճիռ
մահուն իւրեանց. ուստերք և դըս-
տերք և ամենայն ընտանիք իւրեանց
յանաշխարհիս գրեցան, և ամե-
նայն հայրենի գաւառք հատան 'ի
նոցանէ:

Ձայս ասէր, և առաւել քան ըզ-
սոյն սաստկացուցանէր զհրամանն
արքունի: Վարդէր կազմէր զզօրսն
ամենայն, և տարածանէր երկայնէր
զճակատն յերկայնութիւն գաշտին
մեծի: Եւ իւրաքանչիւր գազանացն
յաջմէ և յահեկէ զերեքհազարեան
սպառազէնն պատրաստէր, և զըն-
տիր ընտիր նահատակացն շուրջ
զիւրեաւ գումարէր. այսպէս ամ-
րացուցանէր զգունդն մատեան իբ-
րեւ զաշտարակ մի հզօր և կամ իբ-
րեւ զբերդ մի անմատոյց: Նշանս
բաշխէր, գրօջս արձակէր, և 'ի ձայն
մեծի փողոյն պատրաստ հրամայէր

լինել: Իսկ զգունդն զապարհայիկ, և զԿատչաց և զՀոնաց և զԳեղաց, և զայլս եւս ամենայն իզնախոր ընտիր զօրուն մարդիկ 'ի մի վայր ժողովէր, և հրաման պատուիրանի տայր ընդ աջմէ կողմանէ գնդին իւրոյ պատրաստ լինել ընդդէմ Հայոց զօրավարին:

Իսկ արին Վարդան յառաջ մատուցեալ և զաւագանին հարցանէր, և միաբան ամենեցուն խրատու ըզզօրաբլուխսն կարգէր: Զգունդն առաջին տայր 'ի ձեռն իշխանին Արծրունեաց, և նիզակակից նմա զմեծ իշխանն Մովսէս, և զայն ամենայն նախարարեան համահարզս երկոցունց, և զամենայն բազմութիւն գնդին թեւս աստի և անտի կազմէր նոցա: Եւ զգունդն երկրորդ տայր 'ի ձեռն Խորենայ Խորխոսունեաց, և նիզակակից նմա զԼինձայինն և ըզՆերսէս Քաջբերունի: Եւ զգունդն երրորդ մատուցանէր 'ի ձեռն Թաթլոյ Վանանդեցւոյ, և նիզակա-

կից նմա հրամայէր զՏաճատ Գրնթունի, և զբազումսն 'ի քաջ արանց աստի և անտի 'ի թեւս նոցա: Յանձն իւր առնոյր զգունդն չորրորդ, և նիզակակից իւր զքաջն Արշաւիր և զհարազատ Բղբայր իւր զՀամազասպեան: Կարգէր և կազմէր զճակատն յօրդորելով ընդ ամենայն երեսս դաշտին դէմ յանդիման Արեաց գնդին, առ ափն Տղմուտ գետոյն:

Եւ իբրեւ այսպէս պատրաստեցան երկոքեան կողմանքն, լի սըրտմըտութեամբ և մեծաւ բարկութեամբ զայրանային, և գաղանացեալ զօրութեամբ յիրեարս յարձակէին երկոքեան. և ամբոխ աղակին յերկոցունց կողմանցն՝ իբրեւ 'ի մէջ ամպոց շփութեոց՝ ճայթմունսս գործէր, և հնչումն ձայնից զբարանձաւս լերանցն շարժէր: Ի բազմութենէ սաղաւարտիցն և 'ի փայլուն պատենապէն վառելոցն իբրեւ նշոյլք ճառագայ-

Թից արեգական հատանէին: Նա և 'ի բազում սուսերացն շողալ, և 'ի ճօճեւ բազմախուռն նիղակացն իբրեւ յերկնուստ ահագին հրաձգու թիւնք եռային: Քանզի ո՛վ իսկ է բաւական ասել զմեծամեծ տագնապ ահաւոր ձայնիցն, որպէս կոփիւնք վասնաւորացն և ճայթմունք լարից աղեղանցն զլսելիս ամենեցուն առ հասարակ իւլացուցանէին:

Անդ էր տեսանել շտապ մեծի տագնապին և զաղէտս անբաւ տարակուսանացն երկոցունց կողմանցն, առ 'ի յանդուգն յարձակմանէն զմիմեանս բախելով. քանզի Թանձրամիտքն յիմարէին և վատասիրտքն լքանէին, քաջքն ինիղախէին և նահատակքն գոչէին: Եւ խումբ արարեալ ամենայն բազմութեանն՝ զգետն 'ի մէջ փակէին, և զանգիտեալ գունդն Պարսից 'ի գլխուարութենէ գետոյն՝ զտեղեաւն զեռալ սկսան: Իսկ գունդն Հայոց

հասեալ անցանէին, ձի 'ի վերայ առեալ յարձակէին մեծաւ զօրութեամբ: Սասկապէս բախեալք ընդ միմեանս, յերկոցունց կողմանց բազում վիրաւորք յերկիր անկեալ դիւթաւալ խաղային:

Յայնմ մեծ տագնապի 'ի վեր հայեցաւ քաջն Վարդան, և տեսանէր զընտիր ընտիր քաջ նահատակաց Պարսից զօրուն, զի զձախակողմն շարժեցին զՀայոց գնդին. մեծաւ ուժով յարձակէր 'ի տեղին, և զաջ Թեւն Պարսից գնդին բեկեալ՝ արկանէր զգազանօքն, և շրջան առեալ կոտորէր մինչեւ 'ի նոյն տեղի: Եւ այնպէս շտապ տագնապի 'ի վերայ հասուցանէր, մինչեւ գունդն մատեան քակտեալ բաժանեցան 'ի մեծամուր պատրաստութենէն, դեռ եւս քաջ քաջ 'ի փախուստ դառնային:

Ապա դէտ աին 'ի վեր համբաւնայր Մուշկան Նիւսալաւուրտն, քակեալ զոմանս տեսանէր 'ի գըն-

դէն Հայոց, և զկնի մնացեալ 'ի հո-
վիտս լերանց: Վասն որոյ զազաղակ
բարձեալ՝ քաջալերէր շուրջ զիւ-
րեաւ զզօրս Արեաց, որք զտեղի ա-
ռեալ կացին ընդդէմ՝ գնդին Վար-
դանայ: Եւ անդէն 'ի տեղւոջն եր-
կոքին կողմանքն զպարտուածին
խոստովանէին, և առ յոյժ Թանձր
անկեալ գիականց իբրեւ զքարա-
կոյտս գերբկաց երեւէին:

Չայն իբրեւ տեսս Մուշկան Նիւ-
սալաւուրտն, մնայր գազանացն
Արտաշրի, որ 'ի վերայ գազանացն
նստէր 'ի բարձր գիտանոցին և կամ
իբրեւ յամուր քաղաքի, և 'ի ձայն
մեծ գալարափողոցն զիւր գունդան
ստիպէր, և յառաջամարտիկ զօրօքն
զնա 'ի մէջ փակէր: Իսկ կորովին
Վարդան իւրովք քաջ նիզակակ-
ցօքն ոչ սակաւ նախաճիրս 'ի տեղ-
ւոջն գործեաց, յորում տեղւոջ և
ինքն իսկ արժանի եղեւ առնուլ
զկատարեալ նահատակուածին:

Եւ յերկարել գործոյ պատե-

րազմին՝ օրն տարաժամէր, և մօտ
առ երեկս կարճատէր. բազմաց օ-
րահասք մահու հասանէին, մանա-
ւանդ 'ի Թանձրուծենէ անկեալ
գիականց մօտ առ մօտ խտացեալ
իբրեւ զփայտահարս մայրաւորաց:
Անդ էր տեսանել զբեկուումն նիզա-
կացն և զխորտակումն աղեղանց.
Վասն այնորիկ և ոչ կարէին կալ
ճշմարտիւ 'ի վերայ սուրբ մարմնոց
երանելեացն. և սաստիկ խուճապ
տագնապի էր կողմանցն երկոցունց
անկելոցն: Եւ որ մնացեալքն էին,
վանեալք և ցրուեալք լինէին 'ի
լեառնադաշտս և յամուրս ձորոցն.
և յորժամ պատահէին միմեանց,
զարձեալ միւսանգամ զմիմեանս
սատակէին: Եւ մինչեւ 'ի մուտս
արեգականն անդագար լինէր գործ
դառնուածանն:

Եւ քանզի գարնանային էր ժա-
մանակն, ծաղկալից դաշտքն դառ-
նային յորդահոսանս արեանց բազ-
մաց: Մանաւանդ յորժամ տեսա-

նէր ոք զբազմակոյտ գիականցն անկեւոյ, սիրան բեկանէր և աղիքն գալարէին՝ լսել զմնչիւն խոցելոցն և զմննչիւնս բեկելոցն, զԹաւալգլոր խաղալ սողալ վիրաւորացն, զփախուստ վատացն, զԹագուսուլքելոցն, զարտաթափումն զանարի արանցն, զճչիւն կանացեացն, զողբս սիրելեաց, զաշխարհումն մերձաւորաց, զվայ և զաւաղ բարեկամացն: Քանզի ոչ եթէ կողմ էր՝ որ յաղթեաց, և կողմ էր՝ որ պարտեցաւ, այլ քաջք ընդ քաջս ելեալ երկուքին կողմանքն ՚ի պարտութիւն մասնեցան:

Բայց քանզի անկեալ էր զօրավարն Հայոց ՚ի մեծ պատերազմին, ոչ ոք գոյր այնուհետեւ ՚ի մէջ գլխաւոր, յոր յեցեալ ժողովէին գունդն մնացելոցն: Թեպէտ և բազում այն էր՝ որ ասրեցան, քան թէ որ մեռանն, սակայն ցանեալ ցրուեցան. և հասեալ անկանէին ՚ի տեղիս տեղիս յամուրս աշխարհին,

և բռնանային ՚ի վերայ բազում գաւառաց և բերդից, զոր և ոչ առնուլ իսկ ոք կարէր:

Եւ այս անուանք են քաջ նահատակացն՝ որ անդէն ՚ի տեղւոյն կատարեցան: Յազգէն Մամիկոնէից քաջն Վարդան հարիւր երեսուն և երեք արամբք. յազգէն Խորխոռունեաց Խորէնն կորովի իննեւտասն արամբք. յազգէն Պալունեաց արին Արտակ յիսուն և եօթն արամբք. յազգէն Գնթունեաց զարմանալին Տաճատ իննեւտասն արամբք, յազգէն Նիմաքսենից իմաստունն Հմայեակ քսան և երկու արամբք. յազգէն Քաղբերունեաց հրաշակերան Ներսէս եօթն արամբք. յազգէն Գնունեաց մանուկն Վահան երիւք արամբք, յազգէն Ընծայնոց արգարն Արսէն եօթն արամբք. յազգէն Արուանձտայ յառաջադէմն Գարեգին երկու հարազատօքն և ութուտասն արամբք:

Այս երկերիւր ութսուն և եօթն

նահատակք, ընդ ինն մեծամեծ նախարարսն անդէն 'ի տեղւոջն կատարեցան: Եւ յարքունի տանէ և 'ի տանէ Արծրունեաց և յիւրաքանչիւր յայլոց նախարարացն տանէ, թող զայս երկերիւր ութսուն և եօթնս, այլ եւս եօթն հարիւր և քառասուն այր, որք զանուանս իւրաքանչիւր 'ի գարուծիւն կենաց գրեցին 'ի նմին առուր 'ի մեծի պատերազմին: Եւ միահամուռ լինի առ մենայն հազար և երեսուն և վեց այր:

Իսկ 'ի կողմանէ ուրացելոցն անկանէր յայնմ՝ առուր երեք հազար հինգ հարիւր քառասուն և չորք այր: Ինն այր 'ի նոցանէ՝ 'ի մեծ պատուաւորացն էր, վասն որոյ և կարի յոյժ 'ի խոր խոցեցաւ Մուշկանն Նիւսալաւուրտ: Մանաւանդ իբրեւ ետես զանհնարին հարուածան եօթնպատիկ զիւրոյ գընդին քան զՆայոցն, բեկաւ անկաւ զօրուծիւն ուժոյն իւրոյ, և ոչ

հանդարտէր կալ 'ի վերայ խորհրդոց մտացն. քանզի ոչ որպէս կարծէր զպատերազմն՝ կատարեցաւ: Մանաւանդ իբրեւ հայէր տեսանէր զբազմուծիւն անկեւոց իւրոյ կողմանն, և թիւ համարոյ եւս առնէր, և իբրեւ այնչափ յոլով գտանէր զիւր անկեալսն քան զՆայոց գընդին, եւս առաւել վասն երեւելի արանցն, զորս յականէ յանուանէ գիտէր թագաւորն, 'ի մեծ տաքնապի լինէր այրն յանձն իւր: Արդարուծեամբ զիւրսն գրել և ցուցանել 'ի թագաւորէն երկնչէր, դարձեալ և թաքուցանել եւս ոչ կարէր, քանզի ոչ ծածկէր այնպիսի մեծ կռիւ:

Եւ մինչդեռ յայսմ մտաց խորհրդի էր յանձն իւր և նեղէր 'ի միտս իւր, ուրացեալն Վասակ որ զանձն իւր 'ի մէջ գազանացն թագուցեալ ապրեցուցանէր, միւլթար մատուցանէր մտացն լքելոց և ուսուցանէր նմա հնարս նենգու

Թեամբ, Թէ որպէս կարացե մարտընչեւ ընդ ամուրսն խաբէու-
 Թեամբ: Երդմունս կնքէր արքունի
 հրամանաւ և վկայուԹեամբ անձին
 իւրոյ և խաբէբայ երիցամբքն, որ
 ընդ նմայն էին. պատգամաւորս
 առնէր զնոսա, և երեւեցուցանէր
 զԹողուԹիւնն ապստամբուԹեանն
 առ 'ի շինուԹիւնն եկեղեցւոյ շնոր-
 հեւ անդրէն, և զամենայն կարգս
 անդրէն յարմարեւ ըստ առաջին
 սովորուԹեանն: Թէպէտ հրաման
 Թագաւորին հաստատուԹեամբ էր
 տուեալ, վասն զի յոյժ բեկաւ զօ-
 րուԹիւնն նորա, որպէս զի երկոքին
 կողմանք նորա հարան, սակայն
 զօրքն Հայոց վասն նենգուԹեանն
 վասակայ, որ բազում անգամ հա-
 սեալ էին 'ի վերայ ստուԹեանն ու-
 րա, վասն այնորիկ և հրամանի Թա-
 գաւորին վաղվաղակի ոչ կարէին
 հաւատալ:

ԵՅԹՅԵՐՈՐԴ ՅԵՂԱՆԱԿ

ՅՈՐՈՒՄ ՆԿԱՐԱԳՐԻ ԴԱՐՁԵԱԼ ԱՌԱ-
 ՔԻՆՈՒԹԻԻՆՆ ՀԱՅՈՑ ԵՒ ՉԱՐԱԳՈՅՆ

ԵՒՍ ԵՐԵՒԻ ԱՆՍՐԷՆՈՒԹԻԻՆՆ

ՎԱՍԱԿԱՅ

Արդ դարձեալ յայնժամ գըր-
 դեաց զՄուշկան Նիւսալաւորտ և
 զամենայն աւագանին Արեաց, ա-
 ռեալ զզօրսն՝ հասանէր 'ի վերայ
 ամրոցին, յոր անկեալ էին գունդ-
 մի 'ի զօրացն Հայոց հանդերձ սուրբ
 քահանայիւքն, և մարտ եղեալ
 կռուէին շուրջ զբերդաւն: Եւ իբ-
 րեւ ոչ ինչ կարացին ազդել նոցա,
 դարձեալ յերդմունս ապաստան ե-
 ղեալ, զի ուխտիւ իջուսցեն զնոսա
 առանց դաւ ինչ գործելոյ, և եր-
 կիցս և երիցս անգամ ետուն տա-
 նել զաւետարանն: Թէպէտ և քա-
 հանայքն յանձն առնուին զիջանելն
 կալ առաջի, բազումք 'ի զօրակա-

նացն ոչ կարէին հաւատալ սո տ
 ուխտին Վասակայ. քանզի սկսաւ
 երթալ Մուշկան Նիւսաւաւուրս
 զհետ չար խրատուն Վասակայ:

Եւ ոմն 'ի քալ զօրականէն Հա-
 յոց, որ անկեալ էր 'ի բերդն փա-
 խըստեամբ, Բակ անուն, ելեալ 'ի
 պարիսպն թշնամանս դնէր անօրի-
 նին, և յիշեցուցանէր առաջի Պար-
 սից զօրագլխին զամենայն չարիան,
 զոր անցուցեալ էր նորա ընդ աշ-
 խարհն Հայոց: Յորոց բազում իսկ
 լուեալ՝ արդարացուցանէին զամ-
 բաստանուծիւնն, ոչ միայն 'ի Հա-
 յոց կողմանէն, այլ եւս առաւել
 զօրքն Պարսից: Սոյն այրս այս 'ի
 նմին գիշերի եօթն հարիւր արամբք
 ել գնաց 'ի բերդէ անտի, և ոչ կա-
 րացին ձեռն արկանել 'ի նա:

Իսկ որ 'ի ներքս յամրին մնացին,
 թէպէտ և գիտէին ճշմարտիւ զխա-
 բեբայ երգմունս նոցա, ոչ ունէին
 համբար 'ի ներքս: Իբրեւ ոչ կա-
 մաւ իջեալ կացին առաջի, հրամա-

յեաց սպանանել 'ի նոցանէ երկե-
 ըիւր և երեքտասան այր: Աղաղա-
 կեցին ամենեքեան և ասեն. 'Իոհա-
 նամք զքէն Տէր Աստուած մեր.
 մինչդեռ շէն են եկեղեցիք և անբակ
 տաճարք վկայից և միաբան սուրբ
 ուխտ եկեղեցւոյ առաքինացեալ,
 արժանի արարեր զմեզ կոչմանդ
 երկնաւորի Հաւասարեսցէ մահս
 մեր ընդ մահ քաջ նահատակացն,
 և խառնեսցի արիւնս մեր ընդ ա-
 րիւն անկեալ վիրաւորացն. և հա-
 ճեսցի Տէր ընդ եկեղեցիս իւր՝ բաղ-
 մուծեամբ կամաւոր զուարակացս,
 որ ելանեն 'ի վերայ սուրբ սեղա-
 նոյս: Չայս ասելով 'ի տեղւոյն կա-
 տարեցան երկերիւրքն և երեքտա-
 սանքն:

Իսկ սուրբ քահանայքն՝ որ անդ
 դիպեցան յամուրսն, երանելիքս
 այս Յովսէփ և Ղեւոնդ բազում ըն-
 կերակցօքն իւրեանց, մատուցին և
 նոքա զպարանոցս իւրեանց առաջի
 սրոյ դահճապետին, ասելով զնոյն

բանս՝ զոր խօսեցան երկերիւրքն։ Վանդի ոչ եթէ ակնկալուածիւն ինչ էր երանելեացն ըստ մարմնաւոր կենացս, այլ իմաստուածեամբ հընարս խնդրէին լինել փոխանակ ամենայն աշխարհին շինուածեան։ Վասն որոյ և բողոք 'ի դուռն կարգային, և զամենայն ամբաստանուածիւն արկանէին զանօրէնն զՎասա կաւ։ Զայս խբրեւ լուաւ Մուշկան Նիւսալաւուրտ, ոչ իշխեաց 'ի նուսա ձեռն արկանել մահուամբ. այլ զՅովսէփ և զՂեւոնդ գան հարեալ, հրամայեցին սրահել զգուշուածեամբ. քանզի բողոք 'ի դուռն կարգային։ Իսկ զայլ քահանայսն արձակեցին յիւրաքանչիւր տեղիս, հրաման տուեալ վասն շինուածեան և խաղաղուածեան աշխարհին։

Այլ մարդիկն Հայոց, որ հասեալ էին 'ի վերայ յեղյեղուկ հրամանաց թագաւորին և ուրացեալ չարիմացին Վասակայ, ոչ ինչ հաւատային սուա թողուածեանն,

այլ քաջալերէին զմիմեանս և ասէին. Զի պիտոյ է մեզ բնաւ կեանք անցաւոր աշխարհիս, և կամ ընդէր տեսանեմք զարեւ յետ մերոյ սիրելեացն։ Զի եթէ քաջ նահատակքն մեր անկան 'ի մեծ պատերազմին, և բազում վիրաւորք տապալեցան յարիւն յապաժոյժ 'ի մեջ դաշտին, և ամենեցուն մարմինքն եղեն գէշ թուչնոց և կերակուր դաղանաց, և պատուական նախարարքն մեր հասին յանարգուածիւն թըշուառուածեան, լքին զիւրաքանչիւր իշխանուածիւն և են 'ի հալածանս նեղուածեան, որ և ամենայն փափկուածիւնն Հայոց եհաս 'ի վիշտս վտանգի և յանհնարին ապականուածիւն, ոչ անսամբ խաբեբայ հրամանացդ և անկանիմք 'ի ձեռս անօրէն իշխանացդ։

Թողին այնուհետեւ իւրաքանչիւր զգեօղս և զաւանս և զագարակս. ելին հարսուռնք յառագաստից և փեսայք 'ի սենեկաց, անկան

ծերք յաթոռոց և տղայք՝ ի գրկաց. երթային երիտասարդք և կուսանք և ամենայն բաղմուտիւն արանց և կանանց, հասեալ ունէին զամուրս անապատին և զանխաբ տեղիս բազում լերանց: Լաւ համարէին զգազանաբար բնակուած իւնն աստուած պաշտուածամբ՝ ի քարանձաւս կելոյ, քան ուրացուածամբ փափկանալ յիւրաքանչիւր շինուածս: Առանց արանջելոյ համբերէին խոտաբուտ կերակրոցն, և ոչ յիշէին ըզսովորական խորտիկան: Համարեալ էին նոցա դարանափորքն իբրեւ զյարկս բարձր շինուածոց, և գետնանկողինքն իբրեւ անկարեալ պատշկամս:

Սաղմոսք էին նոցա մրմունջք ելագոց, և ընթերցուածք սուրբ գրոց կատարեալ ուրախութիւնք: Ամենայն մարդ յանձն իւր եկեղեցի էր, նոյն ինքն քահանայ. մարմինք իւրաքանչիւր սուրբ սեղան, և ոգիք նոցունց՝ պատարագ ընդունելի:

Քանզի ոչ ոք ՚ի նոցանէ տղայր յուսահատուածամբ զանկեալն ՚ի սրոյ, և ոչ ոք հեծեծելով հառաչէր ՚ի վերայ մերձաւոր սիրելեաց իւրոց: Խնդուածամբ ընկալան ըզյափշտակուած իւն ընչից բաղմաց, և ոչ յիշէին ամենեւին՝ եթէ եղեալ իցեն նոցա ստացուածք: Համբերուածամբ ճգնէին և մեծաւ առաքինութեամբ տանէին զբաջ նահատակութիւնն: Չի եթէ ոչ բացաւ աչօք տեսանէին զյոյսն խնդալից, և ոչ կարէին խսկ գործել զայնպիսի մեծ առաքինութիւն:

Քանզի բազումք յազգէ ՚ի մեծ նախարարացն էին, և եղբարք և որդիք և գստերք, հանդերձ ամենայն սիրելեօք իւրեանց ՚ի մէջ ամբական վայրացն, ոմանք յանոյս երկիրն Խաղտեաց, և այլ բազումք ՚ի կողմանս հարաւոյ՝ յանմատոյց ամուրսն Տմորեաց, և կէսքն ՚ի Թանձրախիտ մայրիսն Արձախոյ, և այլ ոմանք անդէն ՚ի միջոց աշխար-

հին բռնացան 'ի վերայ բազում ամ-
րոցացն: Եւ ամենեքին մեծաւ համ-
բերութեամբ տանէին զբազում նե-
ղութիւնն վասն յուսոյն Աստու-
ծոյ. աղաչելով զայս միայն խըն-
դրէին յԱստուծոյ, մի տեսանել նո-
ցա զաւեր սուրբ եկեղեցեաց:

Այլ որպէս ցուցաք բազում ան-
գամ զամբարշտին չարութիւն, յորդորէր և ստիպէր զզօրսն Պար-
սից 'ի մօտաւոր կողմանց աշխար-
հին, զի հրամանաւ արքունի զօր ե-
կեսցէ յօգնականութիւն նոցա: Եւ հասեալ բազում այրուծի՝ յա-
ւելոյր 'ի թիւ անկելոցն, և լինէր
գունդ բազմութեան իբրեւ զառ-
ջինն: Եւ յառաջ խաղային 'ի մի-
ջոց աշխարհին, մարտ եղեալ կը-
ուուէին ընդ մեծ ամուրս Կապոյտ
լէրինն: Իսկ որ 'ի ներքսն էին՝ քա-
ջութեամբ մարտուցեալ հարկա-
նէին զբազումս 'ի գնդէն Պարսից,
և զմնացեալսն փախստական 'ի բա-
նակն արկանէին: Իսկ նոքա դար-

ձեալ յողորմանս մատուցեալ, նուա-
ճել խաբէութեամբ կամէին:

Իբրեւ ոչ ոք հաւատաց իջանել
առ նոսա, զի մի մատնեսցին չարա-
չար 'ի ձեռս թշնամեացն, սակայն
վասն երգմանցն հարկ եղեւ քահա-
նայի մի իջանել առ նոսա, որում
անուռն էր Արշէն: Խօսէր ընդ նո-
սա յաղերս ընտանութեամբ, և
ցուցանէր զանվնաս փախուստ ան-
մեղացն. արկանէր գութ առաջի
ուրացելոյն Վասակայ, և սաղատե-
լով յիշեցուցանէր նմա զառաջին
կարգ ուխտին քրիստոնէութեան,
զի թերեւս սակաւիկ մի քաղցրաս-
ցի յանհնարին դառնութենէն: Այլ
նա ոչ ինչ լուաւ և անսաց բազում
բանիցն նորա, կապեաց և խաղա-
ցոյց զերանելին և որք ընդ նմա ի-
ջեալ էին:

Մանաւանդ իբրեւ ետես եթէ
երթայ զօրավարն զհետ խրատու
կամաց նորա, սկսաւ այնուհետեւ
'ի բազում տեղիս արձակել զաս-

պատակաւորն, և զոր արտաքոյ
քան զամուսնսն գտանէր զբազմու-
թիւն մարդկանն, վարեցին 'ի գե-
րութիւն, և զ'ամբար 'ի ձեռն ա-
ռեալ հրձիգ առնէին զբազում տե-
ղիս: Իսկ որք էին յամուսնս Տմո-
րեաց, իբրեւ լուան զայս ամենայն
չարիս, զոր գործեցին զօրքն արքու-
նի, ոչ ինչ շահ օգտի համարէին
զկալն 'ի մէջ ամրականացն: Քաջու-
թեամբ ելեալ յարձակեցան օգնա-
կանութեամբ ամրականացն, և հա-
սեալ 'ի մտաւոր աշխարհն Պարս-
կաց, յանխնայ կոտորելով՝ նախ-
ճիրս արեան գործէին, և զմնա-
ցեալնս գերի առեալ տանէին, և
անդէն յամուսնս արկանէին, և ըզ-
չինուածս աշխարհին՝ զ'ամբար 'ի
ձեռն առեալ հրոյ ճարակ տային:

Իարձեալ և որք էին 'ի լերինս
Խաղտեաց, իբրեւ տեսին եթէ յան-
գըգնաբար զօրքն Պարսկաց յաներ-
կիւղս իջանէին յամուսնս աշխարհին
Հայոց, յարձակեցան և նորա մե-

ծաւ զօրութեամբ 'ի ձորագաւառն
Տայոց: Եւ գտին անդ գուռդ բա-
զում 'ի զօրացն արքունի, որ գերի
առնուլ կամէին զամրականս աշ-
խարհին. դարձեալ և կարծէին եւս
եթէ գանձք նախարարացն անդ ի-
ցեն, վասն այնորիկ և յանխնայ
յուզէին զվայրսն:

Նա և տեսին եւս անդ 'ի գետըս
երկուս, զի զեկեղեցիսն այրեցեալ
էր. առաւել եւս վասն այնր 'ի նա-
խանձ բրդեցան բարկութեամբ:
Յարձակեցան, հարան 'ի գիմի մի-
մեանց, և կամակարութեամբ յաղ-
թեալ, բեկեալ արկին զզօրութիւն
գնդին Պարսից, և կոտորեցին զբա-
զումս 'ի նոցանէ, և զմնացեալնս
փախստական հասնէին յաշխարհէն:
Եւ յայնչափ յանգուղն յարձակ-
մանէն՝ միայն երանելին Հմայեակ,
եղբայր սպարապետին Հայոց Վար-
դանայ, յանխնայ քաջութեամբ
մարտուցեալ՝ կատարեցաւ նահա-
տակութեամբ 'ի վերայ սուրբ ուխ-

տին միաբանութեան: Եւ այլքն աւանայն՝ ողջանդամ՝ ապրեալք երթային զՀետ փախստականին:

Եւ իբրեւ այս այսպէս կատարեցաւ, դադարեցին զօրք Թագաւորին խառնամուխ լինել յամենայն տեղիս անխորուածեամբ, և եւս առաւել ձեռնպահ լինել եկեղեցեացն: Գարձեալ միւսանգամ անդրէն հարցանել սկսան յարքունիսն:

Նա և որ յԱրձախայ մայրիսն անկեալքն էին փախստականք, ոչ ինչ լռեալ դադարեցին խաղաղութեամբ. այլ հանապաղ յղէին յաշխարհն Հոնաց շարժէին և յորդորէին զգունդն Հոնաց, և յիշեցուցանէին նոցա զուխոն՝ զոր եդեալ էր ընդ Հայս և անսուտ երդմամբ հաստատեալ: Հաճոյ Թուէր բաղմաց ՚ի նոցանէ լսել զբանսն քաղցրութեամբ: Նա և մեղադիր եւս յոյժ լինէին նոցա, եթէ ՚ի կռիւն ընդէր ոչ եկիք պատրաստութեամբ: Եւ իբրեւ յառաջնումն ինչ ոչ հը-

նարէին զմիմեանս հաւանեցուցանել, ապա գունդ բազում՝ գումարէին, և անդէն յարձակեալ հասանէին ՚ի սահմանս տէրութեանն Պարսից. և զբազում՝ գաւառս հարեալ, բազմադոյն եւս գերի առեալ տանէին յաշխարհն իւրեանց, և յայտնի ցուցանէին Թագաւորին զմիաբանութիւն՝ զոր ունէին ընդ գնդին Հայոց:

Իսկ իբրեւ այս ամենայն ազգումն հասանէր առ զօրավարն Պարսից, սրամտեալ զայրանայր. և մեծաւ բարկութեամբ կուտէր զվնասն ՚ի վերայ անօրինին Վասակայ, իբր թէ նա իցէ սկիզբն և առաջնորդ ամենայն չարեացն, որ գործեցան: Եւ անդէն չու արարեալ գնայր խաղայր հասանէր յաշխարհն Պարսից. դրէր և ցուցանէր յարքունիս զամենայն բողոքութեամբ, և ըզվնաս գործոյն արկանէր զուրացելոյն:

Իբրեւ լուաւ Թագաւորն զամե-

նայն աւեր աշխարհին, և ստուգեաց զիրս մեծի պատերազմին, բեկանէր անկանէր 'ի մեծ խրոխտաւոյն, և լռեալ գաղարէր 'ի հանապազորդ և 'ի խաբեբայ խորհրդոցն. յուզէր և քննէր զվրիպուսն անհանձար գործոյն, և կամէր տեսանել ասելով. Ո՞րք իցէ որ զիս ճշմարտութեամբ 'ի վերայ իրացդ հասուցէ: Իսկ որ էր գիտակ անօրէն գործոյն, անգրէն 'ի դրան արքունի, նոյն հազարապետն Միհրաներսէհ, յառաջ մատուցեալ ասեց թագաւորն. Չայդես ասեմ՝ քեզ, արքայ քաջ. եթէ կամիս ստուգութեամբ լսել զարդարն, որք գլխաւորքն քրիստոնէիցն են 'ի Հայս, սուր կոչել, և գան յօժարութեամբ և ասեն քեզ զամենայն արդարութեամբ:

Յայնժամ զմի ոմն յաւագ նախարարացն, Ասորոմիզդ անուն, որոյ իշխանութիւնն իսկ խառն էր ընդ Հայոց աշխարհին և գործակից

էր զօրավարին 'ի նմին պատերազմի, գրէր և յանձն առնէր նմա զաշխարհն Հայոց մարզպանութեամբ: Եւ զՄուշկան Նիւսալուուրտ հանդերձ ամենայն մնացեալ զօրուն գումարէր յաշխարհն Աղուանից և Լփնաց և Ճղբաց և 'ի Հեճմատակաց և 'ի Թաւասպարաց և 'ի Խիբովան, և յամենայն ամրականն, զորս աւերեալ էր գնդին Հոնաց վասն ուխտին Հայոց: Որպէս և յոյժ իսկ տրտմեալ էր թագաւորն, ոչ միայն ընդ աւեր աշխարհացն և ընդ անկանել զօրացն, այլ եւս առաւել ընդ աւերել պահակին՝ զոր 'ի բազում ժամանակաց հազիւ ուրեմն կարացին շինել. որ և յայնմ ժամանակի դիւրեաւ առեալ քանդեցաւ, որում և չէր իսկ ակնկալութիւն շինութեան: Իսկ զՎասակ հանդերձ գլխաւոր քրիստոնէիւքն 'ի գունն հրամայեաց կոչել:

Արդ եկն եմոտ մարզպանն Ասորոմիզդ յաշխարհն Հայոց սիրով

խաղաղութեամբ: Հրամանաւ արքունի կոչեաց առ ինքն զՍահակ սուրբ եպիսկոպոսն Ռջտունեաց, ուսանել 'ի նմանէ զիրացն ամբաստանութիւն: Բայց թէպէտ և նորա աւերեալ էր ատրուշան մի, և բազում չարչարանօք հարեալ էր զպաշտօնեայս կրակին, ոչ ինչ զանգիտեաց գալ յատեան հրապարակին. դարձեալ և 'ի տանէն Արծրունեաց բարեպաշտօն երէց մի Մուշէ անուն, որ առաջնորդէր աշխարհին Արծրունեաց, աւերեալ էր և նորա զկրակատուն մի, և կապանօք և տանջանօք բազում չարչարանս անցուցեալ էր ընդ մոգան. և սա ոչ ինչ զանգիտեաց, այլ կամաւ եկն և յանդիման եղև մարդպանին: Եւ երկու եւս այլ քահանայք երանելիք, որոց անուանքն են Սամուէլ՝ և Աբրահամ. քանդեալ էր և սոցա զատրուշանն յՈրտաշատ, և յառաջագոյն ըմբռնեալ էին 'ի կապանս յուրացեալն Վա-

սակայ. ածին և զնոսա յառաքինի ընկերան: Եւ ժողովեցին եւս 'ի նոյն տեղի զմեծն Յովսէփ և զՂեւոնդ և զՔաջաջ և զԱրշէն: Եւ իբրեւ ուսաւ և տեղեկացաւ յամենեցունց մարդպանն, գրեաց և եցոյց յարքունիս զամենայն ճշմարտութեամբ որպէս զիարդ լուաւ 'ի բերանոյ նոցա:

Բայց Վասակ թէպէտ և յառաջագոյն հասեալ էր 'ի դուռն, ըստ կամաց իւրոց այլ ընդ այլոյ էր թեալ պատմէր զամենայն ստութեամբ, սակայն 'ի միտս թագաւորին ոչ կարէր զանձն արդարացուցանել. այլ պատասխանի արար նմա և ասէ. Յորժամ քրիստոնեայքն եւս եկեսցեն, հասարակ լուայց յայտենի:

Իսկ զսուրբ քահանայան վասն զի կապանօք տանէին՝ յետ երկուց ամսոց և քսան աւուր հասանէին 'ի ձմերոցն արքունի: Իբրեւ լուաւ մեծ հազարապետն, եթէ ածին ըզ-

նոսա 'ի քաղաքն, ինքն իսկ ակա-
նատես լինէր նոցա: Բայց Թէպէտ
և տեղեկուԹեամբ լսէր 'ի նո-
ցանէ զամենայն, ոչ կարէր ձեռն
արկանել և չարչարել զնոսա. քան-
զի բազումք 'ի նախարարացն Հա-
յոց դեռ եւս բռնացեալ ունէին
զամուրս աշխարհին, և դեռ եւս
մարդպանն յերկիւղի էր: Վասն ո-
րոյ զգուշուԹեամբ հրամայեաց
պահել զսուրբան, և զաշխարհն
հրամայէր սիրով նուաճել. վասն
որոյ և ինքն իսկ շրջէր և ժողովէր
և շինէր ուխտիւ հաստատուԹեան:

Եւ եպիսկոպոսացն հրաման տայր
ունել զիւրաքանչիւր իշխանու-
Թիւնն, և ըստ առաջին սովորու-
Թեանն պաշտել յայտնուԹեամբ,
և համարձակ եւս գալ 'ի հրապա-
րակ: Նա և ընծայից և պատարա-
գաց արժանի առնէր Թողուլ զա-
ռաջեալ: Եւ քանզի բազում գա-
ւառս առեալ և աւերեալ էր զօ-
րականին, Թողուլ հրամայէր ըզ-

հարկս աշխարհին. և զայրուձին
եւս զարքունի ԹեԹեալացոյց առ
ժամանակ մի: Եւ միայնակեացք
որք ելեալ և կորուսեալ էին, հրա-
մայէր գալ և ունել զիւրաքանչիւր
տեղիսն:

Եւ զամենայն կարգս աստուած-
պաշտուԹեանն, որպէս զխարդ և
ունէին յառաջ ժամանակաւ առ
նախնեօքն, նոյնպէս և այժմ, ասէ,
կալցին: Եւ եթէ ոք 'ի հեռի աշ-
խարհ ուրեք գնացեալ իցեն, ու-
նիմ իշխանուԹիւն յարքունուստ,
ասէ մարդպանն, եթէ յազատաց ի-
ցեն, եթէ 'ի շինականաց իցեն, եթէ
յեկեղեցոյ, զինչ կեանս և Թո-
ղեալ իցէ, եկեսցեն և կալցեն զիւ-
րաքանչիւր զարարս. երգմամբ կըն-
քէր և առաքէր 'ի կողմանս կող-
մանս: Որ և բազումք իսկ եկին և
ժողովեցան, և կալան զիւրաքան-
չիւր կալուածս:

Նա և որ մեծն է քան զամենայն,
որ 'ի բռնուԹեանէ ոք ակամայ կա-

լեալ էր զմոգուլթիւնն, հրովարտակս առաքէր յարքունուստ, անդրէն ունել զբրիտոնէուլթիւնն: Եւ յանգլիման խօսէր թագաւորն, որք էին 'ի գրանն արքունի, եթէ Որք ոչ սիրով ունին զգեներմազգէզն, այնպիսեացն և աստուածքն են ցասուցեալ, և ես ոչ ինչ եմ շնորհակալ. և այսօր զնոյն հրաման տամ ամենեցուն, 'ի կամս մարդոյն թողեալ ըստ իւրաքանչիւր մտաց, որպէս զինչ և կամի պաշտել՝ պաշտեսցէ. ամենեքեան իմ ծառայք են: Զայս ասէր, և գրով հրաման տայր ամենայն աշխարհի:

Իբրեւ զայս լուան և տեսին բազուճք՝ որ էին ցանեալ և ցրուեալք 'ի հեռաւոր տեղիս, գայլն և ունէին զիւրաքանչիւր արարս: Իսկ նախարարքն որ էին յամուրս աշխարհին և կամ 'ի հեռաւոր օտարուլթեան, իբրեւ տեսին զշինուլթիւն երկրին՝ մանաւանդ զեկեղեց-

ւոյն հաստատուլթիւն, քաջալերեցան համարձակեցան և նոքա յանգլիման լինել արքային: Վասն որոյ և պատգամ՝ յլեցին առ մարդպան աշխարհին, զի 'ի գուռն ցուցցէ զբանս նախարարացն: Իսկ նա վաղվաղակի յարքունուստ գիր ողորանաց և ուխտ հաստատուլթեան տայր տանել առ նոսա հրամանաւ արքունի: Բայց թէպէտ և գիտէին նոքա զգաւնուլթիւն տէրուլթեանն՝ թէ սուտ են յամենայնի, կամեցան չարչարակից լինել սրբոցն. զի եթէ մահ եւս առաջի կայցէ, ոչ ինչ զանգիտեսցեն երկիւղիւ:

Եւ զայս լուեալ թագաւորին, ոչ կապանօք, այլ արձակ օտիւք և արձակ ձեռօք հրամայեաց առ ինքն կոչել: Ածին վաղվաղակի զկին և զորդիսն, և զինչս իւրաքանչիւր ետուն 'ի ձեռս մարդպանին. և ինքեանք փուլթանակի գնացին 'ի ձմերոցն արքունի:

Եւ մինչ գեռ անդրէն 'ի ձմերո-

ցին էր Թագաւորն, ատեան հարցափորձի 'ի մէջ նոցա հրամայէր լինել: Եւ նստաւ հազարապետն՝ զի լուիցէ կողմանցն երկօցունց: Եւ իբրեւ յերկարեցաւ ամբաստանութիւնն զաւուրս բազումն, պարտաւորեցաւ կողմ ուրացելոցն: Քանզի ցուցանէին զԹուղթսն՝ զոր տուեալ էր Վասակայ և ամենեցուն որ ընդ նմա էին, զի միաբանք իցեն ընդ նմա յուստ ապստամբութեանն. Թուղթ մի 'ի Վրաց աշխարհէն, և Թուղթ մի յԱղուանից աշխարհէն. սոյնպէս և Թուղթ մի յԱղձնիս, և հրովարտակ մի առ Թագաւորն Յունաց, և Թուղթ մի առ մեծ սպարապետն Անտիոքոս: Եւ 'ի բոլորեսին յայսոսիկ Թուղթսն վաւերականի մատանի Վասակայ եղեալ էր: Սոյնպէս խառն էր նա և 'ի մահ մոգուցն 'ի Զարեհաւանի: Եւ զբազում բերդս՝ զոր հանին 'ի Պարսկայ, յայտ առնէին զնորա Թուղթսն և հրամանսն.

քանզի նա էր մարզպան 'ի ժամանակին:

Որպէս և հրեշտակուԹեամբ իսկ զոր յղեալ էր առ Յոյնս նախարար մի, որում անուան էր Ատոմ, յազգէն Գնունեաց. սա մատուցեալ յանգիմանէր զնա առաջի մեծի ատեանին հրովարտական իսկ՝ զոր տուեալ էր նորա իւրով մատանեալ: Նա և 'ի մէջ իսկ բերէր զամբաստանութիւնն նորա Սուշկան Նիւսալաւուրտ, և յայտ առնէր պատերազմակից ընկերօքն իւրովք, որ և յետ վճարելոյ պատերազմին բազում արիւն ետ հեղուլ Վասակ. Թէ որպէս սուտ երգմամբք խաբէր և իջուցանէր յամբոցաց անախ. էր՝ զոր կոտորէր և էր՝ զոր գերի տանէր զԾառայս և զաղախնայս արքունի: Եւ 'ի վերայ այսր ամենայնի մխասու, և գող եւս գտանէր հարկի աշխարհին, որ յարքունիսն երթայր:

Նա և յուրացեալ ընկերացն նո-

րա բազումք էին, որ յայտ արարին զչարիս նորա՝ զոր գործեալ էր ընդ աշխարհն Հայոց: Եւ 'ի մնացեալ մոգացն և 'ի փշտիպանացն՝ որք 'ի կապանսն ապրեալ էին և ապա ածին յարքունիս, հարցին և ցնոսավասն նորա և ասեն. Ի ուրք էք ինչ տեղեակ վասն չարութեան սորա: Ետուն պատասխանի և ասեն. Ամենայն անցք չարչարանայ՝ որ անցին ընդ մեզ, և բազում հարուածք որ եղեն 'ի զօրքն արքունի, և աւեր և գերութիւն աշխարհին Հայոց, և կորուստ հարկացն արքունի, ըսկիզբն և առաջնորդ չարեաց այրգայրգ եղեւ:

Եւ մինչ դեռ այս ամենայն ամբաստանութիւն զնմանէ էր զայնչափ բազում աւուրս, յառաջ մատեան և իւր ազգականքն, որ եւս յառաջագոյն դատախազ լեալ էին զնմանէ առաջի արքային, սկսան կարգաւ ցուցանել և յայտ առնել, որպէս զի բարեկամացեալ էր նա

ընդ Հեռանայ Հոնի միաբանութեամբ բաղասական արքային, 'ի ժամանակին՝ զի կոտորեաց Հեռանս այն զԳօրսն Պարսից յԱղուանս, և ասպատակաւ եհաս յերկիրն Յունաց, և բազում գերի և աւար խաղացոյց 'ի Հոռոմոց և 'ի Հայոց և 'ի Վրաց և յԱղուանից. որպէս զի 'ի վերայ իսկ եհաս խորհրդոցն ինքն իսկ Թագաւորն, և սպան զբաղասական արքայ: Եւ Վասակ մարդպան էր Հայոց 'ի ժամանակին, և Թշնամեացն արքունի խորհրդակից գտաւ: Յուցին և յայտ արարին ազգականքն նորա, որպէս զի հմուտ և տեղեակ իսկ էին չար խորհրդոցն նորա. զամենայն ցուցանելն և յայտ առնելն առաջի Թագաւորին. և զայլ եւս բազմագոյն խորհրդախութիւնսն, որ ստութեամբ վարէր զկեանս իւր՝ ոչ միայն առ ընկերս, այլ և առ Թագաւորն ինքնին գլխովին. զի ոչ երբեք արգարուութեամբ վաստակեալ էր 'ի մանկութենէ:

Յայնմ՝ Ժամանակի հրաման ետ
 հազարապետն. Ածէք այսր և 'ի
 կապելոցն, որք են 'ի բանտի անդ:
 Լուծին և ամփն յերանելեացն ըզ-
 Սահակ եպիսկոպոս Ռշտունեաց և
 զսուրբն Յովսէփ և զՂեւոնդ երէց:
 Եւ իբրեւ մերկացան ամենայն բանք
 ատենին առաջի նոցա, ետ պատաս-
 խանի Սահակ եպիսկոպոսն և ասէ.
 Որ յայտնի ուրացեալն են 'ի ճշմո-
 րիտն Աստուծոյ, ոչ գիտեն զինչ
 գործեն և կամ զինչ խօսին. քանզի
 խաւարեալ են խորհուրդք նոցա.
 Ղտեարս պաշտեն սուտ պատճառա-
 նօք, և ընդ ընկերս մտանեն յուխտ
 ստուածեան: Եւ են նոքա դարանք
 սատանայի, զի նոքօք իսկ կատարէ
 զդառնութիւն կամացն իւրոց, որ-
 պէս երեւի իսկ 'ի դոյն յայդ Վա-
 սակ: Քանզի մինչ ունէր զանունն
 քրիստոնէութեան, վերինն երեսօք
 կարծէր ծածկել և թաքուցանել
 զամենայն չարութիւն իւր առաջի
 ձերոյ անգէտ տէրութեանդ, և զա.

մենայն նենգութիւնն իւր քրիստո-
 նէութեամբն ծածկէր:

Ուստի և ձեր իսկ կարծեցեալ՝
 մեծապէս պատուեցէք զդա առա-
 ւել քան զարժանն իւր: Հաւատա-
 ցէք դմա զաշխարհն Վրաց. հար-
 ցէք, եթէ գո՛հ իցեն զգմանէ: Ե-
 տուք դմա զտէրութիւնն Սիւնեաց.
 լուարուք յազգականաց այտի դո-
 րա, զինչ պատմեն զգմանէ: Արա-
 ըէք զդա մարզպան Հայոց. զոր
 նախնեացն ձերոց մեծաւ աշխա-
 տութեամբ գտեալ էր, դա 'ի
 միում՝ ամի կորոյս զերկիրն ամե-
 նայն: Տեսէր, իբրեւ բարձաւ 'ի
 դմանէ պատուական անունն Աս-
 տուծոյ, զոր ունէր ստուածեամբ,
 մերկ երեւեցաւ ամենայն չարագոր-
 ծութիւն դորա: Զի եթէ առ Աս-
 տուածն իւր սուտ գտաւ, առ ո՞
 ոք 'ի մահկանացուաց աստի դա ար-
 դար գտցի:

Արդ ամենայն ամբաստանու-
 թիւն՝ որ այժմ յայտնի եղեւ ըզ-

դմանէ, ոչ ահա ձեր խակ յառաջա-
գոյն լուեալ էր. բայց յոր գէմն
ծածկեցէքն, դուք ձեզէն խակ քաջ
գիտէք: Ինչ այսպէս թուի, եթէ
սուտ յուսով դա զձեզ խնդացոյց:
Այլ ոչ դուք և ոչ դա և ոչ որ ըզ-
կնի ձեր գալոցն է, զայն 'ի մեզ ոչ
կարէ տեսնել: Արդ արարէք զգա-
որպէս և կամիք. ցմեզ զի՞ հարցա-
նէք:

Չարմացաւ մեծ հազարապետն
ընդ միտս իւր, և 'ի խորհուրդս իւր
քննէր զամենայն բանս ատենին:
Քանզի հասեալ էր 'ի վերայ, եթէ
յիրաւի դատապարտեցաւ այրն
լստ անարժան գործոցն իւրոց, ե-
մուտ և եցոյց զամենայն բանս ատե-
նին յարքունիսն: Եւ իբրեւ լուաւ
թագաւորն և ստուգեաց 'ի հազա-
րապետէն զառնն պարտաւորու-
թիւն, բարկացաւ յոյժ և 'ի խոր
խոցեցաւ. բայց միայն երկայնամու-
թեամբ կամեցաւ հասուցանել զնա
'ի մեծ անարգութիւն: Լուռ եկաց

աւուրս երկոտասան, մինչեւ 'ի
գլուխ չոգաւ փուրսիչ ամբաստա-
նու թեանն:

Եւ եղև յաւուր միոջ մեծի զա-
մենայն երեւելի և զպատուականն
հրամայէր յընթրիս հոջել: Կոչեցին
և զուրացեալն. և նա ըստ առաջի
կարգի օրինայն արքունի արկանէր
զպատուական հանդերձն, զոր ու-
նէր 'ի թագաւորէն. կապէր և ըզ-
պատուավորսն, և զխոյրն ոսկեզէն
դնէր 'ի վերայ, և զկուսնակուռ
ձոյլ ոսկի կամարն ընդելուզեալ
մարգարտով և ախմբք պատուա-
կանօք ընդ մէջ իւր ածէր, և ըզ-
գինգան յականջն, և զգումար-
տակն 'ի պարանոցին, զսամոյրսն
զթիկամբն և զամենայն օրէնս պա-
տուոյն զանձամբ արկեալ՝ երթայր
յարքունիս, շքեզ և երեւելի քան
զամենեսեան երեւէր բազմու-
թեանն:

Իսկ նախարարքն որք կամօք 'ի
Հայոց չոգան՝ անձամբ տուեալ

զանձինս 'ի փորձութիւնն, և սուրբքն որ յառաջագոյն հասեալ էին, կապանօք ունէին զամենեսեան առ գրանն արքունի: Իբրեւ տեսին զնա զարդարեալ և շքեղացեալ, և բազմամբօխ գնդաւ գայր յարքունիս, 'ի միտս իւրեանց սկսան այլ պանեւ և ասեւ. Ո՛վ անմիտ վաճառական, զանմահ և զանանց պատիւ ետուր, և զանցաւորդ Գնեցեր, զոր և զայդ եւս ընդ մօտոյ աւուրս կորուսանելոց էս:

Եհաս և նստաւ 'ի ներքին դահլիճնն, որ էր հրապարակ մեծամեծացն: Արդ եկն եւ սենեկապանն յարքունուստ, հարցանէր ցնա և ասէր. Արբայ յիւեաց առ քեզ յոր մէ գտեալ է քօ զայդ ամենայն պատուական պատիւդ, ասա ինձ վաղ վաղակի, վասն որոյ արդար վաստակոց: Եւ յուշ առնէր նմա զամենայն բանս ատենին, յորում դատապարտեցան. նա և զոր ոչ եւս անդ խօսեցան՝ զայն եւս յայտնէր

նմա: Զի ոչ ըստ կարգի ունէր նա զտէրութիւնն Սիւնեաց աշխարհին, այլ նենգութեամբ և քսութեամբ ետ սպանանել զհօրեղբայր իւր ըզՎաղինակ, և յինքն տարաւ զտէրութիւնն իբրեւ քրտիկար յարքունիս: Նա և այլ եւս բազում բանիւք դատապարտեցին զնա, որում ամենայն աւագանին վկայ գային: Պապանձեցաւ ամենեւին, և չգտաւ բան ճշմարիտ 'ի բերան նորա: Իբրեւ կրկնեցին և երեքկնեցին ցուցանելով 'ի ներքս յարքունիան, հատաւ վճիռ մահու 'ի վերայ նորա:

Արդ եկն եւ դահճապետն, և մատեաւ առաջի ամենայն մեծամեծացն մերկեաց 'ի նմանէ զպատիւն զոր ունէր յարքունուստ, և զգեցոյց նմա հանդերձ մահապարտի: Կապեցին զոտս և զձեռս, և կանանց բար նստուցին 'ի ձի մատակ. տարան ետուն յայն զընդան, ուր կային մահապարտք ամենայն:

Իսկ նախարարքն Հայոց և սուրբ

եպիսկոպոսքն հանդերձ երիցամբքն,
 Թէպէտ և էին 'ի մեծի պատուհա-
 սի, ոչ ինչ յիշէին զնեղուծիւնսն՝
 որ անցեալ էր ընդ նոսա, և կամ
 որ այլ եւս ակնկալուծիւն էր գալ
 'ի վերայ, այլ զարմացեալ էին ընդ
 մեծ յայանուծիւնն՝ որ եղև յԱս-
 տուծոյ: Միխիթարէին զմիմեանս և
 ասէին. Քաջուծեամբ պատերազ-
 մեցաք, առաւել եւս համբերու-
 թեամբ ճգնեսցուք: Լուեալ է մեր
 'ի սուրբ հարցն մերոց, եթէ գլուխ
 ամենայն առաքինուծեան համբե-
 րուծիւն է, և իմաստուծիւն երկ-
 նաւոր՝ կատարեալ աստուածպաշ-
 տուծիւն, և զայս ոչ ոք կարէ դը-
 տանել առանց չարչարանոց: Իսկ
 չարչարանքն յորժամ ընդերկարա-
 նայ 'ի վերայ, յայնժամ բազմանայ
 վարձ հաստուցմանց պարգեւին:

Ապա թէ այդ այդպէս է, զայս
 միայն աղաչեսցուք զԱստուած, զի
 համբերել կարասցուք ամենայն
 փորձուծեանց. և Տէր ինքնին ա-

րասցէ հնարս մերում փրկուծեանս
 Լուեալ է մեր զգատաստան քա-
 ռասուն զինուորացն Քրիստոսի,
 որք բազում հարուածս տանջանաց
 ընկալան: Մինն 'ի նոցանէ փուծա-
 ցաւ 'ի բաղանիսն, և վրիպեաց 'ի
 պսակէն. իսկ երեսուն և ինն համ-
 բերուծեամբ կատարեցան, և հա-
 սին այնմ աւետեաց, որում ցան-
 կացեալն էին: Իսկ մեր ընկերակիցն
 աւանիկ, որ յառաջագոյն որոշե-
 ցաւ 'ի մէնջ, ահա եղև գործակից
 սատանայի: Մինչ դեռ ոգիքն 'ի
 մարմնին են, ընկալաւ զառհաւատ-
 չեայ դեհէնին տանջանաց, որ ոչ
 միայն սրբոց է ողբալի, այլ և ամե-
 նայն գազանաբարոյ մարդկան:

Զայս ասէին, և բազում արտա-
 սուս 'ի վերայ կորուսելոյն հե-
 ղուին. և անդէն զերգս հոգեւորս
 'ի բերան առեալ ասէին. Բարի է
 յուսալ 'ի Տէր քան յուսալ 'ի մար-
 դիկ. բարի է յուսալ 'ի Տէր քան
 յուսալ յիշխանս. ամենայն աղինք

չըջեցան զինեւ, և անուամբ Տեառն
յաղթեցի նոցա: Քաջալերէին զմի-
մեանս և ասէին. Զայս գիտելով,
եղբարք, մի երկիւյուշք յանաստուած
ազգէս հեթանոսաց, որ քան զմե-
զուս վատթարագոյն եւս են՝ ՚ի զայ-
րանալն իւրեանց. զի և նոցա ցա-
սուամն՝ ՚ի սատակուամն անձանց իւ-
րեանց լիցի. այլ մեք զանուն Տեառն
կարգացուք, և վանեսցուք զամե-
նեսեան:

Իսկ ուրացեալն Վասակ հայեր ՚ի
միաբանութիւն սուրբ կապելոցն,
որք մեծաւ խնդութեամբ ընդու-
նէին զհարցարանն և զուարթա-
գոյն և սայծառք երեւէին որպէս
յառաջագոյն յարքունիսն. հայեր
և կարօտեր, և ոչ ոք խառնեաց ըզ-
նա ՚ի նոսա, այլ ուրոյն նովին կա-
պանօք պահէին: Եւ օր ըստ օրէ բե-
րէին իբրեւ զգէշ ընկէնուին ՚ի մեծ
հրապարակին, ձաղէին և այսա-
նէին, և տեսիլ ամենայն կարուա-
նին զնա առնէին: Կողոպտեցին հս-

նին և ոչ ինչ թողին զոր ընդ իւրն
ունէր. այնպէս ձաղեցին աղբա-
տութեամբ, մինչեւ հաց մուրա-
նային և բերէին նմա իւր ծառայքն:
Եւ այնպէս սաստիկ արկին զպար-
տերս հարկաց աշխարհին ՚ի վերայ
տան նորա, որ մինչեւ զհարց և ըզ-
հաւուց և զիւր արարս և զզարգս
կանանց եւս եդ ՚ի վերայ և ետ և
տուժեցաւ, և ոչ կարաց հատու-
ցանել զպարտան արքունի: Եւ
յայն տեղի հասուցին, մինչեւ հար-
ցանել նմա եթէ կայցէ՞ ինչ գանձ
՚ի գերեզմանս նախնեացն մերոց. և
եթէ գտեալ էր նորա, հանէր և
տայր ընդ իւր և ընդ ընտանեացն
տուգանս. սրպէս զի բազում մար-
դիկ իսկ չողան ՚ի տուժին:

Եւ իբրեւ այսպէս յամենայն
կողմանց հարեալ վատթարացաւ,
անկաւ յախտս դժնդակս անդէն ՚ի
կապանսն: Զեռաւ փոր նորա, և
հարան և արորեցան գոգք նորա, և
քամեալ մղեցաւ թանձրամու-

Թիւն նորա: Եւացին որդունք ընդ
աչս նորա և 'ի վայր սորեցին ընդ
ռնդունս նորա. խցան լսելիք նո-
րա, և ծակոտեցան չարաչար շըր-
թունք նորա. լուծան ջիղք բազկաց
նորա, և յետ կոյս կորացան կըր-
կունք ոտից նորա: Բղխեաց 'ի նմա
նէ հոտ մահու, և փախստական ե-
ղեն 'ի նմանէ ձեռնասուն ծառայք
նորա: Լեզուն միայն կայր կենդանի
'ի բերան նորա, և ոչ գտաւ խոս-
տովանուԹիւն 'ի շրթունս նորա:
Ճաշակեաց զմահ հեղձամղձուկ, և
էջ 'ի դժոխս անհնարին դառնու-
թեամբ: Ոտնչար եղեն նմա ամե-
նայն սիրելիք նորա, և ոչ յագեցան
սաստիկ հարուածովքն ամենայն
Թշնամիք նորա:

Եւ այն որ կամերն Թագաւոր լի-
նել մեղօք Հայոց աշխարհին, ոչ ե-
րեւեցաւ տեղի գերեզմանի նորա.
քանզի իբրեւ զոռն մեռաւ և իբ-
րեւ զգէշ քարշեցաւ: Ոչ յիշեցաւ
անուն նորա 'ի մէջ սրբոց, և ոչ

մատեաւ յիշատակ նորա առաջի
սուրբ սեղանոյն յեկեղեցւոջն: Ոչ
ինչ եթող չարիս՝ զոր ոչ գործեաց
'ի կեանս իւր, և ոչ ինչ մնաց 'ի մե-
ծամեծ չարեաց՝ որ ոչ անցին ընդ
նա 'ի մահուան նորա:

Գրեցաւ յիշատակարանս այս
վասն նորա, առ 'ի կշտամբուսն
յանդիմանուԹեան մեղաց նորա.
զի ամենայն որ զայս լուեալ գի-
տասցէ, նզովս 'ի հետ արկցէ, և մի
լիցի ցանկացող գործոց նորա:

ԱՐՏԱՔՈՅ ԵՕԹՆ ՅԵՂԱՆԱԿԻՆ

ՈՒԹԵՐՈՐԴ

ԴԱՐՁԵԱԼ ՎԱՍՆ ՆՈՐԻՆ ՊԱՏԵՐԱԶՄԻՆ

ԵՒ ԶԱՐԶԱՐԱՆՍՑ

ՍՈՒՐԲ ՔԱՀԱՆԱՅԻՑՆ

Արդ 'ի վեշտասաներորդի ամի
աէրութեան նորին թագաւորի,
գարձեալ անդրէն խաղայր գնայր
յաշխարհն Քուշանաց մեծաւ սըրաւ
մըտութեամբ 'ի գործ պատերազ
մին: Եւ գնացեալ 'ի Վրկանէ, և
ելեալ յԱպար աշխարհ, նովին կա
պանօք զնախարարան և զքահանայան
հրամայեաց պահել 'ի գղեկ քաղա
քին 'ի Նիւշապուհ: և զերկուս յե
րանելի կապելոցն ընդ իւր խաղա
ցոյց: Ահ արկանէր ամենայն քրիս
տոնէութեան ընդ որ անցանէր:

Իբրեւ զայն տեսանէր շոն մի,
որ էր յազգէ թագաւորացն 'ի Խայ

լանդրաց աշխարհէն, Բէլ անունն, և 'ի ծածուկ խոնարհէր առ քրիստոնէայսն, և սիրով յօժարու թեամբ ուսանէր 'ի նոցանէ զճըշմարտութիւնն և կամօք իւրովք նուաճեալ էր ընդ իշխանութեամբ թագաւորին, և կարի յոյժ դառնանայր 'ի միտս իւր յորժամ տեսանէր չարչարեալ զսուրբսն: Եւ իբրեւ այլ ոչ ինչ էր ձեռնհաս, փախստական անկանէր առ արքայն Քուշանաց: Երթայր և պատմէր նմա զամենայն անցս չարչարանացն, զոր անցոյց թագաւորն ընդ աշխարհն Հայոց. տեղեակ եւս առնէր զնա վասն խրամատութեան պահակին Հոնաց. ցուցանէր և զերկպառակութիւն զորացն, որ բազում ազգք բաժանեցան 'ի սիրոյ թագաւորին. ազգէր նմա և զարտունջ զԱրեաց աշխարհին:

Չայս իբրեւ լուաւ թագաւորն Քուշանաց, ոչ ինչ երկմտութեամբ թերանայր յառնէն, և ոչ կարծիք

լրտեսի անկանէին 'ի միտս նորա: Քանզի սակաւ մի յառաջագոյն նորա լուեալ էր, դարձեալ իբրեւ ստուգեաց եւս 'ի Բէլայն յայնմ՝ եթէ խաղացեալ գայ 'ի վերայ աշխարհին Քուշանաց, փութացաւ վաղվաղակի զօր ժողովէր, գունդ կազմէր՝ ելանել նմա ընդ առաջ չօր ձեռամբ: Զի թեպէտ և ոչ կարէր յանդիման տալ պատերազմ ընդդէմ նորա, այլ 'ի վերջի թեւոյն անկեալ, բազում հարուածս հասուցանէր 'ի վերայ զօրացն արքունի: Եւ այնպէս նեղեալ շտապէր, զի անձուկ ըջկարաւ վատախտարակ արարեալ՝ այսրէն դարձուցանէր, և ինքն ասպատակաւ զհետ մտեալ աւերէր զբազում գաւառս արքունի. և ինքն ողջանդամ անդրէն յերկիրն իւր դառնայր:

Եւ իբրեւ ետես եթէ անարգանօք և վատթարութեամբ դարձեալ էմ 'ի պատերազմէս, զիջաւ փոքր

մի 'ի հսարտուութենէն, և գիտաց եթէ յերկպառակուութենէ զօրացն եղեն չարիքն ամենայն: Եւ առ մղձկեւ սրտին՝ չգիտէր թէ յո՞ թափէր զԹոյնս գառնութեանն: Իսկ մեծ հազարապետն յոյժ էր յերկիւղի. քանզի ինքն էր պատճառք ամենայն չարեացն զոր գործեաց:

Սկսան բանս 'ի բերան գնել մոգպետին և մոգացն, որք մատուցեալ յանդիման ասէին. ցթագաւորն. Արքայ քաջ, մէք 'ի դենէ իսկ գիտեմք, զի ոչ որ 'ի մարդկանէ կարէ կալ առաջի քոյոյ մեծի զօրութեանդ. այլ վասն քրիստոնէիցն, որ են ընդդէմ՝ օրինաց մերոյ, բարկացեալ են մեզ աստուածքն, զի մինչեւ ցայսօր կենդանի պահեցեր զնոսա: Եւ յիշեցուցանէին եւս նմա, որպէս նոքա 'ի բանտի անդ անիծանէին զքեզ: Եւ բազում և այլ հայհոյութիւնս խօսէին զարբոյն, և զօր հանապազ զնոսա յաչաց հանէին, և զմիտս թագաւորին

ածէին 'ի ցասումն բարկութեան. մինչեւ փուլթացաւ վաղվաղակի հեղուլ զարիւն անմեղացն:

Ետ հրաման վասն երկուցն՝ որ անդէն 'ի կարաւանին առ իւրն էին, Սամուէլ և Արրահամ, զի գաղտ կորուսցեն զնոսա: Իսկ որք էին 'ի դղեկ քաղաքին, հեռի էին 'ի կարաւանէն իբրեւ օթիւք հնգետասան: Հրամայեաց համբարակապետին, որում անունն էր Գենչապուհ, զի յառաջ քան զնա երթիցէ 'ի քաղաքն, ուր էին սուրբ քահանայքն Տեառն, և չարաչար տանջանօք իշխեսցէ դատել և հարցանել, և սրով վախճանել:

Այլ զնոսա մոգպետին՝ յառաջագոյն, որում յանձն արարեալ էր, բազում անգամ աւելի քան զհրամանն արքունի չարչարեալ էր. քանզի իշխան դենպետ էր Ապար աշխարհին, և առաւել ջերմագոյն էր 'ի մոգութեանն. քան զբազում գիտունն եւս տեղեակ

էր զրադեշտական օրինացն: Նա և զոր մեծ պարծանս համարէին ըստ իւրեանց մնլորութեանն կարգի, համակդեն անուն էր. գիտէր և զանպարտքան, ուսեալ էր և զբողւ պայխան, ունէր և զպալհաւիկն և զպարսկագէտն. քանզի այս հինգ կեշտք են՝ որ գրաւեալ ունին զամենայն օրէնս մոգութեանն: Բայց արտաքոյ սոցա է միւս եւս այլ վեցերորդ, զոր մոգպետն կոչեն:

Թուէր իմն անձին, եթէ կատարեալ իցէ ամենայն գիտութեամբ. հայեր ընդ երանելիսն, եթէ առ ՚ի տգիտութեան մնլորեալ են ՚ի մեծ գիտութենէս մերմէ: Եդ անտի կարծիս ՚ի մտի՝ անգադար չարչարել զնոսա, զի թերեւս առ չթուժալ մարմնոյն նեղութեանց՝ լուայց ՚ի նոցանէ բանս ինչ ողոքանաց: Վասն որոյ զատ և որոշեաց ՚ի նախարարացն զքահանայսն, և հեռացոյց ՚ի նոցանէ բացադոյն. և արկ զնոսա ՚ի ներքնատուն մի գէճ խա-

ւարչտին: Եւ հրամայէր վեց անհերկու քաշկէնս ժամէ ՚ի ժամ, և դորակ և կէս ջուր. և ամենեւին ոչ զոք թողոյր մօտ երթալ ՚ի դուրս բանտին:

Եւ իբրեւ աւուրս քառասունս այսու նեղէր զնոսա, և ոչ լուաւ ՚ի նոցանէ բան թուլութեան, այլ իմն ամ զմտաւ, եթէ ոք յիւրոց ծառայիցն դաղտ եգիտ ինչ ՚ի նոցանէ, և ՚ի ծածուկ տացէ նոցա կերակուր: Ինքն երթեալ կնքէր զերդ և զդուռն բանդին, և զկարգեալ ռոճիկն տայր յիւր հաւատարիմնն տանել նոցա. և արար զայս աւուրս հնգետասան. սակայն և այնպէս երանելիքն ոչ ինչ շտապեալ տագնապեցան. այլ մեծաւ համբերութեամբ տանէին զճիւղութիւնն, և անգադար սաղմոսիւք կային ՚ի հանապաղորդ պաշտամանն. և ՚ի կատարել աղօթիցն զուարթագին գոհանալով, սակաւիկ մի հանգչէին ՚ի գետնախշտի յանկողինսն:

Իսկ պահապանքն, որ 'ի վերայ կապելոցն կային, յոյժ էին զարմացեալ ընդ առողջութիւն անհիւանդութեան նոցա, իբրեւ լէին զանդադար հնչումն ձայնիցն: Վասն այնորիկ պատմեցին յականջս մոգպետին և ասէն. Ոչ են արքն այն լոկ առանց մեծի զօրութեան. զի եթէ պղնձի մարմինք ունէին նոքա, արդ լուծեալ էր 'ի գէճ խոնաւոյ անտի: Բազում ժամանակք են մեր, զի յանձն է մեզ պահպանութիւն բանգիս. ոչ յիշեմք՝ եթէ 'ի կապելոց ոք ամսօրեայ ժամանակ կեցեալ է 'ի տանդ յայդմիկ: Արդ մեք ասեմք քեզ. եթէ առեր հրաման մահու նոցա և սպանանես, դու գիտես. ապա թէ ոչ, սրահել յանձն արարաւ քեզ և ոչ դատել զնոսա, չարաչար վտանգ է կապելոցն: Նա և մեք զահի հարեալ եմք և յոյժ երկնչիմք, յորժամ տեսանեմք զայնպիսի անհնարին նեղութիւնսն:

Եւ իբրեւ զայս լուաւ մոգպետն, յարուցեալ ինքնին երթայր 'ի մէջ գիշերին յերդ բանգին: Եւ հայեցեալ 'ի ներքս ընդ մութ գիշերոյն, այն ինչ լինէր նոցա 'ի պաշտամանէն հանգչել, և տեսանէր զանձն իւրաքանչիւր կապելոցն, զի իբրեւ զկանթեղ անշիջանելի վառեալ բորբոքէր: Չահի մեծի հարաւ, և ասէր ընդ միտս իւր. Չինչ է այս մեծ սքանչելիքս. աստուածք մեր ուրեմն եկեալ իջեալ են 'ի բանդս, և նոցա փառաւորութիւնն լուցեալ բորբոքի: Եւ եթէ նոքա առ սոսա ոչ մերձենան, մարդոյ լոկոյ անհնարին է զայսպիսի պայծառութիւն լուսոյ զգենուլ: Իմ այսպէս լուեալ էր վասն կեշտիս այսորիկ, եթէ առ յոյժ յիմարութեանն մոլորեալ են, և ստութեամբ կերպարանին յաչս տգէտ մարդկան. թերեւս և այս տեսիլ այնպէս ինչ երեւեցաւ ինձ:

Եւ ոչ կարէր համօրէն կալ 'ի

վերայ իրացն երեւման: Եւ մինչ
գեռ յայսմ մտաց խորհրդի էր,
գարձեալ սուրբքն յիւրաքանչիւր
խշտեկացն կանգնեցան կացին 'ի
սովորական սլաշտամանն: Յայն,
ժամ ճմարտեալ գիտաց մոգ-
պեան, եթէ ոչ այլ ընդ այլոյ տե-
սանէր՝ որ երեւեցաւն նմա, այլ 'ի
նոցունց յանձանց փայլէր լուսա-
ւորութիւնն: Յայնժամ կրկին ան-
գամ զահի հարաւ և ասէ. Ո՞ւ՞մ 'ի
կապեւոցն եղեւ այսպիսի յայտնու-
թիւն. ես և ոչ զմի ոք ոչ գիտեմ,
և ոչ լուեալ է իմ 'ի հարցն յա-
ռաջնոց: Եւ քանզի անհնարին շար-
ժեցաւ 'ի մեծ սքանչելեացն, և
գողային ամենայն մարմինքն, և
թմբերեալ կիսամեռ լինէր 'ի վերայ
տանեացն մինչեւ յառաւօտն. և 'ի
ծագել լուսոյն իբրեւ զբազմօրեայ
հիւանդ յարուցեալ երթայր 'ի
վանս իւր, այլ և ոչ ումեք իշխեաց
ամենեւին պատմել զոր ինչ ետեսն:
Կոչեաց առ իւր զպահապանսն և

ասէ ցնոսա. Երթայք հանէք զկա-
պեալն 'ի վերնատուն մի ցամաքա-
գոյն, և անդ պահեցէք զնոսա ըզ-
գուշութեամբ, որպէս և ասացէքն:
Մի ոմն 'ի դահճաց անտի, իբրեւ
լուաւ զհրամանս մոգպետին, փու-
թով ընթացեալ երթայր, իբրեւ
մեծ իմն աւետիս տանէր նոցա:
Հրամայեաց ձեզ, ասէ, ելանել 'ի
ցամաք վերնատուն մի. արիք վաղ-
վաղակի, և մի հեղգայք, քանզի և
մեք խկ պաղատեցաք վասն ձերոյ
տառապանացդ:

Իսկ սուրբն Յովսէփ հեզաբար
սկսաւ խօսել ընդ դահճապետին և
ասէ. Երթ ասա ցյիմար առաջ
նորդն ձեր. չէ լուեալ քո վասն
հանդերձեալ գալստեան Տեառն
մերոյ և կամ վասն մերոյ հրաշա-
կերտ շինուածոցն, որք մեզ կան
պահին 'ի սկզբանէ պատրաստու-
թիւնքն. վասն որոյ գիւրեաւ համ-
բերեմք մեծի նեղութեանս առ սեր
այնր յուսոյ՝ զոր տեսանեմք: Դու

բարւոք արարեր, զի արգահատեցեր մեծի նեղութեանս մարմնոյ. այլ ոչ ինչ եմք ձանձրացեալք իբրեւ զանասուած ոք, որ չիք այլ ինչ յոյս 'ի միտս նորա քան որ երեւինս: Այլ մեք առ սերն Քրիստոսին մերոյ՝ ընդ այս յոյժ եմք ինդացեալ, և կատարեալ պարգեւս զսա իսկ համարիմք, զի ժամանակեայ վշտօքս զանժամանակ երանութիւնսն ժառանգեսցուք:

Եթէ շինուածոց իցեմք ցանկացեալք, ունիմք շինուածս յերկինս առանց մարմնաւոր ձեռագործի, որ ոչ երեւին ձեր արքունիքդ առ նոքօք: Նոյնպէս և հանդերձից և փառաց և անսխտ կերակրոց, զոր եթէ ոք կամեսցի ասել ձեզ, չհանգարտէ լսել ձեր ակարութիւնդ. վասն զի կուրութեան հնութեամբն չտեսանէք և ոչ լսէք և ոչ իմանայք, յայն սակս զմեզ զուր և անիրաւ առանց յանցանաց անողորմն գատիք: Այլ մեր թագա-

ւորն առատ է և բարերար, և բաց է դուռն արքայութեան նորա. եթէ կամեսցի ոք դիմել՝ գիմեսցէ համարձակ. 'ի դարձելոց յապաշխարութիւն չնախանձի և ոչ ընդ ումեք երբեք:

Բայց վասն գիւրութեանս՝ որ դու հրամայեցեր առնել մեզ, էր մեր իշխանութիւն անդրէն յաշխարհին մերում չանկանել մեզ 'ի ձեռս թագաւորիդ, որպէս և այլքն՝ զի ապրեցան յայսպիսի փորձանաց. այլ որպէս կամօք և յօժարութեամբ եկաք, իբրեւ թէ գիտեաք զվիշտ վտանգիս, ոչ ինչ զանգիտեցաք յայսպիսի ճգանց, սոյնպէս և կամիմք՝ զի և այլ եւս ծանրացուցես 'ի վերայ մեր, մինչեւ քո չարութիւն կամացդ յագեսցի 'ի մեզ: Չի թէ Աստուածն մեր, որ է արարիչ երկնի և երկրի և ամենայն երեւելեաց և աներեւութից, և առ սէր իւրոյ բարերարութեանն խոնարհեցաւ առ ազգս մարդկան,

և զգեցաւ մարմին չարչարելի, և անց ընդ ամենայն հանդէս առաքինութեան, և կատարեաց զամենայն գործ անտեսութեան, 'ի կամս իւր մատնեցաւ 'ի ձեռս խաչահանուացն, մահու մեռաւ և եղաւ 'ի գերեզմանի, և զօրութեամբ ատուածութեանն իւրոյ յարուցեալ երեւեցաւ աշակերտացն և այլոց բազմաց, և վերացաւ առ հայր իւր յերկինս, և նստաւ ընդ աջմէ հայրենի աթոռոյն, և շնորհեաց մեզ զօրութիւն երկնաւոր, զի ըստ նորա անմահութեանն՝ և մէք մերով մահկանացու մարմնովս կարիցեմք չարչարակից լինել անմահ մեծութեանն, և նա ոչ եւս իբրեւ զմահկանացու համարի զմեր մահն, այլ իբրեւ անմահից հատուցանէ մեզ զվարձս վաստակոց մերոց. արդ փոքր համարիմք մէք զչարչարանս զայս առ յէր փոխարինին, զոր էարկ առ ազգս մարդկան:

Իբրեւ լուաւ զայս ամենայն

բանս մոգպետն 'ի դահճապետէ անտի, խռովեցաւ, պղտորեցաւ 'ի միտս իւր, և հատաւ քուն յաչաց նորա զբազում՝ գիշերս: Իսկ յաւուր միոջ յերեկուն պահուն յարուցեալ երթայր առ նոսա միայնիկ լաիկ, և ոչ զոք առնոյր ընդ իւր 'ի սպասաւորացն: Եւ իբրեւ եհաս 'ի դուրս տանն, հայէր ընդ ծակ մի 'ի ներքս և տեսանէր ըստ առաջին տեսլեանն, բայց նոքա 'ի քուն կային խաղաղիկ: Հեզաբար կարգաց յանուանէ զեպիսկոպոսն, քանզի քաջ իսկ գիտէր պարսկերէն: Եկն 'ի դուրս և հարցանէր. Ո՞վ էս դու: Ես ինքն իսկ եմ, ասէ. կամիմ 'ի ներքս մտանել և տեսանել զձեզ:

Եւ իբրեւ եմուա 'ի մէջ սրբոցն, ոչ եւս երեւէր նմա այլ նշանն. և պատմեաց նոցա զերկիցս երեւուին սքանչելեացն: Ետ պատասխանի Ղեւոնդ երէցն և ասէ. Ստուած, որ ասաց 'ի խաւարի լոյս ծագել,

որ և ծագեաց և լուսաւորեաց ի մաստուծեամբ զաներեւոյթ արարածս, նոյն զօրուծիւն և այսօր ծագեաց 'ի խաւարեալ միտս քո, և բայան աչք կուրացեալ ոգւոյդ, և տեսեր զանշիջանելի լոյս շնորհացն Աստուծոյ. փութա, մի՛ հեղգար. գուցէ դարձեալ կուրացեալ ընդ խաւար գնայցես:

Եւ զայս իբրեւ ասաց, յոտն կացին ամենեքեան ասելով զբառաներորդ երկրորդ սաղմոսն. Առաքեա, Տէր, զլոյս քո և զճմարտութիւն քո, զի նոքա առաջնորդեսցեն և հանցեն զմեզ 'ի լեառն սուրբ և 'ի յարկս քո: Արդարեւ ճմարտիւ, Տէր, առաջնորդեցեր և ածեր զմոլորեալս զայս յանանց ուրախութիւնդ և յանմերժելի հանգիստդ: Ահա նմանեալ է օրս այս սուրբ չարչարանացն քոց. որպէս ապրեցուցեր զմահապարտ աւազակն յերկրորդ մահոռանէն, և նովաւ բացեր զաղխեալ գուռն Ադե-

նայ, այսպէս գտեր և զայս կորուսեալս. որ էր պատճառք մահու բաղմաց, արդ արարեր զսա պատճառք կենաց մեզ և անձին իւրում: Գոհանամք զքէն, Տէր, գոհանամք և ձայնակիցք լինիմք սուրբ մարգարէին. Մի՛ մեզ Տէր, մի՛ մեզ, այլ անուան քում տուր փառս վասն ողորմութեան և ճմարտութեան քոյ. զի մի երբեք ասասցեն 'ի հեթանոսս, թէ ո՛ւր է Աստուած նոցա. որպէս և այսօր իսկ յայանի եղև զօրուծիւն քո մեծ 'ի մեջ ապարասան խաւարադդեստ աղգիս:

Իսկ որ ձրին եգիտ զաստուածատուր շնորհան, սկսաւ և նա առանձինն ասել. Տէր լոյս իմ և կեանք իմ, ես յուժէ երկեայց. Տէր ապաւէն կենաց իմոց, ես յուժէ՞ գողացայց: Քանզի գիտեմ՝ ճմարտիւ, եթէ բազում են այսուհետեւ թըշնամիք իմ, և կամին մերձենալ և ուտել զմարմինս իմ. այլ գու, Տէր ամենայնի, եկիր վասն ամենեցուն

կենաց, զի դարձցին և կեցցեն առաջի քոյոյ մարդասիրութեանդ: Մի որոշեր զիս 'ի սուրբ գառանցս՝ յորս խառնեցայ, զի մի ըստ քո փարախդ արտաքս ելեալ՝ չար գազանն դարձեալ բեկանիցէ զիս: Մի հայիր, Տէր, 'ի բազմամեայամբարըշտութիւնս իմ, զի մի մոլորեալ 'ի ճմարիս կենացդ՝ զբազումս անդրէն 'ի կորուստ աշակերտիցեմ. այլ որոց և զէ պատճառք մահու՝ նոցին եղէց և պատճառք կենաց: Սատանայ՝ որ ինեւ խրոխտացեալ պարծէր 'ի մէջ մեծի կորստականացս, ինեւ կորացեալ ամաչեսցէ 'ի մէջ իւրոց աշակերտացն:

Եւ զայս իբրեւ ասացին, նմին իսկ ետուն կատարել զազօթսն, և դադարեցին նովաւ հանդերձ մինչեւ 'ի պահն երրորդ. և այնպէս խաղաղացեալ կացին 'ի քուն ամենեքեան մինչեւ 'ի ժամ առաւօտուն: Իսկ նորա յոսն կացեալ, և 'ի քուն ոչ մտանէր. այլ զձեռսն

իւր 'ի վեր համբարձեալ՝ կայր յազօթս: Եւ մինչ դեռ ընդ երդ պշուցեալ հայէր յերկինս, յանկարծակի տունն լի եղեւ լուսով, և երեւեցան նմա սանդուղք լուսեղէնք՝ որ կանգնեալ էր յերկրէ յերկինս, և գունդք գունդք զօրաց ելանէին 'ի վեր. և էր ամենեցուն տեսիլն նոր և չքնաղ, ահաւոր և սքանչելի իբրեւ զտեսիլ հրեշտակի: Ունէր և զթիւ համարոյ 'ի միտս իւր զիւրաքանչիւր գնդիցն, զոր տեսանէր. էր՝ որ զչաղարի, էր՝ որ զերեսուն և զերից, էր՝ որ զերկերիւրոց և զերեքտասանից: Եւ այնպէս մտաբոյնս մերձենայր, մինչեւ ճանաչել նմա զերիս 'ի նոցանէ, զՎարդան և զԱրտակ և զԽորէն: Եւ ունէին ինն պսակ 'ի ձեռին, խօսէին ընդ միմեանս և ասէին. Ահա եկն եհասս ժամ, զի և սոքա խառնեսցին 'ի գունդս մեր. քանզի և մէք սոցա իսկ մնայաք, և առհաւատցեայ պատիւ սոցա բերաք: Եւ որում ոչ

եւս մնայաք՝ եկն երեւեցաւ և խառնեցաւ, և եղև իբրեւ զմի՛ ՚ի զինուորաց Քրիստոսի:

Այս երկցս անգամ՝ երեւեցաւ չքնաղ տեսիլս առն երանելոյ: Զարթոյց զսուրբսն՝ ՚ի քնոյ անտի, և պատմեաց նոցա զամենայն տեսիլն կարգաւ: Իսկ նոքա յարուցեալ կացին յաղօթս և ասէին. Տէր, Տէր մեր, զի՛ սքանչելի է աշուն քո յամենայն երկրի. համբարձաւ մեծվայելչութիւն քոյ՝ ՚ի վերոյ քան զերկինս. ՚ի բերանոց մանկանց տղայոց սարնդիացաց հաստատեցեր զօրհնութիւն, զի եղծցի թշնամին և հակառակորդն: Զի ոչ եւս է այսուհետեւ ասել, եթէ տեսից զերկինս զգործս մատանց քոց, այլ թէ տեսից զբեզ, Տէր երկնի և երկրի. որպէս երեւեցար իսկ այսօր՝ ՚ի ձեռն սուրբ զօրականացն քոց հեռաւոր օտարիս, որ անցեալ էր ըստ ակնկալութիւն կենաց իւրոց:

Ահա գու, Տէր, ողորմութեամբ քով պսակեցեր զսիրելիս քո, և գլութութեամբ քով ելեր ՚ի խնդիր կորուսելոյս, գարձուցեր և խառնեցեր ՚ի դասս սրբոց քոց: Ոչ միայն ետես սա զերկինս՝ զգործս մատանց քոց, այլ ետես զերկինս և զքնակիչս նորա, և մինչ դեռ է յերկրիս՝ խառնեցաւ ՚ի գուհոյս բիւրաւոր հրեշտակաց քոց: Ետես և զոգիս արդարոց կատարելոց, ետես և զնրմանութիւն փառաց աներեւոյթ պատրաստութեանցն, ետես և ՚ի ձեռին նոցա զանշուշտ ռաբունայն, որ հանդերձեալ պահի ՚ի ձեռն ճարտարապետին: Երանի՛ սմա վասն սուրբ տեսլեանս, և երանի՛ է մեզ վասն սորա մերձաւորութեանս առ մեզ. քանզի հաստատեալ գիտացաք սովաւ, եթէ որում այսպիսի սքանչելիք յայտնին, մեծ մասն ընկալաւ սա յանսպառ քոց բարութեանցդ: Անսպառ են պարգեւքն քո, Տէր, և առանց խնդրելոյ տաս

ուժ և կամիս քոյով յորդ և ան-
նախանձ առատութեամբդ: Եւ ե-
թէ որ ոչ խնդրեն՝ չարգելուս 'ի
նոցանէ, բայ մեզ, Տէր, զդուռն
ողորմութեան քոյ, որ 'ի մանկու-
թենէ մերմէ ցանկացեալ եմք բա-
րեմասնութեան սրբոց քոց: Զնո-
րագիւտ դաստակերտս քո բարե-
խօս առնեմք վասն անձանց մերոց.
մի ընկղմեսցի նաւ հաւատոց մերոց
'ի մէջ ալէկոծեալ ծովու մեղաց:

Եւ այսպէս յերկար կատարելով
զազրթան, յորդ և առատ արտա-
սուս հեղուին 'ի վերայ անձանց իւ-
րեանց: Կուրթ ողորանաց արկա-
նէին առաջի բարերարին, զի լսելի
լիցի ձայն պաղատանաց նոցա, և
հաստատուն կացցեն 'ի վիշտս ճը-
գանցն, զի մի զրկեսցին 'ի ցանկա-
լի պսակացն, զոր ունէին սուրբքն
'ի ձեռս իւրեանց, որպէս և աղգե-
ցաւ նոցա 'ի ձեռն շոգւոյն սրբոյ,
զի մերձեալ էր ժամանակ կոչման
նոցա, որպէս զի երթիցեն և աներ-

կիւզ դագարեսցեն 'ի կասկածելի
ակնկալութենէն, որում համբե-
րէին բազում տառապանօք, զի առ-
հաւատչելւ ժողու հասցեն երկնա-
ւոր մեծութեանն, որում 'ի վա-
ղընջուց իսկ էին ցանկացեալք:

Եւ քանզի ինքն իսկ մոգպետն
իշխան էր աշխարհին, և նմա յանձն
արարեալ էր զկապեալն քաղաքին,
վասն այնորիկ և համարձակու-
թեամբ ընդ առաւօտն հանեալ
տանէր յապարանսն իւր: Լուա-
նայր և սրբէր զնոսա 'ի չարչարա-
նաց բանդին, առնոյր զջուր լուաց-
մանն սրբոյն և արկանէր զիւր մար-
մնով: Ուղղէր 'ի տան իւրում ա-
ւաղան, և ընդունէր 'ի նոցանէ ըզ-
սուրբ մկրտութիւնն. հաղորդէր 'ի
կենդանարար մարմինն և 'ի քաւիչ
արիւնն Տեառն մերոյ Յիսուսի
Քրիստոսի: Բարձր բարբառով ա-
ղաղակէր և ասէր. Մկրտութիւնս
այս լիցի ինձ 'ի լուացումն մեղաց
իմոց, և 'ի ծնունդս նորոգութեան

վերստին Հողույն սրբոյ, և ճաշակումն անմահ խորհրդոյս 'ի Ժառանգութիւն երկնաւոր որդեգրութեանն: Գնէր և ըստ մարմնոյ առաջի նոցա սեղան կերակրոյ, և մխիթարութեան բաժակ մատուցանէր նոցա, և միաբանէր ընդ նոսա հացին օրհնութեան:

Այլ թէպէտ և ինքն եհաս յերկնաւոր բարխն, և աներկիւղ էր 'ի մարդկանս հարուածոց, սակայն վասն ընտանեացն յոյժ ունէր կասկած, զի մի իբրու վնասակարք մատնեսցին յիրս արքունի: Վասն այնորիկ 'ի ծածուկ կոչէր 'ի գիշերի և զնախարարսն, որ 'ի նմին քաղաքի էին 'ի կապանս, և առնէր ծախս մեծամեծս: Եւ էին ամենեքեան 'ի մեծի խնդութեան վասն սքանչելեացն, որ երեւեցաւ նոցա: Ոչ յիշէին ամենեւին, եթէ վիշտք ինչ անցեալ էին ընդ նոսա:

Բայց 'ի Ժամ բազմականացն կարծիք իմն եղէն 'ի միտս սրբոյն վասն

երիցու միոյ, որ էր ընդ նոսա 'ի սուրբ կապանսն. զի 'ի մէջ շինական մարդկան կեցեալ էր, և տգիտագոյն եւս էր 'ի գրոց մխիթարութենէ: Հրամայեցին նմա ունել զգլուխ բազմականին. ետ պատասխանի երանելին և ասէ. Ձերնչ է այդ՝ զոր գուբդ գործէք, և կամ յինէն զի՞ թաքուցանէք զծածուկս խորհրդոցդ: Ես քան զկրսերս ձեր խոնարհագոյն եմ, և քան զեւս փութուես յաշակերտաց ձերոց տգիտագոյն եմ, զիմրդ կարացից այդմ տանել: Այս իսկ մեծ էր ինձ, զի սուրբ կապանաց ձերոց հաղորդեալ եմ այսօր: Եթէ արժանի համարիք զիս ձերում սեղանոյդ, կալարուք գուբ զիւրաքանչիւր տէրի բազմականիդ, և հրամայեցէք ինձ զիմ տեղին: Եւ բռնադատեաց սուրբ եպիսկոպոսն միաբանութեամբ ամենայն սրբոյն, և 'ի վերոյ քան զամենեսեան բազմեցուցին զնա:

Եւ իբրեւ բոլորեցաւ ակումբը բաղմահանին, և հաղորդեցան ամենեքեան 'ի կերակուրն զուարթութեամբ, յոսն եկաց սուրբն Յովսէփ, և սկսաւ զուրախութեան նուագն մատուցանել և ասել այսպէս. Ուրախ լերուք ամենեքեան 'ի Քրիստոս. քանզի վաղիւ այս ժամ իցէ, ահա մոռացեալ իցէ մեր զամենայն նեղութիւնս և զչարչարանս զոր կրեցաք: Եւ փոխանակ սակաւ աշխատութեանս մերոյ՝ բաղմասպատիկ հանգիստ ընդունելոց եմք, և փոխանակ խաւարային արգելանի բանդին՝ մտանելոց եմք յերկնից քաղաքն լուսաւոր, որոյ քաղաքի քաղաքապետ ինքն Քրիստոս է, հանդիսապետ՝ յորում ասպարիսի նախ ինքն առաքինեցաւ սուրբ զնշան յաղթութեան: Եւ այսօր նոյն Տէր է, որ յաջողէ մեզ զնոյն նշան ընդունելով 'ի փրկութիւն անձանց մերոց և 'ի պարծանս մեծափառ սուրբ եկեղեցւոյ: Եւ զոր

օրինակ տեսէք դուք զեղբայրս զայս 'ի գլուխ բաղմահանիս մերոյ, սոյնպէս սա նախ ընդունելոց է վաղիւ զպսակն 'ի ձեռն կատարմանն իւրոյ: Զի ահաւասիկ եկն եհաս և մերձեցաւ առ մեզ թշնամին կենաց մերոց և պսակիչ սուրբ չարչարանաց ծառայիցս Քրիստոսի:

Զայս իբրեւ ասաց, լուաւ 'ի նրմանէ բանս պնդութեան, որով յոյժ մխիթարեցան ամենեքեան. ասէ. Ի սուրբ աղօթից ձերոց այդպէս արասցէ ինձ Քրիստոս, և կատարեսցէ զէլս վախճանի իմոյ յաշխարհէս ըստ բանի քում: Եւ ահա ընդ ասելդ քո աղգումն եղեւ հոգւոյս իմոյ և յիշեցի ես զմարդասիրութիւնն Քրիստոսի, որոյ և գալուստ իսկ նորա յաշխարհս վասն մեր մեղացն եղեւ: Քիտացի յիս որպէս և յաւազակն 'ի ժամ խաչին. որպէս նովաւ զգրուես փակեալ գրախափն եբաց, և յառաջեցաւ լինել կարապետ այնոցիկ՝ որ

անգրէնն 'ի նոյն տեղի գառնալոց էին յուրախուժիւն, արասցէ և զիս այսօր Տէր Յիսուս Քրիստոս սպասաւոր ձերում մեծաշուք գընդիդ:

Աւանիկ վասն միոյ մեղաւորի՛ որ գառնայ յապաշխարուժիւն, անվախճան լինի ուրախուժիւն հրեշտակաց յերկինս. որպէս զի գիտեն իսկ զկամս Տեառն իւրեանց: Քանզի վասն միոյ կորուսելոյ ոչ խարին եկն 'ի խնդիր, վասն այնորիկ և նոքա խնդակիցք լինին վասն միոյ գարձելոյ յապաշխարուժիւն: Թերեւս վասն իմ եկեալ էր մեծ զօրավարն Հայոց բազում սուրբ ընկերակցօքն իւրովք. զսպան վասն ձեր բերեալ էր, այլ զուրախուժեան աւետիսն հասարակաց տայր: Եւ առաւել եւս ընդ իս էին զարմացեալ, զի ոչ ճանաչէին զիս 'ի կեանս իւրեանց, ահա 'ի սուրբ մահն իւրեանց՝ կամէին զի և ես մասն ընկալայց ընդ երանելիսն:

Աղաչեմ զձեզ, տեսրք իմ և հարք, աղօթս արարէք 'ի վերայ անարժանուժեանս իմոյ, զի արժանի եղէց մեծի աւետեացն հասանել, որ յանսուտ ձերոց բերանոցդ բարբառեցաւ 'ի լսելիս իմ: Արդ փութամ տեսանել զօրն, և յաւուր անդ զժամս եկեալ հասեալ 'ի վերայ մեր: Եւ էրբ իցէ զի ելլց 'ի թանձրագանդալ ձանձրալի մարմնոյս այսօրիկ, էրբ իցէ զի տեսից զքեզ Տէր Յիսուս, էրբ իցէ զի աներկիւղ եղէց 'ի մահուանէ, էրբ իցէ զի տգիտուժիւնս իմ հասցէ 'ի կատարեալ գիտուժիւն: Սգնեա ինձ, Տէր, օգնեա ինձ, և կարկառեա զամենազօր աչք յօգնականուժիւն. զի խոստման բանիցս իմոյ և գործք արդեամբք կատարեսցին 'ի վերայ մեր. և փառաւոր լինի յիս 'ի մեղաւորս անուն Տեառն մերոյ Յիսուսի Քրիստոսի:

Չայս իբրեւ սասց երանելին, յոտն կացին 'ի բազմականացն անդ,

գոհանային ասելով. Փառք քեզ, Տէր, փառք քեզ թաղաւոր, զի ետուր մեզ կերակուր ուրախու թեան. լցո զմեզ Հոգւովդ սրբով, զի գոցուք առաջի քո հաճոյք և մի ամաչեցեալք, զի դու հատուցանես իւրաքանչիւր ըստ գործս իւր:

Ի նմին ժամու եղեւ խորհուրդ մեծ 'ի մեջ նոցա, թէ զինչ օրինակաւ կարացեն ապրեցուցանել ըզմոգպեան. զի մի լուեալ յարքու նիսն, իբրեւ զհուր բորբոքեսցի բարկու թիւն 'ի վերայ մնացելոցն: Իբրեւ ոչ ինչ կարացին 'ի ժամուն վճարել, միաբանու թեամբ աղօթս արարեալ՝ յԱստուած ապաստան առնէին զկեանս առնն հաւատացեալս:

Իսկ նախարարքն հրաժարեցին 'ի սրբոցն յորդառատ արտասուօք, և սղբալից ուրախութեամբ անկեալ յոտս նոցա աղաչէին մեծաւ սլաղատանօք՝ յանձն առնել զնոսա Հոգւոյն սրբոյ: Զի մի սք 'ի մէնջ, ա-

սեն, թուլացեալ և ելեալ արտաքս 'ի հաւասար միաբանութենէս, կերակուր լիցի չարաբարոյ գազանին:

Իսկ երանելիքն միաբան քաջալերէին զնոսա և ասէին. Զօրացարուք, եղբարք, 'ի Տէր, և մխիթարեցարուք 'ի մարդասիրութիւնն Աստուծոյ, որ ոչ թողու զձեզ որբս և ոչ 'ի բացե առնէ զողորմութիւն իւր 'ի մէնջ հաւատով 'ի Քրիստոս. բազում բարեխօսիւքն՝ զոր ունիմք առ նմա, ոչ շիջանի վառումն կան թեղաց ձերոց, և ոչ ուրախ լինի խաւարասէր թշնամին կենաց ձերոց: Այլ նոյն Տէր է որ զօրացոյց զառաջին նահատակսն՝ խառնելով զնոսա 'ի գունդս հրեշտակաց իւրոց. նոցուն սուրբ ոգիք և ամենայն դասք արդարոց հասցեն ձեզ յօգնականութիւն համբերութեան, զի ընդ նոսին նոցունց պսակացն արժանի լինիլիք:

Զայս խօսէին ընդ նոսա, և զգլշերն ամենայն սաղմոսիւք 'ի գլուխ

տանէին. իսկ 'ի ժամ առաւօտուն
ասէին ամենեքեան. Մագեա, Տէր,
զողորմութիւնս քո՝ ոչք ճանաչեն
զքեզ, զարդարութիւնս քո ոչք ու-
ղիզ են սրտիւք: Մի եկեացէ 'ի վե-
րայ մեր ոտն ամբարտաւանից, և
ձեռք մեղաւորաց մի գողացուցեն
զմեզ. անդ անկցին ամենեքեան, որ
գործեն զանօրէնութիւն. մերժե-
ցան, և այլ մի կարասցեն հաստա-
տել:

Եւ անդէն վաղվաղակի հասին
դահիճքն 'ի դուռն բանդին. մտին
'ի ներքս և տեսին, զի որ յառաջ
մոգպետն էր, և նմա իսկ յանձն ա-
րարեալ էր պահել զնոսա, նստէր
'ի մէջ նոցա և լսէր 'ի նոցանէ, նա
և քաջալերէր եւս զնոսա չերկնչել
'ի մահուանէ: Իբրեւ տեսին զմեծ
սքանչելիան դահիճքն, յոյժ զարմա-
ցան ընդ իրսն, այլ ոչ ինչ իշխէին
հարցանել ցնա. բայց չօքան և
պատմեցին Քենչապհոյ, որում
յանձն արարեալ էր զչարչարանս

սրբոյն: Իսկ նա իբրեւ լուաւ 'ի
դահիճքն արքունի, զահի մեծի հա-
րաւ 'ի միտս իւր, թէ գուցէ և
ինքն անձամբ 'ի ներքս լիցի. քանզի
և ծանօթագոյն եւս էր առնն:
Հրամայեաց հանել 'ի բանդէ անտի
զամենեսեան կապանօքն, և հեռա-
ցուցանէր 'ի քաղաքէ անտի երկո-
տասան պարսիկ հրասախաւ: Եւ 'ի
ծածուկ խօսէր ընդ մոգպետին, ե-
թէ զի՞նչ պատճառք իցեն կապա-
նաց նորա: Ետ պատասխանի այրն
և ասէ ցնա. Մի խօսիր ընդ իս 'ի
ծածուկ, և մի լսեր զխորհուրդս
լուսոյ 'ի մէջ խաւարի. զի բացան
աչք իմ արդ. քանզի տեսի զլոյսն
երկնաւոր: Եթէ կամիս լինել խոր-
հորդակից կենաց, հարց ցիս յան-
դիման, և պատմեմ՝ քեզ զոր տեսի
զմեծամեծան Աստուծոյ:

Եւ իբրեւ լուաւ 'ի նմանէ զամե-
նայն, և ստուգեսց եւս վասն իւ-
րոյ միաբանութեանն, եթէ ոչ
քակտի 'ի սրբոյն հաւանութենէ,

ոչ իշխեաց ձեռն արկանել 'ի նա, թէպէտ և ունէր հրաման յարքունուստ: Այլ փութացաւ, և ինքն երթեալ պատմէր թագաւորին 'ի ծածուկ զամենայն որպէս զխարդ լուաւ 'ի նմանէ:

Ետ պատասխանի թագաւորն և ասէ ց'Իենշապուհ. Մի ոք ամենելին լուիցէ զայդ 'ի քէն, մանաւանդ վասն տեսլեանն մեծի՝ որ երեւեալ է նմա, զի մի ագէտ մարդիկ երկմտեալ՝ բաժանեացին 'ի մեր հաստատուն օրինացս: Մինչ մեք զայլս կամէաք հնազանդեցուցանել թերեւս զողիս դացեն, իբրեւ նոցա ոչ ինչ կարացաք առնել, մեր որ վարդապետ օրինացդ էին, զկնի նոցա մոլորութեանն խոտորեցան:

Նա և այն եւս չար է մեզ քան զամենայն, զի ոչ գուզնաքեայ ոք խոտորեցաւ 'ի նոցա օրէնսն, այլ այր մի համակդեն, երեւելի ընդ ամենայն վերին աշխարհս: Եթէ փայբարիմք ընդ նմա, նա տեղեկագոյն

է քան զամենայն վարդապետս աշխարհիս. դուցէ 'ի հիմանէ խարխարեալ աւերէ զօրէնս մեր: Եւ եթէ դատիմք զնա ընդ այլ չարագործսն, նա և այնպէս հուշակեալ ելանէ համբաւ քրիստոնէութեան նորա, և մեծ անարգանք զկնի դէնիս ձգին: Եւ եթէ սրով եւս վախճանեսցի, բազում են քրիստոնեայք 'ի կարաւանիս, ընդ ամենայն երկիր ցանեալ ցրուեսցեն զոսկերս նորա: Սակաւիկ ինչ էին մեզ անարգանք առ ամենայն մարդիկս, ուր մեծարեալ պատուէին ոսկերքդ նաժարացւոցդ. իսկ եթէ մոգացդ և մոգպետացդ զնոյն պատիւ կրեսցեն, մեք մեզէն լինիցիմք քակտիչք օրինացն մերոց:

Այլ այժմ իմ է քեզ երգումս տուեալ յանմահ դիսն. նախ ըզդառնացեալ ծերն կոչեա առաջիք: Եթէ հաւանեսցի սիրով, և զղջացեալ ապաշաւեսցէ զկախարդութիւն նոցա, մեծարեսցիր զնա

սիրով՝ պատուով ըստ առաջին կարգին, և մի ոք գիտասցէ զԹըշնամանս նորա ամենեւին: Ապա թէ ոչ հաւանեացի, և ոչ կամեսցի անսալ բանից իմոց, յարուսջիր 'ի վերայ նորա բազում ամբաստանս յաշխարհէ անտի, զի վնասակար գոցի յերս արքունի. և աշխարհաւ փութսիշ 'ի վերայ յարուսջիր, և չկօթակ արասջիր յայն կոյս քան զՎոլորան և զՄակուրան. և անդ ընկեցեալ զնա 'ի վիրապ մի, և ընկալցի զմահ թշուառութեան: Եւ զայլագեհնսն փութանակի կարճեա 'ի կենաց աշխարհիս, զի մի գղղղեսցեն զօրէնս մերոյ աշխարհիս: Չի եթէ զճարտար մոգակտն այնպէս արագ աշակերտեցին, տգէտ մարդիկ զիմրդ կարասցեն կալ առաջի նոցա պատիր խաբէութեանն:

Արդ ել նստաւ Դենշապուհ արտաքոյ բանակին յատենի, որպէս ասացաք, հեռի երկոտասան հրասախաւ: Հարցանէր ցմոգպետն և

ասէր. Իշխանութիւն առի վասն քո, ոչ միայն բանիւ հարցանել, այլ և ամենայն հարուածովք տանջանաց: Մինչ չեւ ձեռն արկեալ է իմ 'ի քեզ, ընկալ զմեծարանս և արհամարհեա զանարգանս, և խընայեա 'ի պատուական ալիսդ: Թող անդր 'ի բաց զքրիստոնէութիւնդ՝ զոր ոչ ունէիր 'ի բնէ, և դարձիր անդրէն 'ի մոգութիւնն, որպէս զի վարդապետ էիր բազմաց:

Ետ պատասխանի երանելին և ասէ. Աղաչեմ զքեզ, տէր, որ յառաջ իբրեւ զհարազատ եղբայր համարեալ էիր յաչս իմ, և այսօր թշնամի կատարեալ մի ըստ առաջին սիրոյն գթար դու յիս, այլ կատարեա 'ի վերայ իմ զկամս չարութեան թագաւորին ձերոյ. և որպէս առեր իշխանութիւն 'ի վերայ իմ, դատեա զիս:

Յայնժամ իբրեւ ետես Դենշապուհ, եթէ առ ոչինչ զսպառնալիսն արքունի համարեցաւ, և ոչ ու

ղոքանացն երեսս ինչ արար, և քան
'ի ծածոուկ՝ յայտնի եւս կամէր զի
խօսեսցի, կատարեաց 'ի վերայ նո-
րա ըստ խրատուն արքունի: Եւ
գաղտագողի ընկեցաւ 'ի հեռաւոր
օտարուծիւն, որպէս զխարդ և ու-
սաւ 'ի վարդապետէն, և արար:

Եւ հրամայեաց եւս Ռենշապէոյ
երկուս եւս ընկերակիցս օգնականս
յաւագ գործակալացն, զՋնիկանն՝
որ էր մարդպետ արքունի, և զՄո-
վան հանդերձապետ 'ի ձեռանէ
մովպետան մովպետի:

Արդ երեքեան սոքա իւրաքան-
չիւր սպասաւորօք առին զսուրբան
յայնմ՝ անապատէ, և փոխեցան
նոյնչափ եւս հեռագոյն 'ի միւս եւս
գժնդակ տեղի 'ի նմին գիշերի: Եւ
զոք 'ի կարաւանէն անդր ոչ թողին
տեսանել, ոչ 'ի Հայոց և ոչ յամե-
նայն քրիստոնէից, և ոչ քնաւ յար-
տաքին հեթանոսաց: Եւ սպասա-
ւորքն՝ որ էին 'ի վերայ կապեւոյն
անդէն 'ի քաղաքին, հրամայեցին

պահել զգուշուծեամբ, զի զհետս
նոցա մի ոք գիտասցէ՝ ընդ որ տա-
նիցեն 'ի մահու տեղի, մի նոքա և
մի ամենեւին ոք 'ի մարդկանէ:

Բայց այր մի Խուժիկ անուն 'ի
զօրացն արքունի, որ 'ի ծածոուկ
ունէր զքրիստոնէուծիւնն, և վի-
ճակեալ էր 'ի դասս դահճացն, և
կայր 'ի սպասու օրապահացն հան-
դերձ գործիական տանջանարա-
նօքն, եկն եմուտ 'ի մէջ գիշերին և
խառնեցաւ 'ի դասս նախարարացն:
Առաջին դասն 'ի միջնոյն կարծեր
զնա, և միջինն երրորդին, և երե-
քեանն միմեանց համարէին զնա. և
ոչ ոք 'ի նոցանէ եհարց՝ եթէ դու
ով էս ընդ մեզ, ոչ 'ի տերանցն և
ոչ 'ի սպասաւորացն:

Իբրեւ հասին 'ի տեղի անապա-
տին, որ ամենեւին անբոյս էր 'ի
գալարւոյ, և այնպէս էր ասպառաժ
գժնեայ, զի ոչ նստելոյ անգամ
տեղի գտաւ անդ նոցա, իջին հեռա-
գոյն նախարարքն երեքեան, և հրա-

մայեցին դահճացն իւրեանց կապել զոտս և զձեռս նոցա: Եւ արկին պարանս երկայնս յոտս նոցա, և երկու երկու լծեցան և առին 'ի քարշ: Եւ այնպէս ձգեցին ճողքեցին ընդ ապառաժ տեղիսն քարշելով, զի ամենեւին խայծ ոչ մնաց 'ի մարմինս երանելեացն: Եւ ապա լուծին և ածին 'ի մի տեղի:

Թուէր իմն նոցա այսպէս, եթէ կակղեցաք զխստութիւն նոցա, և հնազանդեցուցաք զբիրտ աստտամբութիւն նոցա. և արգ զինչ և խօսիցիմք, անսայցեն բանից մերոց, և առնիցեն զկամս թագաւորին, և ապրեալ լիցին յանհնարին տանջանացն: Եւ զայն ոչ կարացին քաջ իմանալ, եթէ իբրեւ զքաջ զինուորս վառեցին զնոսա, և 'ի հրահանգս կրթութեան վարժեցին ըզնոսա. և իբրեւ զբազանս վայրենիս, արիւնխանս ուսուցին զնոսա: Եւ եթէ ունէին սակաւ ինչ կասկած յառաջագոյն, հայեցեալ նո-

ցա 'ի չարաչար վէրս մարմոյն իւրեանց, զառաջին երկիւղն 'ի բաց մերժեցին: Սկսան իբրեւ արբեալք անղգայք զմիմեամբք ելանել 'ի բանից պատասխանիս. և փութային իբր ծարաւիք յաղբիւր, եթէ ո'նախ վաղ զիւր արիւնն հեղցէ յերկիր:

Եւ մինչ դեռ յայսմ պատրաստութեան էին սուրբքն, խօսել սկսաւ ընդ նոսա Դենչապուհ և ասէ. Սրբայ յղեաց զիս առ ձեզ. ամենայն աւեր աշխարհին Հայոց, ասէ, և կոտորածք զօրացն՝ որ հասին 'ի վերայ, 'ի ձէնջ եղեն փառքն ամենայն. և բազում նախարարք՝ որ այժմ կան կապանօք չարջարեալ, վասն ձերոյ յամառութեանդ եղեւ այդ ամենայն: Սյլ և արգ եթէ կամիք ինձ լսել, ասեմ ձեզ. որպէս եղերուք պատճառք ամենայն չարչարանաց մահուն, այսօր լերուք պատճառք կենաց ձերոց: Եւ նախարարքն՝ որ կան 'ի կապանս,

'ի ձեռն ձեր է իշխանութիւն արւ
ձակել զնոսա, և աւեր աշխարհին
ձերոյ ձեօք շինի, և բազումք որ
վարեալ են 'ի գերութիւն, անդրէն
դառնան:

Ահա դուք ձերոյին աջօք տե-
սէք այսօր, եթէ զորպիսի այր տոհ-
միկ, զոր թագաւորն ինքնին յակա-
նէ յանուանէ ճանաչէր վասն մեծի
գիտութեան օրինացս մերոց, և
կատարեալ էր յամենայն 'ի դէնիս
և ամենայն մեծամեծաց սիրելի, և
գրէ թէ բոլոր աշխարհս կախեալ
էր զնմանէ. և վասն զի անարգեաց
զգեհիմազգէզն, և պատրեցաւ 'ի
ձեր տիմար գիտութիւնդ, ոչ ինչ
ինայեաց թագաւորն 'ի մեծ պա-
տիւ նորա, այլ իբրեւ զգերի մի
զանաշխարհիկ շիօթակ արարի զնա
յայնչափ օտարութիւն հեռաւոր,
զի ընդ երթալն իսկ ոչ ժամանէ 'ի
տեղի պատուհասին իւրոյ:

Արդ եթէ 'ի բուն դայեկութիւնն
վասն պատուական օրինացն ոչ իւր-

նայեաց 'ի նա, որչափ ևս առաւել
'ի ձեզ յօտարաշխարհիկսդ, որ մա-
հապարտ իսկ էք յիրս արքունի:
Եւ չիք ինչ ձեզ այլ հնար կենաց,
բայց եթէ երկիր պագանիցէք արե-
գական, և կատարիցէք զկամս թա-
գաւորին, որպէս և ուսոյց զմեզ
մեծն Չրագեշան: Եւ եթէ զայդ
առնէք, ոչ միայն արձակիք 'ի կա-
պանացդ և սպրիք 'ի մահուանէ,
այլ և մեծամեծ պարգեւօք յու-
ղարկիք յաշխարհն ձեր:

Յառաջ մատուցեալ Ալեոնդ ե-
րէց և թարգման կացոյց զլահակ
եպիսկոպոս. Չիւրդ լուիցուք, ա-
սէ, երկգիմի հրամանացդ քոց. ա-
հա զերկրպագութիւնդ նախ ե-
տուր արեգական, և զկատարումն
երկրպագութեան 'ի կամս թագա-
ւորին ձգեցեր, մեծարեցեր զարե-
գակն՝ յառաջ ձայնելով զանուն
նորա, և մեծացուցեր զթագաւորն
աւելի քան զարեգակն. և յայտ ա-
րարեր՝ եթէ առանց կամաց իւրոց

սպասաւորէ արեգակնն արարաւ ծոց, իսկ Թագաւորն 'ի կամս ազաւտութեանն իւրոյ՝ զոր կամի աստուածացուցանէ, և զոր կամի ծառայեցուցանէ. և ինքն ճշմարտութեանն վերայ չեւ է հասեալ: Մի խօսիր ընդ մեզ իբրեւ ընդ տղայս, զի հասակաւ կատարեալ եմք, և գիտութեանն ոչ եմք անտեղեակ. ուստի սկսար դու, այտի տաց քեզ պատասխանի:

Ապաքէն զմեզ եգիր պատճառս աւերածոյ աշխարհին մերոյ և հարուածոց զօրացն արքունի. մեր օրէնքն զմեզ այդպէս ոչ ուսուցանեն, այլ յոյժ պատուել հրամայեն զերկրաւոր Թագաւորս, և սիրել զնոսա յամենայն զօրութենէ մերմէ, ոչ իբրեւ զմարդ ոք դուզնաքեայ 'ի մարդկանէ, այլ իբրեւ Աստուծոյ՝ ճշմարիտ կալ 'ի ծառայութեան. և եթէ զրկիմք ինչ 'ի նոցանէ, փոխանակ ընդ երկրաւորիս զերկնիցն խոստացաւ մեզ զարքա-

յութիւն: Եւ ոչ միայն զարքանն կութիւն հպատակութեան պարտիմք հարկանել նոցա, այլ և մահու չափ զանձինս 'ի վերայ գնել սիրոյ Թագաւորին: Եւ որպէս յերկրի ոչ ունիմք իշխանութիւն փոխանակել զնա ընդ այլում տեաւուն, նոյնպէս և յերկինս չունիմք իշխանութիւն փոխանակել զճըմարիտ Աստուածն մեր ընդ այլում, որ չիք Աստուած բայց 'ի նմանէ:

Բայց ասեմ քեզ՝ որում սակաւիկ մի տեղեկագոյն ես: Ո՞վ 'ի քաջ զօրականէն զկնի մտանիցէ 'ի պատերազմ. և եթէ զայս արասցէ, ոչ քաջ անուանի նա, այլ յոյժ վատ: Եւ կամ ո՞ յիմաստուն վաճառականաց զպատուական մարգարիտն փոխանակիցէ ընդ անարգութրուշայի, բայց եթէ յիմարեալ իցէ սգիտութեամբ, որպէս և ձեր մոլորութեան առաջնորդք:

Միայն գտեր զմեզ 'ի բազում առաքինեացն մերոց, և կամիս դո-

ղուծեամբ աւերել զամուրս խորհրդոց մերոց. չեմք մեք միայն՝ որ պէս և գուդ կարծես. չիք տեղի ունայն, ուր չիցէ Քրիստոս թագաւորն մեր. բայց միայն այնոքիկ են թափուր 'ի նմանէ, որ իբրեւ զքեզ և զչարագեւ իշխանն քո, որք ուրացեալ էք 'ի նմանէ: Զի թէ զինուորք աշխարհին մերոյ, որ աշակերտեալքն էին մեօք 'ի Քրիստոս, առ ռոն հարին զահագին հրամանս թագաւորին ձերոյ, և զմեծամեծ պարգեւս առ ոչինչ համարեցան, և զհայրենի տէրութիւնն 'ի բաց կողոպտեցան, չինայեցին 'ի կին և յորդիս և 'ի գանձս մարմնաւորս կենաց աշխարհիս, նա և ոչ զարիւնն իւրեանց ածին ինչ զմտաւ վասն սիրոյն Քրիստոսի, այլ զերկրպագուս արեգականն՝ որ ձեր վարդապետք էին, չարաչար հարուածովք սատակեցին զնոսա, և մեծամեծ չարիս հասուցին 'ի վերայ զօրացն ձերոց, և բազումք 'ի նոցանէ ան-

կանէին 'ի նմին պատերազմի, և այլք մատնեցան 'ի պէսպէս փորձութիւնս, կէսքն ընկեցան 'ի հեռաւոր օտարութիւն, և եւս բազմագոյնք վարեցան 'ի գերութիւն: Եւ ամենքին նոքա յառաջեցին քան զմեզ յարքայութիւնն Աստուծոյ, և խառնեալ են 'ի դուռնդս վերին հրեշտակացն, և ցնծան 'ի պատրաստեալ յուրախութիւնսն, յոր հասեալ խառնեցաւ երանելի այրն, զոր դու ասես շիօթակ արարի: Երանի տամ նմա, և երանի երկրին՝ ընդ որ նայն անցանիցէ, և տեղւոյն՝ ուր նայն վախճանեացի. ոչ միայն զարքունեօք ձերովք անցանէ պատուականութեամբ, այլ և զերկնից լուսաւորօք՝ որում դուքդ երկիր պագանէք:

Ետ պատասխանի Մովսն հանդերձապետ և ասէ ցնոսա. Աստուածքն բարերար են, և երկայնամտութեամբ ջանան ընդ ազգի մարդկան, զի դիտասցեն և ծանի-

ցեն զիւրեանց փոքրկուծիւնն և զնոցա մեծուծիւնն, և վայելեսցեն 'ի պարգեւս աշխարհիս, զոր տուեալ է յիշխանուծիւն 'ի ձեռս թագաւորի, և 'ի բերանոյ նոցա ելանեն հրաման մահու և կենաց: Եւ ձեզ ոչ է իշխանուծիւն այդպէս ընդդիմանալ կամաց նոցա և ոչ առնուլ յանձն զերկրպագուծիւն աւրեգական, որ ճառագայծիւք իւրովք լուսաւորէ զամենայն տիեզերս, և ջերմուծեամբ իւրով հասուցանէ զկերակուր մարդկան և անասնոց, և վասն հասարակաբաշխառատուծեանն և անաչառ մատակարարուծեանն անուանեցաւ՝ իհրաստուած, զի չիք 'ի նմա նենգուծիւն և անխմաստուծիւն: Վասն որոյ և մէք երկայնամիտ լինիմք 'ի վերայ տգիտուծեան ձերոյ. քան զի չեմք մարդատեացք իբրեւ զգազանս շաղղակերս և արիւնարբուս: Խնայեցէք յանձինս ձեր, և միխառնէք զմեզ ակամայ յարիւնդ

ձեր: Թողէք անգր զառաջին յանցանս ձեր, և զառաջիկայ իրս ուղղեցէք, զի և այլոցն վասն ձեր լիցի ողորմուծիւն 'ի մեծ թագաւորէն:

Առ այս ետ պատասխանի Սահակ եպիսկոպոս և ասէ. Իբրեւ ուսեալ և յոյժ խրատեալ՝ զգեղեցիկ հոգ յանձին ունիս շինուծեան աշխարհի և փառաց թագաւորին. բայց զայս կարի տգիտաբար ուսուցանես, զի աստուածս բազումս խոտովանիս, և զմի կամս ոչ ասես ամենեցուն: Եթէ վէհքն առ միմեանս մարտուցեալ են, մէք խոնարհագոյնք քան զնոսս զիւրգ կարացուք հաւանել բանից քոց: Միաբանեա զժուր և զկրակ, զի ուսցուք 'ի նոցանէ զխաղաղուծիւն. կոչեա զարեգակն 'ի տուն որպէս կրակ, և եթէ նմա ոչ մարծի գալ՝ զի մի աշխարհ 'ի խաւարի մնասցէ, յղեա զգա առ նա, զի ուսցի 'ի նմանէ զանկարօտուծիւնն:

Եւ եթէ մի է բնուծիւն աս

տուածոցն քոյ, հաւասարեացեն առ միմեանս զուգութեամբ. լիցի անկերակուր կրակ իբրեւ զարեգակն, և մի խափանեսցին ծառայքն արքունի 'ի ծախս ռոճկաց սորա: Արդ մինգ անյագ ուտէ, և հանապազ մեռանի. և մինն որ չուտէ, առանց օգոյն նուազի լոյս ճառագայթից իւրոյ. ցրտանայ ձմերայնի, և սառուցանէ զամենայն դաւարաբոյսս խոտոցն. տօթանայ յամարայնի, և հրակէզ առնէ զամենայն կենդանիս: Եւ որ ինքն յար 'ի փոփոխման կայ, ոչ կարէ հաստատուն կեանս ումեք շնորհէ: Եւ քեզ ոչ կարեմ մեղադիր լինել. որոյ ոչ տեսեալ է զմեծ թապաւորն, պատուաւորացն մատուցանէ զերկըրպագութիւն. իսկ եթէ ոք զայս 'ի հմուտ գիտնոցն արասցէ, վազ վաղակի մահ 'ի վերայ հրամայեն:

Այլ վասն արեգական, եթէ կամիցիս ուսանել, զճշմարիտն ասացից քեզ: Մասն է նա աշխարհիս ա-

րարածոց, 'ի բազում մասանց մի մասն որոշեալ է. կէսքն 'ի վերոյ են քան զնա, և կէսքն 'ի ներքոյ նորա: Ոչ է նա առանձին սուրբ յստակ լուսով, այլ 'ի ձեռն օգոյն հրամանաւն Աստուծոյ տարածանէ զճառագայթս իւր, և հրային մասամբ ջեռուցանէ զամենայն գոյացեալս 'ի ներքոյ իւրոյ կայանին: Իսկ վերինքն ոչ ինչ մասն ունին 'ի նորա ճառագայթիցն. քանզի իբրեւ յաման ինչ արկեալ է զլոյսն 'ի գունդ նորա, և 'ի վայր կոյս հէզուբերանացեալ՝ առ 'ի պէտս ներքնոցս վայելչութեան: Եւ զոր օրինակ նաւ մի թառուցեալ 'ի վերայ ծովային ջուրցն բաղմութեան, անգիտութեամբ գնայ զուղեւորութիւնն 'ի ձեռն հմուտ և ճարտար նաւապետին, այսպէս և արեգակն 'ի ձեռն կառավարին իւրոյ ունի զփոփոխմունս շրջանին իւրոյ տարեւոր ժամանակին:

Եւ որպէս այլ մասունք աշխար-

հիս հաստատեալ են վասն մեր կե-
նացն, և զնա իբրեւ զմի յայլոց մա-
սանց տուեալ է մեզ յառաջնոր-
դութիւն լուսոյ, որպէս զլուսին և
զաստեղս և զօդս յարածուիս և
զամբս անձրեւաբերս. նոյնպէս և
յերկրիս մասանց զծով և զգետս և
զաղբիւրս և զամենայն պիտանացու-
ջուրս, նոյնպէս և զցամաքայինս
ամենայն պիտոյիւք իւրովք: Աս-
տուած և զմի ոք 'ի սոցանէ չէ ար-
ժան անուանել. և եթէ ժպրհիցի
ոք ասել, զանձն տգիտաբար կորու-
սանէ. և աստուածանունն մեծա-
րելով զնոսս՝ նոքա ոչ ինչ օգտե-
ցան: Միոյ իշխանութեան երկու-
թագաւորք ոչ լինին. և եթէ մարդ
զայդ քեզ յանձն ոչ առնու, քանի՛
եւս հեռի է առ 'ի յԱստուծոյ բը-
նութեանէն այգալիսի կարգ շփո-
թեալ:

Արդ եթէ կամիս ուսանել զճըշ-
մարիան, քաղցրացո զդառնութիւն
սրտիդ, և բաց զաչս մտացդ, և մի

յարթնութեան կուրութեամբ ընդ
խաւար գնայցես. որ անկեալ ես 'ի
խորխորատ, և զամենեսեան կամիս
առ քեզ ձգել: Եւ եթէ քոյքն գան
զինի մոլոր վարդապետութեանդ՝
որ ոչ տեսանեն և ոչ իմանան, մի
և զմեզ կարծեր գոյն օրինակ. քան
զի բաց են աչք մտաց մերոց և սրա-
տեսիլ եմք: Մարմնոյս աչօք զարա-
րածս տեսանեմք, և իմանամք զսա-
յայլէ արարեալ. և ամենեքեան
են ընդ ապականութեամբ: Իսկ ա-
րարիչն ամենեցուն աներեւոյթ է
'ի մարմնաւոր աչաց, այլ մտաց ի-
մանի զօրութիւն նորա:

Եւ վասն զի ետես զմեզ 'ի մեծի
տգիտութեան, և ողորմեցաւ մե-
րում՝ անուսուամութեանն, յու-
րում և մեք իբրեւ զձեզք երբեմն
զերեւելիսս կարծէաք արարիչ և
գործէաք զամենայն անառակու-
թիւնս, վասն այնորիկ առ սէր իւր
եկն մարմնացաւ 'ի մարդկանէ, և
ուսոյց մեզ զաներեւոյթ աստուա-

ծուծիւնն իւր: Այն զի բարձրացոյց զինքն 'ի խաչն կախաղանի, և զի մարդիկ զհետ լուսաւորացոյ մոլորեցան, մերկեաց յարեգականէ զոյս ճառագայթիցն իւրոյ, զի ելիցի խաւար սպասաւոր մարդկուծեան նորա. զի որ իբրեւ զձեզ աւարժանք իցեն, մի տեսցեն զկեանս իւրեանց 'ի մեծի անարգուծեան: Որպէս և այսօր որ ոչ խոստովանի զխաչելեալն Աստուած, նոյն խաւար մածեալ է զողով և մարմնով նորա. որպէս և դու իսկ այսօր 'ի նմին խաւարի կաս, և զմեզ դեռ եւս չարչարես: Պատրաստ եմք ըստ օրինակի Տեառն մերոյ մեռանել, որպէս զիարդ և կամիս կատարեալ կամս գառնուծեան քո:

Յայնժամ իբրեւ հայեցաւ 'ի նոսա անօրէնն Գենշապուհ, և ետես 'ի մեծի ուրախուծեան զուարթալին զամենեսեան, գիտաց եթէ ոչ գնան առ նոսա բանք սպառնալեաց և ողբանաց: Հրամայեաց զմի ոմն

'ի կրսերագունիցն յառաջ մատուցանել, երէց մի Արշէն անուն, վասն որոյ յառաջ կասկածն իսկ եղեւ սրբոյն: Կապեցին զոտան և զձեռան, և մեծաւ ուժով պրկեցին, մինչեւ ճարճատիւն հատաւ ամենայն ջրղացն. և այնպէս կայր մեծ ժամս յանհնարին պրկոցան:

Եբաց սուրբն զբերան իւր և ասէ. Ահա շրջեցան զինեւ շունք բազուկք, և ժողովք չարաց պաշարեցին զիս. ծակեցին զոտս իմ և ըզձեռս իմ, և փոխանակ բերանոյ իմոյ աղաղակեցին ամենայն ոսկերք իմ: Լուր ինձ, Տէր, և լուր ձայնի իմո՛ւմ, և ընկալ զողբի իմ 'ի ժողովս սուրբ զօրականին քո, որ երեւեցաւ նորակերտ դաստակերտին քոյ: Ես որ կրսերս եմ յամենեսեան, ու զօրմուծիւն քո գլծացեալ յառաջեցոյց զիս:

Եւ զայս իբրեւ ասաց, ոչ եւս կարէր բանալ զբերանն յանհնարին պրկոցաց գեւորանին: Եւ անդէն

վաղվաղակի դահիճքն հրաման առեալ յերկից նախարարացն՝ սրով հատանել զպարանոց երանելոյն, և ընկեցին զմարմինն 'ի խորխորաս մի ցամաք:

Եւ անդէն 'ի տեղւոջն սկսաւ խօսել Բենշապուհ ընդ եպիսկոպոսին և ասէ. Յորժամ եկի ես յաշխարհն Հայոց՝ զտարի մի և զվեց ա միս եհաս շրջել ինձ անդ. ոչ յիշեմ ես ամենեւին՝ եթէ բան մի տրտունջ յումեքէ լուայ վասն քո, նոյնպէս և առաւել վասն Յովսէփայ. զի դա իսկ էր իշխան ամենայն քրիստոնէից, և հաւատարիմ յամենայն իրս արքունիւ Նա և որ մարգպան աշխարհին լեալ էր յառաջ քան զիմ երթալն, մեծապէս գոհ էր զառնէս զայսմանէ. և ես ինձէն աջօք իմովք տեսի, զի որպէս հայր հաստատուն համարեալ էր ամենայն աշխարհին, և անաչառութեամբ սիրէր զմեծամեծսն և զփոքունս:

Արդ փոխանակ ընդ ձեր՝ ես ազատեմ զձեզ. ինայեցէք 'ի պատուական անձինս ձեր, և մի մատնիք 'ի մահ չարչարանաց ըստ առաջնոյն կարգի, զոր տեսէք աջօք ձերովք: Քանզի թէ 'ի դոյն միտս յամուութեան կայք, և իմ եղեալ է 'ի մտի իմո՞ւմ բազում չարչարանօք կարճել զձեզ 'ի կենաց ձերոց: Ես գիտեմ, զի 'ի հրապոյրս առնդ այդորիկ ելեալ էք դուք. քանզի ինքն ախտացեալ է մարմնով, և ձեռնարկութեամբ բժշկաց չիք դտեալ առողջութիւն. և հիւանդոս կենօք ձանձրացեալ է, և փափագէ 'ի մահ քան 'ի կեանս:

Առ այս ետ պատասխանի սուրբն Յովսէփ և ասէ. Գովութիւնդ՝ զոր ետուր դու նախ եպիսկոպոսիդ և ապա ինձ, յիրաւի արարեր և ըստ կարգի պատուեցեր վասն ալեացդ, այդպէս իսկ արժան է: Այլ ճմարիտ ծառայից Աստուծոյ ոչ է օրէն Դիմագարձ լինել երկրաւոր իշխա-

նաց, և ոչ զոք 'ի ժողովրդոց տըր-
տունն շ առնել վասն մարմնաւոր զօ-
շաքաղուածեան. այլ ցածուածեամբ
և հեզուածեամբ ուսուցանել զպա-
տուիրանս Աստուծոյ, և առանց
խարդախ իմաստութեան խաղաղա-
սէր լինել առ ամենեսեան, և անա-
չառ վարդապետութեամբ առ մի
Տէրն արարածոց առաջնորդել բու-
լորեցունց:

Բ Այլ վասն առնս այսորիկ հրա-
պուրանաց՝ զոր ասացեր, և զայդ-
ոչ ստեցեր, այլ կարի զճմարիտն
ասացեր: Զի ոչ իբրեւ զօտար ոք
հրապուրէ զմեզ, և ոչ իբրեւ ըզ-
պատրող ոք խաբերայ մոլորեցու-
ցանէ զմեզ, այլ յոյժ սիրէ զմեզ:
Քանզի մի է մայր մեր՝ եկեղեցի՝ որ
երկնեացն զմեզ, և մի է հայր մեր
սուրբ Հոգին՝ որ ծնաւ զմեզ. զիա՞րդ
համահարբ և միոյ մօր որդիք երկ-
պառակք լինիցին, և ոչ միաբանք:
Որ քեզ թուին՝ թէ հրապոյրք ի-
ցեն, մեր 'ի տուէ և 'ի գիշերի դոյն

խորհուրդ էր՝ զի անբակ ունիցիմք
զկենաց միաբանութիւնս: Իսկ եթէ
սա ձանձրացեալ իցէ՝ ելանել յախ-
տալից մարմնոյս, առաւել եւս մեք
ամենեքեան. զի չիք ոք ամենեւին 'ի
ծնունդս կանանց, որ ունիցի զմար-
մինս առանց ցաւոց չարչարանաց:

Ետ պատասխանի 'Իենչապուհ և
ասէ. Զայդ ոչ գիտէք, որչափ եր-
կայնամիտ լինիմ ես 'ի վերայ ձեր-
այս ոչ հրամանաւ արքունի է այս-
չափ երկայնաբան լինել ընդ ձեզ
պայքարաւ, այլ յիմմէ քաղցրու-
թեանէ թողացուցի ձեզ. զի չեմ իբ-
րեւ զձեզ անագորոյն, զի անձանց
ատելի էք և այլոց թշնամիք: Իմ զի
ալ և հաց կերեալ է յաշխարհին
ձերում, գուծ և սէր ունիմ ընդ
աշխարհն ձեր:

Ետ պատասխանի Ղեւոնդ երէց
և ասէ. Որ առ արտաքինսն գուծ
և սէր ունի, զպատուիրանսն Աս-
տուծոյ կատարէ, այլ պարտի և
յիւր ոգիսն խնայել. զի չեմք ան-

ձանց տեարք, այլ է որ համարս խնդրէ 'ի մէնջ և վասն արտաքնոց և վասն ներքնոց: Այլ որ ասացեր՝ յինէն անսամ՝ ձեզ և ոչ հրամանաւ Թադաւորին, եթէ գուք սովոր էք անցանել ըստ հրամանաւ Թադաւորին ձերոյ, զայդ բարեոք առնէք, զի աւերիչ աշխարհի է և սատակիչ անմեղ մարդկան, բարեկամ սատանայի և թշնամի Աստուծոյ: Այլ մեք ոչ կարեմք անյանել զհրամանաւ մերոյ Թադաւորին, և ոչ զանանց կեանսն մեր կարեմք փոխանակել ընդ ապականացու պտրանս աշխարհիս:

Այլ վասն իմ զի ասացեր, չգլտեալ զառողջութիւն 'ի բժշկաց, սիրէ զմահ՝ քան զկեանս, այդ բանք ոչ այնոցիկ են՝ որ տեսանեն զամենայն չարչարանս աշխարհիս: Ազէ ցածո զքեզ սակաւիկ մի 'ի զայրագին սրտմտութենէդ, և եկ զհետ ճմարիտ բանից իմոց, և հայեաց կարգաւ ընդ իրս աշխարհիս: Ո՞ք

'ի մահկանացուացս ունի կեանս անտրտունջս. ո՞չ ահա ամենայն լի են ախտիւք, է որ 'ի ներքոյ, և է որ արտաքոյ. ցուրտ և տօթ, քաղց և ծարաւ և ամենայն աղքատութիւն կարօտութեան: Արտաքոյ՝ անիրաւութիւն, յափշտակութիւն, գէճ՝ պղծութիւն անառակ յարձակմամբ. 'ի ներքոյ՝ ամբարշտութիւն, ուրացութիւն, տգիտութիւն, անդարձ մոլորութիւն 'ի կամաւոր պղատութենէն:

Բայց դու որ զբժիշկս խոտեալ անարգեցեր, թէ չլիք իմ 'ի նոցանէ գտեալ զառողջութիւն, չեն ինչ զարմանք, վասն զի մարդիկ են նոքա. է ցաւ՝ որում գտանեն հնարս առողջութեան, և է՝ որ ապստամբէ 'ի հնարից նոցա. վասն զի ամենեքեան եմք մահկանացուք, այն որ բժշկէն և որ բժշկին: Այլ երանի թէ և գուք ըստ բժշկական արուեստին բերէիք զնմանութիւն. զի ոչ փոքր է ճմարտութիւն նոցա

բժշկուածեանն: Քանզի յորժամ տեսանեն նոքա զոք հիւանդացեալ, ոչ յապաղեն երթալ առ նոսա, այլ փութացեալ հնարին մատուցանել զառողջութիւն: Մանաւանդ եթէ յարքունիս մի ոք 'ի սիրելեաց թափաւորին ախտանայցէ, և հասեալ 'ի մեծ հրապարակն՝ տեսանիցէ ըզբաղմութիւն պատուաւորացն և զառողջութիւն գեղեցիկ երիտասարդացն, և եւս 'ի ներքս մատուցեալ 'ի սրահնն արքունի, և անդ տեսանիցէ զամենայն սպասաւորացն զչքնաղ և զսքանչելի տեսիլն, ոչ ինչ զարմանայ ընդ հրաշակերտ տեսիլն: Նա և եթէ գահոյք ականակապք իցեն և համակ ոսկեղէնք՝ յորոց վերայ հիւանդն անկեալ դընիցի, չէ ինչ նմա փոյթ զայնմ ամենայնէ: Այլ 'ի բաց հրամայէ առնուլ զոսկէհուռ վերարկուսն, և ձեռն 'ի ներքս տարեալ՝ զննէ զամենայն մարմինն, եթէ ջերմ իցէ բնութիւնն, և եթէ սիրտն 'ի տե-

լուջն հանդարտ կայցէ, և կամ թէ լեարդն կակոճու իցէ, և կամ թէ շարժք երակացն յարմար իցեն. և ըստ նմին զգարման բժշկութեանն առնիցէ՝ շնորհելով նմա զառողջութիւն:

Իսկ արդ եթէ մարդկային բժշկութիւնն այսպիսի գիտէ քամահել զամենայնիւ, և միայն զիւր արուեստն յառաջ մատուցեալ՝ ըզգործն կատարէ, որչափ եւս առաւել ձեզ արժան էր, որ զբոլոր աշխարհս ունիք յիշխանութեան մեծի, հոգ յանձին տանել՝ նախ զհոգիսդ բժշկել յամենայն ախտալից մոլորութեանց աշխարհիս, և մարմնովք իսկ կային ամենեքեան ձեզ 'ի ծառայութեան: Արդ այժմ զի դուք սգիտացարուք, և զանմահ հոգիսդ մահկանացու արարէք յանշէջ հուր գեհենին, մարմնովք՝ եթէ կամիք և եթէ ոչ կամիք՝ ախտացեալ էք յախտաւորութիւն անառողջութեան. և զմեզ նախատէք

մարմնոյ ցաւովք, որ ոչ 'ի կամն մերոյ ազատութեան է, այլ որպէս դիպեցաւ 'ի բնութեանս մարմնոյ իւրաքանչիւր մարդոյ:

Եւ Քրիստոս ճշմարիտ Աստուած կենդանի և կենդանարար՝ 'ի կամն իւրոյ բարերարութեան եղեւ բըժիշկ հոգւոյ և մարմնոյ, և նա ինքն 'ի ցաւս չարչարանաց իւրոյ բժրչկեաց զամենայն ազգս մարդկան: Եւ եւս խանդաղատագոյն գթացեալ, վերստին ծննդեամբն ծնեալ զմեզ յառողջութիւն՝ անցաւ և անվերս, և 'ի ծածուկ հարուածոյ զհին ծակոտուածսն վիշապին ողջացոյց. և արար զմեզ անսպիս և անարատս հոգւով և մարմնով, զի իցեմք բանականից հրեշտակաց և զօրք երկնաւոր թագաւորին մերոյ: Եւ քո զայս ոչ գիտացեալ, և ոչ վայելեալ յերկնաւոր պարգեւն Աստուծոյ, և ոչ եւս այլ կամիս ուսանել 'ի մէնջ. այլ և զմեզ եւս վրիպեցուցանել կամիս, որում չիք

հնար, և մի այլ լիցի, և ոչ կարես իսկ առնել:

Այլ վասն իմոյ ախտալից մարմնոյս ասացից քեզ կարճառօտս: Խնդամ՝ և ուրախ եմ՝ յորժամ տեսանեմ զմարմինս իմ՝ չարչարեալ. գիտեմ, զի զօրանայ յիս առողջութիւն հոգւոյս իմոյ: Մանաւանդ զի ունիմ ինձ գրաւական ըզմեծ վարդապետն հեթանոսաց, որ 'ի ցաւս մարմնոյ անձինն մխիթարէր, և 'ի կոփումն սատանայական մարմնոյ պարծէր, և ասէր. Զի եթէ անկակիցք եղաք նմանութեան մահու նորա, որչափ եւս առաւել լիցուք հաղորդք յարութեան նորա: Այլ գու որ ունիս իշխանութիւն 'ի վերայ մեր, դատես զմեզ ըստ չարութեան կամաց քոց: Զեմք ինչ զանգիտեւոց յահագին յահաւոր սպառնալեացդ քոց, և ոչ երկիւղած 'ի դառն մահուանէն՝ զոր ամեւոց ես 'ի վերայ մեր:

Յայնժամ՝ մեկուսացոյց սակա-

ւիկ մի զերանելիսն 'ի միմեանց, և միայն ասէ ցտուրբ եպիսկոպոսն. Գո՛վուծիւն, զոր ետու քեզ յառաջ, ոչ իմացար պատիւ անձինքոյ: Յիշեցուցանեմ քեզ զչարիսն, զոր գործեցեր դու, զի անձամբ զանձն քո արասցես մահապարտ: Սիրդարեւ դո՛ւ աւերեցեր զատրուշանն յՈւշտունիս, և կամ զկրակն դո՛ւ սպաներ. նա և որպէս լուայ և ստուգեցի, թէ և զմոգսն դու չարչարեցեր, և սպաս պաշտամանն դու տարար. արդ եթէ արդարեւ դու առեր, պատմեա ինձ:

Ետ պատասխանի սուրբն և ասէ. Արդ կամիս ուսանել զայդ յինէն, եթէ յառաջագոյն գիտէիր: Դենչապուհ ասէ. Սյլ է համբաւ, և այլ է ճշմարտութիւն: Եպիսկոպոսն ասէ. Որպէս կարծեսդ ասա ինձ: Դենչապուհ ասէ. Իմ լուեալ էր, եթէ զամենայն վնասն յՈրշտունիս դու արարեր: Եպիսկոպոսն ասէ. Եւ զի այդպէս հաւաս-

տեաւ 'ի վերայ հասեր, կրկին զի՛ հարցանես: Դենչապուհ ասէ. Ձճըմարիտն 'ի քէն կամիմ ուսանել: Եպիսկոպոսն ասէ. Ոչ զօգուտ կենաց քոց կամիս ուսանել յինէն, այլ արեան իմոյ ցանկան միտք քոյ: Դենչապուհ ասէ. Ձեմ գազան արինախանձ, այլ վրէժ ինդիր եմ աստուածոցն անարգուծեան:

Եպիսկոպոսն ասէ. Չտարերս համերս աստուածս անուանես, և զպատկերակիցս քո մարդիկ խողխողել կամիս. տալոց հատուցանելոց ես վրէժ թագաւորաւն քով յանկաշառ ատենին Ստուծոյ: Եւ զոր քո չար կամքդ կամիս լսել յինէն, զայդ ես ասեմ քեզ: Չտունն արդարեւ ես աւերեցի, և զմոգսն ես չարչարեցի գանիւ, և զկահս պղղծութեան՝ որ 'ի տանն էր՝ 'ի ծովն ես ընկեցի: Սյլ զկրակ ո՛վ կարէ սպանանել. քանզի ամէնիմաստ արարին տրարածոց հոգ ինամոյ տարեալ յառաջագոյն՝ անմահս

Հաստատեաց զբնուածիւն չորից նիւ-
թոցն: Աղէ սպան դու զօդ եթէ
կարես, և կամ ապականեա զհող՝
զի մի բուսուսցէ զդաւարի, փողո-
տեա զգետ՝ զի մեռցի: Եթէ զայդ
երեսին կարես առնել, ապա և զկը-
րակ կարես սպանանել:

Ապա եթէ ճարտարապետն մեր
միաբանեաց զչորից տարերայդ զան-
բակուածիւն, ահա և գտանի բնու-
ածիւն հրոյ՝ի քարինս և յերկածս
և յամենայն տարերս զննելիս, ըն-
դէր ստուածեամբ զրպարտես զիս,
թէ դու զկրակ սպաներ: Աղէ դու
սպան զՋերմուածիւն արեգական,
զի ունի նա մասն հրոյ. և կամ
տուր հրաման, զի մի թափեացի
հուր յերկածոյ: Մեռանի այն՝ որ
չնչէն և շարժի և գնայ և ուտէ և
լմպէ. երբ տեսեր դու զկրակ գը-
նայուն կամ խօսուն կամ գիտուն:
Արդ զոր կենդանի քո չէ տեսեալ,
մեռեալ խոստովանիս: Քանի ան-
թողի է ամբարշտուածիւնդ ձեր

բան զամենայն Հեթանոսաց, որ
գիտնագոյնք են բան զձեզ. որ թէ
պէտ և՛ի ճշմարտն Աստուծոյ մո-
լորեալ են, զանխօս տարերս Աս-
տուած ոչ խոստովանին: Արդ եթէ
դու անգիտուածեամբ կորնչելի ա-
սես զբնուածիւն հրոյ, ոչ առնուն
քեզ յանձն արարածքս. քանզի
խառն է դա յամենեցունց:

Դենշապուհ ասէ. Ոչ ինչ մտա-
նեմ ես ընդ քեզ՝ի պայքար քննու-
ածեան վասն բնուածեան արարա-
ծոցս. այլ խոստովանեա ինձ, եթէ
գո՞ւ անցուցեր զկրակն, եթէ ոչ:

Պատասխանի ետ երանելին և ա-
սէ. Որովհետեւ ոչ կամեցար լինել
աշակերտ ճշմարտուածեանն, ասա-
ցից զկամս հօրն քոյ սատանայի:
Ես ինձէն մտի՛ի կրակատունն ձեր,
և տեսի՛ զի կային պաշտօնեայք ամ-
բարշտուածեանն սնտաի կարծեացն
ձերոց, և կրակարանն լի հրով ա-
ռաջի նոցա բորբոքեալ այրէր:
Հարցի ցնոսա բանիւք և ոչ գանիւ,

Թէ զի՞նչ համարիք 'ի միտս ձեր զկրակ պաշտամանս այսորիկ: Ետուն պատասխանի և ասեն. Մէք ինչ ոչ գիտեմք. բայց այսչափ ինչ իմանամք, զի սովորութիւն է նախնեացն և հրաման բուռն Թագաւորին:

Ասեմ գարձեալ ցնոսա. Եւ զբընութիւն կրակիդ զի՞նչ իմանայք. արարի՞չ կարծէք, Թէ արարած: Ասեն միաբան ամենեքեան. Արարիչ մեք զգա ոչ գիտեմք, նա և ոչ հանգուցիչ աշխատելոց: Չեւք մեր փապարեալ են 'ի կացնի, և ողունք մեր տեւեալ են 'ի փայտակրի, աչք մեր գիջացեալ են արտասուօք 'ի կծուութենէ ծխոյ դորա, և երեսք մեր մրոտեալ են 'ի խոնաւութեան Թանձրութենէ նորին ծխոյ: Եթէ շատ մատուցանեմք նմա զկերակուն, յոյժ քաղցնու. և եթէ բնաւ չտամք, ամենեւին անցանէ. և եթէ մօտ երթամք և երկիր պագանեմք, կիզու զմեզ. և եթէ ոչ

երթամք մօտ ամենեւին, մոխիր լինի: Մեր այդպէս հասեալ է 'ի վերայ բնութեան դորա:

Ասեմ գարձեալ ցնոսա. Իսկ լուսեալ է ձեր, եթէ ոյր ուսուցեալ է ձեզ զայդպիսի մոլորութիւն: Ետուն պատասխանի և ասեն. Չի 'ի լսելոյ հարցանես զմեզ, այլ հայեաց ընդ առաջիկայ իրսդ. զի օրէնքս գիրքն մեր ոգւովք մտաց միայն կուրացեալ են. այլ Թագաւորն մեր մարմնով միով ակամբն կոյր է, այլ ոգւոյն բնաւ չիք իսկ աչք:

Վասն այնորիկ և ես իբրեւ լուսայ զայս 'ի մոգացն, յոյժ ողորմեցայ. զի տգիտութեամբ զարգարն խօսեցան. Սակաւիկ մի չարչարեցի ըզնոսա գանիւ, և նոցուն իսկ ետու զկրակն 'ի ջուրն ընկեանու, և ասացի այսպէս. Աստուածք, որ զերկինս և զերկիր ոչ արարին, կորեցեն 'ի ներքոյ երկնից. և ապա ըզմոգսն 'ի բաց արձակեցի:

Չայս ամենայն իբրեւ լուսաւ

Դենշապուհն 'ի բերանոյ սուրբ եւ պիսկոպոսին, անհնարին զահի հարաւ 'ի Թշնամանաց Թագաւորին և յանտրգանաց դէնին: Վասն որոյ և երկեալ իսկ մատուցանել զնա 'ի տանջանս հարուածոց, Թէ գուցէ այլ եւս մեծ անարգանս զԹագաւորէն տացէ ասել յատենին, և 'ի նա ձգիցին կարծիք Թշնամանացն. զի երկայնմտուԹեամբ պայքարեցաւ ընդ նոսա:

Եւ քանզի սուսեր ընդ մէջ ածեալ նստէր յատենի ահարկանելով սրբոցն, գոչեաց իբրեւ առիւծ զայրագին, և հանեալ զսուսերն գազանաբար յարձակեցաւ 'ի վերայ երանելեացն. և եհար եպիսկոպոսին զաջ ուսն Թիկամբն հետ, և զձեռն 'ի վայր ընկէց: Եւ նորա յահեակ կողմն յերկիր անկեալ, և դարձեալ անդրէն պատասպարէր, առնոյր զաջ ձեռն 'ի վեր. աղաղակեաց մեծածայն և ասէ. Ընկալ, Տէր, զկամաւոր պատարագս՝ որ

ինձէն զիս քեզ մատուցի բոլորովին, և խառնեա զիս 'ի գունդս սուրբ զինուորացն քոց:

Դարձեալ քաջալերէր զընկերակիցան իւր և ասէր. Հնապ առաքինիք, եհաս ժամ կատարման մերոյ. խցէք զաչս մարմնոյ վայր մի, և այժմ տեսանէք զոյսն մեր Քրիստոս: Եւ Թաւալելով ընդ արիւնն անձին իւրոյ ասէր. Օրհնեցից ըզՏէր յամենայն ժամ, հանապաղ օրհնուԹիւն նորա 'ի բերան իմ: Ի Տէր պարծեսցի անձն իմ, լուիցեն հեզք և ուրախ եղիցին: Եւ ասելով զսաղմոսս զայս կաթարէր մինչեւ ցայս տեղի. Բազում նեղուԹիւնք են արգարոց, յամենայնէ փրկէ զնոսա Տէր, և պահէ զամենայն ոսկերս նոցա:

Եւ մինչ դեռ կայր յուժի մարմնոյն սակաւիկ մի, իւրովք աջօք իսկ հայեցեալ տեսանէր յերկնից եկեալ գունդս բազում հրեշտակաց և վեց պսակ 'ի ձեռին հրեշ-

տակապետին: Գարձեալ և ըէր
եւս բարբառ 'ի վերուստ, որ ա-
սէր. Քաջալերեցարուք, սիրելիք
իմ. զի ահա մոռացայք զվշտալի
կեանսդ, և հասէք երանելի սրա-
կացդ, որ ձերով ճարտարու-
թեամբդ կազմեցէք. առէք դիք
յիւրաքանչիւր գլուխ: Զի նիւթ
պատրաստական 'ի ձէնջ հիւթե-
ցաւ, իսկ ճճմարտութիւն գործոյդ
յամենասուրբ ձեռացն Քրիստոսի
կազմեցաւ. զոր 'ի սպասուորաց
այտի իսկ ընկալեալ՝ ընդ Ստեփա-
նոսի լինիք պսակակից: Նա և զայն
եւս քաջապէս տեսանէր, զի դեռ
եւս շողայր սուրն 'ի վերայ պարա-
նոցի երանելեայն:

Զոր իբրեւ ետես սուրբն Ղե-
ւոնդ, եթէ ոչ եւս զմի մի կամին
հարցանել և դատել, այլ միանգա-
մայն հրաման եղեւ մահու, ասէ
ցերանելին Յովսէփ. Մատիւր. յա-
ռաջեա ընդդէմ սրոյն, զի դու աս-
տիճանաւ 'ի վեր ես քան զամենե-

սեան: Եւ զայս իբրեւ ասաց, կար-
գեցան կացին մի ըստ միողէ. առ
ձեպ տագնապի ստիպելոյ դահ-
ձացն՝ միանգամայն հատին ընկեցին
զպարանոցս երանելեացն առաջի
սուրբ եպիսկոպոսին. և նորա ընդ
հանել ոգւոցն աղաղակեաց և ասէ.
Տէր Յիսուս, ընկալ զոգիս մեր ա-
մենեցուն, և խառնեա զմեզ 'ի
գունդս սիրելեացն քոց: Եւ միան-
գամայն կատարեցան ամենեքեան 'ի
նմին տեղւոջ:

Եւ եթէ զմոգպեան եւս, որ հա-
ւատաց 'ի Քրիստոս, կամիցիս ընդ
նոսա 'ի համար արկանել, թուով
են եօթն. թող զերկուսն եւս որ 'ի
Վատգետսն կատարեցան, և միւս
եպիսկոպոսն Թաթիկ անուն յասու-
րեսաանի: Բայց անգէն 'ի տեղւոջն
վեցեքին, որոց անուանքն են այսու-
քիկ. Սահակ եպիսկոպոս յՈրը-
տունեաց, սուրբն Յովսէփ 'ի Վայոյ
ձորոյ՝ 'ի գեղջէ Հողոցմանց, Ղե-
ւոնդ երէց 'ի Վանանդայ՝ 'ի գեղջէ

իջաւանից, Մուշէ երէց յԱղբակոյ,
Արշէն երէց 'ի Բագրեւանդայ, 'ի
գեղջէ յԵղեգեկայ, Քաջաջ սար-
կաւազ՝ ուստի եպիսկոպոսն էր
յՌրջտունեաց: Իսկ երանելի մոգ-
պետն 'ի Նիւշապուհ հաղաքէ,
Սամուէլ՝ երէց յԱյրարատոյ՝ 'ի
գեղջէ յԱրածոյ, Աբրահամ սար-
կաւազ 'ի նմին գեղջէ:

Արդ զվեց զայս սուրբս յանա-
պատին՝ ուր կատարեցին, Գենշա-
պուհ և մոգպետն և Ջնիկանն և
մայպետն անդէն 'ի տեղւոջն պա-
հապանս ընտրեցին յիւրաքանչիւր
սպասաւորացն, և պահել հրամա-
յեցին զմարմինս երանելեացն ցա-
ւուրս տանն կամ եւս աւելի, մին-
չեւ կարաւանն արքունի անցեալ
գնասցէ. զի մի այլադէնքն եկեալ
բառնայցեն զոսկերս գոցա, և բաշ-
խեալ սփռեսցեն ընդ աշխարհս ա-
մենայն, յոր և մարգիկ եւս առա-
ւել յորդորեալ մոլորիցին զկնի
նաժարացւոց աղանդին:

Իսկ Խուժիկն, զոր յառաջագոյն
ասացաք, զինու հանդերձ մնայր
անդէն ընդ պահապաննն որպէս
զմի 'ի նոցանէ, այր լի իմաստու-
թեամբ, և կատարեալ աստուա-
ծային գիտութեամբ, սպասէր և
դէտ ահն ունէր՝ եթէ որով օրինա-
կաւ հնարս գտցէ զոսկերս սրբոցն
գողանալ 'ի նոցանէ:

Եւ իբրեւ աւուրք երեք անցին 'ի
վերայ, արհաւիրք մեծ անկանէին
'ի վերայ ամենեցուն, և իբրեւ
թմբրեալ և կիսամեռք անյարիրք
անկեալ գնէին զերիս աւուրսն:
Իսկ 'ի չորրորդումն աւուրն եր-
կուք 'ի պահապանացն չարաչար
լլկեցան 'ի դիւէ: Գարձեալ հասա-
րակ գիշերաւ չափ՝ ձայնք ահեղք
հնչէին, և թնդիւնք և որոտաձայնք
'ի ներքուստ՝ որպէս գլրդումն
գետնաշարժի. երկիրն գողայր 'ի
ներքոյ նոցա, և շողիւնք սուսերաց
փայլատակունս արձակէին շուրջ
զնոքօք: Եւ զամենեսեան զգիա-

կունսն կանգնեալ տեսանէին, և զնոյն բանս ատենին ահագինս բարբառէին 'ի լսելիս նոցա. մինչեւ խուճապել նոցա ընդ միմեանս, դեռ եւս զիրեարս սատակէին: Եւ այսպէս տագնապեալք և ցնորեալք մինչեւ այր զընկեր 'ի փախուստ չգիտէր ընդ որ երթայր: Եւ եկեալ պատմէին մեծաւ զարմացմամբ զամենայն անցս չարչարանացն, զոր կրեցին:

Ի խորհուրդ մտին նախարարքն երեքեան, և սկսան զարմանալով աւել ցմիմեանս. Չինչ գործեսցուք, զինչ արասցուք վասն անքնին աղանդոյն քրիստոնէից. քանզի մինչ դեռ կենդանի էին, զարմանալի էր կեանք նոցա, ընչատեսացք էին իբրեւ զանկարօտս, սրբասէրք էին իբրեւ զանմարմինս, անաչառք էին իբրեւ զարգարագատս, աներկիւղք էին իբրեւ զանմահս: Եթէ զայս ամենայն ասեմք իբրեւ զողիտաց և իբրեւ ըզլսանդգնեւոց, իսկ զայն զի առնի-

ցեմք, զի ցաւոտք ամենայն 'ի կարաւանի աստ նոքօք առողջանան: Եւ կամ որ մեծս է քան զայդ ամենայն, ոյր ուրուք դի կանգնեալ երեւեցաւ 'ի կենդանեաց կամ բարբառ բանից որ լուաւ 'ի նմանէ:

Չի սուտ չեն մեր սպասաւորքն. մեր մեզէն իսկ հասեալ է 'ի վերայ ստուգութեան սոցա: Եւ եթէ կամեցեալ էր սոցա մարմնաւոր ինչ ազահուծիւն 'ի ներքս խառնել, սակաւ մի ակնարկէին քրիստոնէից 'ի կարաւանիս, զկշիւ իւրաքանչիւր մարմնոց նոցա ոսկի առնուին: Վարձեալ և արքդ, որ 'ի դիւէ չարչարեցան, զի յայնժամ ցաւոտք չէին' և մէք գիտեմք. յայտ է եթէ այսօր նշանն մեծ երեւեցաւ: Եթէ լուսլինիմք, այսպէս մեզ և անձանց մերոց կասկած իսկ է. և եթէ տանիմք զգոսս առաջի թագաւորին, լսելով նորա 'ի դոցանէ զայդ ամենայն մեծամեծ սքանչելիս, գուցէ և օրինացս մերոց քակտուին ինչ հասանիցէ:

Ետ պատասխանի մոգպետն և ասէ ցնոսա. Ո՞չ զիս ոստիկան արարին 'ի վերայ ձեր երկոցունցդ. զի՞ այդչափ նեղեալ տագնապիք յանձինս ձեր. դուք զգործ ձեր կատարեցէք, և հրամանն արքունի 'ի գլուխ տարայք: Արդ եթէ համբաւդ այդ յայտնեցին, և հարցափորձինչ լինեցին առաջի արքային, այդինդիր մեր մոգաց է. դուք անհոգ լերուք, և մի ինչ ածէք զմտաւ: Եւ եթէ զարհուրեցայք ինչ յոգիս ձեր, վաղագոյն առաւօտուցն 'ի դարիթիրէ եկայք. զի վաղիւ անդ մովպետան մովպետ ռատ յազէ, և նոյն հաճեալ հաւանեցուցե ըզմիտս ձեր:

Իսկ Խուժիկն իբրեւ լուաւ զայս ամենայն, և գիտաց՝ եթէ փոյթ ինչ ոչ է նոցա յայնմ՛հետէ սուրբ սպանելոցն, փութացաւ վաղվաղակի էառ տասն այր, որոց զչափ գիտէր զքրիստոնէութեանն, և հասեալ 'ի տեղին՝ շէն եգիտ զամենեսեան: Եւ

քանզի կասկած ունէր տակաւին 'ի նոցուն 'ի դահճացն, դարձեալ փոխեցին անտի զսուրբսն յայլ տեղի բացագոյն իբրեւ երկու հրասախօք: Եւ իբրեւ յանհոգս եղէն, սրբեցին կազմեցին զոսկերս երանելեացն. բերին 'ի բանակն և ունէին 'ի ծածուկ. և առ սակաւ սակաւ յայտնեցին նախ զօրականին Հայոց, և ապա բաղում՝ քրիստոնէիցն՝ որ էին 'ի կարաւանին: Եւ զառաջին պտուղ ընծային մատուցանէին կապեալ նախարարացն. և անդէն վաղվաղակի արձակեցան նոքա 'ի կապանաց իւրեանց, և սպառնալիք մահուանն անցին զնոքօք. և հրովարտակք թողուլթեան առաքեցան յաշխարհն Հայոց:

Արդ այս երանելի Խուժիկս, որ արժանի եղեւ 'ի ծածուկ սպասաւոր լինել սրբոցն, որ ինչ 'ի մահուանէն և այսր ասացաւ դատակնիք վճուիս այսորիկ, սա երկրորդեայ մեզ զամենայն կարգաւ. ըզ-

չարաչար քարշուժն, և զհարց և ըզ-
 փորձ դատաւորացն, և զիւրաքան-
 չիւր անձանց սրբոցն զպատասխա-
 նիսն, և զկատարումն մահուան նո-
 ցա, և զհազաբին արհաւիրսն՝ որ 'ի
 վերայ պահպանացն անկաւ, և
 զհեծեծումն քննութեան նախարա-
 րացն երեցունց, և զամփոփումն
 սուրբ ոսկերաց նոցա. ոչ խառն 'ի
 խուռն 'ի մի վայր ժողովելոյ, այլ
 զմի մի 'ի նոցանէ ուրոյն ուրոյն 'ի
 վեց տապանս ժողովէր. և զա-
 նուանս իւրաքանչիւր ուսեալ և 'ի
 վերայ տապանացն նշանակեալ էր:
 Եւ զկապանսն երկաթիս ընդ իւ-
 րաքանչիւր ոսկերան եդեալ էր,
 քանզի դահձացն 'ի բաց ընկեցեալ
 էր. որպէս և զհանդերձս զիւրա-
 քանչիւր տապանի նշանակեալ էր:

Եւ կատարեցան սոքա վեցեքեան
 սուրբ և ցանկալի մահուամբն իւ-
 րեանց որ օր քսան և հինգ էր հրո-
 տից ամսոյ, 'ի մեծ անապատին յԱ-
 պար աշխարհի 'ի սահմանս Նիւշա-
 պուհ քաղաքի:

ԴԱՐՁԵԱԼ ՎԱՍՆ ԽՈՍՏՈՎԱՆՈՂ

ԱՇՏԱԳԵՐՏԱՅ ՆՈՅՈՒՆՑ

Իսկ աշակերտք երանելեացն 'ի
 կապանս կային 'ի ներքս 'ի քաղա-
 քին. եկն դահձապետ մի արքունի
 և եհան զնոսա 'ի քաղաքէ անտի
 արտաքս:

Եհան 'ի նմին քաղաքէ ասորես-
 տանեայս քրիստոնեայս արս հինգ,
 քանզի և նոքա 'ի կապանս էին վասն
 անուանն Քրիստոսի. եհարց ցնոսա
 բանիւք, և ոչ հաւանեցան երկիր
 պագանեւ արեգական: Չարչարեաց
 զնոսա գանիւ, և նոքա եւս առա-
 լեւ 'ի նոյն միտս պնդեցան. կրտ-
 րեաց զնոցա ունչս և զականջս, և
 ետ տանել յասորեստան, զի կայ-
 ցեն 'ի մշակութեան արքունի: Եր-
 թային մեծաւ յօժարութեամբ,
 իբրեւ այն՝ թէ մեծ պարգեւս գը-
 տեալ 'ի թագաւորէն:

Արդ եկն դարձեալ նոյն դահձա-

պետն առ աշակերտս սուրբ սպանելոցն, ընտրեաց երկուս 'ի նոցանէ որ համեստագոյնքն էին, առեալ մեկուսի յայլոցն և ասէ ցնոսա. Չինչ անուանք են ձեր: Ետ պատասխանի մինն և ասէ. Առ 'ի ծնողաց ինձ Խորէն, և դմա Աբրահամ. Իսկ ըստ շնորհատուր կարգիս՝ ծառայք Քրիստոսի եմք, և աշակերտք երանելեացն՝ զոր սպանէք:

Ետ պատասխանի դաճապետն և ասէ ցնոսա. Իսկ արդ զինչ գործ է ձեր, և կամ բնաւ ոյր իսկ ամեալ է զձեզ այսր: Առ այս ետ պատասխանի Աբրահամ և ասէ ցնոսա. Չայդ ձեզ 'ի վարդապետաց մերոց արժան էր ուսանել. զի ոչ դուզնաքեայք որ էին նորա, այլ ունէին ստացուածս հայրենիս ըստ արժանի բաւականին, ըստ նմին և սպասաւորս, էր որ իբրեւ զմեզ, և էր որ լաւագոյն քան զմեզ. որոց սնուցեալ և ուսուցեալն էր, ընդ նոսա եմք եկեալ: Քանզի և պատուէր

իսկ ունիմք յաստուածատուր օրինացն մերոց՝ սիրել զնոսա իբրեւ զսուրբ ծնողս, և սպաս տանել նոցա իբրեւ հոգեւոր անեանց:

Յասեաւ դաճապետն և ասէ. Իբրեւ զանխրատ և զաներկիւղ ստամբակս խօսիս: Մինչդեռ 'ի խաղաղութեան և յաշխարհի էիք, բարիոք էր. յորժամ գրուահ էղէն նորա յիրս արքունի և մահապարտ գտան ըստ գործոց իւրեանց, ձեզ չէր արժան ամենեւին մօտ երթալ առ նոսա: Ոչ տեսանէք 'ի մեծ կարաւանիս, յորժամ որ 'ի պատուաւորացն 'ի դիւպահւոջն արքունի լինիցի, սգոյ հանդերձ ագանի, և զատեալ և որոչեալ 'ի բացէ նստի միայնիկ, և ամենեւին հուպ ոչ որ իշխէ երթալ առ նոսա: Եւ դու այդպէս իբրեւ զանյանցի աշակերտ պարծելով խօսիս:

Առ այս ետ պատասխանի Խորէն և ասէ. Ոչ ձեր կարգդ անխրաւ է և ոչ մերս ստուածամբ. նախա-

րարն յանցաւոր՝ ուստի զպարգեւն
գտեալ էր, այնպէս պարտ էր նմա
հպատակ լինել, զի 'ի պատուոյն
վերայ և այլ եւս պարգեւս մեծա-
մեծս գտանէր 'ի նմանէ: Արդ փո-
խանակ զի զայն ոչ արար, ձախողա-
կի յետս ընդգէմքն պատահեաց նը-
մա: Եւ մեր վարդապետքն եթէ առ
Աստուած յանցուցեալ էին, և կամ
առ Թագաւորն մեղուցեալ ինչ
էին, նոյն օրինակ և մեք առ նոսա
առնէաք. ոչ յաշխարհի մօտ եր-
թայաք, և ոչ 'ի տար աշխարհ այսր
զհետ նոցա դայաք: Արդ քանզի առ
երկոսին կողմանսն արդարու թեամբ
կեցեալ են, և դուք զուր տարա-
պարտուց սպանէք զնոսա, մեք արդ
եւս առաւել սպասաւորեմք սուրբ
ոսկերաց նոցա:

Ասէ ցնոսա դահճապետն. Ես
յառաջագոյն իսկ ասացի, եթէ կա-
րի ստամբակ ոմն ես դու. ահա
յայտ եղև աւագիկ, եթէ յամե-
նայն վնաս նոցա խառն էք դուք:

Աբրահամ ասէ. Յո՞ր վնաս: Իսհ-
ճապետն ասէ. Առաջին 'ի մահ մո-
գուցն, ապա և յայլսն ամենայն:
Աբրահամ ասէ. Այդ ոչ միայն 'ի
մէնջ է, այլ ըստ կարգի և ձերոց
օրինացդ. Թագաւորք ձեզ տան
հրաման, և դուք 'ի ձեռն ձերոց
սպասաւորացդ գործէք:

Դահճապետն ասէ. Ի Սիհր աս-
տուած երդուեալ իմ, խստագոյն
եւս խօսիս քան զվարդապետսն քո.
յայտ է եթէ վնասակարագոյնք
եւս էք դուք: Արդ ոչ է հնար ձեզ
սպրեւ 'ի մահուանէ, բայց եթէ
երկիր պագանիցէք արեգական, և
կատարիցէք զկամս օրինաց մերոց:

Խորէն ասէ. Յայժմ իբրեւ զմարդ
չարախօսէիր, և արդ իբրեւ զըռն
անպիտան ընդ վայր հաջես: Եթէ
դոյր արեգական ականջք, դու տա-
յիր նմա Թշնամանս զնել արդ նա
բնու թեամբ անզգայ է, և դու չա-
րու թեամբ անզգայագոյն քան զնա:
Յիմ տեսեր զմեզ պակասագոյն

քան զհարսն մեր. մի բանիւք զփորձ առնուլ կամիս զմեր, այլ հանդէս արա քու՛մ չարուԹեանդ և մերում բարուԹեանս, և ամաչեցեալ գտա նի հայրն քո սատանայ, ոչ միայն 'ի մէնջ՝ որ կատարեւագոյնքս եմք, այլ և որ կարի փոքրիկն Թոււի քեզ, նա դիցէ վերս սաստիկս յոգիս և մարմինս քո:

Չայս իբրեւ լուաւ գահճապեան, սրտմտեալ բարկացաւ 'ի վերայ նոցա: Ետ քարչել չարագոյն քան զառաջինսն, և այնչափ սաստիկ քարչեցին, մինչեւ բազմաց կարծիք եղեն՝ Թէ մեռան: Իսկ իբրեւ ժամք երեք 'ի վերայ անցին, դարձեալ խօսել սկսան երկոքեանն և ասեն. Փոքր համարիմք զանարգանս զայս և առ ոչինչ զցաւս մարմնոյս առ մեծ սէրն Աստուծոյ, որով կատարեցան հարքն մեր հոգեւորք: Հապա, մի դար և մի դարեր, այլ զոր ինչ առ նոսայն արարեր, զնոյն և սու մեզ կատարեա: Եթէ չարա-

գոյն Թոււին քեզ գործք նոցա, կըրկին և զմերս համարեսջիր. զի նոքա բանիւք հրամայեին, և մեք գործովք զարդենան կատարէաք:

Յայնժամ եւս առաւել զայրագնեցաւ 'ի վերայ նոցա, և հրամայեաց զմահու գան հարկանել: Եւ առ մի մի 'ի նոցանէ փոխեցաւ վեց վեց այր 'ի գահճացն: Եւ մինչ դեռ կիսամեք յերկիր անկեալ գնէին, հրամայեաց զերկոցունց ահանջսն մօտ կարել: Եւ այնպէս բրեցին, որպէս Թէ չիցէ լեալ 'ի տեղւոջն:

ՉարԹեան որպէս 'ի քնոյ 'ի սաստիկ հարուածոցն, սկսան ազաչելով պազաասան մատուցանել, և ասեն. Այլաչմք զքեզ, քաջ զինուոր Թագաւորին, կամ կատարեա զմեզ իբրեւ զհարսն մեր մահուամք, և կամ արա զպատուհասոգ ըստ օրինակի վերջնոցս: Ձի ահա լսելիք մեր առողջացան զանախաաւորուԹիւն երկնաւոր, իսկ հոտոակիքս գեռ եւս աստէն 'ի տեղւոջ կան

յանցս չարչարանաց. մի կիսապարգեւ առներ զմեզ յերկնից բարու-թենէն: Սրբեցեր զմարմինս մեր քարչելով և զլսելիս մեր կտրելով, սրբեա և զառնգունս մեր հատանելով. քանզի որչափ տգեղս առնես զմեզ երկրաւորաւս, գեղեցկագոյնս առնես զմեզ երկնաւորաւն:

Ետ պատասխանի հեղութեամբ դահճապետն և ասէ. Եթէ և այլ յամեմ ես առ ձեզ մօտ կալով, կարծեմ՝ եթէ և աշակերտէք զիս 'ի ձեր յամառութիւնդ: Զի ահա արդ և զխորհուրդս արքունի 'ի վեր հանեմ ձեզ: Յայդ վայր եղեւ հրաման պատուհասիդ ձերոյ, և 'ի վերայ դորին պատուհասի՝ երթալ ձեզ յասորեստան, և լինել ձեզ մշակ յարքունիս. զի որ ընդ ձեզ հայեսցի, մի 'ի դմին յամառութեան պնդեսցի ընդդէմ հրամանաց թագաւորին:

Ասէն ցնա երանելիքն, Դու զմեր երկիրս կիսագործ թողեր, մեք

յարքունի երկիրն կէս մարմնովք մերովք ոչ վաստակեմք: Իբրեւ զայս լուաւ դահճապետն, աղաչեաց զգլինուորսն՝ որ տանէին զնոսա, և ասէ. Միայն աստի դուք առեք գնացէք, և հասեալ յասորեստան՝ ուր կամ իւրեանց է և շրջեսցին:

Այս են Հայոց խոստովանողք, որ զխեղութիւնն և զչարչարանն խնդութեամբ ընկալան յանձինս իւրեանց: Եւ վասն զի վրիպեցին 'ի սուրբ մահուանէն, սգով և տըրտմութեամբ երթային զերկայնութիւն ճանապարհին: Ոչ ծանր թուէին նոցա կապանք ոտիցն և ձեռացն, իբրեւ զայն՝ թէ ընդէր ոչ եղաք արժանի հաւասարել ընդ քաջ նահատակն:

Եւ իբրեւ տարան հասուցին ըզնոսա յերկիրն բաբելոնացոց, 'ի գաւառ մի զոր Շահուըն անուանեն, թէպէտ և էին յարքունի պատուհասին, սակայն և յայտ և գաղտ

մեծապէս ընկալեալ եղեն 'ի բնակչաց աշխարհին: Սակայն երանելիքն և յայնմ յոյժ տրամագին էին, իբր այն՝ եթէ սակաւ վաստակեցաք և մեծապէս հանգչիմք. և հանապաղ 'ի նմին զըման կային:

Եւ անգէն թեւակոխէին տեսանել զսուրբ կապանան նախարարացն, լինել սպասաւոր մարմնաւոր պիտոյից նոցա: Իմա ուցին զայս մեծամեծաց աշխարհին, որք էին 'ի նմին սուրբ ուխտի քրիստոնէի ութեանն: Եւ հաւանեալ ամենեցուն մեծամեծաց և փոքունց՝ ազգ առնել ամենայն երկրին, զի հաճոյ թուեսցի ամենեցուն՝ 'ի ձեռն մարմնաւոր պիտոյիցն կցորդ լինել սուրբ կապելոցն 'ի հետաւոր օտարութեանն:

Եւ այսպէս ամ յամէ ժողովէին ըստ իւրաքանչիւր կարի մարդկանն, ոմն սակաւ և ոմն շատ, ոյր զինչ և 'ի ձեռս պատրաստութիւն լինէր, եթէ դրամոց և եթէ դա՛հեկանաց,

ժողովէին կազմէին տային յերանելիսն՝ տանել նոցա: Եւ այսպէս յարբանեկութեան կային, մինչեւ տասն ամի լցաւ սպասաւորութեանն:

Եւ վասն զի յոյժ խտաբոյնս պահէին 'ի ջերմոջ աշխարհին, և անդադար էին 'ի ճանապարհորդութեանն ընդ նոյն Շահուղ, ընդ Մեշոյն և ընդ Քաշկար և ընդ ամենայն ասորեստան և խուժաստան, սաստիկ տապով հարեալ 'ի խորշակ մեռանէր սուրբն Խորէն, և աւանդեալ լինէր 'ի բնակչաց աշխարհին ընդ սուրբ Վկայան:

Իսկ երանելին Աբրահամ կայր 'ի նմին առաքինութեան անդադար. և զամենայն տուրս հաւատացելոցն չըջէր ժողովէր և տանէր 'ի մեծ հեռաստանն, և ինքն մատակարարէր ըստ իւրաքանչիւր կարօտութեան: Եւ այնպէս յերկարեցաւ մինչեւ յերկոտասաներորդ ամիս պատժաւորացն, մինչեւ աղաչել զնա միա-

բան ամենեցուն, զի հաւանեացի երթալ յաշխարհն Հայոց. զի ընդ մտանել նորա առ նոսա 'ի նմա տեսցեն և զքաջ նահատական՝ որք կատարեցան սրով, 'ի նմա տեսցեն և զսուրբ կապանս չարչարանացն:

Եւ յորժամ մարտիրոսք և խոստովանողք և կապեալք նովաւ տեսանին, նովաւ օրհնի աշխարհն ամենայն, նովաւ օրհնին և տղայք նոցա յաճումն, նովաւ զգաստանան երիտասարդք նոցա 'ի սրբութիւն, նովաւ համեստանան ծերք նոցա յիմաստութիւն: Նովաւ ուսանին իշխանքն նոցա զմարդասիրութիւն, նովաւ անկանի գութ յԱստուծոյ 'ի սիրտս թագաւորին՝ շինել և խաղաղութիւն առնել բոլոր աշխարհին: Նովաւ եկեղեցիքն պարծին իբրեւ քաջ և կատարեալ զինուորաւ, նովաւ վկայարանքն զարդարին նովաւ և վկայքն ցնծացեալ բերկրին: Նովաւ և դաշտն Աւարայրի պայծառացեալ ծաղկալից

լինի, ոչ յանձրեւաբեր ամսոց, այլ 'ի սուրբ և յարիւնաբուլս վրկայից ցանեալ և ցրուեալք սպիտակութիւնք սուրբ ոսկերացն: Յորժամ կոխեսցեն ամենավաստակոսք խոստովանողին զլայնատարած տեղիս պատերազմին, յորժամ կենդանի մարտիրոս ընդ նա շրջեսցի, կենդանի առ կենդանիս երթեալ ամենայն աշխարհին կրկին լինի կենդանութիւնն:

Գիտեմք, ասեն, յորժամ տեսցեն զսա ամենայն միայնակեացք աշխարհին Հայոց, սովաւ յիշեսցեն զհոգեւոր գունդս պատերազմողացն, որ փոխանակ մեր, ասեն, ետուն զանձինս 'ի մահ, և հեղին զարիւնս իւրեանց 'ի հաշտութիւն պատարագ Աստուծոյ: Սովաւ յիշին սուրբ քահանայքն, որք խողխողեցան յօտարութեանս և ցածուցին զսրամտութիւն բարկութեան թագաւորին: Սովաւ թերեւս զի և զմեր կապանս յիշեսցեն,

և աղօթօս աւանելով խնդրեսցեն յԱստուծոյ, զի գերեզարձ լիցի մեր անդրէն 'ի հայրենի երկիրն մեր:

Քանզի յոյժ անձկացեալ եմք՝ ոչ միայն ըստ մարմնոյ կարօտու թեան, այլ առաւել տեսանել ըզստերք եկեղեցիսն մեր և զսրբասէր պաշտօնեայսն մեր, զոր 'ի նմա կարգեալ հաստատեցաք: Եւ եթէ միւս սովս յաշողեսցէ մեզ Աստուած երթալ և ընուլ զկարօտութիւն մնացելոցն, գիտեմք զի և մեզ բանայ Աստուած զգուռն ողորմութեան իւրոյ՝ ընդ նոյն ճանապարհ երթալ, ընդ որ ոտք սրբոյս կարապետեն:

Չայս խորհուրդ խորհելով աստուածաշնորհ նախարարացն, մեծաւ թախանձանօք ածէին զխոստովանողն 'ի հաւանութիւն: Եւ վասն զի ոչ էր սովորութիւն երբեք բարւոյն ընդդէմ դառնալ, ըստ առաջին սովորութեան և յայսմ վայ-

րի փութացաւ վազվազակի կատարել զհրամանն զմիաբան հաւանեցելոցն յաստուածային առաքելութիւնն: Ակն եմուտ յաշխարհն Հայոց:

Փութացան և ելին ընդ առաջ նորա վազվազակի արք և կանայք, մեծամեծք և փոքուկք, և ամենայն բազմութիւն ազատաց և շինականաց: Անկանէին առաջի, փարէին զտիւք և զձեռօք սրբոյն, և ասէին. Օրհնեալ Տէր Աստուած 'ի բարձունս, որ առաքեաց մեզ հրեշտակ յերկնից՝ բերել մեզ աւետիս յարութեան, զի լինիցիմք ժառանգք արքայութեան: Զի ահա 'ի քեզ կերպարանեալ տեսանեմք զամենեսեան զհրաժարեալն յուսով յարութեամբ, և զկանդեալն անկալութեամբ արձակելով: Ի քեզ ասանեմք և զաշխարհին շինութիւն խաղաղութեան. քեւ եկեղեցիքն մեր ցնծացեալ բերկրին, և քեւ սուրբ վկայքն մեր անդադար լիցին

մեզ 'ի բարեխօսութիւնս առ Աստուած: Օրհնեա զմեզ, սուրբ հայր մեր. դու ես բերան հանգուցելոցն, խօսեաց ընդ մեզ յայտնի օրհնութեամբ, զի յոգիս մեր լուսիցուք 'ի ծածուկ զօրհնութիւնս սրբոցն:

Հորդեցեր ճանապարհ այնոցիկ՝ որ անձկացեալ էին գալ յերկիր իւրեանց, խնդրեա յԱստուծոյ՝ զի ստէպ եկեացեն զհետ սուրբ կարապետիդ: Եւ որպէս հորդեցեր զարգելեալ ճանապարհ երկրի, բաց և յերկինս զդուռն աղօթից մերոց. զի և մեր մեղաւորաց մտցեն պաղատանք առաջի Աստուծոյ 'ի բարեխօսութիւնս նոցին կապելոց. և մինչ դեռ եմք յեւանելի մարմինս, որպէս տեսաք զքո զերանելի սրբութիւնդ, տեսցուք և զսիրելի անձկալիսն մեր, որ 'ի բազում ժամանակաց հարեալ և պաշարեալ եմք յոգիս և մարմինս մեր: Արդ հաւատամք յանսուտ յոյսն, զի որպէս լցեալ կատարեցաւ 'ի քեզ տե-

սիլս 'ի սուրբ սէր քո, այսպէս և ընդ մօտոյ ունիմք տեսանել զճշմարիտ վկայսն Քրիստոսի որ հանապաղ խանդակաթ եմք 'ի տեսիլս երկնաւոր գեղոյ նոցա:

Բայց երանելի խոստովանողն, թէպէտ և այսպէս սիրով ընկալեալ եղեւ յամենայն աշխարհէն, ոչ ինչ կամեցաւ ամենեւին մերձեցնալ առ դք ըստ մարմնոյ կարօտութեան. այլ ընտրեաց իւր տեղի մի զատ յամենայն բազմամբոխ ժողովրդոց, և առաքինի եղբարքք երկեք կատարեաց զկեանս իւր մեծաւ ճգնութեամբ:

Չոր եթէ կամիցի ոք 'ի կարգ արկանել, դժուարաւ կարացէ ասել զվարս առաքինութեան նորա: Չի եթէ զտքնութիւնն ասիցես, իբրեւ զկանթեղ անշէջ կայր զամենայն գիշերս. և եթէ զսակաւապիտոութիւն կերակրոցն, համարեաց՝ եթէ զանկերակուր հրեշտակացն բերէր զնմանութիւն: Եթէ զհեղու-

Թիւն ցածու թեանն կամիցիս ասել,
ոչ զոք 'ի կենդանեաց կարիցես գը-
տանել նման նմա. և եթէ զանըն-
չասիրու թիւնն կամիցիս ասել, դաբ
ձեալ զոր օրինակ չպատրի մեռեալ
'ի կարասի, զիոյն օրինակ ճշմար-
տութեամբ և առ երանելին իմաս-
ջիր:

Անյագական ձայնիւ հանապա-
զորդեալ էր 'ի պաշաւման, և ան-
հապ ազօթիւք միշա ընդ Աստուծոյ
'ի բարձգեալս խօսէր: Այլ եղէւ նա
անհամեւոյ, և խթան ընդօրոտեցիչ
ամենայն հեղգացելոց: Գորովեցաւ
նովաւ ագահութիւն, և կարի յոյժ
ամաչեաց նովաւ շուայտութիւն որ-
կորամեղաւթեան: Առողջութիւն ե-
ղէւ նա աշխարհիս Հայոց, և բա-
զում վերաւարբ 'ի ծայծուկ նովաւ
գաին զառողջութիւն: Եղեւ նա
վարգասեա կատարեալ վարգապե-
տաց իւրոց, և սուրբ հայր խրատ-
տաւ հաբանց իւրոց: Ի լուր համ-
բաւոյ նորա իմաստնացան սգեաք:

և 'ի աեսիլ մերձաւորութեան նա-
րա զգաստացան լիախբ: Բնակեալ
էր ըստ մարմնոյ 'ի նեղ խցկանն, և
աս սրբութեան նորա անկեալ էր
զհեռաւորօք և զմերձաւորօք: Զար-
հուրեցան դեւք և փախեան 'ի նմա-
նէ, իջին հրեշտակք և բանակեալ
էին զնովաւ:

Յոյնք երանի ետուն վասն նորա
աշխարհիս Հայոց, և բազում բար-
բարոսք փութացան տեսանել զնա
մարմնով: Սիրելի եղեւ նա սիրե-
լեացն Աստուծոյ, և զբազումս 'ի
թշնամեաց ճշմարտութեանն ած 'ի
հաւանութիւն սուրբ սիրոյ: Սկիզ-
բն արար առաքինութեան անգըս-
տին 'ի տղայ տիոց իւրոց, և նովին
առաքինութեամբ կատարեցաւ 'ի
վախճան կենաց իւրոց: Որպէս ոչ
խառնեցաւ 'ի կարգս սուրբ ամուս-
նութեան աշխարհիս, այսպէս չե-
մուտ ընդ մարմնաւոր պիտոյիւք
ամենայն ապականացու իրաց աշ-
խարհիս: Եւ եթէ պարտ է պար-

զարար ասել, որպէս փոխանակեաց
զպէտս մարմնոյ ընդ պիտանացու
հոգեւոր իրաց, այսպէս փոխա-
դրեալ եղև յերկրէ՛ի յերկինս:

ՄՆՈՒՄՆԻՅ ՆԱԽԱՐԱՐԱՅՆ, ՈՐԻՔ ԿԱՄՕՐԻ

ՅՕԺԱՐՈՒԹԵԱՄԲ ՎԱՍՆ ՍԻՐՈՅՆ

ՔՐԻՍՏՈՍԻ ԵՏՈՒՆ ԶՆՁԻՆՍ

Ի ԿԱՊԱՆՍ ԱՐԲՈՒՆԻ

Յողգէն Սիւնեաց երկու եղբայրք
Բաբգէն և Բահուր. յողգէն Արծ-
րունեաց Ներշապուհ և Շաւասպ
և Շնգին և Մէհրուժան և Պարգեւ
և Տաճատ. յողգէն Մամիկոնէից
Համաղասպեան և Համաղասպ և
Արտաւազդ և Մուշեղ. յողգէն
Կամսարականաց Արշաւիր և Թա-
թուլ, Վարձ, Ներսէհ և Աշոտ.
յողգէն Ամատունեաց Վահան և
Առանձար և Առնակ. յողգէն Գը-
նունեաց Ատով. յողգէն Դիմաքսե-
նից Թաթուլ և Սատոյ, երկու եւս
այլովք ընկերօք. յողգէն Անձաւա-
ցեաց Շմաւոն և Զուարէն և Առա-
ւան, յողգէն Առաւելենից Փա-

պակ և Վարադզէն և Դաղ. յԱրծ-
րունեաց տոհմէն Սպրսամ. 'ի տոհ-
մէն Մանդակունեաց Սահակ և
Փարսման. յաղզէն Տաշրացեաց
Վրէն. յՌափսոնեան տանէն Բա-
բել և Յուխնան:

Այս երեսուն և հինգ արք, են
որ յաւագ նախարարացն, և են որ
'ի կրտերագունիցն, սակայն ամենե-
քեան ըստ մարմնոյ են նախարարա-
զունք, իսկ ըստ հոգեւոր առաքել-
նութեանն ամենեքեան երկնային
քաղաքացիք: Եւ բազում եւս այլ
ազատ մարդիկ, են որ յարքունի
տանէ, և են որ 'ի տանէ նախա-
րարացն իսկ նոցուն, նիզակակիցք և
մարտակիցք քաջ նահատակացն:
Եւ ամենեքին սոքա կամօք մատնե-
ցան 'ի սուրբ կապանս չարչարա-
նացն:

Այլ մեք առ այժմ ոչ ընդ այս
եմք զարմացեալ միայն, զի կամօք
չոգան մտին 'ի փորձութիւնն, այլ
առաւել ընդ այն եմք սքանչացեալ,

զի մարդիկ փափուկ իբրեւ զնոսա՝
ընդարձակասուն բնակիչք ձիւնե-
ղէն լերանց՝ եղեն բնակիչք խորշա-
կաբեր դաշտաց: Որ զօրէն ազատ
էրէոյ շրջէին 'ի մէջ ծաղկաբեր լե-
րանց, ընկեցան 'ի բոցակէզ աշ-
խարհն արեւելից կապեալ ոտիւք
և կապեալ ձեռօք: Հաց նեղու-
թեան և ջուր կարօտանաց, խաւար-
արգել 'ի տուէ և անլոյս 'ի գիշե-
րի, անվերարկուք և անանկողինք,
գազանաբար գետնախշտիք լինէին
զինն ամ և զվեց ամիս: Եւ այնպէս
մեծաւ խնդութեամբ տանէին զնե-
ղութիւնն, զի ամենեւին ոչ ոք
տրտունջ հայհոյութեան 'ի բերա-
նոյ նոցա լուաւ. այլ յորդառատ
գոհացողութիւն ըստ նմանութեան
բարեկեցիկ մարդկան, որ են յաս-
տուածպաշտութեան:

Եւ մինչ դեռ էին յայնպիսի նե-
ղութեան, կարծիք եղեն 'ի միտս
թագաւորին՝ թէ առ յոյժ վշտին
ձանձրացեալ են դառնութեան կե-

նօքն իւրեանց: Յղեաց առ նոսա զմեծ հազարապետն և ասէ. Ինչ նեայ յայսմ հետէ զգաստացոյցք յանձինս ձեր, և մի կայք 'ի նոյն յամառութեան. Բարեք երկիր արեգական, և արձակիք 'ի չարաչար կապանացոյ, և ունիք անդրէն զիւրաքանչիւր հայրենի կեանս ձեր:

Ետուն պատասխանի երանելիքն և ասեն. Առ փորձ ինչ եկեալ հարցանես ցմեզ, եթէ արգարեւ թագաւորն իսկ յղեաց զքեզ: Երգուաւ հազարապետն և ասէ. Չիք այդր բան աւելի կամ պակաս՝ որ ոչ 'ի բերանոյ նորա ելեալ է: Ասեն ցնա անդրէն. Որք միանգամ աշակերտեալ են ճմարտութեանն, ոչ երբեք փոխին 'ի նմանէ. այլ որ ենն՝ նոյն կան: Միթէ յայնժամ առ չիմանալ ինչ սնդեցաք, և այսօր նեղութիւնս իմաստանցոյց ինչ զմեզ. այլ ոչ այնպէս: Այլ զըջումն մտաց մերոյ այս է, եթէ ընդէր ընդ առաջինսն չկատարեցաք ըզ-

կեանս մեր: Բայց արգ աղաչեմք զքեզ և քեւ զթագաւորն ձեր, մի այլ վասն այդպիսի իրաց հարցանէք ցմեզ. այլ զինչ եղեալ է 'ի մտի ձերում՝ վասն մեր՝ կատարեցէք:

Իբրեւ լուաւ զայս մեծ հազարապետն, յոյժ գովեաց 'ի միտս իւր զպնդութիւն հաստատութեան նոցա. և յայնմ հետէ սկսաւ արկանել սէր ընդ նոսա՝ իբրեւ ընդ սիրելիս Աստուծոյ: Եւ բազում բանիւր ողորանօք ածէր զթագաւորն 'ի հաւանութիւն, զի թողութիւն արասցէ նորա 'ի կապանացն իւրեանց: Զի թէպէտ և փոխեցաւ նա 'ի գործոյ հազարապետութեանն արքունի, և 'ի բազում իրս գտաւ փնասակար, ինքն իսկ յանձն իւր կրթէր զաւեր աշխարհին Հայոց, վասն որոյ և մեծաւ անարդանօք յուղարկեցաւ 'ի տուն իւր, սակայն զկապեւոյցն ոչ երբեք չարախօս կամէր լինել մինչեւ ցօր վախճանի կենաց իւրոց:

Իսկ յերանելեացն բազումք, 'ի նոցանէ՝ որ մանկագոյնքն էին, ուսան զգարուծիւն հայրենի աշխարհին իւրեանց, և եղեւ նոցա այն կերակուր հոգեւոր, որով զանձինս քաջալերէին և զընկերան մխիթարէին: Եւ այնպէս զմայլեցան 'ի միտս և յոգիս իւրեանց, զի և որ ծերագոյնքն էին 'ի նոցանէ, փափկացան մատաղացան մանկացան: Զի թէպէտ և գարուծեան ժամանակքն անցեսլ էին, սակայն բազում սաղմոսս 'ի բերան առեալ՝ հոգեւոր երգակից լինէին մատաղերամ բազմուծեան մանկուողն:

Եւ այնպէս բարձրացուցանէին զպաշտօնն սրբուծեան, մինչեւ ումանք 'ի դառն զահճացն, մեծապէս քաղցրուծիւն անկանէր ընդ լսելիս նոցա, և որչափ 'ի ձեռս իւրեանց էր՝ արտաքոյ արքունի հրամանին գիւրուծիւն առնէին նոցա, և սէր խնամոյ ունէին առ ամենեսեան, և բազում անգամ զմար-

մնաւոր պէտս նոցա ընուին նոքա: Մանաւանդ զի նշանք եւս բժշկուծեան յԱստուծոյ յաջողեալ լինէր 'ի ձեռս նոցա, որպէս զի բազումք 'ի դիւահարաց սրբեցան 'ի նմին քաղաքի ուր կապեալքն կային: Իբրեւ ոչ ոք գոյր առ նոսա քահանայ, գիմէին առ նոսա հիւանդք և ախտաժեռք քաղաքին, և ընդունէին 'ի նոցանէ զիւրաքանչիւր ցաւոց զաւողջուծիւն:

Նա և որ մեծ իշխանն էր աշխարհին, զոր և Հարեւշլոմ Շապուհ անուանէին, և նմա իսկ յանձն էին ամենայն սրտաւորքն, մեծապէս գուծ սիրոյ էարկ առ ամենեսեան: Զծերս 'ի նոցանէ առ հարս ունէր, և զմանկագոյնս 'ի նոցանէ իբրեւ զսիրելի որդիս գգուէր: Բազում անգամ գրեաց և եցոյց յարքունիս զվիշտս նեղուծեան կապելոցն, և զառն առն իւրաքանչիւր զբարս աղնուականուծեանն ցուցանէր նուցա. առաջի մեծամեծացն տառա-

պէր, ջանայր ազգի ազգի հնարիւք,
մինչեւ բազում բարեխօսիւք ածին
'ի հաւան զԹագաւորն: Հրամա-
յեաց լուծանել զկապանս նոցա, և
բաննալ 'ի նոցանէ զսուգ պատու-
հասին, և ադանել նոցա հանդերձ՝
զօրէն նախարարութեանն. կար-
գեաց նոցա ռոճիկ, և զպարաս-
տութիւն սպառազինութեանն հը-
րամայեաց յարբունուստ: Գրեաց
և յանձն արար մեծ սպարապետին,
զի ընդ զօրս արբունի երթիցեն 'ի
գործ պատերազմի:

Եւ իբրեւ այս այսպէս կարգե-
ցաւ, և կազմեցաւ նոր հրաման
Թագաւորին, 'ի բազում տեղիս՝
ուր և հասին՝ առաւելեալ գտան 'ի
գործ արութեան, մինչեւ գովու-
թեան հրովարտակ վասն նոցա 'ի
գունն տային: Որպէս զի քաղցրա-
ցաւ խի մտաց Թագաւորին, հրա-
մայեաց զամենեքեան ածել զառա-
ջեաւ: Եկին և յանդիման եղեն
Յազկերտի արքայից արքային: Ե-

տես զնոսա զուարթութեամբ, խօ-
սեցաւ ընդ նոսա բանիւք խաղա-
ղութեամբ, և խոստացաւ տալ նո-
ցա զիւրաքանչիւր իշխանութիւն
ըստ կարգի հայրենի պատուոցն, և
արձակել զնոսա յաշխարհն օրինօք
քրիստոնէութեանն, յորոյ վերայ
և մեծապէս էին չարչարեալ:

Եւ մինչ գեռ անդէն մեծաւ խըն-
դութեամբ շրջէին 'ի կարաւանին
պռաջի Թագաւորին, 'ի նմին ժա-
մանակի հասանէր վախճան կենաց
Թագաւորին՝ յինն և 'ի տասներորդ
ամի Թագաւորութեանն իւրոյ: Եւ
ընդ հակառակս ելեալ երկու որդիք
նորա՝ 'ի վերայ տէրութեանն կը-
ռուէին. սաստկանայր գործ դառ-
նութեան պատերազմին զերկուպ
ամս:

Եւ մինչ գեռ նոքա յայնմ խու-
վութեան էին, ապստամբեաց և
Աղուանից արքայն, վասն զի քեռ-
որդի էր նոցա, և ըստ կարգի
հայրենի հաւատոցն՝ քրիստոնէայ

էր յառաջ, և Յազկերտ արքայից արքայ բռնի մոգ արար: Եւ նորա գտեալ ժամանակ անձինն պարապոյ, հարկեցաւ զանձն 'ի մահ դռնել. լաւ համարեցաւ մեռանել 'ի պատերազմի, քան ուրացութեամբ ունել զԹագաւորութիւնն: Վասն այսր ամենայնի յապաղումն եղեւ չարձակելոյն նոցա յաշխարհն:

Իսկ կրտսեր որդւոյն Յազկերտի դայեակն, Ռահամ անուն 'ի Մեհրան տոհմէն, Թէպէտ և ետես ըզգունդն Արեաց ընդ երկուս բաժանեալ, սակայն կիսովն գազանաբար յարձակեցաւ 'ի վերայ երէց որդւոյ Թագաւորին, հար սատակեաց զգունդն, և ձերբակալ արարեալ զորդի Թագաւորին, անդէն 'ի տեղւոյն հրամայէր սպանանել: Եւ ըզմնացեալ զօրսն ածէր հաւանեցուցանէր և առնէր միաբանութիւն ամենայն Արեաց գնդին. և Թագաւորեցուցանէր զիւր սանն, որում անուն էր Պերոզ:

Զի Թէպէտ և Արեաց աշխարհին առնէր մեծապէս խաղաղութիւն, սակայն Աղուանից արքայն ոչ կամէր նուաճել անդրէն 'ի ծառայութիւն. այլ խրամատեաց ըզպահակն շորայ, և անցոյց յայս կոյս զօրսն Մասթաց, միաբանեաց զմետասան Թագաւորս ըզլեառնորդեայն, և ընդդէմ եկաց պատերազմաւ Արեաց գնդին, և բազում վնասս արար զօրացն արքունի: Թէպէտ և երկիցս և երիցս ետուն հրովարտակս աղաչանաց, ոչ ինչ կարացին ածել զայրն 'ի հաւանութիւն. այլ գրով և պատգամաւ յանդիմանէր զնոսա, վասն զուր աւերածի աշխարհին Հայոց: Յիշեցուցանէր նոցա զմահ նախարարացն և զչարչարանս կապելոցն: Ի վերայ անչափ սիրոյ և վաստակոց, փոխանակ կեանս առնելոյ՝ զարեւ հատեք, ասէր: Լաւ լիցի ինձ, ասէ, զնոցա չարչարանսն յանձն իմ առնուլ, քան Թողուլ զքերխտոնէութիւնն:

Եւ իբրեւ տեսին, թէ ոչ բռնորւ-
թեամբ և ոչ սիրով կարացաք ածել
'ի հաւանորւթիւն, գանձս սաստիկս
հոռուն տանել յաշխարհն Խայլան-
դրաց, բացին զգրոզնս Ալանաց և
հանին գոռնդ բազում 'ի Հոնաց, և
կռուեցան տարի մի ընդ Աղուանից
արքայի: Թէպէտ և թօթափեցան
և ցրուեցան զօրքն իւր 'ի նմանէ,
սակայն զնա ոչ կարացին հնազան-
դել, այլ և հարուածք եւս մեծա-
մեծք հասին 'ի վերայ նոցա, էր որ
կռուով և էր որ ախտիւ չարչարա-
նօք: Եւ յայնչափ ժամանակաց
ընդ երկարել պաշարմանն, մեծ կէս
աշխարհին աւերեցաւ, այլ ոչ ոք 'ի
նմանէ երկիտեալ բաժանեցաւ:

Յղեաց առ նա դարձեալ թագա-
ւորն Պարսից. Զբոյրդ իմ, պտէ, և
զքեռորդիդ 'ի բաց տուր ածել, զի
'ի բնէ մտքք էին և գուքրիպտոնեայ
արարեր, և աշխարհոք քեզ լիցի:
Իսկ սքանչելի այրն ոչ 'ի տէրու-
թեանն վերայ կռուէր, այլ յաս-

տուած պաշտուէթեանն: Զմայրն և
զկիկնն ետ տանել, և զաշխարհն բո-
վանդակ 'ի բաց եթող. և ինքն զա-
ւետարանն առ և յաշխարհն 'ի
բաց կամէր գնալ:

Զայս իբրեւ լուաւ թագաւորն,
կարի զեղջ և ապաշու անկանէր 'ի
միտս նորա, և զամենայն վնասս ի-
րացն զհարքն իւրով արկանէր: Ան-
սուտ երգուումն կնքէր և տայր տա-
նել առ նա, եթէ յաշխարհէդ
միայն մի գնար և զինչ ասես՝ առ-
նեմ: Խնդրեայ զմանկուութեան սեպ-
հականն, զո՞ր հօր իւրոյ շնորհեալ
էր նմա 'ի տղայութեանն՝ հազար
երդ. առ զայն 'ի թագաւորէն, և
նստու 'ի նմա միայնակեցօք հան-
գերձ: Եւ այնպէս հանապազօր-
դեաց զինքն յաստուածային պաշ-
տամանն, զի և չյիշէր ամենեւին՝
թէ և թագաւոր լեալ իցէ յառաջ:

Եւ այս ամենայն յերկար խոռ-
վութիւնք, որ եղէն մինչեւ 'ի հին-
գերորդ ամս Պերոզի արքայից ար-

քայլի պատճառք եղեն չարձակելոյ նախարարացն Հայոց. այլ ռոճկաւ և 'ի տաճար մտանել յարքունիս մեծապէս առատացոյց քան զամաց սովորութիւնն: Եւ 'ի նմին հինգերորդ ամին զբազմաց նոցա անդրէն զկեանսն շնորհեաց. և այլոցն առ յայն խոստացաւ՝ յամն վեցերորդ միանգամայն արձակել զամենեսեան կենօք և պատուով:

Բայց 'ի տեղի այսր ինձ դարձեալ դալ պիտի:

Իսկ կանայք երանելի առաքելնեացն, և կապելոցն և անկելոցն 'ի պատերազմին, ընդ ամենայն աչխարհն Հայոց համօրէն համարել ես ոչ կարեմ. զի բազում այն են զոր ոչ գիտեմ, քան թէ գիտիցես: Աի հինգ հարիւրով չափ յականէ յանուանէ ճանաչեմ. ոչ որ միայն աւագագոյնքն էին, այլ զբազումս 'ի կրօնագոռնաց անտի:

Ամենեքեան միահամուռ զերկ-

նաւոր նախանձ բերելով, ոչ ինչ ընդհատ երեւեցան յայնցանէ՝ որ ոչ ճաշակեցին զաշխարհ: Քանզի եթէ աւագագոյնք էին, և եթէ մանկագոյնք, զմի առաքինութիւն հաւատոց զգեցան: Ոչ ինչ յիշեցին ամենեւին զանուն փափկութեան մայրենի ազատութեանն, այլ իբրեւ մարդք՝ որ վշտամբերք լեալ իցեն անգստին 'ի շինական սովորութեանցն տանջելով վարեալ զկեանս աշխարհիս, անդրագոյնք եւս քան զնոսա յանձն առին զհամբերութիւն վշտաց:

Ոչ միայն յոգիսն մխիթարեալ կացին առ աներեւոյթ զօրութիւնն յուսոյն յաւիտենից, այլ և մարմնոյ նեղութեամբք առաւել եւս բարձին զբեռն ծանրութեան: Աի թէպէտ և ունէին զիւրաբանչիւր ձեռնասուռն սպասաւորս, ոչ ոք երեւէր 'ի նոցանէ՝ թէ ո՞ր տիկինն իցէ և կամ ո՞ր նաժիշտն. մի հանդերձ էր հասարակաց, և միապէս

գետնախշտիք երկողեան: Ոչ ոք ումեք անկողնարկ լինէր. քանզի և չճանաչէին իսկ զխոտեղէնսն ընտրել 'ի միմեանց: մի գոյն թխուծեան փսրայիցն, և մի գոյն սեւուծեան սնարից բարձիցն:

Ոչ գոյր նոցա համեմ խահամոքք անուշարար առանձինն, և ոչ հացարարք որոշեալ 'ի պէտս սպասու ըստ ազատաց կարգի, այլ հասարակաց էր: Շաբաթամուտն ըստ կարգի միայնակեցաց, որ յանապատս բնակեալ են: Ոչ ոք ումեք ջուր 'ի ձեռս արկանէր, և ոչ կրբուսեքք աւագաց դաստառակս մատուցանէին. չանկաւ օշնան 'ի ձեռս փափկասուն կանանց, և ոչ մատուցաւ իւր 'ի զուարթութիւն խրախուծեան: Ձեգան առաջի սուրբ սկտեղք, և ոչ անկան բաժակակալք յուրախուծիւն. չեկաց ուրուք նոցա նուիրակ առ դուրս, և ոչ կոչեցան սրտուականք յարանց 'ի տաճարս նոցա. չյիշեցան նոցա՝

Թէ գուցէ որ ամենեւին 'ի բնակասնունդ գայեկաց և կամ բնաւ 'ի սիրելի հարազատաց:

Փոշոտեցան և ծխոտեցան սրահալք և սրսկապանք նորեկ հարսանց, և սարգի ոստայնք ձգեցան 'ի սենեակս առագաստաց նոցա. կործանեցան բարձրագահք տաճարաց նոցա, և խանգարեցան սպառք երախանաց նոցա. անկան կործանեցան ապարանք նոցա, և տապալեալ աւերեցան ամուրք ապաստանի նոցա: Չորացան աղաղեցան բուրաստանք ծաղկոցաց նոցա, և տաշտախիլ եղէն որթք գինէբեր այգեաց նոցա: Աչօք իւրեանց տեսին զյափրջատակութիւն արարոց իւրեանց, և ականջօք իւրեանց լուան զվիշտս չարչարանաց սիրելեաց իւրեանց. առան դանձք իւրեանց յարբունիս, և ոչ մնացին ամենեւին զարդք երեսաց իւրեանց:

Տիկնայք փափկասունք Հայոց աշխարհին, որ գրգեալք և գգուեալք

էին յիւրաքանչիւր պաստեռուսն և 'ի գահաւորակս, հանապազ բոկ և հեաի երթային 'ի տունս արօթից, անձանձրոյթ խնդրեալ ուխտիւք՝ զի համբերել կարասցեն մեծի նեղութեանն: Որ 'ի մանկութեանէ իւրեանց սնեալ էին ուղղովք զուարակաց և ամձովք էրէոց, խոտաբուս կենօք իբրեւ զվայրենիս ընդունէին զկերակուրն մեծաւ խընդութեամբ, և ոչ յիշէին ամենեւին զսովորական փափկութիւնն: Սեւացեալ ներկան մորթք մարմնոց նոցա, վասն զի ցերեկ արեւակէզք էին և զամենայն գիշերսն գեանաբեկք: Սաղմոսք էին մշտնջենաւորք մրմունջք 'ի բերանս նոցա, և մխլթարութիւնք կատարեալք՝ ընթերցուածք մարգարէիցն: Միաբանեցին երկու երկու՝ իբրեւ ամուլք հաւանք և հաւասարք՝ ուղիղ տանելով զակօսն արքայութեանն, զի առանց վրիպելոյ հասցեն 'ի նաւահանգիստն խաղաղութեան:

Մուացան զկանացի տկարութիւն, և եղեն արուք առաքինիք 'ի հոգեւոր պատերազմի. մարտ եղեալ կուռեցան ընդ մեղսն կարեւորս, հաաին կտրեցին և ընկեցին զմահաբեր արմատս նորա: Միամըտութեամբ յաղթեցին խորամանկութեանն, և սուրբ սիրով լուսցին զկապուտակ ներկուածս նախանձուն. հաաին զարմատս ագահութեան, և չորացան մահաբեր պտուղք ոստոց նոցա: Խոնարհութեամբ կռիեցին զամբարտաւանութիւն, և նովին խոնարհութեամբ հաաին երկնաւոր բարձրութեանն: Աղօթիւք բացին զփակեալ դրուսն երկնից, և սուրբ խնդրուածովք իջուցին զհրեշտակս 'ի փրկուութիւն. լուսն աւետիս 'ի հեռաստանէ, և փառաւորեցին զԱստուած 'ի բարձունս:

Այրիք որ 'ի նոսա էին՝ եղեն վերջսին հարսուէք առաքինութեան, և բարձին յանձանց զնախատինս

այրու-թեանն: Իսկ կանայք կապե-
լոցն կամօք կապեցին զմարմնաւոր
ցանկու-թիւնս, և եղեն կցորդ չար-
չարանաց սուրբ կապեցոցն. 'ի
կեանս իւրեանց նմանեցին քաջ
նահատակացն մահուամբ, և 'ի հե-
ռաստանէ եղեն վարդապետք մխի-
թարիչք բանդարդեւեայն: Մա-
տամբք իւրեանց վաստակեցին և
կերակրեցան, և զկարգեալ ռոճիկ
նոցա յարքունուստ՝ ամ յամէ թո-
շակ առնէին և տային տանել նոցա
'ի մխիթարու-թիւն: Անարիւն ճիւղ-
ուանց նմանեցին, որ երգոյն քաղ-
ցրու-թեամբ սուանց կերակրանաց
կեան, և կենդանի են միայն զօգն
ծծելով, զանմարմնոցն բերեն զնը-
մանու-թիւն:

Բազում ձմերաց հալեցան սառ-
նամանիք, եհասս գարուն և եկին նո-
շեկ ծիծեռունք, տեսին և խնդա-
ցին կենցաղասէր մարդիկ, և նոքա
ոչ երբեք կարացին տեսանել զանձ
կալիան իւրեանց: Մաղիկք դարնա-

նայինք յիշատակեցին զպսակասէր
ամուսինս նոցա, և աչք իւրեանց
կարօտացան տեսանել զցանկալի
գեղ երեսաց նոցա: Սպառեցան
բարակք որսականք, և խցեալ կու-
րացան արշաւանք որսորդաց: Բնա-
գրօք յիշատակեցան նոքա, և ոչ մի
սօնք տարեկանաց ոչ ամին զնոսա
'ի հեռաստանէ. 'ի ճաշատեղս նոցա
հայեցան և արտասուեցին, և յա-
մենայն յատեանս յիշեցին զա-
նուանս նոցա: Բազում արձանք
կանգնեալ էին յանոււն նոցա, և
անուանք իւրաքանչիւր նշանակեալ
'ի նոսա:

Եւ իբրեւ այնպէս յամենայն
կողմանց ալէկոծ լինէին միաք նո-
ցա, ոչ ինչ կասեալ թուլացան
յերկնաւոր առաքինու-թեանէն: Ար-
տաքնոցն երեւէին իբրեւ այրիք
սգաւորք և չարչարեալք, և յողիս
իւրեանց զարդարեալք և մխիթա-
րեալք երկնաւոր սիրովիչ: Ոչ եւս
սովորեցին հարցանել զեկեալ ոք 'ի

հեռաստանէ, եթէ էրբ լինիցի մեղ տեսանել զսիրելիսն մեր, այլ այն էին իղձք աղօթից նոցա առ Աստուած, եթէ որպէս սկսանն՝ քաջութեամբ 'ի նմին կատարեսցին լի երկնաւոր սիրովն:

Եւ մէք և նոքա հասարակ ժառանգեսցուք զքաղաքամայրն բարեաց, և հասցուք խոստացելոց սիրելեացն Աստուծոյ 'ի Քրիստոս Յիսուս 'ի Տէր մեր:

ՎԵՐՁ

ԲԱՆ ԽՐԱՏՈՒ

ՅԱՂԱԳՍ ՄԻԱՆՁԱՆՑ

Մարդիկ, որ են 'ի մարմնի և կամօք ետուն զանձինս իւրեանց յաստուածպաշտութիւն, անգստին 'ի տղայութենէ խոկան՝ կրթին 'ի վըտամբերութիւն. հեռանան 'ի հայրենի բնակութենէն, և վարին յանապատ յանշէն երկիր. ոչ իբրեւ չարակնելով նախանձոտք փախուցեալք 'ի բազմամարդոյ քաղաքաց, այլ զի տեսանեն զաշխարհս լի ամենայն չարեօք, խոյս տան 'ի խորչս և 'ի ստորոտս անապատ վայրաց:

Չոր տեսանեմք իսկ յաճախ 'ի կողմանս հարաւոյ բազմութիւն աւրանց՝ առանց կանանց միաբանութեան, յազգաց և 'ի լեզուաց ըլմիով վայրօք հասեալք, ժողովեալք իբրեւ 'ի հայրենի դաւառս՝ առնեն զբնակութիւնս երկու ընդ երկուս,

և կամ երեք ընդ երկու, և կամ եւս բազումս քան զսոյնս: Եւ շինեն իւրաքանչիւր խցկուես զատուցեալս 'ի միմեանց. որմք գուշնաքեայ առցրտոյն պահպանութիւն, և զոյգ նմին ձեղուն՝ առ արեգական պահպանիլ. յատակք անպաճոյճք՝ շատացեալք խոտեղէն անկողնօք: Եւ քանզի բնութիւնս մեր զուղակ է՝ սիրէ ծածկել զմերկութիւն, առնեն և նոքա հանգերձս անպաճոյճս և յոյժ դձուձս, կողոբս ամարանի և թեզանաւորս ձմերանի, արկանեն և աղբոզորնս մեկնաւորս:

Մանաւանդ 'ի պարս շրջափայ անգագար պաշտամանն՝ երգս հոգեւորս հօրն բողբոցուն մատուցանեն զուարթ հոգեով: Կան ընդդէմ միմեանց զաչս 'ի վայր արկեալ՝ զժայրս ոտից մատանցն նկատելով, իբր թէ մի կէտ տեսակի ամենեքեան հայեսցին. զաջ ձեռն 'ի վերայ ծնօտին եդեալ և զահեակն 'ի վերայ կրծիցն, որպէս կարծեմ

ուսեալ 'ի բնական հարցն: Երկուեն պատուականագոյնք 'ի մարմնի, կենդանական և խոհական, երկուքումք երկոցունց սպասաւորեալ. կենդանականին՝ սրամտականն է հակառակ, իսկ խոհականին՝ արտաբերական բանս: Արդ ձախուռն զերասանակ 'ի ձեռն առեալ՝ զսրտմշտականն սանձակոծիցէ, և զաջ ձեռն 'ի վերայ աջոյ ծնօտին եդեալ՝ խոհականին սպաս ունի առ դրան բերման բանին, զի մի այլակութիւն յուղիլ փառատրութիւնն խառնեսցի: Եւ ընդ այսու երկու մասամբքս նահանջին ամենայն զգայութիւնքս. աչք յուղիլ տեսութիւն և ականջք 'ի զգաստ լսողութիւն, միտք 'ի սուրբ իմաստութիւն, և այլն ըստ իւրաքանչիւր մասին:

Եւ իբրեւ այսպէս կարգեալք և յօրինեալք, ամենեքեան 'ի նմանութիւն վեցթեւեան սերովբելից շուրջ պարփակեալք ձայնս ան-

հատտ 'ի վեր հնչեցուցանեն, և օր-
հնու թիւն եռաչափս 'ի խորհուրդ
միաբանութեան արարչին իւրեանց
բողորեն: Չախն ամենայն պարա-
պեն երգոցն քաղցրութեան, յա-
գեալք և զմայլեալք 'ի կերակուրան
երկնայինս՝ առլցեալք հասանեն 'ի
ժամ երեկոյին: Եւ քանզի մարմին
ունին ըստ բնութեանս մերում՝ ըզ-
գայութեանս, ուտեն՝ զի մի քաղ-
ցիցեն, և ըմպեն՝ զի մի ծարաւես-
ցին:

Արդ գու իբրեւ լիցես զուտեն,
մի առ մերս ընթանայցես. զի հաց
է նոցա անպաճոյճ՝ և բանջար վայ-
րենի՝ զոր համով աղին համեմեն, և
ջուր յստակ՝ զոր յամպոց բերմա-
նէ 'ի գուբս ժողովեն: Սակայն և
զայս ոչ երբեք 'ի տուընջեան մա-
տուցանեն 'ի դարմանս պիտոյից
մարմնոց. այլ միաբան պահելով
զերկայնութիւն աւուրն, տեղի
տան արեգական մտանելոյ. ձգեն
երկայնեն զերեկունն, մինչեւ աս-

տեղք յիւրաքանչիւր կայանս պայ-
ծառանան. գոհանան իբրեւ ընդ մի
բերան ասելով. Ի խաւարային ժա-
մու զխաւարային կերակուրս խա-
ւարային մարմնոյս տացուք:

Եւ զայս ասելով, 'ի ձայն բարձր
փառատրեն զսուրբ Երրորդու-
թիւնն, խնդալից ուրախութեամբ
ակըմբին յիւրաքանչիւր տեղիս: Եւ
որպէս ասացաքն՝ ուտեն հաց և զու-
պա, և ըմպեն ջուր ցուրտ: Քանզի
գոն 'ի նոսա ծերք փափկավարք,
մատուցանեն ջուր ջերմ, զոր և բա-
րեխառն անուանեն. այլ դինի և
կամ այլ ինչ զանազանեալ, և գը-
տանի ոչ 'ի սուրբ միայնանոցս նո-
ցա:

Եւ յարուցեալ յանպաճոյճ ըն-
թրեացն, միաբանութեամբ ասեն.
Փառք քեզ, Տէր, փառք քեզ
թագաւոր մեր, զի ետուր մեզ կե-
րակուր ուրախութեան. լցո զմեզ
Հոգւով սրբով, զի գտցուք առաջի
քո հաճոյք, և մի ամաչեսցուք. զի

գուհ հատուցանես իւրաքանչիւր ըստ գործոց իւրեանց: Եւ այսպէս աեառնագրելով զինքեանս՝ տան զանձինս սահաւ մի անօսր քնոյ. զի մի տհաշ կերակրովք գեղեցիկ շինուած մարմնոյն չփոթեալ խանգարիցի: Նա և եթէ յամեն եւս 'ի քունն, երազ հոգեկան տեսանեն, և անդէն զանուրջն մեկնեն իբր ըզբանս սուրբ մարգարեիցն:

Եւ զարթուցեալք առ հաստրակ անդէն 'ի շրջանս պարուց բոլորին. ոչ հակառակք և ոչ ընդդիմացեալք, քաղցր հաւանութեամբ և հեղ հանդարտութեամբ: Առաջ նորդք դասուցն հնչուսն ձայնի արձակեն, երգս հոգեւորականս քաղցրանուագս փոփոխելով. իսկ այլ կրտերագոյնքն ձայնիցն միտ դնելով, խառնեն զիւրաքանչիւր բարբառսն յարմարելով և կազմելով զմիաբանութիւն հնչմանն, զի իբրեւ 'ի միոջէ բերանոյ ամենայն բազմութիւն ձայնիցն հնչիցէ: Եւ այսպէս

յերկարելով զձայնաւոր պաշտօնն, ծունր դնեն ամենեքեան, յաղօթական լուութեամբ. և 'ի ձեռն առաջ նորդի աղօթիցն կանգնեալք ամենեքեան զփառատութիւնն կատարեն:

Եւ կատարեալ զտուրնջեան պաշտօնն, լաւ համարեցան զգիշերսն վաղայարոյց լինելով մինչեւ յառաւօտ աղօթիցն պարապեալք, և ընթեռնուեն զգիրս սուրբս. իսկ որք ունին շնորհս վարդապետութեան, առնեն մեկնութիւնս 'ի մխիթարութիւն լսողացն: Պատմեն վասն լինելութեան աշխարհի յոչընչեղեալ, և կարգեալ մի ըստ միոջէ զխրատս բարեաց կարգեն 'ի լսելիս ժողովրդոցն վկայութեամբ սուրբ գրոց: Եւ այսպէս ուսուցանելով մինչեւ մոռանալ լսողացն զամենայն իր աշխարհականս, և չյիշել ամենեւիմբ զհարկաւոր կերակուր և ըմպելիս:

Եւ այնպէս ուրախացեալք 'ի

սէրն Աստուծոյ, մինչեւ չհամարեալ զինքեանս 'ի մարմնի, այլ յերկինս. և հեշտութեամբ անցուցանեն զերկայնութիւն գիշերոյն մինչեւ յառաւօտ: Քանզի սոսկացեալք են յերկրէս և զքեցեալք զերկինս: Ամաչէ մահ առ գրունս նոցա, և դառնացան դժոխք յիշանել նոցա: Կենդանութիւն նոցա գրունք են ալօթից աշխարհի, և ոսկերք նոցա գանձ են ամենայն ալաւինելոց: Լուր նոցա յորդորիչ է ամենայն հեղգացելոց, և գործք նոցա վարդապետութիւն ամենայն կամեցողաց. դասակիցք են հրեշտակաց, և օթեւանք սուրբ Երրորդութեանն:

Արդ զայս ամենայն գիտելով, եղբարք, պարտիմք թեւակոխել, և զնոյն նախանձ սրբութեան յանձինս բերելով, նմանողք լիցուք այն պիսուոյ բաղմագունդ միայնացելոց յաշխարհէ և դիմելոց 'ի քաղաքամայրն Վերին, որ ազատ է յախտից

երկրաւորաց. քանզի ընկերակիցք են մերոյ բնութեանս, որ զօրացուցանէ զակարուծիւնս: Միայն կամեաց, բուռն հար հաւատովք, յուսա, սիրեա, և կարես տեսանել զայնպիսի նահատակութիւն: Զի ոչ ինչ համեմատ են չարչարանք ժամանակեանք առ կեանսն՝ որ պատրաստեալ է այնպիսի ճգնողաց:

Քանզի յոյժ իսկ երկուցեալ եմ էս ընդ հեղգութիւնս մեր. գրեթէ զամենեսեան տեսանեմ թաւալեալ յերկրաւոր ստացուածս: Իսկ արդ բնութիւնս իմ ո՞չ կշտամբեալ յանդիմանէ զիս, եթէ ստեղծայ մերկ, և եթէ եդայ 'ի դրախտին մերկ, և եթէ ելի անտի մերկ, և եթէ ծնայ մերկ, և եթէ անդրէն յերկիր մերկանդամ երթամ: Արդ եթէ տանել սատի ոչ կարեմք, զի՞ եւս աստէն 'ի սմին թարթափիմք յաշխարհիս: Մերկացիր սոսկացիր, ո՞վ միայնակեացդ, մի թաւ ամուր ընդունակ լինիր նենգաւոր թշնամոյն. գու-

ցէ 'ի դարան մտեալ մտալուտա՝ ըզ-
քեզ անդէն 'ի քեզ արշաւեսցէ կո-
ղոստել, զերծանել 'ի քէն զգանձան
երկնաւորս: Բաւական համարեսց
քեզ զտերունեան կանոն, ոչ որ
յերկրաւորացս կարէ երկուց տե-
րանց ծառայել. որ յայտնագոյն
խիկ ցուցանէ առանց միջնորդի և
մեկնութեան. Ոչ կարէք դուք, ա-
սէ, Աստուծոյ հաճոյ լինել և Մա-
մոնիայի:

Եւ արդ էս տեսանեմ 'ի մերում
աշխարհիս և ոչ զոր ազատեալ յայս-
պիսի աղետից: Յետս ընդդէմ՝ ըն-
թերցաք զգեղեցիկ գրեալսն. 'ի
պատճառս ուխտաւորութեան հե-
ռացաք 'ի սուրբ ծնողացն, և արա-
րաք բազում հարս օտարոտիս. զորս
պատուելոյ արժանի էր՝ անարգե-
ցաք, և յորս ոչն ունէաք իշխանու-
թիւն զնել մեծարանս՝ զախտ աղե-
տից մերոց յոյժ ծախեցաք: Ազա-
տացաք 'ի հարկաց արքունի՝ զորս
առանց մեղաց էր հարկիլն, և մտաք

ընդ հարկաւ ստացուածոց, որ լի
են անառակ ագահութեամբ: Չե-
լաք յանկողինս սուրբ հարսանեաց,
և արարաք մեզ բարձրագահոյս ա-
ռաւել. քան զաշխարհի: Փափկա-
նամք յանկողինս յարմարեալ, և
յածեալ կոծին միտք մեր 'ի խոր-
հուրդս աղտելիս զգիշերն ամենայն:

Կօշիկք ոտից մերոց յանգիմանեն
զմեզ, եթէ ոչ են սուրբ ճանա-
պարհք մեր: Հանդերձք մեր աղա-
ղակեն զգործոց մերոց, եթէ մերկ
եմք յերկնաւոր զգեստուցն: Երի-
ւալք մեր ցուցանեն զմեզ, եթէ ոչ
եմք յափշտակելոց ընդ առաջ
Տեառն 'ի վերայ օգոց: Երեսուծք
ապարանից մերոց յայտ առնեն, ե-
թէ ոչ ունիմք մեք տաճար առանց
ձեռագործի յերկինս, յոր մտանե-
լոց են ամենայն դասք սոսկացելոցն
յերկրաւոր ախտից: Կալուածք
անդաստանաց մերոց կշտամբեն ըզ-
մեզ, եթէ չիք մեր բաժին 'ի վի-
ճական երկնաւորս:

Մրգուզք անյադք եղաք 'ի կերակուրս, և առանց չափոյ արբաք գիւնի պղտորիչ խորհրդոց և մտաց: Խոր 'ի քուն ննջեմք ամենեքեան, և երազ թուի մեզ ճմարտութիւնն: Կափուցեալ են աչք մտաց մերոց 'ի տեսական խորհրդոց, և անյադ պակշտեալ հայել 'ի կեանս աշխարհիս: Սրգեւեալք զլսելիս 'ի սուրբ ընթերցուածոց, և ունկնդիր եմք բառաչման խաշանց մերոց: Ոչ եկն մեզ հոտ անոյշ 'ի Հոգւոյն սրբոյ, վասն զի սիրեցաք մեք զիւզ ախտալից աշխարհիս: Ոչ ճաշակեցին քիւմք ոգւոց մերոց զկերակուր երկնային, վասն զի պարարեցաք զանձինս մեր 'ի զանազան խորտիկս: Մուտ է գոյն դիմաց մերոց, վասն զի ոչ զուարթացան երեսք մեր 'ի խորհուրդս սրբութեան: Յաւալից են անդամք մարմնոց մերոց, վասն զի յառաջ քան զմարմինս՝ զոգիս ախտացուցաք: Գերեզմանաց բռնւոց նմանեցաք յանձինս մեր, վասն

զի ունայն եմք 'ի շնորհաց սուրբ Հոգւոյն:

Վասն այսորիկ և ամենայն չարիք եկին հասին յաւուրս մեր. կենդանեալ մերով տեսաք զգիւտեանս անձանց մերոց: Քաջ նահատակք մեր անկան 'ի պատերազմի, և սուրբ քահանայք մեր խողխողեցան 'ի ձեռաց անօրինաց. գեղեցիկ երիտասարդքն զենան 'ի սպանումն, և բազում կուսանք վարեցան 'ի գերութիւն. գիրգ կանայք անկան 'ի տաւասականս այրութեան, և բազում որբք կականին դառնապէս: Սղատ եկեղեցի անկաւ 'ի ծառայութիւն հեթանոսաց, և սուրբ քահանայք նորա կոփին չարչարին յանօրէն հարկահանաց: Բարձեալ է ողորմութիւն յաշխարհէ, և հեռացեալ է գութ յիւրաքանչիւր մտաց: Նրկինք 'ի վերուստ բարկացեալ են, և երկիր 'ի ներքուստ կայ յերերի տատանման:

Շինուածք մեր եղեն գերեզմանք

գիականց մերոց, և վաստակք ձե-
ռաց մերոց տապալէցան 'ի վերայ
մեր: Պայթեաց և սատառեցաւ
ԹանձրուԹիւն երկրիս, և բազում
մարդիկ 'ի վայր հոսեցին: Ոչ սպա-
սեաց որդի հօր, և ոչ քոյր զաջս
եղբօր կալաւ, և ոչ եւ ձայն լալոյ
կանանց 'ի վերայ ծննդոց իւրեանց,
վասն զի Լքոյց սով զբերանս նոցա:
Հզօրք խորտակեցան յանկարծակի
իբրեւ զմայրս բարձունս Լիբանա-
նու. հնծանք եղեն բարկուԹեան,
և ճմլեցան ամենեքեան իբրեւ զօղ-
կոյզս ընդ ոտամբ, փոխանակ գի-
նուոյ՝ արիւն անմեղաց ցայտեցաւ 'ի
հանդերձս մեր: Գառնայաւ քան
զլեզի կերակուր 'ի քիմն մեր, և 'ի
քացախ դարձաւ սուրբ ըմպելիք
մեր: Ընդ հարեալն հարաք ամե-
նեքեան յոգի և 'ի մարմինս մեր, և
ընդ մեռեալն զմահ ճաշակեցաք:
Արդ ո՛չ ապաքէն վասն մերոյ հեղ-
գուԹեան անցին այս անցք չարչա-
րանաց ընդ աշխարհ:

Օն անդր 'ի բաց կաց յաշխար-
հէ, որ վաղդ ելեր մեկնեցար
յաղետից սորա. ԹօԹափեալ ըն-
կեա 'ի բաց զկեղեւանս ախտալեց
աշխարհիս: Մերկեաց իբր զմբշա-
մարտիկ, օժ իւղովն Քրիստոսի, զի
մի կռուեսցին 'ի քեզ ձեռք ախոյա-
նին: Իսկ արդ եթէ հեԹանոսք, որ
ըմբռնեցան 'ի տեսական իմաստու-
Թիւն, ոչ միայն 'ի ստացուածոց 'ի
բաց կացին, այլ և յօրինաւոր կե-
րակրոց հրաժարեցին, համառօտ և
անպաճոյճ ըմպելեօք շատացան
յանձինս իւրեանց, և առաքինի
մահուամբ վախճանեցան 'ի կատա-
րած կենաց իւրեանց, որչափ եւս
առաւել մեք պարտիմք նմանողք
լինել սիրելեացն Քրիստոսի, որք
հրեշտակակրօնք զանձինս կարգե-
ցին, խառնելով զինքեանս 'ի գունդս
վերնոցն:

Եկայք և մեք, ո՛վ միայնացեալք,
զօրէն Թշնամեացն մտցուք 'ի մերն
ստացուած իբր յօտար երկիր, ար-

մատախիւ զճառատունիս թշնա-
մւոյն կոտորեսցուք. իբրեւ զգերի
առեալ ծախիցեմք՝ ՚ի նեղեալս զինչս
մեր, ոչ զի ատիցեմք զազգահանս,
այլ զի սիրիցեմք զաղքատան, որ են
զօրահանք Քրիստոսի և ճշմարիտ
բարեխօսք: Ապա թէ աստէն կա-
պիս ընչիւք, և քեզէն վարես զքեզ
յանգարձ գերուծիւն, ուր չեք
անդ գինք փրկանաց: Փուծա փու-
ծա ճեպեա, եղբայր, ապրիլ յայն-
պիսի անողորմ գեհնէն. զի կարի-
ցես հասանել յամուր քաղաքն,
որ ոչ գոյ քեզ կասկած կամ եր-
կիւղ խախտիլ և վարիլ ՚ի գերու-
ծիւն:

Եւ եթէ եկեսցես զհետ գեղեցիկ
վարդապետուծեան հարցն, զորս
վերագոյնն գծագրեցի քեզ զվարս
սուրբ միայնակեցացն, յայնժամ
կարասցես համբառնալ զասս մը-
տացդ առանց ախտից չարչարանաց,
հայել և տեսանել զքեզ գեր ՚ի վե-
րոյ քան զամենայն երկինս: Երանի

տայցես անձինդ քաջապէս ճողո-
պրեալ ՚ի վշտալից կենաց աշխար-
հիս, և խառնեսցիս յերամ՝ միայ-
նակեցացն, ՚ի գուեղս սրբոց ար-
գարոցն, ՚ի վիճակ առաքելոցն, ՚ի
գուժարս մարգարէիցն, ՚ի կաճառս
մարտիրոսացն, ՚ի բանակս հրեշ-
տակացն և ՚ի ժողովս անդրանկացն,
՚ի մեծ քաղաքն երկնից, ՚ի բազմա-
կանսն աբրահամեան, և ՚ի կերա-
կուրս երկնայինս և յըմպելիս ան-
կարօտս: Դու ես այնուհետեւ մար-
գարէն, որ ոչ պատուեցար ՚ի մար-
մնական աշխարհիս, այլ թեւա-
ծեալ թռուցար յանմարմին աշ-
խարհի, և հանգուցեալ դագարե-
ցեր յանապական ուրախուծիւննն:
Յորս լիցի և մեզ՝ վերջին գրչու-
ծեամբ աշխատողացս՝ միաբանու-
ծեամբ սուրբ ուխտիւս վայելել,
չնորհօքն Տեառն մերոյ Յիսուսի
Քրիստոսի, որում փառք յաւի-
տեանս. ամէն:

ՅԱՆԿ ԱՆՈՒԱՆՑ

- Աբրահամ խոստովանող 350-368.
Աբրահամ նահապետ 87. 200.
Աբրահամ սարկաւազ 244. 271. 342.
Ադէն 282.
Ալանաց գրուներ 380.
Ակէ 173.
Ակէայլէք 186.
Աղբակ 342.
Աղձնիք 18. 95. 174. 250.
Աղուանք 18. 19 55. 95. 115. 128. 156-
159. 143. 144. 148. 174. 176. 245
250. 255. 377. 379. 580.
Ամատունի 50. 76. 175. 185. 197. 369.
Այրարատ 49. 148. 342.
Այրուկ 186.
Անանիա 49.
Անատոլ 15. 154.
Անդղ 105.
ԵՂԻ.

- Անի 125.
 Անձաւացի, անձեւացի 50. 76. 185.
 569.
 Անտիոքացիք 196.
 Անտիոքոս 250.
 Աշնակ 146.
 Աշոտ 569.
 Ապահոսնի 50. 76. 157. 172.
 Ապար 18. 267. 274. 348.
 Ապարհայիկ 218.
 Ապրսամ 186. 570.
 Առանձար 197. 569.
 Առաւան 569.
 Առաւելէն 569.
 Առնակ 569.
 Ասիացիք 152.
 Ասորեստան 541. 549. 556. 557. 559.
 Ասորեստանեայ 549.
 Ասորի 154.
 Ատամ 150. 185. 251. 569.
 Ատորովիզ 242. 245. 246. 249.
 Ատրպատական 127. 136. 146.
 Արագած 146.
 Արած 342.

- Արբանեալ 126.
 Արգեանք 145.
 Արղնարղիւն 19.
 Արիք 17. 50. 155. 177. 219. 222. 229.
 268. 578. 579.
 Արծրունի 49. 76. 185. 186. 218. 226.
 244. 569.
 Արծրունի տոհմ 370.
 Արհին 45. 56.
 Արհնի, որ և Արինի 123.
 Արձախ, Արցախ 176. 255. 240.
 Արմաւիր 145.
 Արշակ Բ. Հայոց 11.
 Արշակունի 11.
 Արշարունի 141. 185.
 Արշաւիր 141. 185. 219. 569.
 Արշէն 257. 245. 521. 542.
 Արուճ 145.
 Արսէն 186. 218. 225.
 Արտագերս 125.
 Արտաղ 186.
 Արտակ մոկացի 76.
 Արտակ պալունի 185. 225. 285.
 Արտակ ռըտունի 76. 172.

Արտաշատ 50. 125. 146. 185. 244.
 Արտաշէս Ք. Հայոց 11.
 Արտաշէր 222.
 Արտաւազդ 369.
 Առտէն 175.
 Արցախ, տես Արձախ.
 Աւարայր 360.
 Աքաբ որ և Աքաբ 205
 Բաբգէն 369.
 Բաբելոնցի 357.
 Բաբելոն 25.
 Բաբել 370.
 Բագրատունի 156. 172.
 Բագրեւանդ 49. 342.
 Բակ 250.
 Բակուր 369.
 Բաղասահան 141. 255.
 Բասեան 49.
 Բասիլ 50.
 Բարձրաբուհ 125.
 Բզնունիք 49.
 Բէլ 268. 269.
 Գաբելեան 157. 175. 185.
 Գագ 50.

Գագերովն 152.
 Գագէշոյ, Գագելոյ 76. 172.
 Գազրիկ 144. 186.
 Գառնի 125. 145.
 Գարեգին 25.
 Գարեգին Սրուանձտայ 225.
 Գաւ 177.
 Գեգէովն 204.
 Գեղք 218.
 Գիտ, որ և Գիւտ 76. 172.
 Գղուար 177.
 Գնթունի 185. 219. 225
 Գնունի 150. 185. 225. 251. 369.
 Գուդք կամ Գութք 19.
 Գրեալ 126.
 Դաղ 370.
 Դասն 95.
 Դաւիթ երէց 5.
 Դաւիթ մարգարէ 205.
 Դենիմաղդէզն 44. 308.
 Դենշապուհ 41. 271. 298. 300. 302.
 305. 304. 307. 320. 322. 325 352. 355.
 355. 358. 342.
 Դիմաքսեան 141. 185. 186. 225. 369.

- Դրախտ 295.
 Դրունք Ալանաց 380.
 Դրսհանակերտ 145.
 Եգիպտացի 201.
 Եղնակ, որ և Եղնիկ 49.
 Եղբայր 50.
 Եղեգեակ 542.
 Եղիաս 205.
 Եղիշայ, որ և Եղիշ 50.
 Երամաւանք 145.
 Երան և տաներան, Արեայ և անա-
 րեայ 45. 50.
 Երեմիա 49.
 Երեմիաս 50.
 Երեքով 205.
 Երկայնորդք 123.
 Եւզաղ 49.
 Եւրովպէ 132.
 Եփլ'ալ'իոս 154. 155.
 Զանգակ 175.
 Զանդիկ 111.
 Զարաւանդ 158. 197.
 Զարեհաւան 250.
 Զուարէն 369.

- Զրադաշտական 55.
 Զրադեշտ, որ և Զրադեշ, Զրա-
 դաշտ 509.
 Զրադեշտական, որ և զրադեշական
 272.
 Զրուան 44.
 Ընծային, ընծայացի 186. 218. 225.
 Ընչուղ 175.
 Թաթիկ 49.
 Թաթիկ այլ 541.
 Թաթուլ գիմաքսեան 185. 369.
 Թաթուլ կամարական 369.
 Թաթուլ վանանդեցի 218.
 Թաւասպարք 177. 245.
 Թէոդոս փոքր 15. 151. 155.
 Իջաւանք 542.
 Իսրայէլ 204.
 Իտաղական երկիր 55.
 Լիբանանու մայրք 404
 Լոփնաս 141.
 Լիփնք 18. 19. 95. 141. 177. 245.
 Խաղխաղ 139.
 Խաղտիք 176. 255. 258.
 Խայլանդուրք, Խայլընդուրք; 22.
 267. 380.

- Խարաման, տես Հարաման.
 Խիբիովան 245.
 Խոսրով 185.
 Խորանիսա 125.
 Խորէն խոստովանող 550-559.
 Խորէն խորխոռունի 185. 218. 225.
 285.
 Խորխոռունի 76. 157. 172. 185. 218.
 225.
 Խուժաստան 86. 539.
 Խուժիկ 505. 545. 546. 547.
 Խուրս 186.
 Խրսան 177.
 Մախանիսա 126.
 Մաւղէք 19. 95.
 Կամնարական 569.
 Կապիոհ, որ և Կապիոխ 145.
 Կապոյտ շեառն 126. 256.
 Կատիշք 218.
 Կարէն 185.
 Կորդիք 176.
 Կորդուք 18. 19. 95.
 Կուաշ 145.
 Կուր 159.

- Կուրան 502.
 Համազասպ 569.
 Համազասպեան 219. 569.
 Հայք աղգ 5. 6. 11. 12. 18. 19. 24.
 51. 55. 40. 78. 159. 160.
 Հայք աշխարհ 107. 115.
 Հայք ստորին 175.
 Հարաման, որ և Խարաման 44. 46.
 82.
 Հարեւշղով Շապուհ 575.
 Հեճմատակ 177. 245.
 Հեռան 235.
 Հէր 158. 197.
 Հմայեակ գլխաքսեան 185. 225.
 Հմայեակ մամիկոնեան 259.
 Հնդիկք 108.
 Հողոցիմք 544.
 Հոն 21. 22. 75. 76. 129. 144. 148.
 177. 218. 240. 245. 255. 267. 268.
 580.
 Հուում, Հուուիմ 15. 19. 22. 47.
 159. 175. 255.
 Հոււմ. տես Հուում.
 Հուուիմ, որ և Հուում 152.

- Հրեայ 70. 111.
 Զողկերտ, որ և Զողակերտ 145.
 Ղևոնդ երէց 103. 186. 198. 215. 231.
 252. 245. 254. 281. 309. 323. 340.
 341.
 Ճիւղբ 177. 245.
 Ճորայ սահակ 22. 177. 379. մարդ
 ...սան 156. կողմանք 158.
 Մաղգէզն 154.
 Մակաբայեցիք 195.
 Մակուրան 302.
 Մամիկոնեայ, Մամիկոնեան 76. 174.
 225. 369.
 Մանաղկերտ 49.
 Մանդակունի 186. 370.
 Մանէճ 76. 172.
 Մանէն 175.
 Մասքուլք 379.
 Մատաթի 196.
 Մատեան գունդ 217. 221.
 Մարգաղի 49.
 Մարգաստան 49.
 Մարիամ մայր Տեառն 46. 68.
 Մարկիանոս 154. 159.

- Մեհրան 378.
 Մեհրուժան 369.
 Մելեա 49.
 Մեշոյն 339.
 Միհր 37. 62. 314. 355.
 Միհրներսէհ 45. 30. 164. 165. 169.
 179. 242. 245. 254. 236. 375.
 Մծբին 15
 Մոկք 30. 76. 218.
 Մովան 304. 315.
 Մովսէս 62. 200.
 Մուշ գիմաքսեան 141.
 Մուշեայ, Մուշէ եպիսկոպոս 49.
 Մուշեղ 369.
 Մուշէ երէց 244. 342.
 Մուշկան Նիւսալաւուրտ 181. 197.
 215-218. 221. 222. 226. 229. 250.
 252. 241. 245. 251.
 Յաղկերտ Ա. 81.
 Յաղկերտ Բ. 12-378.
 Յեսու 204.
 Յեփթայի 204.
 Յոյնք 15. 16-18. 20. 152. 150. 174. 175.
 176. 230. 231. 255. 367.

- Յովհաննէս 70.
 Յովնէփ Էպիսկոպոս 49. 50. 77. 151.
 186. 198. 251. 252. 245. 254. 277
 292. 322. 325. 340. 341.
 Յովնէփ հայր Տեառն 47.
 Յորգանան 70.
 Յուխնան 370.
 Նածարացիք, Նածրացիք 47. 301.
 342.
 Ներշապուհ 76. 151. 156. 183. 218.
 369.
 Ներսէս կամսարական 369.
 Ներսէս ուրծացի 175.
 Ներսէս քաջբերունի 186. 218. 223.
 Նիւշապուհ 76. 267. 342. 348. 369.
 Նիսալաուերո, Նիւսալաուերո.
 տես Մուշկան.
 Նոյ 199.
 Շահ 186.
 Շահուղ 337. 339.
 Շապուհ Բ. որմզդեան 12. 81. 108.
 Շապուհ Հարեւելլով 373.
 Շաւասպ 369.
 Շմաւոն անձեւացի 76. 183. 369.

- Շնգին 369.
 Ողական 126.
 Ոստանիկ 19. 175.
 Ոան Արագածու 146.
 Որմիզդ 44. 43. 36.
 Որմիզդ արքայ 51.
 Որոտն 126.
 Ուրծ 137. 175.
 Պալուհի 183.
 Պալուհիք 137. 223.
 Պալուհիք միւս եւս 173.
 Պարգեւ 369.
 Պարսիկ 11. 15. 42. 299.
 Պարսիկք 11. 23. 123. 142. 144. 150.
 258. 230.
 Պարսք 93. 97. 108. 110. 111. 128.
 133. 137. 161. 165. 175. 177. 178.
 197. 215. 220. 221. 230. 256. 259.
 241. 235. 380.
 Պաւղ'ոս առաքեալ 20.
 Պեարոս երէց 175.
 Պերոզ 378. 381.
 Պիղ'ատոս պոնդացի 70.
 Ջնիկան 304. 342.

- Ռահամ 578.
 Ռափտոնեան 570.
 Ռըմբոսեան 151. 136.
 Ռըշտունիք 50. 76. 172. 186. 244.
 254. 352. 341. 342.
 Սահաստան 86.
 Սահակ եպիսկոպոս ռըշտունեաց
 50. 244. 254. 291. 509. 515. 541.
 Սահակ եպիսկոպոս Տարօնոյ 49.
 Սահակ մանդակունի 570.
 Սահակ նահապետ 87.
 Սահակ սարկաւազ 173.
 Սահառունի 185.
 Սամուէլ՝ երէջ 244. 271. 342.
 Սասան 11.
 Սատոյ 569.
 Սեբուխա 158.
 Սեքք 132.
 Սինէ, որ և Սինեայ, Սինայ 62.
 Սիւնիք 49. 76. 114. 116. 136. 149.
 167. 185. 253. 259. 369.
 Սլիկունի 186.
 Սուրմակ 49.
 Ստահրաշապուհ, որ և Վ.ամէա-
 պուհ 11.

- Ստեփանոս 340.
 Սրուանձատյ ազգ 225.
 Սրուանձատեայք 186.
 Վահան Աղուանից 144.
 Վահան ամատունի 76. 185. 369.
 Վահան գնունի 225.
 Վահէուունիք 76. 157. 172. 185.
 Վաղինակ 259.
 Վայոյ ձոր 341.
 Վան 126.
 Վանանդ 50. 341.
 Վանանդեցի 218.
 Վասակ մամիկոնեան 174. 175.
 Վասակ սիւնի մարզպան 76. 114-121.
 151. 156-158. 145. 148. 154. 167.
 169-182. 198. 215. 227. 228. 229.
 250. 252. 256-258. 245-245. 250-
 263.
 Վասակաշատ 126.
 Վատ 177.
 Վատգետք 341.
 Վարադգէն 370.
 Վարազշապուհ 175.
 Վարդան մամիկոնեան սպարապետ

76. 117. 118. 131. 136-159. 148.
 180. 184-187. 195. 218-222. 225.
 239. 283.
- Վարդանաշատ** 145.
- Վարձ** 569.
- Վերք** 18. 19. 35. 88. 95. 156. 159.
 174. 176. 177. 250. 255. 283.
- Վուրկ** 141.
- Վում Բ.** 12.
- Վումահան** 129.
- Վրէն** 186. 370.
- Վրկան** 267.
- Տաճատ արծրունի** 369.
- Տաճատ գնթունի** 185. 219. 225.
- Տաճատ Էպիսկոպոս** 49.
- Տաճկաստան** 19. 111.
- Տայոց ձորագաւառ** 239.
- Տայք** 49.
- Տաշրացի** 186. 370.
- Տարուբերան** 49.
- Տարօն** 49.
- Տեղբօն** 15.
- Տերան Բ.** 11.
- Տերոյ** 172.

- Տղմուտ** 219.
- Տմորիք** 176. 235. 258.
- Տրդատիոս** 152.
- Տրպատունիք** 186.
- Փայտակարան** 164. 178.
- Փանդուրակ** 68.
- Փապակ** 369.
- Փառախոտ** 145.
- Փասի** 177.
- Փարսման** 186. 370.
- Փենեկէզ** 202.
- Փիւքուն** 177.
- Փոսի** 177.
- Քաղզէացի** 25.
- Քաշկար** 559.
- Քաջալ** 245. 342.
- Քաջերունի** 186. 218. 225.
- Քասու** 49.
- Քողեանք** 186.
- Քուշանք** 16. 18. 21. 35. 89. 108. 267.
 268. 269.
- Օշական ամուր** 145.

1871
 1872
 1873
 1874
 1875
 1876
 1877
 1878
 1879
 1880
 1881
 1882
 1883
 1884
 1885
 1886
 1887
 1888
 1889
 1890
 1891
 1892
 1893
 1894
 1895
 1896
 1897
 1898
 1899
 1900

1871
 1872
 1873
 1874
 1875
 1876
 1877
 1878
 1879
 1880
 1881
 1882
 1883
 1884
 1885
 1886
 1887
 1888
 1889
 1890
 1891
 1892
 1893
 1894
 1895
 1896
 1897
 1898
 1899
 1900

0015810

2013

2009

« Ազգային գրադարան



NL0015810

